

কল্যাণী  
মহাশয়





# কথা শিল্পী শরৎ চন্দ্র

নারায়ণ চৌধুরী



এ. মুখার্জী অ্যান্ড কোম্পানী প্রাইভেট লিমিটেড  
২ বঙ্কিম চ্যাটার্জী স্ট্রীট, কলিকাতা-১২





## দ্বিতীয় সংস্করণের নিবেদন

‘কথামঞ্জী শরণচন্দ্র’ গ্রন্থের পরিবর্ধিত দ্বিতীয় সংস্করণ প্রকাশিত হলো। এক বছরের সামান্য কিছু বেশী সময়ের মধ্যে বইখানির সংস্করণান্তর প্রকাশ বইখানির জনপ্রিয়তার ইঙ্গিত করেছে। সংবাদ ও সাময়িক পত্রাদির মূল্যায়ণেও সমালোচকদের সমাদরের নিশানা মিলেছে। এইজন্য সংশ্লিষ্ট সকলের কাছেই আমি কৃতজ্ঞ।

এই সংস্করণে দশটি নূতন প্রবন্ধ যোগ করা হয়েছে। রচনাগুলি যথাক্রমে শিক্ষা ও সভ্যতা, নন্দন, পঞ্চায়ত, আলেখ্য, শিক্ষা ও সাহিত্য, চতুরঙ্গ, শিক্ষা ও সেবা, মাসিক বাংলাদেশ, ক্যালকাটা মিউনিসিপ্যাল গেজেট ও জয়ন্তী পত্রিকায় প্রকাশিত হয়েছিল। সে সব গ্রন্থাকারে প্রকাশের অনুমতি-দানের জন্য পত্রিকা সম্পাদকদের ধন্যবাদ।

গ্রন্থের স্থানে স্থানে হয়ত কিছু পুনরুক্তি চোখে পড়বে। এ বিষয়ে কৈফিয়ৎ এই যে, বিষয়ের প্রয়োজনেই এই পুনরুক্তিগুলি অপরিহার্য হয়েছে। কলেবর সংক্ষেপের উদ্দেশ্যে সেগুলি ছাঁটাই করা যেত কিন্তু তাতে বিভিন্ন শিরোনামের অধীনে সংগ্রহিত বিষয়বস্তুর বক্তব্য পরিস্ফুটিত হতো না। এই বিবেচনায় পাঠক তাদের প্রসন্নচিত্তে গ্রহণ করবেন বলে আশা করি।

প্রথম সংস্করণের মত এই সংস্করণটিও লোকসমাদৃত হলে শ্রম সার্থক জ্ঞান করবো।

গ্রন্থকার

লেখকের অন্যান্য গ্রন্থ

সঙ্গীত পরিক্রমা ( ২য় সংস্করণ )

আধুনিক সাহিত্যের মূল্যায়ন

সমকালীন সাহিত্য

সাহিত্য ও সমাজ মানস

কথাসাহিত্য

গান্ধীজি

আত্মদর্শন

‘অন্নমধুর

**Maharshi Devendranath Tagore**


**Saratchandra Chatterjee : Life and Literature ( মল্লহ )**

প্রভুতি

## সূচী

বিষয়	পৃষ্ঠা
১. উপক্রমণিকা—শরণ সাহিত্যের নব মূল্যায়ন	... ১
২. শিল্পী ব্যক্তিত্ব	... ১০
৩. স্টাইল	... ১৬
৪. সাহিত্য চিন্তা	... ২২
৫. সমাজ-চেতনা	... ৩৭
৬. ছোটগল্প	... ৫৪
৭. উপন্যাস	... ৬১
৮. নারীচরিত্র	... ৭৪
৯. চাষীচরিত্র	... ৮০
১০. রবীন্দ্রনাথ ও শরণচন্দ্র	... ৮৯
১১. রাজনৈতিক চিন্তা	... ৯৬
১২. শিল্পের জগৎ	... ১১১
১৩. পল্লীচিত্র	... ১২০
১৪. পতিতা চরিত্র	... ১২৯
১৫. দৈবতা—১	... ১৩৫
১৬. দৈবতা—২	... ১৪৪
১৭. ভাষাশিল্প	... ১৫৪
১৮. প্রবন্ধ সাহিত্য	... ১৭১
১৯. প্রতিভার রহস্য	... ১৮৩
২০. বৈদেশিক প্রভাব	... ১৯১
২১. উপসংহার	... ১৯৮





শরৎচন্দ্র চট্টোপাধ্যায়

জন্ম—১৮৭৬ খ্রীঃ

মৃত্যু—১৯৩৮ খ্রীঃ



## উপক্রমণিকা—শরৎ সাহিত্যের নবমূল্যায়ণ

অপরাজেয় কথাশিল্পী শরৎচন্দ্র চট্টোপাধ্যায় বাংলা সাহিত্যে এক আশ্চর্য প্রতিভা। এই প্রতিভার কোন দোসর খুঁজে পাওয়া যায় না বাংলা সাহিত্যের ইতিহাসে তাঁর আগে ও পরে। বঙ্কিমচন্দ্র ও রবীন্দ্রনাথ অবশ্যই শরৎচন্দ্র অপেক্ষা অনেক বহুবিস্তারী প্রতিভাসম্পন্ন লেখক, তাঁরা দু'জন রসসৃষ্টিতে যেমন অনন্য তেমনি মনীষা ও বৈদম্ব্যের ক্ষেত্রে বিচিত্রপথসন্ধানী জিজ্ঞাসায় ভরপুর ; পক্ষান্তরে শরৎচন্দ্রের পর কথাসাহিত্যে কেউ কেউ এসেছেন যাঁরা শরৎচন্দ্রের তুল্য প্রতিভার অধিকারী না হলেও বাংলা সাহিত্যের দিগন্তকে দৃষ্টিগ্রাহ্যভাবে সম্প্রসারিত করেছেন। যেমন বিভূতিভূষণ বাংলা উপন্যাসে একটি নূতন আয়তন যোগ করেছেন—প্রকৃতিপ্রেম ; তারাক্ষর বকমারি চরিত্রের স্রষ্টা ; মানিক বন্দ্যোপাধ্যায় বাংলার সমাজ-স্থিতির সবচেয়ে সূক্ষ্ম পর্যবেক্ষক লেখক ও বাস্তবতার সর্বাগ্রগণ্য শিল্পী। কিন্তু যেখানে শরৎচন্দ্র তুলনারহিত এবং পূর্বপর সকল দৃষ্টান্তের উর্ধ্বে স্থিত, সে হলো কথাসাহিত্যের মনোহারিত্বের ক্ষেত্র। এমন মনোহারী ও লোকপ্রিয় গল্প-উপন্যাস আর কেউ সৃষ্টি করে যেতে পারেননি বাংলা ভাষায়। শরৎচন্দ্রকে বাংলার পাঠক সম্প্রদায় ‘অপরাজেয়’ আখ্যায় ভূষিত করেছেন। অভিধাটি অকারণ নয়। বঙ্কিমচন্দ্র ও রবীন্দ্রনাথ তাঁদের অপরিমীম সৃষ্টিকুশলতার দ্বারা বাংলা সাহিত্যের বিস্তৃত ক্ষেত্র জুড়ে রয়েছেন ; কিন্তু কথাসাহিত্যের সীমিত ক্ষেত্রে এলে দেখতে পাই, শরৎচন্দ্র তাঁর লেখার জগতে বাংলার পাঠকচিত্তকে যেরূপ গভীরভাবে সম্মোহিত করেছেন এমন ওই দুই অগ্রগামী ও দিকপাল লেখকের পক্ষেও সম্ভব হয়নি। মনোজ্ঞতার শিল্পে শরৎচন্দ্র অপ্রতিদ্বন্দ্বী।

মনোজ্ঞতা তথা লোকপ্রিয়তার শিল্পকে স্বভাবতই নিয়ন্ত্রণের শিল্প জ্ঞান করার একটা সহজ প্রবণতা আমাদের সকলেরই মধ্যে কম-বেশী রয়েছে। বিশেষ বিশেষ লেখকের বেলায় এ কথা সত্য হতে পারে কিন্তু শরৎচন্দ্রের বেলায় এ কথা আদৌ সত্য নয়। লোকপ্রিয়তার নজিরে শরৎচন্দ্রকে খাটো করে দেখবার উপায় নেই, কেননা শরৎচন্দ্র নিছক লোকপ্রিয় শিল্পীই নন,

আরও অনেক কিছু। তাঁর সে সব বৈশিষ্ট্যের বিশ্লেষণ এই প্রবন্ধেই আমরা কতক পরিমাণে করবার চেষ্টা করবো, তবে গোড়াতেই যে-কথাটা বিশেষভাবে চিহ্নিত হওয়া দরকার তা হলো, তাঁর মত জনপ্রিয় শিল্পী আজ পর্যন্ত বাংলার কথাসাহিত্যের আসরে দ্বিতীয় আবির্ভূত হয়নি। বাংলার পাঠকপাঠিকার হৃদয়াসনে সুদৃঢ় অধিকার স্থাপনায় শরৎচন্দ্রের কৃতিত্ব অবিসম্বাদী ও সর্বাধিক।

কোন গুণে শরৎচন্দ্র এই অসম্ভব জনপ্রিয়তা অর্জন করেছিলেন? সে এইজন্য যে, তিনি তাঁর গল্প-উপন্যাসে কেবলমাত্র মানুষের উপরই তাঁর সকল মনোযোগ সংহত করেছিলেন—মানুষ-বাতিরিক্ত কোন অবাস্তব প্রসঙ্গের উত্থাপনায় সময় ও উদ্যম ক্ষেপ করেননি। মানুষ ও মানুষের হৃদয় এই ছিল তাঁর একান্ত অনুসন্ধানের ক্ষেত্র। মানুষ যে-পারিপাশ্বিক আবেষ্টনীতে বাস করে সেই পারিপাশ্বিকের উন্মোচনে তাঁর তাদৃশ উৎসাহ দেখা যায়নি, নিসর্গের রূপ বর্ণনায় তাঁর সামান্যই অনুরাগ পরিলক্ষিত হয়েছে; এমনকি যে মানুষ বা মানুষী তাঁর মুখ্যমনোযোগের বস্তু, তার দৈহিক রূপসৌন্দর্য বর্ণনায়ও তিনি পাতার পর পাতা ভরাতে যাননি বঙ্কিমচন্দ্রের কিংবা অন্তঃকরণ-একজন অগ্রগণ্য লেখকের ধরনে। তাঁর একমাত্র চিত্রিতব্য বিষয় ছিল মানুষ ও তার মন। চরিত্রসমূহের অন্তর্দ্বন্দ্বের বিশ্লেষণে তিনি বিশেষ আনন্দ পেতেন। তবে সেখানেও কথা আছে। মানিক বন্দ্যোপাধ্যায়ের মত জটিল কুটিল মনের বিশ্লেষণের দিকে তাঁর ঝোঁক ছিল না; সমাজের প্রচলিত অনুশাসন বা সংস্কারের সঙ্গে অন্তরের সহজ প্রবৃত্তির যে-সংঘাত, সেই সংঘাতজনিত আলো-ডনের ছবি ফুটিয়ে তোলাতেই ছিল তাঁর শিল্পিমনের সমধিক স্মৃতি। শরৎচন্দ্র তাঁর বর্ণিত চরিত্রগুলির আবেগজীবনের রূপায়ণে সিদ্ধহস্ত ছিলেন। বাঙালী যে অত্যন্ত ভাবাবেগপরায়ণ জাতি সেটা শরৎচন্দ্রের লেখা পড়লে যত সুনিশ্চিত-ভাবে উপলব্ধি করা যায় এমন বোধকরি আর কারও লেখা থেকে যায় না। অচরিতার্থ প্রেম, সমাজ নিষিদ্ধ অথচ তৎসত্ত্বেও অদম্য ভালবাসার আবেগ, বধ্যভূমির বেদনা তথা মাতৃহত্যার ক্ষুধা, সন্তানবাৎসল্য, ভ্রাতৃস্নেহ, নারীর সেবাপরায়ণতা, বিদ্রোহের তেজ প্রভৃতি কতকগুলি বিশেষ বিশেষ ভাবাবেগকে শরৎচন্দ্র অতিশয় চমৎকার শিল্পরূপ দান করেছেন। বাংলার সমাজজীবন, বিশেষ, পল্লী-সমাজজীবনের চিত্ররূপ উপস্থিত করতে গিয়ে দুটি কাজ তিনি বিধিমতে নিষ্পন্ন করেছেন। এক, বাংলার পল্লীবাসী সাধারণ নর-নারীর স্বভাব-বৈশিষ্ট্যের উদ্ঘাটন; দুই, বাংলার সমাজে প্রচলিত



একাধিক গতানুগতিক : ব্যবোধকে সঙ্গেরে আঘাত হানা। অর্থাৎ, তাঁর লেখনী বাস্তবতা ও আদর্শবাদ—এই দুই খাতেই যুগপৎ প্রবাহিত হয়েছে। বাঙালী চরিত্রের মানসিক গঠন বৈশিষ্ট্য ও স্বভাবের ধাতু বিশ্লেষণ করে তিনি তার কতকগুলি অনুচিত সংস্কারকে চূড়ান্ত রকমের সমালোচনা করেছেন। বাঙালীর অগুরে তিনি বিদ্রোহের আগুন পূবে দিয়েছেন। এইখানেই তাঁর শিল্পসৃষ্টির সার্থকতা।

তবে ক্ষেত্র বিশেষে রক্ষণশীলতাব অনুকূলেও শরৎচন্দ্র তাঁর অমিত লেখনীর শক্তি প্রয়োগ করেছিলেন। শিল্পী-মনের প্রবণতা অনুযায়ী কখনও প্রগতি-শীলতা কখনও রক্ষণশীলতা এই দুই খাতেই তাঁর লেখনীর আবেগ চালিত হয়েছে। আমরা যথাস্থানে এ বিষয়টির আরও বিস্তারিত আলোচনা কববো।

শরৎচন্দ্রের শিল্পের সার্থকতা বিধানের ভাষা একটি প্রধান সহায় হয়েছে। এমন মনোমুগ্ধকর ভাষা বাংলার খুব কম লেখকেরই লেখনীমুখে নিসৃত হয়েছে। শুধু ভাষা বললে কমই বলা হয়, বলতে হয় তাঁর স্টাইল, ভাষার মধ্য দিয়ে প্রতিফলিত তাঁর ব্যক্তিত্বের বিচ্ছুরণ। শব্দ সম্পদ, শব্দ প্রয়োগের বৈশিষ্ট্য, বাক্যগঠনের রীতি, চিন্তার ছাঁচ, বক্তব্য প্রকাশের ভঙ্গী সব জড়িয়ে এবং সে সবকেও ছাড়িয়ে তাঁর এই স্টাইল। স্টাইলের জাহ্নতে শরৎচন্দ্র বাঙালীর চিত্র হরণ করেছেন। শ্রীমতী রাধারানী দেবীকে লিখিত এক পত্রে শরৎচন্দ্র পিনয় করে অবস্থা বলেছেন যে, “ভাষার ওপরে দখল আমাব চিরদিনই কম; শব্দসম্পদ যে কত সামান্য এ সংবাদ আর যার কাছেই লুকোনো থাক, তোমাদের কাছে থাকবাব কথা নয়।” কিন্তু এই বিবৃতিকে সত্য বলে গ্রহণ করবার হেতু নেই। আর যদি সত্য বলে গৃহীত হয়ও সেক্ষেত্রেও বলবার কথা এই যে, ওই যে তিনি শব্দ সম্পদের “সামান্যতা” নিয়ে কুণ্ঠা প্রকাশ করেছেন ওর মধ্যেই রয়েছে তাঁর ভাষার যথার্থ শক্তি। নিসর্গবর্ণনা, প্রতিবেশচিহ্ন, বর্ণিত চরিত্রসমূহের দেহ সৌষ্ঠবের খুঁটিনাটি বিশ্লেষণ এ সমস্ত বিষয়ের বিবরণ দানে তিনি তাঁর মনোযোগ ক্ষেপ করেননি বলেই তাঁর শব্দ-সম্পদ স্বতঃই ‘সামান্য’ রয়ে গেছে। শ্রীকান্ত উপন্যাসের প্রথম পর্বের প্রারম্ভিক অনুচ্ছেদে তিনি তাঁর কবিত্বশক্তির ন্যূনতা নিয়ে যে আক্ষেপোক্তি করেছেন সেটা আসলে আক্ষেপোক্তি নয়, সেটা তাঁর আত্মশক্তিতে বিশ্বাসেরই এক ধরনের প্রকাশ। আত্মশক্তিকে এখানে ভাষার শক্তি বলে বুঝতে হবে। ফলতঃ শব্দসম্পদের বিশালতা বা বিস্তারের মধ্যে তো শিল্পীর চাতুর্য নিহিত

থাকে না, শিল্পীর চাতুর্য নিহিত থাকে যে সমস্ত শব্দ নিয়ে শিল্পীর সচরাচর কারবার সেই সমস্ত শব্দ সাজাবার কায়দার মধ্যে এবং কোথায় কোন্ শব্দের উপর কোঁক আরোপ করতে হবে তার ভঙ্গীর মধ্যে।

এই মানদণ্ডে বিচার করলে শরৎচন্দ্রের ভাষার কি কোন তুলনা হয়? শরৎচন্দ্রের যে কোন উপন্যাসের যে কোন পরিচ্ছেদের বর্ণনাংশের যে কোন পাঁচ-ছয় লাইন পর পর তুলে আভ্যন্তর পাঠের রীতিতে বিচার করলেই বুঝতে পারা যাবে তাঁর শব্দপ্রয়োগের বৈশিষ্ট্য, শব্দের ওজন ও সংযম, অর্থের রীতি, অভীক্ষিত অর্থের স্পষ্টতা ও লক্ষ্যবেধিতা। এই থেকে আরও একটা কথা যা মনে আসে তা হলো এই, শরৎচন্দ্র মূলতঃ পল্লীভিত্তিক লেখক হলেও তাঁর ভাষাশিল্প ছিল দরবারী গুণযুক্ত অর্থাৎ নাগরিক। নাগরিক বৈদগ্ধ্যের সুবাসে তাঁর স্টাইল ভরপুর। ভাস্করসুলভ নিপুণতায় পাথর কেটে কেটে মাপজোপ করে বসানোর মত তিনি প্রতিটি শব্দ মেপে মেপে ওজন করে বসাতেন। শব্দগুলির উচ্চারণগত ধ্বনি এবং পাঠকের মনের উপর সেই ধ্বনির সম্ভাবিত প্রতিক্রিয়া খুঁটিয়ে বিচার করে দেখে তবে তিনি শব্দ ব্যবহার করতেন। এই প্রক্রিয়া ভাষাশিল্পের একান্তই নাগরিক প্রক্রিয়া। মননশীলতা এর পরতে পরতে বিধৃত। যাকে বলে ‘অশিক্ষিতপটু’ কিংবা দৈবানুগ্রহপুষ্ট শিল্পশক্তি, তার সঙ্গে এর সম্পর্ক নেই—এ সম্পূর্ণই সচেতন মনের এক শিল্প। অনুশীলন ভিন্ন এ শিল্প আয়ত্ত হয় না, পরিমার্জনা ভিন্ন এ শিল্পের সৌন্দর্য্য পরিস্ফুট হয় না।

শরৎচন্দ্র যে কতবড় ভাষাশিল্পী ছিলেন তার যথাযথ মূল্যায়ণ এখনও হয়নি। হলে দেখা যাবে তিনি এই ক্ষেত্রে তাঁর পূর্ববর্তী ও পরবর্তী বহু লেখককেই নিম্প্রভ করে দিয়েছেন। ভাষার অসাধারণ চিত্তাকর্ষক ক্ষমতা তাঁর হাতে বাঙালী পাঠকের অন্তরে প্রবেশের আসল চাবিকাঠিটি তুলে দিয়েছে। আর বাঙালী পাঠকও যে তাঁকে তাঁদের অন্তরে অবিচলিত আসন দান করেছেন তা প্রথমতঃ ও প্রধানতঃ এই ভাষার গুণে প্রভাবিত হয়ে। প্রভাবক্রিয়াটা কখনও সজাগ স্তরের, কখনও অজাগ। বোধহয় খতিয়ে দেখলে অজাগ অংশই বেশী। বাঙালী পাঠক তাঁদের অজান্তে অথবা অর্ধজ্ঞাতসারে শরৎ-সাহিত্যের ঐকান্তিক ভক্তে পরিণত হয়েছেন।

শরৎচন্দ্রের রচনারীতি থেকে এইবারে শরৎচন্দ্রের রচনার বিষয়ের দিকে দৃষ্টি ফেরানো যাক কিয়ৎ পরিমাণে।

সকলেই জানেন শরৎচন্দ্র পুরুষচরিত্র অপেক্ষা নারীচরিত্র অঙ্কনে সমধিক পারদর্শিতা প্রদর্শন করেছেন। নারীচরিত্রগুলির বৈশিষ্ট্য পরিস্ফুট করতে গিয়ে তিনি যেন তাঁর অন্তরের সমস্ত দরদ ঢেলে দিয়েছেন। শুধু যে পল্লী বাংলার মধ্যবিত্ত আর নিম্নবিত্ত স্তরের সাধারণ সতীসাক্ষী পতিগতপ্রাণা গৃহবধূ, বালবিধবা, অরক্ষণীয়া অনূঢ়া কন্যা, প্রৌঢ়া জননী প্রভৃতি নানান ধরনের নারী-চিত্রই তাঁর বর্ণিতব্য বিষয়ের অন্তর্ভুক্ত হয়েছে তা-ই নয়; সমাজ-পৈঠার বহির্ভূত সাধারণের অবজ্ঞাত তথাকথিত পতিতা ও ভ্রষ্টাদের উপরও তিনি তাঁর শিল্পদৃষ্টির মমত্ব অর্পণ করেছেন পরম উদার্যে। তাদের বহিঃস্থ ক্রোদাত্ত জীবনের অন্তরালস্থিত সহজাত নারীত্বের মহিমাকে রূপায়িত করেছেন একান্ত সত্য। এইজন্য তাঁকে সমাজের রক্ষণশীল অংশ থেকে কম নিন্দাবাদ সহ্য করতে হয়নি কিন্তু সমস্ত কটু সমালোচনার ঞ্জকুটি অগ্রাহ্য করে তিনি তাঁর মানবিকতার অবস্থানে অবিচলিত থেকেছেন। মানুষের স্থলন-পতনকে অতিক্রম করেও যে তার অন্তর্নিহিত মানব-মহিমা অজেয় থাকে এই ভাবটিকে তিনি বারবার তাঁর পাঠকের মনোযোগের সামনে তুলে ধরেছেন অকম্পিত হস্তে। সাবিত্রী, রাজলক্ষ্মী, চন্দ্রমুখী, বিজলী প্রভৃতি চরিত্র এই মন্তব্যের প্রমাণ।

পক্ষান্তরে, পতিপ্রাণা সতী-সাক্ষী নারীর আদর্শ তুলে ধরেছেন বিরাজ-বৌ (বিরাজ-বৌ), মুরবালা (চরিত্রহীন), সরযু (চন্দ্রনাথ), অননাদাদি (শ্রীকান্ত), ষোড়শী (দেনা-পাওনা), প্রভৃতি চরিত্রের মধ্য দিয়ে। স্বশুরকুল কর্তৃক প্রত্যাখ্যাতা আত্মমর্যাদাদুগ্ধা নারীর মহিমা ফুটিয়েছেন পণ্ডিতমশাই উপন্যাসের কুসুম চরিত্রের মধ্য দিয়ে। পল্লীসমাজের রমা বৈধবোর অভিষাপদীর্ণা ও কৃত্রিম সামাজিক মূল্যবোধের সঙ্গে বাল্যপ্রণয়ের স্মৃতির নিরন্তর সংঘাতে ক্ষতবিক্ষত-হৃদয়া নারীর এক বেদনাকরুণ উদাহরণ। বিন্দুর ছেলের বিন্দু আর রামের সুমতির নারায়ণী, বড়দিদির মাধবী আর মেজদিদির হেমাঙ্গিনীর মধ্যে প্রকাশ পেয়েছে স্নেহবাৎসল্যের এক অপরূপ স্নিগ্ধতার আলেখ্য। অরক্ষণীয়ার পোড়াকাঠ ভামিনীর চরিত্রে রূপ পেয়েছে কোন কোন নারীর আপাত-রক্ষতার খোলসের অন্তরালে যে স্নেহের ফল্গুধারা বহমান থাকে তার হৃতির ওজ্জ্বল্য। পল্লীসমাজের জ্যেষ্ঠাইমা চরিত্রে পাই প্রৌঢ়া জননীর বিচক্ষণ সংসারবুদ্ধি ও ন্যায়ের প্রতি পক্ষপাত।

কিন্তু এসব কমবেশী বাঙালী সংসারের পরিচিত কাঠামোর চিরাভাস্ত নারীরূপের ছবি। শরৎচন্দ্রের নারীচরিত্রের মিছিল ওইখানেই শেষ হয়ে যায়নি। তিনি কতকগুলি বিদ্রোহী চরিত্রও সৃষ্টি করেছেন। যেমন, অভয়া (শ্রীকান্ত ২য় পর্ব), সুনন্দা (শ্রীকান্ত ৩য় পর্ব), কিরণময়ী (চরিত্রহীন), কমল (শেষ প্রশ্ন) প্রভৃতি। অভয়া নিরুদ্দেশ স্বামীর সন্ধানে প্রতিবেশী যুবক রোহিণীকে সঙ্গে করে বর্মা মূলুকে এসেছিল। স্বামীর খোঁজ সে পেয়েছিল কিন্তু তার কদর্য জীবনযাত্রা ও ততোধিক বিকৃত রুচির পরিচয় পেয়ে স্বামীর সঙ্গে একত্র ঘর করার ইচ্ছা তার উবে যায়। ইতিমধ্যে রোহিণী তাকে মনে মনে ভালবাসে। রোহিণীর প্রেমকে মর্যাদা দিয়ে অভয়া তারই সঙ্গে ঘর বাঁধে ও স্বামী-স্ত্রী রূপে বাস করতে থাকে। অত্যন্ত বলিষ্ঠ ও সাহসিক চরিত্র এই অভয়া। আমাদের পুরুষ শাসিত সমাজের পুরুষের স্বার্থানুকূল একতরফা অনুশাসনাদির বিরুদ্ধে অভয়া এক মূর্তিমর্তী বিদ্রোহিনী নারী। পুরুষ দাম্পত্যজীবনের পবিত্রতাকে নষ্ট করে কদাচারী হলে তার কোন সাজা নেই, নারী একটু বেচাল হলেই তার উপর সমাজের রোষ বজ্রাগ্নির মত নেমে আসে—এই নিত্যন্ত অগাধ্য সংস্কারটাকেই আঘাত করতে চেয়েছে অভয়া তার ভয়শূন্য আচরণের মধ্য দিয়ে। অভয়ার তুলা নির্ভীক দ্বিতীয় আর একটি চরিত্র নেই গোটা শরৎ সাহিত্যের বিস্তৃত আয়তনের ভিতর। শরৎচন্দ্র প্রয়োজনবোধে কতখানি বিপ্লবী হতে পারেন তার দৃষ্টান্ত রেখেছেন অভয়া চরিত্রের মধ্যে।

শ্রীকান্ত তৃতীয় পর্বের সুনন্দাও একটি বিদ্রোহিনী চরিত্র। তবে তার বিদ্রোহের জাত আলাদা, বিদ্রোহের কারণ ভিন্ন। জৈব জীবনের সমস্যাটির সঙ্গে সে-বিদ্রোহের কোন সম্পর্ক নেই। সুনন্দা শাস্ত্রজ্ঞ ব্রাহ্মণ পরিবারের কন্যা, বধু হয়ে শ্বশুরগৃহে আসার পর শ্বশুরকুলের সকলের স্নেহ ও আদরে বেশ সুখেই তার দিন কাটছিল, কিন্তু একটি অগা্যের প্রতিবিধানে তেজস্বিনী প্রতিবাদিনীর ভূমিকা গ্রহণ করে সে আশ্চর্য চরিত্র-মহিমার পরিচয় দিলে। কোন একটি ঘটনায় যেদিন সে জানতে পারল তার ভাগুরের অর্জিত সম্পত্তির একটা অংশ এক অনাথিনী তাঁতি-বোঁ ও তার শিশুপুত্রকে ঠকিয়ে কৌশলে কেনা সম্পত্তি, সেদিন সে মুহূর্তমাত্রেরও দ্বিধা না করে স্বামী-পুত্রের হাত ধরে শ্বশুরের ভিটা ত্যাগ করে এক পোড়ো বাড়িতে এসে ঠাঁই নিলে এবং জ্যেষ্ঠা ভাতৃজায়ার শত উপরোধেও আর প্রাচুর্যের সংসারে ফিরে গেল

না। অগ্নায়কে রুখতে গিয়ে স্বেচ্ছায় দারিদ্র্য বরণের এই গৌরবজনক ঘটনা আরও মহিমাম্বিত হয়েছে এই কারণে যে, এই ক্ষেত্রে অগ্নায়-অসহিষ্ণুতা এসেছে এক গ্রাম্য নারীর কাছ থেকে, যে শ্রেণীর নারী জমিজমার সংক্রান্ত বৈষয়িক ব্যাপারে পুরুষের প্রশ্নহীন আনুগত্য স্বীকার করে নিতেই সচরাচর অভ্যস্ত। কিন্তু সুনন্দার তেজটুকু এসেছে কোথা থেকে তা বুঝতে অসুবিধা হয় না। তার তেজের উৎস হলো তার সন্ন্যাসীকল্প শাস্ত্রজ্ঞ পিতার শিক্ষা, যে-শিক্ষায় ধর্মকে সব-কিছুর উর্ধ্ব স্থান দেওয়া হয়েছে। বাংলার অজ-পাড়াগাঁর অভ্যন্তরেও যে এমন মহীয়সী চরিত্র থাকতে পারে সেটটা একটা শুভলক্ষণ ও সর্ববিধ প্রতিকূলতা অগ্রাহ্য করেও বাঙালী জাতির টিকে থাকার পক্ষে একটা মস্ত যুক্তি।

শরৎচন্দ্রের অনেক চরিত্রই বাস্তবের আদল থেকে নেওয়া। এই চরিত্রটির কোন বাস্তব ভিত্তি আছে কিনা বলা যায় না, তবে এটি যদি কল্পিত চরিত্রও হয় তাহলেও তার মূল্য কমে না। চরিত্রটির সম্ভাব্যতা তথা প্রতীতি-যোগ্যতার মধ্যেই তার শক্তি নিহিত।

কিরণময়ী একটি অত্যাশ্চর্য চরিত্র। এমন বুদ্ধিদীপ্ত সপ্রতিভ সর্বসংস্কার-মুক্ত সনাতন শাস্ত্র শাসনের বিরুদ্ধে বিদ্রোহিনী নারী বোধকরি শেষ প্রশ্নের কমলও নয়। কমলের সঙ্গে কিরণময়ীর মূলগত পার্থক্য এখানে যে, কমল মুখে সনাতন ভারতীয় ধর্ম ও সংস্কৃতির মূল্যবোধগুলির বিরুদ্ধে বিদ্রোহ ঘোষণা করলেও আচরণে ভারতীয় নারীর স্বভাবগত সংযমে রূঢ়। সে একাদশী তিথিতে হবিষ্যন্ন করে, প্রায়ই আলু-ভাতে ভাত ফুটিয়ে খায়, কঠোর নিয়ম-শাসনে বদ্ধ তার জীবন। কিরণময়ীর ওসব বালাই নেই। সে যা বিশ্বাস করে তা-ই করে। সে ঈশ্বর মানে না, শাস্ত্রের পবিত্রতায় বিশ্বাস করে না, ভোগবাসনাবশ্বিত রিক্ত নারীজীবনে স্বামী বর্তমানেই অনঙ্গ ডাক্তারের সঙ্গে অনুচিত সম্বন্ধ পাতে। প্রতিহিংসার ভাঙনায় পত্নীপ্রেমে মাতোয়ারা এবং তার প্রতি উদাসীন উপেক্ষাকে জব্দ করবার মতলবে তার অনভিজ্ঞ ভাই দিবাকরকে প্রলুব্ধ করে বর্মা মুল্লুকে তাকে ভাগিয়ে নিয়ে যায়। কিন্তু এ স্বৈরাচার অশিক্ষিতা নারীর স্বৈরাচার নয়, এর পিছনে আছে বুদ্ধি দিয়ে আচরণকে সমর্থন করবার প্রথর মননশীলতা। শাস্ত্র পড়েই সে শাস্ত্রকে অস্বীকার করতে শিখেছে। স্বামী বেঁচে থাকতে স্বামীর সহায়তায় সে শাস্ত্র-গ্রন্থগুলি তন্ন তন্ন করে খেঁটেছে, তার ফলে শাস্ত্রনির্মাতা পুরুষদের কাপটা

আর ৬গামিটাই শুধু তার চোখে বড় হয়ে দেখা দিয়েছে, শাস্ত্রবাক্যে বিশ্বাস স্থাপনের কোন কারণ সে খুঁজে পায়নি।

কিন্তু এমন যে সুতীক্ষ্ণবুদ্ধিশালিনী কিরণময়ী, সে কিন্তু শেষ রক্ষা করতে পারল না। বুদ্ধি আর প্রবৃত্তির দ্বন্দ্ব বিপর্যস্ত হয়ে সে শেষ পর্যন্ত পাগল হয়ে গেল। শরৎচন্দ্র শেষ অবধি ঠাকে পাগল বানালেন কেন? তিনি কি কিরণময়ীকে তার বিশ্বাসে বিজয়িনী রেখে চরিত্রহীন উপন্যাসের অগ্নিবিশ উপসংহার করতে পারতেন না? এইখানেই ধাঁধা, আর এই ধাঁধার উন্মোচন-চেষ্টার মধ্যেই আমরা শরৎচন্দ্রের ব্যক্তিত্বের দ্বৈধতার পরিচয় পেতে পারি।

আমার মনে হয় শরৎচন্দ্র একই কালে একজন প্রথম শ্রেণীর বিদ্রোহী লেখক ও রক্ষণশীল প্রকৃতির মানুষ ছিলেন। তাঁর রক্ষণশীলতা এসেছিল তাঁর রাষ্ট্রদেশীয় কুলীন ব্রাহ্মণের মজ্জাগত ব্রাহ্মণ্য সংস্কার থেকে; আর বিদ্রোহের প্রেরণা তিনি পেয়েছিলেন তাঁর বাউণ্ডলে ভ্রাম্যমাণ ভবঘুরে জীবনযাত্রার ছক থেকে। কৌলিক সংস্কারে তিনি রক্ষণশীল, আর জীবনচরণে তিনি বিদ্রোহী, বিপ্লবী। এই দুই প্রবৃত্তির দ্বন্দ্ব-সংঘাতে কখনও রক্ষণশীল সত্তা জয়ী হয়েছে, কখনও বিদ্রোহী সত্তা। আলোচ্য ক্ষেত্রে, অর্থাৎ কিরণময়ীর পরিণাম চিত্রণে, শরৎচন্দ্র রক্ষণশীলতার কাছে আত্মসমর্পণ করেছেন। খুব সম্ভব নিত্য ইচ্ছার বিরুদ্ধেই এ কাজ তিনি করেছেন। তাঁর সামনে দুটি দৃষ্টান্ত এ ব্যাপারে পূর্ব-উদাহরণের কাজ করেছে—বঙ্কিমচন্দ্রের বিষবৃক্ষ উপন্যাসের অন্তিম কুন্দনন্দিনীর বিয়পানে আত্মহত্যা ও কৃষ্ণকান্তের উইলার শেষে রিভলভারের গুলিতে দ্বৈরিণী বিধবা রোহিণীর হত্যা। শরৎচন্দ্র অবশ্য আত্মহত্যা বা হত্যার পথে যাননি, মস্তিষ্কবিকৃতির পথে কিরণময়ীর ‘উন্মার্গ-গামিতার’ শাস্তিবিধান করেছেন। কিন্তু ফল একই দাঁড়িয়েছে। আত্মহত্যা বা হত্যা জনিত মৃত্যুই হোক আর উন্মাদাবস্থাই হোক, লৌকিক বিচারে দুই ধরনের অবস্থাই মৃত্যুর সামিল।

পূর্বসূরীর দৃষ্টান্ত ছাড়াও এ ব্যাপারে কিছু বস্তুগত কারণ শরৎচন্দ্রকে রক্ষণশীলতার অনুকূলে প্রভাবিত করে থাকবে। শরৎচন্দ্রের চিঠিপত্র থেকে তার কতকটা আঁচ করা যায়। চরিত্রহীন ‘ভারতবর্ষ’ মাসিকে ধারাবাহিকভাবে প্রকাশিত হওয়ার কথা ছিল কিন্তু ভারতবর্ষ মাসিকের পরিচালকবৃন্দ উপন্যাসটি immoral বলে মত প্রকাশ করেন ও পাণ্ডুলিপি ফেরত দেন। স্বভাবতঃই শরৎচন্দ্র এতে অত্যন্ত ক্ষুব্ধ হন। তিনি তাঁর বাল্যবন্ধু প্রমথনাথ

ভট্টাচার্যকে ( প্রমথবাবু ভারতবর্ষ পরিচালনার সঙ্গে যুক্ত ছিলেন ) লিখিত এক চিঠিতে নিতান্ত আশ্চর্যের সুরে জানান, বইখানাকে immoral বলায় ভারতবর্ষের পরিচালকদের গোঁড়ামিই শুধু প্রকাশ পেয়েছে, সাহিত্যবুদ্ধি প্রকাশ পায়নি।

সে যাই হোক, তাঁদের যখন সকলেরই এত আপত্তি, সেইজন্য “যাতে এটা in strictest sense moral হয় তাই উপসংহাব করিব।” ( শরণ-সাহিত্য-সংগ্রহ, দ্বাদশ সম্ভার, পত্র-সংকলন, পৃ. ৩৬৩ )।

তারই ফলে কিরণময়ী চরিত্রের এবং বিধ পরিণতি। পরিণতিটি স্বাধীন ইচ্ছা প্রসূত নয়, অভিমান প্রসূত। তবে অযৌক্তিক মনে হয় না। বিদ্রোহের আবেশ এবং রক্ষণশীলতার সংকোচনী প্রকৃতির মধ্যে নিরন্তর দ্বন্দ্বের ফলে কিরণময়ী চরিত্রে যে tension-এর সৃষ্টি হয়েছিল তাব পরিণামে কিরণময়ীর পাগল হয়ে যাওয়া কিছু বেমানান নয়। একপ ক্ষেত্রে এই রকম হওয়াই সম্ভব।

## শিল্পী ব্যক্তিত্ব

অপরাজেয় কথাশিল্পী শরৎচন্দ্রের জন্মের একশত বৎসর পূর্তি উপলক্ষে এখন থেকেই এই অসামান্য লোকপ্রিয় সাহিত্যিকের শতবর্ষ উৎসব উদ্‌যাপনার প্রস্তুতি শুরু হয়ে গিয়েছে। সরকারী-বেসরকারী উভয় স্তরেই এরূপ প্রস্তুতির কর্মতৎপরতা লক্ষ্য করা যাচ্ছে। পশ্চিমবঙ্গ সরকারের তরফে জানানো হয়েছে তাঁরা এই উপলক্ষে শরৎচন্দ্রের সমগ্র রচনাবলী সুলভে প্রচারের ব্যবস্থা করবেন। পক্ষান্তরে বেসরকারী উদ্যোগ-অনুষ্ঠানের মুখপাত্ররূপে শরৎ সমিতি বাঙালীর চিত্তজয়ী এই অসাধারণ প্রতিভাসম্পন্ন লেখকের স্মৃতি ফলপ্রদভাবে লোকমনে গ্রথিত করে দেওয়ার নানাবিধ উপায়ের কথা ভাবছেন। এই উদ্দেশ্যে তাঁরা একাধিক প্রস্তাব ও পবিকল্পনা রচনা করেছেন। তাঁরাও সুলভ মূল্যে শরৎ গ্রন্থাবলী প্রচারের দায়িত্ব গ্রহণ করেছেন। এ সবই শুভ উদ্যোগ সন্দেহ নাই। পরিকল্পনাগুলি সাফল্যমণ্ডিত হলে কিছু কাজের মত কাজ হবে।

শরৎচন্দ্রের জন্মশতবর্ষ অনুষ্ঠানের প্রাক্-মুহূর্তে এই বিশিষ্ট কথাকারের শিল্পমানসের বৈশিষ্ট্য, লেখক-চরিত্র, অগাধ রচনাকারদের থেকে কোথায় এই লেখকের রচনার স্বাভাব্য প্রভৃতি নিয়ে কিছুটা চিন্তাচর্চা করলে মন্দ হয় না। শরৎচন্দ্রকে আমরা ‘অপরাজেয় কথাশিল্পী’ এই সম্মাননা পূর্ণ অভিধায় ভূষিত করেছি। কিন্তু কেন এই শিল্পী ‘অপরাজেয়’, কোন্‌ গুণে তাঁর উপন্যাস ও ছোটগল্প অন্য সব লেখকের রচনাকে ডিঙিয়ে বাঙালী পাঠক-পাঠিকার চিত্তমধ্যে অপ্রতিহত প্রবেশাধিকার লাভ করেছে ও সেখানে স্থায়ী আসন দখল করেছে, তাঁর লেখার জাহ্ন কোথায় ও কিসে নিহিত—ওই সমস্ত প্রশ্নের উত্তর এক কথায় দেওয়া চলে না। তা একটু ব্যাখ্যা-বিশ্লেষণের অপেক্ষা রাখো। নীচে সে রকম চেষ্টাই খানিকটা করব।

আমার মনে হয় শরৎচন্দ্র খাঁটি অর্থে একজন জাত-শিল্পী আর তাঁর এই বৈশিষ্ট্যের মধ্যেই তাঁর রচনার অপরাজেয়তার সংকেত নিহিত। আমাদের দেশে অবসরভোগী জমিদার, অনর্জিত সম্পদের অগায়ভোগদখলকারী



অভিজাত শ্রেণীর গৃহস্থে মানুষ, কিংবা চাকুরিজীবী অথবা বৃত্তিজীবী মধ্যবিত্ত ভদ্রলোক সম্প্রদায়ের মানুষদের মধ্য থেকেই সাধারণতঃ সাহিত্যিকেরা বেরিয়ে আসেন। বেশীরভাগ লেখকেরই গোত্র-লক্ষণ মেলাতে গেলে দেখা যাবে পূর্বোক্ত তিন গোত্রের কোন না কোন গোত্রের আওতার মধ্যে তাঁরা পড়েন। প্রায়শঃ মধ্যবিত্ত ভদ্রলোক শ্রেণী থেকেই সাহিত্যিক বর্গের ব্যক্তি বেশী আহরিত হয়ে থাকেন। কিন্তু শরৎচন্দ্রকে এই তিন গোত্রের কোন গোত্রের ভিতরই ধরানো যাবে না। তিনি জমিদার শ্রেণী থেকেও আসেননি, অকর্মা অভিজাত বর্গের মানুষও তিনি নন, আবার চাকুরি বা ব্যবসায় সম্বল মধ্যবিত্ত ভদ্রলোক শ্রেণীর লোকও তাঁকে বলা চলে না। সত্য বটে জীবিকার প্রয়োজনে তাঁকে অনেক বছর রেঙ্গুনে থেকে চাকরি করতে হয়েছিল, কিন্তু চাকরি করে জমানো টাকা থেকে মেয়ের বিয়ে দেওয়া, ছেলেকে উচ্চতর শিক্ষায় শিক্ষিত করে তোলা, কিংবা শেষ বয়সে বাড়ি বানানো জাতীয় যে সব আকাঙ্ক্ষা মধ্যবিত্তের চাকরির পশ্চাতে প্রায়শঃ মূলপ্রেরণা রূপে কাজ করে, এই ধরনের কোন আকাঙ্ক্ষাই শরৎচন্দ্রের রেঙ্গুন প্রবাস কিংবা রেঙ্গুনে চাকরি করার মূলে সক্রিয় ছিল না। তিনি ছিলেন জন্মবৈরাগী, উদ্দেশ্যহীন-ভাবে স্থান থেকে স্থানান্তরে ঘুরে বেড়িয়েছেন, ভ্রাম্যমাণ অবস্থায় রেঙ্গুনে একটা চাকরি মিলে গিয়েছিল, সেখানেই আপাততঃ স্থিতি করেন আর ওই কাজেই বেশ কয়েক বছর লেগে থাকেন। চাকরি করে সংসার ধর্ম নির্বাহ করা, সন্তান পালন, ব্যাঙ্কে টাকা জমানো, ছেলে পড়ানো বা মেয়ের বিয়ে দেওয়া—এ সব কিছুই তাঁর চাকরির পরিকল্পনার অন্তর্গত ছিল না। বস্তুতঃ শরৎচন্দ্রকে যঁারা কাছে থেকে দেখেছেন তাঁরা বিলক্ষণ অবগত ছিলেন যে, মধ্যবিত্তের জীবনযাত্রার ছকের সঙ্গে শরৎচন্দ্রের কোন-কিছুই মেলে না, মেলানোর উপায় নেই। এই জন্ম-বাউগুলে সংসার-নিষ্পৃহ অতৃপ্ত অশান্ত মানুষটির জীবনতরঙ্গী ভাসতে ভাসতে রেঙ্গুনের ঘাটে কিছুকালের জন্য নোঙ্গরের আশ্রয় পেয়েছিল কিন্তু নোঙ্গর তোলবার প্রথমতম সুযোগে সেখান থেকে নোঙ্গর তুলে নিয়েছিল। তবুও যে-মানুষের প্রকৃতি, অস্থির যঁার চিত্ত, তাঁর মন দীর্ঘকাল একই ঘাটে বাঁধা থাকবে তা কি কখনও হবান্ন যো আছে? তাই দেখতে পাই লেখকরূপে প্রতিষ্ঠা লাভ সম্ভাবনার প্রথমতম সুযোগে বাংলার পাঠককুলের আমন্ত্রণ গ্রহণ করে তিনি চাকরিতে ইস্তফা দিয়ে রেঙ্গুনের বাস তুলে কলকাতা চলে এসেছিলেন—পিছনের ফেলে আসা

সঙ্গ ও অনুসঙ্গগুলির জগৎ তাঁকে দীর্ঘশ্বাস মোচন করতে দেখা যায়নি। মজ্জাগত নিস্পৃহ স্বভাবের মানুষের এমনিই ধারা, তার উপর ওই মানুষ যদি শিল্প স্বভাববিশিষ্ট হয় তা হলে তো আরও। শরৎচন্দ্র ছিলেন জাত-শিল্পী, স্বভাবলেখক, তাঁকে কি দীর্ঘদিন একই বন্ধনের বেড়ে আটকে রাখা যায়?

শরৎচন্দ্রের জীবনের ছাঁচ পর্যালোচনা করলে দেখা যায়, তাঁর জীবনে গতানুগতিক সংসারযাত্রার প্রভাব লেশমাত্র ছিল না। প্রথম যৌবনে তিনি বার পাঁচেক সন্ন্যাসী হয়ে ঘর ছেড়ে বেরিয়ে পড়েছিলেন, বছর পাঁচ-ছয় একটানা গানবাজনার চর্চা করেছেন, যাত্রার দলে সখী সেজে গান গেয়েছেন, সাপ ধরার কৌশল ও সাপকে বশ করার প্রক্রিয়া আয়ত্ত করবার জন্য সাপুড়েদের সঙ্গ করেছেন। আরও কত কী। তারপর এসেছিলেন কলকাতায় ভাগ্যব্রেষণে। কিন্তু কলকাতায় তাঁর অন্ন মাপা ছিল না, ফলে সেখানে চাকরির সন্ধানে ব্যর্থ হয়ে সুদূর রেঙ্গুন মুল্লুকে পাড়ি দিলেন। তার পর অনেক দিন আর ঘরমুখো হবার নাম করেননি। রেঙ্গুনেও জীবন-যাত্রা মোটেই শান্তশিষ্ট রুটিন-মাপা নির্বিরোধ মধ্যবিত্তের জীবনযাত্রা ছিল না।

এই থেকে বোঝা যায় শরৎচন্দ্র এমন এক শিল্পী, যিনি জন্ম-অশান্ত, অস্থিরচিত্ত, অধীর; নিয়ম-নীতির নিত্যাত্ত বশংবদ বাধ্য মানুষ যাকে কোন মতেই বলা চলে না। ইউরোপীয় বোত্তেমীয় শিল্পী-সাহিত্যিকদের ধরন-ধারণ অনেকটাই তাঁর মধ্যে বর্তিয়েছিল, খুব সম্ভব তাঁরও অজান্তে।

আমাদের দেশের অধিকাংশ লেখকেরই জীবনের ছাঁচ বড় গতানুগতিক। হয় তাঁরা অধুনাবাতিল জমিদার বা অভিজাত জীবনের স্তর থেকে সমাগত, নয় তো নিতান্তই প্রথার দাসহ মানা মধ্যবিত্ত বা নিম্নমধ্যবিত্ত ছাপোষা জীব। পূর্বেই বলেছি, শরৎচন্দ্রকে এঁদের কারও সঙ্গেই এক করে দেখা চলে না। শিল্পী হিসাবে তিনি অনন্যপরতন্ত্র, তুলনা রহিত। তিনি নিজেই নিজের তুলনা, তাঁর দোসর খুঁজতে যাওয়া বৃথা। দোসর যদি খুঁজতেই হয় এদেশে তাঁর জুটি মিলবে না, জুটি মিলবে ইউরোপে, যে-দেশের শিল্প-সাহিত্যের ইতিহাসে শরৎচন্দ্রের মানসিকতা বিশিষ্ট একাধিক লেখকের নজির মিলবে। দৃষ্টান্তস্বরূপ রুশ লেখক ডস্টয়েভ্‌স্কি কিংবা গর্কি, নরওয়েজিয়ান লেখক হামসুন, আইরিশ কবি ডেভিস, ইংরেজ কবি গোল্ডস্মিথ, শেলী ও বায়রণ, ফরাসী গল্প-লেখক মোপাসাঁ, আমেরিকান কবি হুইটম্যান প্রমুখের নাম করা

যায়। গর্কির জীবনের ছকের ভিতর গতানুগতিকতার নামমাত্র ছিল না। সে যারা গর্কির আত্মজীবনী তিনখণ্ড পড়েছেন তাঁরাই ভাল করে জানেন। হামসুন তাঁর হাঙ্গার উপন্যাসে দারিদ্র্যের সঙ্গে নিয়তসংগ্রামরত এক সাহিত্যশোপ্রার্থী যুবকের যে-ছবি এঁকেছেন সে তাঁর নিজেরই জীবনের প্রক্ষেপ মাত্র। গোল্ডস্মিথ একটি বাঁশী মাএ সম্বল করে সম্পূর্ণ কর্দরক গৃহ্য অবস্থায় সারা ইউরোপ পরিভ্রমণে বেরিয়ে ছিলেন এবং বাঁশী বাজিয়ে পাথেয় সংগ্রহ করেছিলেন। হুইটম্যান পেট চালাবার তাগিদে হেন কাজ নেই যা করেননি—কাগজে হকারি থেকে প্রেসের কম্পোজিটারি পর্যন্ত সব কাজেই হাত মগ্ন করেছিলেন উদ্দেশ্যহীনভাবে শহর থেকে শহরান্তরে ঘুরে বেড়াবার কালে। মোপাসাঁ জীবনের বাস্তব অভিজ্ঞতা সঞ্চয়ের জগৎ নৈশ প্যারিসের অন্ধকার গলি ঘুঁজিতে ঘুরে বেড়িয়েছেন রাতের পর রাত—এই সব নিশীথ পরিক্রমার অভিযানে বাধ্য হয়ে যে হলাহল পান করতে হয়েছে তাকেই অমৃতের রসপাত্রিত্ব করেছেন তাঁর অপূর্ব শিল্পকর্মের ভিতর।

শরৎচন্দ্রকেও এঁদেরই গোত্রের শিল্পী মনে করতে হবে। তবেই তাঁর রচনার গহনে প্রবেশের প্রাথমিক চাবিকাঠির আমরা সন্ধান পাব। এদেশের শাস্ত্র নির্জীব পদে পদে সংস্কার চালিত ‘ভদ্রলোক’ লেখকদের সঙ্গে তাঁর কোনই মিল নেই—না ব্যক্তিত্বে, না লেখার দাঁচ-ধরনে। তাঁর লেখা বিদ্রোহের ভেঙ্গে পূর্ণ, বৈপ্লবিকতার সংকেতবাহী। (যদিও উত্তর জীবনে এই বৈপ্লবিকতা তিনি পূরাপূরি অক্ষুণ্ণ রাখতে পারেননি—বৈপ্লবিকতার ভিতর রক্ষণশীলতার খাদ এসে মিশেছিল।) গতানুগতিক শাস্ত্রশাসনের ছকবাঁধা রাস্তায় চলতে অভ্যস্ত সনাতন আইন-শৃঙ্খলাব ভক্ত নিরীহ বাঙালী লেখকের থেকে শরৎচন্দ্রের জাত-গোত্র এতই আলাদা যে, এই লেখক বাঙালী সম্প্রদায়ের মধ্যে কেমন করে আবির্ভূত হলেন সেইটে ভেবে এক এক সময় অবাক হয়ে যেতে হয়। বাংলা সাহিত্যের পূর্বসূরী দিক্‌পাল কারও সঙ্গেই তাঁর সাদৃশ্য নেই, বৈসাদৃশ্য অতি সুপ্রকট। বিদ্যাসাগর, হেম-নবীন, বঙ্কিমচন্দ্র, রবীন্দ্রনাথ, সত্যেন দত্ত, রামেন্দ্রসুন্দর, দ্বিজেন্দ্রলাল, দীনেশচন্দ্র, প্রমথ চৌধুরী,—কোন লেখকের সঙ্গেই তাঁকে মেলাবার উপায় নেই। বাংলার লেখকগোষ্ঠী সমূহের পরিচিত চৌহদ্দিতে তাঁর পদপাত অনুপস্থিত। যদি তাঁকে আদৌ পূর্বসূরী বা উত্তরসূরী কারও সঙ্গে মেলাতে হয় তো এই কাটি নাম মনে পড়া স্বাভাবিক—পূর্বসূরীদের মধ্যে মণুসুদন,

উত্তরসূরীদের মধ্যে কাজী নজরুল ও মানিক বন্দ্যোপাধ্যায়। কিন্তু সেখানেও কথা আছে। যদিও এঁদের সকলেই জীবনীশক্তির দীপশিখা একই সঙ্গে দুই প্রান্তে জ্বালিয়ে শক্তিকে ত্বরায় নিঃশেষ করেছেন, তাহলেও শরৎচন্দ্রের সঙ্গে কোথায় যেন এঁদের একটা বড় রকমের বেমিলও রয়েছে। মধুসূদন উচ্ছ্বাল প্রকৃতির শিল্পী হলেও অভিজাত গোত্রের শিল্পী—বৃত্তিতে ব্যারিস্টার। কাজী নজরুল একদা লেটোর দলে গান বাঁধতেন, পরে যুদ্ধে সৈনিকদলে নাম লিখিয়েছিলেন; কিন্তু উত্তর কালে নজরুলের যে-জীবনের সঙ্গে আমরা পরিচিত তা একান্তভাবেই কলকাতার নাগরিক জীবন-যাপন পদ্ধতির বাঁধা-ধরা ছকটিকে স্মরণ করিয়ে দেয়। নজরুলের প্রথম জীবনের বিদ্রোহের বেগ পরবর্তী জীবনের নিস্তরঙ্গ জীবনযাত্রার প্রভাববৃত্তের মধ্যে এসে বহুল পরিমাণে শান্ত হয়ে গিয়েছিল। তিনি বিদ্রোহ থেকে ভক্তিতে চলে এসেছিলেন। বিদ্রোহ থেকে ভক্তিবাদে সমুত্তীর্ণ হতে গিয়ে তিনি তাঁর অতীতকেই শুধু অস্বীকার করেননি, এমনকি নিজের জীবনে বিপর্যয়ও ডেকে এনেছেন নিজের অজান্তে। মানিক বন্দ্যোপাধ্যায়ের শিল্পী জীবনের ছাঁচে বাঁধাঙা প্রকৃতির বিশেষ পোষকতা দেখতে পাওয়া যায়। গতানুগতিকত্বের সংস্কার দ্বারা তাঁর অশান্ত ও সন্তোষমালোচনাপ্রবণ চিত্তকে শাসিত রাখা অসম্ভব ছিল। তদুপরি তাঁর মজ্জাগত মনোবিকলন ও ব্যবচ্ছেদের অভ্যাস সর্বপ্রকার প্রচলিত সংস্কারের প্রতি তাঁকে আরও বেশী অশ্রদ্ধাপরায়ণ করে তুলেছিল। কিন্তু মানিক নিয়ম-না-মানা, বাঁধনছেঁড়া প্রকৃতির শিল্পী হলেও নিরাশ্রয় ছিলেন না—চল্লিশের দশকের মাঝামাঝি সময়ে এসে তিনি মার্কসবাদী প্রত্যয়ের নিশ্চিত একটি অবলম্বন পান। এই অবলম্বন তাঁকে বাঁচিয়ে দিয়েছিল—তাঁকে উদ্দেশ্যহীন মনোবিশ্লেষণ প্রক্রিয়ার নৈরাজ্যবাদী গৃহতা থেকে রক্ষা করেছিল।

এই ১৭ দৃষ্টান্তের পরিপ্রেক্ষিতে এবারে আমরা শরৎচন্দ্রের উপরে আরও খানিকটা মনোযোগ অর্পণ করতে পারি। কী ধাতে এই শিল্পী গড়া ছিলেন ওই মনোযোগক্রিয়া থেকে তার বেশ কিছুটা আন্দাজ করা যেতে পারে। বাল্যবন্ধু লেখক চারুচন্দ্র বন্দ্যোপাধ্যায়কে শরৎচন্দ্র এক চিঠিতে লিখেছিলেন—“চারু, আমার মতো করে তোমাদের যদি উপগ্রাস রচনা করতে হতো তাহলে তোমরা উপগ্রাস লিখতেই পারতে না। এমন দিন গেছে, যখন দু-তিনদিন অনাহারে অনিদ্রায় থেকেছি। কাঁধে গামছা ফেলে এ-গ্রাম সে-গ্রাম ঘুরে

বেড়িয়েছি। কত বাড়িতে কুকুর লেলিয়ে দিয়েছে—তারা বড়লোক। কত হাড়ী বাগদির বাড়িতে আহাং করেছি। গ্রামের সকলের সঙ্গে মিশেছি, তাদের সুখ-দুঃখে সহানুভূতি জানিয়ে তাদের মুখ থেকে তাদের পারিবারিক ও সামাজিক জীবনের কাহিনী জেনে নিয়েছি। তারপর খুব ভাল করে দেখে নিয়েছি পল্লীগ্রাম ও পল্লীসমাজ। তাছাড়া আমার উপন্যাসের অধিকাংশ চরিত্র এবং ঘটনা আমার স্বচক্ষে দেখা।”

এই থেকেই বুঝতে পারা যাবে শরৎচন্দ্রের লেখক জীবনের ভিত্তি কোথায় ও তার বুনியাদ কত সুদৃঢ়। আমাদের মধ্যবিত্ত আবহাওয়ায় বর্ধিত প্রথাবদ্ধ মূল্যবোধ গঠিত গতানুগতিক ধারায় জীবন-যাপনকারী লেখকদের করণ-কারণের সঙ্গে তাঁর কিছুই মেলে না। তাঁর লেখবার স্টাইলও অনন্যসাধারণ, আমাদের প্রচলিত ঔপন্যাসিক-গল্পকারদের লেখবার রীতিপদ্ধতির থেকে আলাদা। কিন্তু সে ভিন্ন এসঙ্গ। বারান্তরে শরৎচন্দ্রের স্টাইল সম্বন্ধে আলোচনা করার ইচ্ছা রইল।

## স্টাইল

কথায় বলে ‘স্টাইল ইজ দ্য ম্যান’, স্টাইল লেখকের ব্যক্তিত্বের প্রক্ষেপ। কথাটি শরৎচন্দ্রের সম্পর্কে বিশেষভাবে খাটে। শরৎচন্দ্রের রচনার ভঙ্গী, শব্দ প্রয়োগের বিশেষত্ব, শব্দ সাজাবার কায়দা, বাক্য ব্যবহারের বিশেষ ডোল ইত্যাদি বৈশিষ্ট্যের মধ্যে শরৎচন্দ্রের লেখক-ব্যক্তিত্ব অত্যন্ত স্পষ্টরেখায় প্রতিভাত। অবশ্য স্টাইল বলতে শুধু লিপি-বৈশিষ্ট্যকেই বোঝায় না, তার উপরে আরও অনেক কিছু বোঝায়। স্টাইলের দর্পণে গোটা মানুষটির ছবিই ভেসে ওঠে পাঠকের চোখের সামনে। কাজেই স্টাইলের মানদণ্ডে শরৎচন্দ্রকে একবার বিচার করে দেখলে মন্দ হয় না।

একটা কথা গোড়াতেই বলে নেওয়া ভাল। শরৎচন্দ্র মুখ্যতঃ পল্লীপ্রধান বিষয়বস্তুর অবলম্বনকারী ঔপন্যাসিক ও ছোটগল্পকার হলেও, এবং তাঁর পল্লী-ভিত্তিক রচনাগুলিতেই শিল্পোৎকর্ষ সমধিক প্রকাশিত হলেও, তিনি আসলে নাগরিক মেজাজের শিল্পী। বৈদগ্ধ্য, দরবারী রীতি, পরিশীলন, প্রখর তাঁর রচনার ছত্রে ছত্রে পরিস্ফুট। তিনি পল্লীগ্রামের চিত্র-চরিত্র নিয়ে কথাসাহিত্য রচনা করলেও যে ভাষায় ও ভঙ্গীতে সেটি করেছেন তা কিন্তু আদৌ গ্রামীণতা-সুলভ শৈথিল্য, স্নেহতা কিংবা তথাকথিত অশিক্ষিতপটুত্বের দ্বারা স্পৃষ্ট নয়; ওই রচনার পরতে পরতে আছে একজন নাগরিক শিল্পিজনোচিত মনোযোগ, যত্ন ও অনুশীলনীর প্রভাব। শরৎচন্দ্র নিজেকে ‘গেয়ালোক’ বলে চালাবার চেষ্টা করতেন, আলাভোলা দাঠাকুর গোছের বেশবাস পরে থাকতে ভালবাসতেন, পরনে ছিল থান ধুতি, গায়ে বালাপোষ, পায়ে তালতলার চটি, তাইতে লোকের সহজেই মনে হতে পারতো তাঁর শিক্ষাদীক্ষা গ্রাম্যস্তরের, শুধু দৈবানুগ্রহপুষ্ট অশিক্ষিত—অথবা অর্ধশিক্ষিত—পটুত্বের দ্বারা তিনি বাংলার জনচিত্ত জয় করেছিলেন। কিন্তু এ ধারণা মোটেই ঠিক নয়। তাঁর মত সীরিয়াস ধাতের শিল্পী বাংলা কথাসাহিত্যিকদের মধ্যে খুব অল্পই জন্মগ্রহণ করেছেন। এই ক্ষেত্রে বঙ্কিমচন্দ্র আর রবীন্দ্রনাথের পরেই তাঁর স্থান, ভাষা শিল্পের চর্চায় বুঝি তিনি প্রথমোক্ত দিক্‌পালদ্বয় অপেক্ষাও অধিক মনোযোগ-

পরায়ণ ছিলেন। তাঁর শিক্ষাদীক্ষাও নিতান্ত সাধারণ স্তরের ছিল না। এ বিষয়ে অবশ্য বঙ্কিমচন্দ্র-রবীন্দ্রনাথের সঙ্গে তাঁর তুলনা হয় না, তবে তিনিও একজন অধ্যয়ননিষ্ঠ লেখক ছিলেন। পল্লীভিত্তিক ঔপন্যাসিকের পক্ষে লোকসাহিত্য, বৈষ্ণব ও শাক্ত পদাবলী, কিংবা বাংলা সাহিত্যের এঁদো-ডোবা-সদৃশ মঙ্গলকাব্যগুলির অনুশীলন করাই স্বাভাবিক ছিল; কিন্তু শরৎচন্দ্র তাঁর ধার দিয়েও যাননি। তিনি চর্চা করেছেন ইউরোপীয় সমাজতাত্ত্বিক রচনা-বলীর, অর্থনীতি ও রাজনীতি বিজ্ঞানের, ইতিহাস ও নৃতত্ত্বের। প্রসিদ্ধ সমাজ-তাত্ত্বিক লেখক হার্বার্ট স্পেন্সারের তিনি একজন সবিশেষ ভক্ত ছিলেন। “পত্রের লেখা সাহিত্য আমি খুব কম পড়েছি। ও আমার ভাল লাগে না। আমার বাড়িতে যে বই আছে তার অধিকাংশই সায়েন্সের বই।” দিলীপ-কুমার রায়কে একবার সম্বন্ধে লিখেছিলেন তাঁর হওয়া উচিত ছিল একজন সমাজবিজ্ঞানী, এই দেশের পচা জলহাওয়ার দোষে হয়ে দাঁড়িয়েছেন একজন লোকমনোরঞ্জন গল্পকার। এই আক্ষেপোক্তি থেকেই বোঝা যায় মানুষটি কী ধাতে গড়া ছিলেন এবং কোন্ দিকে তাঁর অন্তরের সহজ প্রবণতা ছিল।

তবু যে তিনি বাংলাদেশের জনমনে জীবনের শেষ দিন পর্যন্ত একজন গ্যালাখ্যাপা বাউগুলে গোছের দৈবান্বিত লেখকের ভাবমূর্তিতে প্রতিষ্ঠিত ছিলেন এবং তাঁর সম্পর্কিত আলোচনাদিতে একজন সীরিয়াস তীক্ষ্ণমননজীবী সচেতন শিল্পীর ভাবমূর্তির সাক্ষাৎ কদাচিৎ দেখতে পাওয়া যায়—তার জন্য তিনি নিজেই কম বা বেশী পরিমাণে দায়ী ছিলেন। পূর্বেই বলেছি তিনি তাঁর বৈদগ্ধ্য ও পরিশীলনকে সম্বন্ধে গোপন করে বাইরে একজন ‘দাঠাকুর’ সেজে থাকতে ভালবাসতেন। শুধু তাই নয়, এই ভাবে লোককে ধোঁকা দিয়ে তিনি এক ধরনের আত্মদোষ পেতেন। শিল্পী মনের কত রকমের খেয়াল থাকে, এও একটা খেয়াল। তাঁর সম্বন্ধে কত অজস্র জনশ্রুতি সমাজে প্রচলিত ছিল, কোনদিন তিনি তার প্রতিবাদ করেননি, বরং সে সম্বন্ধে এক অদ্ভুত রহস্যময়তা অবলম্বন করে তিনি সেই সব ভিত্তিহীন কিংবদন্তী আর গুজবকে অকারণ পল্লবিত হতে দিয়েছেন। এই থেকে লোকমনে একটা ধারণা মুদ্রিত হয়ে গিয়েছিল যে, তিনি গ্রামীণ ধাতের শিল্পী কিন্তু মোটেই তা তিনি ছিলেন না। বিশেষ ভাষাশিল্পের বুননে তাঁর মত সচেতন নাগরিক মেজাজের কারিগর আমাদের কথাসাহিত্যে তার আগে বা পরে অল্পই আবির্ভূত

হয়েছে। শরৎচন্দ্রের যে-কোন উপন্যাসের যে-কোন অংশের যে-কোন অনুচ্ছেদ বা বাক্যসমষ্টির আভ্যন্তর পাঠ বিশ্লেষণের দ্বারা এ কথার প্রমাণ করা চলে। কিন্তু তার আগে তাঁর শিল্পী-মানসিকতার সম্পর্কে আরও দু'একটি কথা বলে নেওয়া প্রয়োজন।

শরৎচন্দ্র বলতেন তিনি রবীন্দ্রনাথের উপন্যাসসমূহ তন্ন তন্ন করে পড়েছিলেন, এক চোখের বালি উপন্যাসই কমপক্ষে দু'শো বার পড়েছিলেন। কেন পড়েছিলেন? রবীন্দ্র-কথাসাহিত্যের ভাবের জগতে বিচরণের অভিপ্রায়ে কি? রবীন্দ্র-ভাবাদর্শকে নিজ জীবনের চিন্তার ছাঁচের ভিতর প্রতিফলিত করবার জগু কি? না, তা মোটেই নয়। শরৎ-সাহিত্যের পাঠক মাত্রই জানেন রবীন্দ্র-ভাবজীবন আর শরৎ-ভাবজীবনে দুস্তর পার্থক্য। শরৎচন্দ্র প্রকৃতিপ্রেমে কিংবা ঈশ্বরচেতনায় কখনও স্ফূর্তি অনুভব করেননি, তাঁর সমগ্র মনোযোগ সংলগ্ন ছিল মানুষে। মানুষ নামক অত্যাশ্চর্য জীবটিকে কেন্দ্র করে তাঁর তাবৎ কোতূহল ও জিজ্ঞাসা স্ফূর্তিমন্ত হয়েছে। তাই যদি হবে তো তাঁর রবীন্দ্র-কথাসাহিত্য খুঁটিয়ে খুঁটিয়ে পড়ার কী দরকার ছিল? দরকার ছিল স্টাইলের পরিশীলনের জগু, ওই সমনোযোগ ভাষাচর্চার বকমন্ত্র থেকে স্বকীয় ভাষারীতি পরিস্ফুট করবার জগু। স্বকীয় স্টাইল শরৎচন্দ্র বিধিমতেই আয়ত্ত করে-ছিলেন। তাঁর স্টাইলের কোন দোসর নেই বাংলা সাহিত্যে, আগের বা পরের কোন প্রতিস্পর্ধীই আজ পর্যন্ত তাঁকে এই ক্ষেত্রে হঠাতে পারেননি। তাঁর ভাষার জাদু তাঁর সাহিত্যের এক প্রধান সম্পদ।

জাঁ-জাঁক রশো সম্বন্ধে একটা কথা শুনতে পাওয়া যায় তিনি প্রতিটি বাক্য রচনা করেই সঙ্গে সঙ্গে সেটি উচ্চারণ করে পড়তেন। তাঁর কান অনুমোদন করলে তবে তিনি বাক্যটি গ্রাহ্য করতেন এবং রচনামধ্যে স্থান দিতেন। শরৎচন্দ্রের সম্পর্কেও বোধহয় একই কথা বলা যায়। তাঁর ছিল সংগীতজ্ঞের কান—তিনি গায়ক ছিলেন এ কথা সকলেই জানেন। তিনি তাঁর ভাবাদেহের অঙ্গসংস্থান ক্রিয়ায় প্রতিটি শব্দ মেপে মেপে ওজন করে বসাতেন এবং পাঠকমনের উপর সেই সব শব্দের কী প্রতিক্রিয়া হতে পড়বে কানের সাক্ষ্যের দ্বারা তা যাচাই করে নিতেন। তাঁর ভাষার একটি শব্দও অযত্নরচিত নয়, অযথা প্রযুক্ত নয়, অস্থানে প্রযুক্ত নয়। প্রতিটি শব্দ তার যথাস্থানে সংস্থিত হয়ে বাক্য মাত্রই একটা নিটোল শিল্পের রূপ লাভ করেছে তাঁর হাতে। ভাস্কর যেমন পাথর কুঁদে কুঁদে সযত্ন মনোযোগে



পিণ্ডাকৃতি পাথর থেকে সুগঠিত সুন্দর সব অবয়ব উৎকীর্ণ করে, শরৎচন্দ্রও তেমনি তাল তাল শব্দের জটলা থেকে গ্রহণ-বর্জন-নির্বাচনের মধ্য দিয়ে উপযুক্ত শব্দাদি চয়ন ও তাদের যথাস্থানে বিগত করে অপরূপ সব বাক্যের মূর্তি সৃজন করতেন। এ এক অসাধারণ শব্দসজ্জা—দরবারী কারুকার্যের সৌগন্ধ্যে ভরপুর।

শরৎচন্দ্রের ভাষাগঠনের মধ্যে বৈজ্ঞানিক মেজাজের যথেষ্ট পোষকতা ছিল। তিনি অবশ্য বিনয় করে একাধিক জায়গায় বলেছেন তাঁর vocabulary বা শব্দভাণ্ডার খুব কম, তবু যে সেই ভাষা লোকের কেন ভাল লাগে তা তিনি বুঝতে পারেন না। এ কথার উত্তরে পাঠকের পক্ষ থেকে এই বলা যায় যে, তাঁর শব্দবৈভব তাঁর নিজের বিচারে অল্প বলে মনে হতে পারে কিন্তু ওই স্বল্পতার মধ্যেই তাঁর ভাষার সৌন্দর্যের চাবিকাঠি নিহিত ছিল। তিনি পারতপক্ষে বাহুল্য-শব্দ বা দ্বিত্ব প্রয়োগ করতেন না। ভাবকে যথাযথভাবে প্রকাশ করার জন্য ভাষার অনেক ঘষা-মাজা করতেন ও শব্দের economy বিধানে যত্নশীল থাকতেন। শব্দের এই ব্যয়কুঠ অভ্যাস বৈজ্ঞানিক স্বভাবের দ্যোতক।

বিজ্ঞানীরা বাহুল্য-কথার কারবার করেন না। তাঁরা precision-এর অনুরাগী। শরৎচন্দ্রও ছিলেন এই precision বা যথার্থ্যের একান্ত ভক্ত। নিজেও তিনি বলেছেন, “আমার ভাষাটা বোধহয় সায়েন্সের বই পড়ার দরুন ঐ-রকম হলে থাকবে।” (চন্দননগরের আলাপ-সভা)

শরৎচন্দ্রের যে-কোন উপন্যাসের যে-কোন অংশের রচনাপংক্তি উৎকলন করে এ কথা প্রমাণ করা যায়। শ্রীকান্ত প্রথম পর্বের কিংবা দত্তার কিংবা পরিণীতার আরম্ভভাগ নেওয়া যাক্। সর্বত্রই এক সচেতন শব্দনিপুণ শিল্পী-স্বভাবের পরিস্ফুরণ লক্ষ্যণীয়। শব্দের সংযম অর্থাৎ অল্প কথায় অধিক ভাব-প্রকাশ, শব্দের সযত্ বিকাশ, শব্দের ধ্বনিচেতনা প্রভৃতি গুণে এই প্রারম্ভিক অংশগুলি চকিতেই পাঠকের মনোহরণ করে নেয় এবং পাঠমধ্যে তাঁকে প্রবল-ভাবে আকর্ষণ করে। পরিণীতার আরম্ভটিতে আছে, অধিকন্তু, মৃদু কোতুকের ঝিলিক। পরিহাসসরসিকতায় শরৎচন্দ্র যে কম যেতেন না তাঁর রচনাবলীর একাধিক অংশে তার প্রমাণ আছে। কিন্তু এহ বাহ্য। আসল হলো তার ভাষাভঙ্গীর গাভীর্য ও ভাবগভীরতা। দু’একটি উদাহরণ দিলে মন্তব্যটি স্ফুটতর হতে পারে।

চরিত্রহীন উপন্যাসের দুটি অংশ এখানে উদ্ধৃত করছি। এক, যেখানে কিরণময়ীর সঙ্গে পাঠকের প্রথম পরিচয় হলো; দুই, যেখানে কিরণময়ীর বৈধব্যের বেশ বর্ণিত হয়েছে। প্রথমাংশ : ‘উপেন্দ্র দরজা ঠেলিয়া চৌকাঠের উপর দাঁড়াইয়া স্তম্ভিত হইয়া গেলেন। স্ত্রীলোকটি কেরোসিনের ডিবা হাতে করিয়া একপাশে দাঁড়াইয়া আছে। মাথার উপরে অল্প একটুখানি আঁচলের ফাঁক দিয়া সমস্ত-রচিত কবরীর এক অংশ দেখা যাইতেছে। দেখা গেল, তার একটি মাত্র কেশও স্থানভ্রষ্ট হয় নাই। নিখুঁত সুন্দর মুখের উপর হাতের আলোকসম্পাতে জয়ুগের মধ্যে সন্নিবিষ্ট কাঁচপোকার টিপ চিক্ চিক্ করিয়া উঠিল এবং ঈষৎ আনত চোখ দুটি দিয়া যে বিদ্যুৎ প্রবাহ বহিয়া গেল, চতুর্দিকের নিবিড় অন্ধকারে তাহার অপূর্ব জ্যোতি ক্ষণকালের জগ্ জগ্ উভয়কেই বিভ্রান্ত করিয়া ফেলিল। সতীশ স্পষ্ট দেখিতে পাইল, ওষ্ঠাধরে হাসির রেখা বাধা পাইয়া বারংবার ফিরিয়া যাইতেছে। সে উপেন্দ্রর গা ঠেলিয়া দিল।’

দ্বিতীয়াংশ : ‘এক অপরাহ্নবেলায় কিরণময়ী জ্যোতিষবাবুদের বাটীতে আসিয়া উপস্থিত হইল। পরণে মোটা থানের কাপড়, গায়ে অলংকারের চিহ্নমাত্র নাই, সুদীর্ঘ রুক্ষ কেশরাশি বিপর্যস্তভাবে মাথায় জড়ানো, দুই-একটা চূর্ণকুস্তল কপালে ঝুলিয়া পড়িয়াছে; চোখে তাহার শান্ত উদাস দৃষ্টি। যেন বৈধব্যের অলৌকিক ঐশ্বর্য তাহার সর্বাঙ্গ ঘিরিয়া মূর্তিমতী হইয়াছে। সে মুখের পানে চাহিলেই চক্ষু আপনিই যেন তাহার পদপ্রান্তে নামিয়া আসে।’

দুটিই বর্ণনামূলক অংশ কিন্তু কী অসামান্য ভাষার সংযম ও গাভীর্য। সাধু ভাষারীতির কী অন্তর্নিহিত প্রসাদগুণ! শরৎচন্দ্র বঙ্কিমচন্দ্রের মত নারীর রূপবর্ণনায় অল্পই উচ্ছ্বসিত হয়েছেন কিন্তু যেখানে রূপবর্ণনা করেছেন সেখানে তাঁর পাকা তুলিকাপাতের নৈপুণ্য কোনমতেই ভুল করবার যে থাকে না। শরৎচন্দ্রের রূপতান্ত্রিকের দৃষ্টি নয়, তিনি কবি নন। মানুষের মন নিয়ে তাঁর কারবার। চরিত্রগুলির মনের গহনে সজ্জানী শিল্পদৃষ্টির আলো ফেলাতেই তাঁর সমধিক আনন্দ। কিন্তু বহিমুখী বর্ণনাতেও তিনি কম যান না। তিনি শ্রীকান্ত উপন্যাসের গোড়ার দিকে বিনয় করে বলেছেন প্রকৃতিচিত্রণ তাঁর আসে না। কিন্তু কী কয়লে প্রকৃতি বর্ণনায়ও যে তিনি কত দুর্ধর্য হতে পারেন তার পরিচয় পাওয়া যায় ইন্দ্রনাথের নিশীথকালীন গঙ্গা-অভিযানের দৃশ্য বর্ণনার তুলনায় কিংবা শ্রীকান্তের একাধিক প্রহর রাতে শ্রীশান অভিযানের



বিবরণের ভিতর। অথবা শ্রীমন্ত দ্বিতীয় পর্বের সামুদ্রিক ঝড়ের দৃশ্যে। কিন্তু রূপ বর্ণনা বা প্রকৃতি বর্ণনা এ সবে তিনি সময়ক্ষেপ করেননি কেননা, ঔপন্যাসিকের প্রধান উপজীব্য মানুষ, প্রধান কাজ মানুষের সু ও কু মণ্ডিত আলোছায়া ঘেরা জটিল সত্তার উন্মোচন। শরৎচন্দ্র নিজেই এক জায়গায় বলেছেন : “রূপের বর্ণনা, স্বভাবের বর্ণনা আমার বইয়ের মধ্যে প্রায় নেই। ও আমি দু-এক কথায় সেরে দিই, বেশি নজর দিই না। আসল বস্তু, তার সত্তা বা মন যাই বলুন—সেটা মানুষের ভিতরটা।” ওই মানুষের ভিতরটাই উদ্ঘাটনের কাজ শরৎচন্দ্র বিধিমতে এবং সার্থকভাবে নিষ্পন্ন করে গিয়েছেন তাঁর উপন্যাস ও ছোটগল্পগুলির মধ্য দিয়ে। তাঁর স্টাইল এ কাজে তাঁর প্রধান সহায় হয়েছিল। প্রকৃতপক্ষে, শরৎচন্দ্রের স্টাইল আর শরৎচন্দ্রের মানব-মুখীনতা অঙ্গাঙ্গিভাবে জড়িত। একটিকে বাদ দিয়ে আরেকটির কথা ভাবা যায় না।

## সাহিত্য চিন্তা

বাংলা ভাষার প্রসিদ্ধ কথাশিল্পী শরৎচন্দ্র চট্টোপাধ্যায়ের কোন সুগঠিত প্রণালীবদ্ধ সাহিত্যদর্শন ছিল কিনা জোর করে বলা মুশকিল ; তবে তাঁর বিভিন্ন উপন্যাস ও ছোটগল্পের ইত্যন্তঃ-ছড়ানো মন্তব্য, অন্তরঙ্গজনদের কাছে লেখা চিঠিপত্র এবং সাহিত্য ও সমাজ সম্পর্কিত প্রবন্ধ নিবন্ধের অভিমত ইত্যাদির মধ্য দিয়ে তাঁর যে মনের প্রকাশ ঘটেছে তার থেকে বোধকরি একটা ধরাছোঁয়া যায় এমন সাহিত্যচিন্তার আদল খাড়া করা যেতে পারে।

শরৎচন্দ্রের শিল্পী-ব্যক্তিত্ব সম্পর্কে সর্বপ্রথমে যেটা লক্ষ্য করবার, তিনি বিশুদ্ধ সাহিত্যের আদর্শে তেমন বিশ্বাসী ছিলেন না। সাহিত্য কেবল সৌন্দর্য সৃষ্টির জগৎ এবং সে সৌন্দর্যসৃষ্টির একমাত্র উদ্দেশ্য পাঠককে আনন্দ দান—এই নন্দনবাদী তত্ত্বে তাঁর বিশেষ আস্থা ছিল বলে মনে হয় না। যদিও হৃদয়ধর্ম তাঁর খুবই প্রবল ছিল তবু সমাজ ও রাষ্ট্রের পরিপ্রেক্ষিতে, সমসাময়িক কালের ভাবনা-ধারণার আধারে, সাহিত্য পরিবেশনের যে মননশীল আদর্শ ক্রমেই সাহিত্যসংসারে উত্তরোত্তর প্রভাব বিস্তার করে চলেছে, তিনি সেই আদর্শেরই অনুগামী ছিলেন এরূপ বলাই যুক্তিযুক্ত। অন্ততঃ তাঁর রচনার বিষয়বস্তু, চিত্র-চরিত্রের গড়ন এবং বক্তব্যের ধাঁচ থেকে সে কথাই বারে বারে মনে হয়। তাঁর কথা ছিলঃ “সমাজের সঙ্গে মিলে মিশে এক হয়ে তার ভিতরের বাসনার কামনার আভাস দেওয়াই সাহিত্য।”

অর্থাৎ সাহিত্য শিল্পের কলাকৈবল্যবাদী দৃষ্টিভঙ্গী তাঁর মনের উপর কোন সময়ই তেমন ছাপ ফেলতে পারেনি, যেমনটা পেরেছে সমাজসচেতন সাহিত্যের ভাবাদর্শ। এই দিক দিয়ে শরৎচন্দ্র ছিলেন আমাদের সাহিত্যে বঙ্কিমচন্দ্রের একজন সার্থক উত্তরাধিকারী। বঙ্কিমচন্দ্রের সঙ্গে শরৎচন্দ্রের মিল ছিল সামান্যই, কিন্তু এই একটি ক্ষেত্রে তাঁদের দুজনার মধ্যে সাদৃশ্য ছিল যে, দুজনার কেউই সমাজকে বাদ দিয়ে সাহিত্য সংরচনের কথা চিন্তাও করতে পারেননি—সমাজ বারংবার তাঁদের লেখায় ফিরে এসেছে।

কিন্তু শরৎচন্দ্র সাহিত্যের এই সমাজসম্পৃক্ত মননশীল আদর্শের অনুগামী

হলেও, যাকে আজকের দিনের পরিভাষায় বলে মননশীল লেখক, তা তিনি বোধহয় ছিলেন না। গোড়াতেই বলেছি, তাঁর ভিতর হৃদয়ধর্মের অতিশয় প্রাবল্য ছিল; ভাবাবেগের প্রাচুর্য ও সাধারণ স্তরের বাঙালী জীবনের প্রতি অন্তহীন দরদ প্রায় ক্ষেত্রেই তাঁর মননশীলতাকে ভাসিয়ে নিয়ে গিয়েছিল। বিশেষ করে পল্লীবাসী মধ্যবিত্ত বা নিম্নমধ্যবিত্ত বাঙালী সংসারের ঘরকন্নার ছবি যখনই তিনি ফোটাতে গেছেন তখনই তাঁর সমাজসচেতন বুদ্ধিবাদী স্বরূপকে আড়াল করে এসে দাঁড়িয়েছে তাঁর পরতুংখকাতর অসামান্যসংবেদনশীল মানবিক সত্তা। শরৎচন্দ্রের শিল্পী জীবনের এ এক আশ্চর্য দ্বৈধতা যে, তিনি হতে চেয়েছেন মননশীল লেখক কিন্তু হৃদয়বৃত্তির আধিক্যের জন্ম বারে বারে তাঁর এই আকাঙ্ক্ষা পরাহত হয়েছে। এতবড় হৃদয়সম্পদে ধনী লেখক আমাদের ভাষায় কমই আবির্ভূত হয়েছেন। তাঁর এই হৃদয়ৈশ্বর্য একই কালে তাঁর দোষ ও গুণের হেতু হয়েছে। দোষের, এই কারণে যে, ঠিক এইজন্মই তিনি বাংলা সাহিত্যে বঙ্কিমচন্দ্র ও রবীন্দ্রনাথের নাগাল ধরতে পারেননি; গুণের, যেহেতু ঠিক এই অন্তহীন সহৃদয়হৃদয়সংবেদ্যতার কারণেই তিনি শিক্ষার স্তরভেদ নির্বিশেষে সকল শ্রেণীর বাঙালী পাঠকের চিত্তজয়ী হয়েছেন। এমনভাবে বঙ্কিম-রবীন্দ্রসাহিত্য বাঙালীর মন কাডতে পারেনি।

শরৎচন্দ্র একজন অসাধারণ মানবিকগুণসমৃদ্ধ কথাসাহিত্যিক। বিদেশের মানবতত্ত্বী কথাকারদের মত (যেমন টলস্টয়, গর্কি প্রমুখ) মানুষই ছিল তাঁর রচনার মুখ্য উপজীব্য। প্রকৃতি বর্ণনায় কিংবা রূপ বর্ণনায় তিনি তেমন উৎসাহ পাননি। মানুষের প্রতি সীমাহীন ভালবাসা তাঁর রচনার ছত্রে ছত্রে ছড়িয়ে আছে। তিনি তাঁর আকৈশোর ভ্রাম্যমাণ বাউণ্ডুলে জীবনে বিচিত্র চরিত্রের নরনারীর সংস্পর্শে এসেছিলেন, জীবনের মন্দ দিকটাও পরখ করে বড় কম দেখেননি। কিন্তু কী আশ্চর্য, এই বিষামৃতময় জীবনের নানাবিধ উল্টা-পাল্টা অভিজ্ঞতা লাভের পরও মানুষে বিশ্বাস তাঁর শিথিল হয়নি, তিনি ‘সীনিক’ বনে যাননি; বরং যতদিন বেঁচে ছিলেন, মানুষের প্রতি অপরিমেয় ভালবাসার সঞ্চয়ই তিনি উজাড় করে ঢেলে দিয়েছেন তাঁর সাহিত্যের পাত্র থেকে অঝোরে। এ এক অত্যন্ত সংঘটন যে, জীবনের ‘অন্ধকার’ দিকটার সঙ্গে অত্যন্ত মাথামাথির সম্বন্ধ স্থাপন করার পরও মানবপ্রীতি এমন অক্ষুণ্ণ অবিকৃত রাখতে পারা যায়। অনেকেই তা পারেন না। পাপ যাদের জীবনে আসক্তির স্তর পেরিয়ে অভ্যাসে পরিণত হয়েছে তাদের তো কথাই নেই,

যারা সাময়িক বিভ্রমের বশে স্থলনপতনের পথে পা বাড়ানো সত্ত্বেও কিছুকাল পরেই আবার স্থিৎ ফিরে পেয়ে সুস্থ ও স্বস্থ জীবনের ঘাটে ফিরে আসতে সমর্থ হয়, এমনকি তারাও হৃর্ভাগ্যক্রমে এই নিষ্কলুষ মানবপ্রীতির স্বর্গ থেকে নির্বাসনদণ্ড বরণ করে নিতে বাধ্য হয়। কিন্তু আশ্চর্য, শরৎচন্দ্রের গায়ে আঁচড়টিও লাগেনি। হাঁসের পাখায় যেমন জল লাগে না, তেমনি তিনি কী এক দুর্জয়ের জাদুক্রিয়ার দ্বারা নিজের গা থেকে পরিভ্রাজক জীবনের সমস্ত রকম বিরূপ অভিজ্ঞতার মলিন ভস্মরাশি ঝেড়ে ফেলে দিয়ে পুনরায় সংসারান্ধনে ফিরে এসেছেন সকলের প্রতি প্রাণঢালা ভালবাসার আবেগ নিয়ে। এই ভাবটাকেই প্রকাশ করেছেন তাঁর এক ভাষণে এই ভাবে :

“নানা অবস্থা বিপর্যয়ে এক দিন নানা ব্যক্তির সংস্রবে আসতে হয়েছিল। তাতে ক্ষতি যে কিছু পৌঁছায়নি তা নয়, কিন্তু সেদিন দেখা যাদের পেয়েছিলাম, তারা সকল ক্ষতিই আমার পরিপূর্ণ করে দিয়েছে। তাঁরা মনের মধ্যে এই উপলব্ধিটুকু রেখে গেছে, ত্রুটি, বিচ্যুতি, অপরাধ, অধর্মই মানুষের সবটুকু নয়। মাঝখানে তার যে বস্তুটি আসল মানুষ—তাকে আত্মা বলা যেতেও পারে—সে তার সকল অভাব, সকল অপরাধের চেয়েও বড়। আমার সাহিত্য রচনায় তাকে যেন অপমান না করি। হেতু যত বড়ই হোক, মানুষের প্রতি মানুষের ঘৃণা জন্মে যায়—আমার লেখা কোন দিন যেন না এত বড় প্রশ্ন পায়। কিন্তু অনেকেই তা অপরাধ বলে গণ্য করেছেন, এবং যে অপরাধে আমি সবচেয়ে বড় লাজ্জনা পেয়েছি, সে আমার এই অপরাধ। পাপীর চিত্র আমার তুলিতে মনোহর হয়ে উঠেছে, আমার বিরুদ্ধে তাঁদের সবচেয়ে বড় এই অভিযোগ। এ ভাল কি মন্দ আমি জানিনে, এতে মানবের কল্যাণ অপেক্ষা অকল্যাণ অধিক হয় কিনা এ বিচার করেও দেখিনি, শুধু সেদিন যাকে সত্যি বলে অনুভব করেছিলাম তাকেই অকপটে প্রকাশ করেছি।” ( ১৩৩৫ সালের ভাদ্র মাসে ৫৩তম বাৎসরিক জন্মদিন উপলক্ষ্যে ইউনিভার্সিটি ইনস্টিটিউটে দেশবাসীর প্রদত্ত অভিনন্দনের উত্তর )।

শ্রীযুক্তা রাধারাণী দেবীকে লিখিত এক পত্রে শরৎচন্দ্র স্বীয় সাহিত্য জীবনের অভিজ্ঞতা ব্যক্ত করেছেন এইভাবে : “তোমাদের মত কবিকল্পনা দিয়ে নয়, নিজের জীবনকে ফোঁটায় ফোঁটায় গলিয়ে নিঃশেষে নীরবে দধু করে যে অভিজ্ঞতা বাস্তব থেকে আহরণ করেছি, এখন মনে হয়, আমার সাহিত্যেও হয়তো সেইটাই ফুটে উঠেছে বারংবার, আমার জ্ঞাত এবং

অজ্ঞাতসারেও। আর এটা অত্যন্ত অকৃত্রিম সত্যের উপর প্রতিষ্ঠিত বলেই বোধহয় এত সহজে ছোটবড় সবাইকার কাছে আবেদন পেয়েছে।” (শরৎ-সাহিত্য-সংগ্রহ, দ্বাদশ সম্ভার, পৃ. ৩৫৩)।

এই দুটি উক্তি থেকে শরৎচন্দ্রের সাহিত্যিক স্বরূপের যে-ছবিটি ভেসে ওঠে তা হলো, তিনি বহুদর্শী বহুশ্রুত ব্যক্তি, কিন্তু তাঁর ওই নানাপথগামী অভিজ্ঞতা-ভূয়িষ্ঠতার পরেও তিনি তাঁর স্বভাবগত মানবপ্রেমকে অব্যাহত ও অমলিন রাখতে পেরেছিলেন। মানুষটি ছিলেন মজ্জাগতভাবে অত্যন্ত সহৃদয় ও করুণাপ্রবণ, নয়তো জীবনের এত এত তিজ-মধুর, কটু-কষায় অভিজ্ঞতা লাভের পরেও গ্রামের সাধারণ পারিবারিক জীবনের সংকীর্ণ কোটরে বদ্ধ আটপোরে নরনারীর দুঃখ-বেদনায় এমন করে তিনি চোখের জলে আধ্বুত হতে পারতেন না। নিজে কৈঁদেছেন, তাঁর পাঠকসাধারণকেও কৈঁদে ভাসিয়েছেন। তিনি পতিপ্রাণা বিরাজ-বৌ-এর অবস্থাগতিক পরপুরুষের সঙ্গে গৃহত্যাগের দুঃখে কৈঁদেছেন ; বিনাদোষে সরস্বতী স্বামী পরিত্যক্তা হওয়ার দুঃখে কৈঁদেছেন ; দরিদ্র ঘরের কন্যা জ্ঞানদার যথেষ্ট বয়স্কা হয়েও অনুঢ়া থাকার দুঃখে কৈঁদেছেন ; বাল্যপ্রণয়ের স্মৃতিবহনকারিণী বালবিধবা রমার রমেশের প্রতি একান্ত স্বাভাবিক ভালবাসা পল্লীসমাজ-শাসনে অবদমিত ও পরাস্ত হওয়ার দুঃখে কৈঁদেছেন ; গৈঁজেল গুলিখোর জুয়াড়ি স্বামীর সতীসাক্ষী স্ত্রী শুভদার অপরিমিত ক্ষমাপ্রবণতার মাহাত্ম্যের কাছে মাথা নত করেছেন ; অভিমানিনী বিন্দুর অপরিমিত সন্তানবাৎসল্যের ক্ষুধার চিত্র এঁকে বন্ধ্যানারীর বেদনার তীব্রতা বুঝিয়েছেন ; মায়ের কল্লিত কলঙ্কের দরুন বিনা অপরাধে স্বামীর ঘর করতে না পারার আহত অভিমানে পশু’দস্তা কুসুমের একদিকে দৃশ্যমর্যাদাবোধ অশুদ্ধিকে সপত্নীপুত্রের প্রতি দুর্নিবার স্নেহের টানের অন্তর্দ্বন্দ্বের ছবি এঁকে সংবেদনশীল গ্রাম্য নারীর দুঃখের অতলতার বোধ জাগিয়েছেন তাঁর পাঠকের মনে ; স্বামী নামক আদর্শের পায়ে সমর্পিতচিত্তা সনাতন ভারতীয় নারীত্বের প্রতীক এক সাধারণ পল্লীবধুর অদ্ভুত সেবাপরায়ণতার আলেখ্য তুলে ধরেছেন গৃহদাহ উপহাসের মৃণাল চরিত্রের মধ্যে ; ভাতৃস্নেহের পরাকাষ্ঠা দেখিয়েছেন বৈকুণ্ঠের উইলের গোকুলের মধ্যে ; এক অসহায় পরনির্ভর সরল-অন্তঃকরণ গৃহশিক্ষকের প্রতি এক বিধবা ধনী কন্যার জননীতুল্য নিষ্কলঙ্ক স্নেহের আকর্ষণের ছবি ফুটিয়েছেন বড়দিদির মাধবী চরিত্রের ভিতর ; এমনি আরও কত চিত্র ও চরিত্র ! এরকমটা কখনও সম্ভব হতে পারতো না,

যদি এদের প্রতি লেখক মনেপ্রাণে আন্তরিকতা গুণসম্পন্ন না হতেন, বাংলার গ্রামজীবনের সঙ্গে পরিণত বয়সেও একাত্মতা অটুট না রাখতে পারতেন।

এরকম সচরাচর দেখা যায় না। আমাদের ভুললে চলবে না শরৎচন্দ্র গ্রামের সন্তান হলেও তাঁর জীবনের একটা বড় ভাগ কেটেছে শহরে : বালো ও কৈশোরে ভাগলপুরে, যুবাবস্থার কিছুকাল কলকাতায়, তারপর এক দমকে অনেক কাল রেঙ্গুনে, পরে আবার কলকাতায়। ভালমন্দ বহুবিধ নাগরিক অভিজ্ঞতার তিনি শরিক হয়েছেন জীবনে, তার আভাস পূর্বেই দিয়েছি। রেঙ্গুনে থাকতে বিচিত্র বিষয়ে পড়াশুনা করেছেন, তাঁর অধীত বিষয়গুলির মধ্যে সমাজতত্ত্ব, অর্থনীতি, আইন, রাষ্ট্রবিজ্ঞান, ইতিহাস, নীতিশাস্ত্র, নৃতত্ত্ব প্রভৃতি ছিল প্রধান। তাঁর ভাষার ডোলটিও ছিল তাঁর অধ্যয়নের ব্যাপ্তির সঙ্গে সামঞ্জস্য রেখে পূরাপূরি নাগরিক, দরবারী, কিনা sophisticated। তাঁর মাজাঘষা বকঝকে স্টাইলের গড়ন থেকেই বোঝা যায় তিনি সচেতন ভাষাশিল্পী ছিলেন, শব্দপ্রয়োগে ছিলেন অতিশয় সতর্ক। অথচ কী আশ্চর্য, নাগরিক মেজাজের এই শিল্পীর মনটি ছিল গ্রামের সুরে বাঁধা। বাংলার পল্লীর প্রতি ভালবাসা তিনি সারা জীবনেও কাটিয়ে উঠতে পারেননি, বাইরের নানাবিধ পালিশ আর পরিমার্জনা সত্ত্বেও অন্তরটি গ্রামেতেই সংলগ্ন ছিল জীবনের শেষ দিন পর্যন্ত। সহজাত মানবপ্রেম, ভাবাবেগের প্রাচুর্য, নিজে যে-শ্রেণী থেকে উঠেছিলেন সেই শ্রেণীর জীবনের স্তরের লোকগুলির প্রতি মমত্ব তাঁকে পল্লীজীবনের রূপকার হিসাবেই বিশেষভাবে বাংলা-সাহিত্যে পরিচিত ও প্রতিষ্ঠিত করেছিল।

শিল্পোৎকর্ষের দিক দিয়ে তাঁর পল্লীভিত্তিক গল্প-উপন্যাসগুলিই যে বেশী উৎরেছে সেটা এইজন্যই অকারণ নয়। পল্লীসমাজ, নিষ্কৃতি, অরক্ষণীয়তা, পণ্ডিতমশাই, দেনা-পাওনা প্রভৃতি উপন্যাস এবং মহেশ, অভাগীর স্বর্গ, একাদশী বৈরাগী, বায়ুনের মেয়ে, বিন্দুর ছেলে, রামের সুমতি প্রভৃতি বড় ও ছোট গল্পগুলি তাঁর শ্রেষ্ঠ রচনাসমূহের মধ্যে পড়ে। তাঁর নগরকেন্দ্রিক উপন্যাস যেমন গৃহদাহ, চরিত্রহীন, ত্রীকান্ত, শেষ প্রশ্ন, পথের দাবী প্রভৃতিতে বুদ্ধির ঔজ্জ্বল্য যথেষ্ট, মননজীবিতার পরিচয় স্পষ্ট; কিন্তু রস আর আন্তরিক সংবেদনাই যদি শিল্পসৃষ্টির প্রাণ হয় তাহলে বলতেই হবে যে, প্রথমোক্ত রচনাগুলিই বাঙালী পাঠকের চিতে বেশী দাগ কেটেছে। অথচ এই সব রচনার উপকরণ কত সামান্য, চরিত্রগুলি কত সাদামাঠা। মননজীবিতার



মধ্যে জটিলতা থাকে, থাকে খরবুদ্ধি শানিত চিন্তার স্বাদ—নাগরিক পদ্ধতি-প্রকরণে অভ্যস্ত বিদ্বান পাঠকের এই ধরনের জটিল চিত্র-চরিত্রই বেশী ভাল লাগে। তিনি কিরণময়ী কিংবা অচলা কিংবা কমলের চরিত্র অনুধাবন করে যতটা উল্লসিত হন, বিরাজ বো কিংবা কুসুম কিংবা রমার চরিত্র অনুধাবন করে স্বভাবতঃই ততটা উল্লসিত হতে পারেন না। অথচ শরৎচন্দ্রের বেলায় দেখা যায়, তাঁর প্রথমোক্ত চরিত্রগুলিকে নিষ্প্রভ করে দিয়ে শেষোক্ত চরিত্রগুলি সমধিক হ্রাসিত হয়ে উঠেছে। সারল্যের জয় হয়েছে জটিলতার উপরে, হৃদয়ধর্মের মননশীলতার উপরে, পল্লীপ্রাণতার নাগরিকতার উপরে। শরৎসাহিত্য পাঠ করতে গিয়ে এমনকি মননশীল রচনাদর্শের অনুরাগী পাঠকও মনে মনে এই তথ্য স্বীকার না করে পারেন না।

এই অবিশ্বাস্য সংঘটনের একমাত্র কারণ শরৎচন্দ্রের আন্তরিকতা গুণ। তাঁর অপরিমেয় হৃদয়ৈশ্বর্য এই আন্তরিকতার উৎস থেকেই উচ্ছ্রিত হয়ে এসেছে। পুনরপি বলি, এমন জন্মবৈরাগী বাউণ্ডুলে প্রকৃতির মানুষ কেমন করে মনের গোপনে সাধারণ মানুষের জন্ম এত গভীর আন্তরিক প্রেম বাঁচিয়ে রেখেছিলেন সেইটে একটা পরম রহস্যের মত মনে হয়।

মননশীলতার সঙ্গে হৃদয়বাহের দ্বন্দ্ব শরৎচন্দ্রের শিল্পী জীবনে লেগে ছিলই এবং এই দ্বন্দ্ব-সংঘাতের ক্ষেত্রে হৃদয়বাহে বারবার জয়লাভ করেছে। যে-কারণে তাঁর বুদ্ধিপ্রধান উপন্যাসগুলির কিছু কিছু চরিত্রের বলিষ্ঠতা (যেমন, অভয়া, কিরণময়ী, কমল, সব্যসাচী প্রভৃতি) ও বহু চমকপ্রদ কথায় মনকে নাড়া দেওয়ার আলোড়ন-ক্ষমতা সত্ত্বেও বাঙালী পাঠক কিন্তু সেই সমস্ত রচনাকে তাঁদের সর্বাঙ্গীণ প্রাণের প্রীতি জানায়নি, সর্বাঙ্গীণ প্রীতি জানাতে জানিয়েছে বিরাজ বো, নিষ্কৃতি, বড়দিদি, মেজদিদি, দেবদাস, চন্দ্রনাথ, অরক্ষণীয়া, পল্লীসমাজ প্রভৃতি রচনাকেই। অথচ এই রচনাগুলির গঠন অজটিল, কাঠামো একমেটে, চরিত্র পরিকল্পনা একটা বিশেষ পরিচিত ছাঁচ অনুযায়ী। কিন্তু তাদের প্রত্যেকটিতেই হৃদয়বাহে খুব প্রবল। যেমন দেবদাস উপন্যাস। এই উপন্যাসটি যতই কাঁচা লেখা আর মেলোড্রামার লক্ষণ চিহ্নিত হোক না কেন, ভাগ্যহত অধঃপতিত দেবদাসের দুঃখে চোখের জল না ফেলেছে এমন পাঠক খুব কমই পাওয়া যাবে। কিংবা চন্দ্রনাথ উপন্যাসের কৈলাস খুড়ো চরিত্র। এই আত্মভোলা স্নেহপরায়ণ চরিত্রটিকে ভাল না বেসেছে এমন পাঠকেরও সাক্ষাৎ মেলা দুরূহ। শরৎচন্দ্র শুধু যে

নিজেই মানুষকে প্রাণভরে ভাল বেসেছেন তা-ই নয়, অপরকেও তিনি ভালবাসিয়ে ছেড়েছেন।

২

‘স্বদেশ ও সাহিত্য’ নামক প্রবন্ধ গ্রন্থে শরৎচন্দ্রের কিছু সাহিত্য সম্পর্কিত রচনা (যার বেশীর ভাগই অভিভাষণ আকারে লিখিত) সংকলিত আছে। এই রচনাগুলি এবং বিভিন্ন সময়ে বিভিন্ন উপলক্ষ্যে বিভিন্ন জনকে লেখা চিঠিপত্রের বয়ান দৃষ্টে মনে হয় সাহিত্যের সঙ্গে নীতির সম্পর্কের প্রশ্নে শরৎচন্দ্রের কিছু সুস্পষ্ট মত ছিল। তিনি মনে করতেন সত্যিকারের ভাল সাহিত্য দ্বনীতির প্রচার কোনমতেই করতে পারে না। নীতিশিক্ষা দেওয়াও তার কাজ নয়। এ বিষয়ে তিনি একবার লিখেছিলেন, “ভাল মন্দ সংসারে চিরদিনই আছে। হয়ত চিরদিনই থাকিবে। ভালকে ভাল, মন্দকে মন্দ, সেও বলে, মন্দের ওকালতি করিতে কোন সাহিত্যিক কোন দিন সাহিত্যের আসরে অবতীর্ণ হয় না, কিন্তু ভুলাইয়া নীতিশিক্ষা দেওয়াও সে আপনার কর্তব্য বলিয়া জ্ঞান করে না। দ্বনীতিও সে প্রচার করে না। একটুখানি তলাইয়া দেখিলে তাহার সমস্ত সাহিত্যিক দ্বনীতির মূলে হয়ত এই একটা চেফাই ধরা পড়িবে যে, সে মানুষকে মানুষ বলিয়াই প্রতিপন্ন করিতে চায়।” (শিবপুর ইনস্টিটিউটে সাহিত্য-সভার সভাপতির অভিভাষণ, ১৩৩০)। অগ্ন্য-পক্ষে ১৩৩১ সালে বঙ্গীয়-সাহিত্য-পরিষৎ নদীয়া শাখার বার্ষিক অধিবেশনে প্রদত্ত সভাপতির ভাষণে তিনি বলেন, ...“অতএব যা অসুন্দর, যা immoral, যা অকল্যাণ, কিছুতেই তা art নয়, ধর্ম নয়। Art for art’s sake কথাটাও যদি সত্য হয়, তা হলে কিছুতেই তা immoral এবং অকল্যাণকর হতে পারে না, এবং অকল্যাণকর এবং immoral হলে art for art’s sake কথাটাও কিছুতে সত্য নয়, শত সহস্র লোকে তুমুল শব্দ করে বললেও সত্য নয়।”

আমি প্রবন্ধের গোড়াতেই বলেছি শরৎচন্দ্র কলাইকবল্যবাদে বিশ্বাস করতেন না। কেন করতেন না তার মূল উপরের কথাগুলির মধ্যে নিহিত আছে। এই ভাষণেরই অপরাংশে তিনি বলেছেন— “Art জিনিসটা মানুষের সৃষ্টি, সে nature নয়। সংসারে যা কিছু ঘটে,—এবং অনেক নোঙ্রা জিনিসই ঘটে,—তা কিছুতেই সাহিত্যের উপাদান নয়। প্রকৃতির বা স্বভাবের

ছবছ নকল করা photography হতে পারে, কিন্তু সে কি ছবি হবে? দৈনিক খবরের কাগজে অনেক কিছু রোমহর্ষণ ভয়ানক ঘটনা ছাপা থাকে, সে কি সাহিত্য? চরিত্র সৃষ্টি কি এতই সহজ?" “দুনিয়ায় যা কিছু সত্যই ঘটে নির্বিচারে তাকেই সাহিত্যের উপকরণ করলে সত্য হতে পারে, কিন্তু সত্য সাহিত্য হয় না।” চন্দননগরের প্রবর্তক সম্ভবের আয়োজিত সাহিত্য-সভার আলাপচারীতেও তিনি একই কথা বলেছেন—সাহিত্যে দেহবাদের বিরুদ্ধে তাঁর আপসহীন মত প্রচার করেছেন।

এই কথাগুলি আমাদের বর্তমান সাহিত্যের কিছু কিছু অতিপ্রাকৃতবাদী কথাসাহিত্যিক ধীরচিন্তে অনুধাবন করে দেখলে ভাল হয়। বাস্তবের ছবছ অনুকারিতার নামে তাঁরা সাহিত্যসৃষ্টিকে প্রায় আবর্জনার জঞ্জালে পরিণত করে তুলেছেন। তাঁদের লেখায় সাহিত্য ও পোর্নোগ্রাফীর সীমারেখা ঘুচবার উপক্রম হয়েছে। তাঁরা শরৎচন্দ্রের হিতোপদেশে কর্ণপাত করে: আত্মসংশোধনের একটা মস্ত সুযোগ লাভ করে উপকৃত হবেন। জীবনের মলিন দিক শরৎচন্দ্র নিজেও কম দেখেননি, কখনও কখনও তাতে অনুলিপ্ত হয়েছেন, কিন্তু সেই বিসদৃশ প্রভাবের ছাপ তাঁর সাহিত্যে তিনি আদে ফেলতে দেননি—এইখানেই তাঁর সাহিত্যসৃষ্টির বৈশিষ্ট্য ও মহত্ত্ব।

‘চরিত্রহীন’ উপন্যাসকে অনেকে তার নামের থেকে সংকেত গ্রহণ করে দুর্নীতিপূর্ণ বলতে চান। এক সময়ে immoral বিবেচনায় এই উপন্যাসটি ভারতবর্ষ পত্রিকার কার্যালয় থেকে ফেরত এসেছিল। শেষে সেটি যমুনায় প্রকাশিত হয়। চরিত্রহীন উপন্যাসের এই তথাকথিত নীতিহীনতা আজকের পরিশীলিত নীতিবোধের মানদণ্ডের বিচারে মোটেই ধোপে টেকে না। শরৎচন্দ্র নিজেও এই নিন্দাস্বক কিংবদন্তীর বারবার সজোরে প্রতিবাদ করেছেন। তাঁর বালাবন্ধু প্রমথনাথ ভট্টাচার্য—যিনি ভারতবর্ষ পত্রিকার সঙ্গে সংশ্লিষ্ট ছিলেন—কে লেখা একাধিক পত্রে শরৎচন্দ্র বিশ্বসাহিত্যের দৃষ্টান্তের উল্লেখ করে অশ্লীলতার অভিযোগের খণ্ডন করতে চেয়েছেন। তিনি খেদের সঙ্গে তাঁর বন্ধুকে লিখেছেন তাঁদের যদি টলস্টয়ের প্রসিদ্ধ উপন্যাস রিসারেকশন পড়া থাকত তো চরিত্রহীনকে তাঁরা দোষাবহ মনে করতে পারতেন না। তিনি আরও জানিয়েছেন যে তিনি এথিকস-পড়া লোক, নীতিধর্মের মূল কথাগুলি তিনি অগ্র কারও চেয়ে কিছু কম জানেন না।

তিনি তাঁর সেই প্রতীতির ভিত্তিতে বলতে পারেন, চরিত্রহীন উপন্যাসের কোন অংশই তিনি দ্বন্দ্বীতিপূর্ণ করে আঁকেননি। তবু যদি কারও সে রকম মনে হয়ে থাকে তো সেটা তাঁর দুর্ভাগ্য।

শরৎচন্দ্রের এই সকল উক্তির মধ্যে তাঁর মৌলিক সাহিত্যচিন্তার রূপ-রেখার একটা আন্দাজ পাওয়া যায়। এর থেকে বোঝা যায়, স্নায়ু-অস্নায়ু নীতি-দ্বন্দ্বীতি সম্পর্কে তাঁর মত প্রচলিত মতের অনুবর্তী ছিল না। তাঁর বিবেচনায় সেই সাহিত্যই দ্বন্দ্বীতিপূর্ণ, অস্নায়ু, যে-সাহিত্য অকারণে মানুষের রিরংসাহৃতিকে উদ্ভিক্ত করতে চায় এবং এই অনুচিত পথে পাঠকের মনোযোগ কৃত্রিমভাবে আকর্ষণ করতে সচেষ্ট হয়। বাস্তব ঘটনার অবিকল অনুকরণ এরূপ একটি পথ। বলা বাহুল্য, শরৎচন্দ্র তাঁর লেখায় এই পথ বরাবর সমস্তে বর্জন করেছেন।

চরিত্রহীন উপন্যাসের কিরণময়ী আর সাবিত্রী চরিত্র নিয়ে সবচেয়ে বেশী আপত্তি উঠেছিল। কিরণময়ী প্রচলিত নীতিধর্মে অ বিশ্বাসিনী, প্রাচীন শাস্ত্রবচনগুলিকে সে কানাকড়িরও মূল্য দেয় না, সতীধর্মের প্রতিও তার তাদৃশ আস্থা আছে বলে বোধ হয় না, অন্ততঃ তার আচরণ সে কথার প্রমাণ দেয় না; কিন্তু মনে মনে সে পাতিব্রতের আদর্শের একান্ত গুণমুগ্ধা ও নিজ জীবনে তার ব্যত্যয় ঘটেছে বলে নিজের উপর বীতশ্রদ্ধা। অতীতের সাবিত্রী একটি মেসের ঝি, তার লম্পট ভগ্নীপতি তাকে বিয়ে করবার প্রতিশ্রুতি দিয়ে ভুলিয়ে গৃহের বার করে নিয়ে এসেছিল তারপর তাকে ত্যাগ করে। অপরের লুক্কদৃষ্টি তার উপর পড়েছিল বলে সে নিজেকে অশুচি মনে করে, হয়তো যে-পরিবেশে সে বাস করত সে-পরিবেশে তার পক্ষে পূরাপূরি শুচি জীবনযাপন করা সম্ভব ছিল না, কিন্তু তার ব্যবহার ছিল অতিশয় ভদ্র সংযত মাধুর্যমণ্ডিত। তার মার্জিত কথাবার্তায় ও অপূর্ব সেবাপরায়ণতায় মুগ্ধ মেসের অতীতম বাসিন্দা সতীশ তাকে ঝি শ্রেণীর স্ত্রীলোক বলে কখনও ভাবতে পারেনি, সাবিত্রীরও মেসের বাবুদের মধ্যে বিশেষ পক্ষপাত পড়েছিল সতীশের উপর কিন্তু এমনি তার শুচিতা ও পবিত্রতার দিকে নজর যে সে কখনও তার দেহকে অবলম্বন করে সতীশকে নষ্ট হতে দেয়নি বরং সর্বাবস্থায় তাকে সর্বনাশের কবল থেকে আগলে রাখবার চেষ্টা করেছে। সাবিত্রীর চরিত্রমাধুর্যের প্রভাবে পড়ে বেপরোয়াস্বভাব নেশাসক্ত সতীশের জীবনের মোড় ঘুরে গিয়েছিল।

এই তো হলো এই দুই চরিত্রের স্বভাবের মূল কাঠামো। এর মধ্যে তখন-কার কালের সনাতনী সমালোচকের দল নীতিহীনতার কোন্ বিশেষ উপাদান খুঁজে পেয়েছিলেন ভাবতে তাজ্জব লাগে। দুটি নারীরই মূল প্রবণতা প্রেম-তন্ময়তার দিকে, পরিবেশের ক্রেদ থেকে উদ্ধাব লাভ করে নির্মল হওয়ার দিকে। এমন চরিত্রে কেমন করে নীতিহীনতার কলুষ আরোপ করা যায় ভাল বুঝতে পারা যায় না। কিরণময়ী চরিত্রের পরিকল্পনায়, তার সংস্কার-মুক্ত কথাবার্তার ধরনে ও আচরণের ছাঁচে যা-ও বা আপত্তির কারণ থাকতে পারে, সাবিত্রীর বেলায় তেমন আপত্তি আদৌ টেকে না। কিরণময়ী চরিত্রের আপাত-বলিষ্ঠতা, পিলে-চমকানো কথাবার্তা প্রভৃতির মধ্য দিয়ে লেখক তার অন্তরের শূন্যতাকেই শুধু প্রকাশ করতে চেয়েছেন। কিরণময়ী যে শেষ পর্যন্ত পাগল হয়ে গেল সে আর কোন কারণে নয়, সে তার বাইরের বিদ্রোহ আর অশ্রদ্ধাপরায়ণতার সঙ্গে ভিতরের পবিত্রতার অভি-লাষের সামঞ্জস্য ঘটাতে পারলো না বলে। এ ঠিক বঙ্কিমচন্দ্রের হাতে রোহিণীর গুলীবদ্ধ হয়ে মরার ঘটনার মত স্থূল বা ক্রুর ঘটনা নয়, এ হলো সেই জাতের ঘটনার দৃষ্টান্ত যাতে বর্ণিত চরিত্র নিজের আভ্যন্তরীণ অসামঞ্জস্যের ভারে নিজেই ভেঙে পড়ে। কিরণময়ী তার অসামঞ্জস্য-জনিত tension সহ্য করতে না পেরে উন্মাদ হয়ে যায়, তার জগৎ নীতিশিক্ষক বঙ্কিমের পছন্দসূরূপে সামাজিক দাওয়াই গ্রয়োগ করে তাকে শাস্তি দেবার তাগিদ শরৎচন্দ্র অনুভব করেননি। এ রকম নিষ্ঠুর প্রক্রিয়ায় তাঁর আস্থা ছিল না। বাল্য-বন্ধু প্রমথনাথ ভট্টাচার্যকে এক চিঠিতে শরৎচন্দ্র লিখেছিলেন তোমরা চরিত্রহীন নিয়ে এত সোরগোল করছ, কিন্তু তোমরা দেখো এর সমাপ্তিটি আমি strictly moral করে আঁকব। এখানে strictly moral কথাটার ব্যঞ্জনা লক্ষণীয়। শরৎচন্দ্রের অভিলষিত moralityর ধারণায় মানবস্বভাবকে ছাপিয়ে সামাজিক অনুশাসনের প্রবলতার স্থান ছিল না, স্থান ছিল মানব-স্বভাবের নিজস্ব নীতিনিষ্পেক্ষ স্বীকার করে নেবার বলিষ্ঠতা। শরৎচন্দ্র কিরণ-ময়ীর স্বভাবকে অনুসরণ করে তার পরিণাম যেরূপ হওয়া উচিত তা দেখিয়েছেন, বঙ্কিমচন্দ্রের মত শাসনদণ্ড উদ্ভূত করে তাকে শাস্তি দেবার জগৎ তাকে পাগল বানাননি। Strictly moral বলতে এখানে তিনি শিল্পের নীতির কথাই বুঝিয়েছেন, সাহিত্যের স্বার্থের ইঙ্গিত করেছেন; সামাজিক নীতি-শাসনের কৃত্রিমতাকে বোঝাননি। তাকে মূল্য দেওয়া তো আরও পরের কথা।

তাছাড়া এ ব্যাপারে আরও কথা আছে। শরৎ-সাহিত্যের রচনারীতি মনোযোগের সঙ্গে পর্যালোচনা করলে দেখা যাবে, যে-কারণে সাহিত্য অলীলতা বা নীতিহীনতার দোষদৃষ্ট হয়—বাস্তবের অবিকল অনুকারিতা ও বন্ধাহীন বর্ণনা—তার চর্চা থেকে তিনি বরাবর দূরে ছিলেন। নর-নারীর দেহমিলন তিনি দেখিয়েছেন কিন্তু একজন খাঁটি আর্টিস্টের মত সংযত সংকেতের দ্বারাই তিনি সে-প্রয়োজন সাধন করেছেন, আজকের তথাকথিত উগ্র বাস্তববাদী লেখকের মত লেবু-চটকানোর ধরনে মিলন দৃশ্যের বর্ণনার হৃদ করে ছাড়েননি। অসাধারণ সংযমী লেখক শরৎচন্দ্র। এই ক্ষেত্রে তিনি বঙ্কিমচন্দ্র আর রবীন্দ্রনাথের সার্থক উত্তরসূরী এবং তারাশঙ্কর, বিভূতিভূষণ প্রমুখ কতিপয় পরবর্তীকালীন শক্তিশালী কথাসাহিত্যিকের প্রেরণার স্থল। চরিত্রহীন উপন্যাসের কথা হচ্ছিল। এই বইয়ের কোথাও কি এতটুকু ইঙ্গিত আছে যার দ্বারা মনে করতে পারা যায় আসঙ্গলিপ্সার সবিস্তার বর্ণনায় তাঁর সামান্য উৎসাহও পরিলক্ষিত হয়েছে? তবে এ বই চরিত্রহীনতার দোষে কলুষিত হলো কী প্রকারে? এক দেহলোলুপতার ছবি ফোটাবার অবকাশ ছিল রেঙ্গুন অভিযুক্তী জাহাজের ডেকে কিরণময়ীর প্রতি দিবাকরের সদ-জাগ্রত রূপমোহ ও জৈবক্ষুধার বর্ণনাংশে। কিন্তু সেখানেও শব্দের কী অসাধারণ ব্যয়কুষ্ঠা! সবিস্তার বর্ণনের কত অনীহা!

এ বিষয়ে আরও ভাল দৃষ্টান্ত আছে। আমি গৃহদাহ উপন্যাসের অচলা-সুরেশ সম্পর্কের কথা বলছি। ডিহরীতে বাস করা-কালীন এক রাত্রি অচলা-সুরেশের মধ্যে জৈব মিলন সাধিত হয়েছিল। দুয়ের স্বতঃস্ফূর্ত ইচ্ছায় নয়, ঘটনার দৈব চক্রান্তে। অন্ততঃ অচলার সজ্ঞান ইচ্ছার বিরুদ্ধে তো বটেই। এই দৃশ্যের কী অপরূপ ব্যঞ্জনাত্মিত গূঢ় ইঙ্গিতধর্মী বিবরণ শরৎচন্দ্র দিয়েছেন তা গৃহদাহের সংশ্লিষ্ট রচনাংশ তুলে ধরলেই বুঝতে পারা যাবে। গৃহকর্তা রামবাবু অচলাকে সুরেশের শয়নকক্ষের দিকে ঠেলে দিলেন। বৃদ্ধের বারংবার উপরোধ অগ্রাহ্য করতে না পেরে অচলা ধীর পায়ে সুরেশের শয়ন-কক্ষে গিয়ে উপস্থিত হলো। তারপর কী ঘটলো? শরৎচন্দ্রের বর্ণনা উদ্ধৃত করছি :

“বাহিরে মাত্র প্রকৃতি তেমনি মাতলামি করিতে লাগিল, প্রগাঢ় অন্ধকারে বিহ্বল তেমনি হাসিয়া হাসিয়া উঠিতে লাগিল, সারারাত্রির মধ্যে কোথাও তাহার লেশমাত্র ব্যতিক্রম হইল না।”

পরদিন অতিশয় ভোরে রামবাবু শয্যা থেকে গাত্রোথান করে দেখতে পেলেন, “বারান্দার এক প্রান্তে টেবিলে মাথা রাখিয়া সুরমা (অচলা) চেয়ারে বসিয়া আছে। ‘তুমি যে, এত ভোরে উঠেছ কেন?’ সুরমা একবার মাত্র মুখ তুলিয়াই আবার তেমনি করিয়া টেবিলের উপর মাথা রাখিল। তাহার মুখ মড়ার মত শাদা, দুই চোখের কোলে গাঢ় কালিমা এবং কালো পাথরের গা দিয়া যেমন ঝরণার ধারা নামিয়া আসে, তেমনি দুই চোখের কোল বাহিয়া অশ্রু ঝরিতেছে।

“বৃদ্ধ শুধু একটা অক্ষুট শব্দ করিয়া একদৃষ্টে এই অর্ধমৃত নারী-দেহের প্রতি নিঃশব্দে চাহিয়া রহিলেন, কোন কথাই তাঁহার কণ্ঠ ভেদিয়া বাহির হইতে পারিল না।”

কয়েকটি মাত্র কথার আঁচড়, কিন্তু কোন কথাই কি ব্যক্ত হতে বাকী আছে? “বাহিরে মৃত্ত প্রকৃতি” ভিতরের মৃত্ততার প্রতিক্রমক, অচলার মড়ার মত শাদা মুখ, দুই চোখের কোলে গাঢ় কালিমা ও কালো পাথরের গা থেকে ঝরণাধারার নেমে আসার মত দুই চোখে অশ্রুর প্লাবন, তার “অর্ধমৃত নারী-দেহ”, কোন সংবাদই অকথিত রাখেনি। পরপুরুষের সঙ্গে এই অবস্থিত অবৈধ মিলনে ভারতীয় নারীর সনাতন সংস্কার ও মজ্জাগত পাতিব্রত্যের আদর্শ কী সাংঘাতিকভাবে বিমর্দিত হয়েছে, সূক্ষ্ম সাংকেতিকতা-ময় শব্দগুলির মধ্য দিয়ে তারই কিছুটা আভাসে প্রকাশ পেয়েছে। শরৎচন্দ্র যে কত বড় শিল্পী ও তাঁর সাহিত্যভাবনা কত সুস্থ নীতির উপর প্রতিষ্ঠিত, এই অংশটির চিত্রণে তার অসংশয় পরিচয় তিনি রেখেছেন। আমাদের একালীন কথাকারদের মধ্যে যঁারা দেহমিলনের বর্ণনার ন্যূনতম সুযোগ পেলেও সেই সুযোগ ছাড়েন না এবং খুঁটিনাটি সমেত তার ষোলকানন বর্ণনাদানে মেতে ওঠেন, তাঁদের শরৎচন্দ্রের উদাহরণ থেকে শিক্ষা গ্রহণ করা উচিত এবং সেইভাবে নিজেদের রচনাকে পরিশোধিত করা উচিত।

৩

বাংলা সাহিত্য জগতের সঙ্গে সংশ্লিষ্ট ব্যক্তির জানেন সাহিত্যের রীতি ও নীতি নিয়ে এক সময়ে রবীন্দ্রনাথের সঙ্গে আধুনিক সাহিত্যের পক্ষ নিয়ে কিছু প্রবীণ ও নবীন লেখক বিতর্ক-যুদ্ধে প্রবৃত্ত হয়েছিলেন।

শেষোক্তদের মধ্যে শরৎচন্দ্র ছিলেন অন্যতম। ঘটনাটি এই : ১৩৩৪ সালের শ্রাবণ মাসের বিচিত্রা পত্রিকায় রবীন্দ্রনাথ ‘সাহিত্যের ধর্ম’ নামক এক প্রবন্ধ লেখেন। তাতে তিনি তৎকালীন তরুণ সাহিত্যিকদের (কল্লোল-কালিকলম-প্রগতি গোষ্ঠীর লেখকদের) লেখনীর অসংযমকে কটাক্ষ করে কিছু অকরণ মন্তব্য করেন। পরের মাসের বিচিত্রায় এই প্রবন্ধের তীব্র প্রতিবাদ ও সংশ্লিষ্ট তরুণ লেখকদের পক্ষ সমর্থন করে উষ্টুর নরেশচন্দ্র সেনগুপ্ত একটি জোরালো প্রবন্ধ প্রচার করেন। একে একে এই বিতর্কে যোগ দেন দ্বিজেন্দ্রনারায়ণ বাগচী, শরৎচন্দ্র এবং আরও কেউ কেউ। শরৎচন্দ্রের প্রবন্ধটি প্রকাশিত হয় ওই বছরের আশ্বিন মাসের বঙ্গবাণী পত্রিকায়। প্রবন্ধটির নাম ‘সাহিত্যের রীতি ও নীতি’। তাতে তিনি তরুণ লেখকদের পক্ষ অবলম্বন করে কবিগুরুর উদ্দেশে বেশ কিছু চোখা-চোখা বাণ নিক্ষেপ করেন। তরুণ লেখকদের প্রতি, তারুণ্যের প্রতি, তারুণ্যের সৃষ্টিক্ষমতার প্রতি শরৎচন্দ্রের গভীর বিশ্বাস ছিল। তাই তিনি স্থির থাকতে পারেননি। তরুণদের প্রতি মমতার বশে কবির সঙ্গে বাক্যুদ্ধে প্রবৃত্ত হয়েছিলেন। তাঁর নিজের সাহিত্য ছিল সংযমের পরাকাষ্ঠী কিন্তু যাঁদের হয়ে তিনি সওয়াল করতে নেমেছিলেন তাঁদের অনেকের রচনা সম্পর্কে কিন্তু সে কথা বলা যায় না। তরুণ লেখকদের একটা উল্লেখযোগ্য অংশই যে সে সময় জেনেওনে “বেআক্ৰতার” বাসনে মেতেছিলেন সে কথা আজ ইতিহাসের সত্যে পরিণত। কবির অভিযোগের বাস্তব ভিত্তি ছিল, কিন্তু শরৎচন্দ্র অভিযোগটিকে উড়িয়ে দেবার আগ্রহে কবির বিরুদ্ধে কিছু অতিরিক্ত ঝাঁঝ প্রকাশ করে ফেলেছিলেন। তীব্র ভীক্ষু ঝাঁঝালো লেখার নমুনা হিসাবে বিতর্কমূলক প্রবন্ধ-সাহিত্যের ইতিহাসে শরৎচন্দ্রের ওই লেখাটি দীর্ঘকাল স্মরণীয় হয়ে থাকবে।

কিন্তু শরৎচন্দ্র পরে স্বীকার করেছিলেন যে, কবির বিরুদ্ধে জেহাদ ঘোষণা করার সময় তাঁর নিজের বক্তব্যের অনুকূলে যথেষ্ট সাক্ষ্য-প্রমাণ তিনি সংগ্রহ করে উঠতে পারেননি—স্বল্প-পরিমাণ নজিরের ভিত্তিতে তিনি লড়াইয়ে অবতীর্ণ হয়েছিলেন। ওই সময়ের পরে এক বৎসরকাল যাবৎ তিনি তরুণদের লেখা বই-পত্র বিশেষ মনোযোগ সহকারে পড়েন। পড়ে এই সিদ্ধান্তে উপনীত হন যে, কবিগুরুর সমালোচনায় যথেষ্ট সারবত্তা ছিল। এই অকপট স্বীকারোক্তির পরিচয় আছে তাঁর ১৩৩৬ সালের



আম্বিন সংখ্যা মাসিক বসুমতীতে প্রকাশিত একটি অভিভাষণের বয়ানের মধ্যে। শরৎচন্দ্র যে কতখানি সত্যনিষ্ঠ ছিলেন তার পরিচয় পাওয়া এই স্বতঃপ্রসূত কবুলনামার মধ্যে। তরুণ লেখকদের উদ্দেশ্য করে তিনি এই ভাষণে বলেছেন : “তোমরা যারা এখানে আছ, রাগ করে আমার কথা নিও না। এ সব আমি অত্যন্ত দুঃখের সঙ্গেই বলেছি। বহুদিন সাহিত্য চর্চা করে যা ভাল বুঝেছি তার থেকেই বলছি, সংযত হওয়া দরকার। তোমরা সীমা অতিক্রম করেছ—একটু আধটু করেছ তা নয়, অনেকখানি করেছ। একটু আধটুর জায়গায় কোথাও কিছু হতো না। এ ক্ষেত্রে তা একেবারে নয়।”

কিন্তু মাত্র এই স্বীকারোক্তির জন্মই প্রবন্ধটি মূল্যবান নয়, এতে আরও এমন কিছু কথা আছে যা নবীন-প্রবীণ সকলেরই আমাদের বিশেষ প্রণিধান করা উচিত। ভারতীয় সমাজের শাস্ত্রশাসিত বিশেষ গড়নের জন্ম, অর্থ-নৈতিক অস্থির জন্ম, এদেশে যৌন অবদমনের সমস্যা একটি বাস্তব সমস্যা। এই কারণেই এদেশীয় তরুণ লেখকদের দৃষ্টি এই বিষয়টার দিকে বেশী করে আকৃষ্ট হয়। তাঁরা যেন আর কোন বিষয়বস্তু চোখেই দেখতে পান না। শরৎচন্দ্র এই একাঙ্গিতার সমালোচনা করে লিখেছেন : “কেবল একটা ব্যাপারে তোমরা বেদনা বোধ করছ।...বেদনার কি আর কোন বস্তু দেখতে পাও না? মানবজীবন, সমস্ত সংসার, এত বড় পরাধীন জাতি, এসব ত রয়েছে, এর বেদনা কি তোমরা অনুভব কর না? আমরা সব চাইতে দরিদ্র, আমাদের মধ্যে শিক্ষার কত অভাব, সামাজিক ব্যাপারে কত ক্রটি আছে, এসব নিয়ে তোমরা কাজ কর না কেন? এর অভাব, বেদনাটি তোমাদের লাগে না? এর জন্ম প্রাণটা কাঁদে না কি? তোমাদের সাহস আছে, কিন্তু সাহস বেবল একদিকে যৌনচিত্রণের দিকে হলে চলবে না। যেটাকে তোমরা সাহস মনে করছ, আমি মনে করি, সেটা সাহসের অভাব। এদিকে ত শাস্তির ভয় নাই, কেউ তোমাদের বিশেষ কিছু করতে পারবে না। যেদিকে শাস্তির ভয় আছে, সেদিকে সত্যসত্যি সাহসের দরকার। সেখানে তোমরা নীরব। লেখার শক্তি তোমাদের আছে স্বীকার করি; কিন্তু অণু জিনিস তোমরা ধরলে না। পরাধীন দেশের কত রকম অভাব আছে—নানা দিকে আছে—এটা যেন তোমরা একেবারেই অস্বীকার করে চলছ।”

শরৎচন্দ্র একেবারে মোক্ষম জায়গায় হস্তস্পর্শ করেছেন। আজও নবীন লেখকদের একটা মোটা ভাগ যৌনতার সমস্যা নিয়েই বুঁদ হয়ে আছেন, রাষ্ট্র সমাজ ও দেশের যে আরও বহুতর সমস্যা আছে তা তাঁদের কল্পনাকে মোটেই উচ্চকিত করে না। তাঁদের জিজ্ঞাসার বিস্তৃতির অভাব ও কেবল-মাত্র একটি বিষয়ের উপরেই অন্তহীন দাগা বুলনোর অভ্যাস যে বাংলা সাহিত্যের গণ্ডীকে নিতান্ত সংকীর্ণ সীমায় সীমিত করে রেখেছে সে তাঁরা দেখেও দেখছেন না। Sex জীবনের অনেকগুলি বিষয়ের একটি বিষয় মাত্র ; সেইটাই জীবন নয়। তাকে ছাপিয়ে যাওয়ার মধ্যেই জীবনের সার্থকতা ও পরিপূর্ণতা। শরৎ সাহিত্য থেকে যদি কিছু শিক্ষণীয় থাকে তো এই শিক্ষাই আমরা পাই।

## সমাজ-চেতনা

শরৎ সাহিত্য পূর্বাপর অনুধাবন করলে তার মধ্যে চিন্তার কিছু দ্বৈধতা লক্ষ্য করা যায়। ব্যক্তির স্তরে, তিনি ব্যক্তিমুক্তির একজন প্রবল উদ্গাতা; পরিবারের স্তরে, বেশ কিছু পরিমাণে রক্ষণশীল; আর ব্যক্তি ও পরিবার নিয়ে গঠিত যে সমাজ, তার পরিপ্রেক্ষিতে কখনও স্বাধীনতার অনুরাগী কখনও রক্ষণশীলতার পক্ষপাতী। সমাজের প্রসঙ্গে কখনও তিনি ভাঙনের জয়গান করেছেন, বিদ্রোহের মন্ত্রণা দিচ্ছেন, কখনও আবার একেবারে বিপরীত প্রান্তে চলে গিয়ে প্রচলিত সামাজিক কাঠামোর সংহতি রক্ষার প্রয়োজনীয়তার উপর জোর দিচ্ছেন। অর্থাৎ এক কথায় বলতে গেলে, শরৎ সাহিত্যের পরিবেশিত ভাবধারায় পূর্বাপর সামঞ্জস্য নেই—এক সময়ের ভাবনা অণু সময়ের ভাবনার দ্বারা খণ্ডিত, এক বইয়ের বক্তব্য অণু বইয়ে বক্তব্যে অঙ্গীকৃত।

অবশ্য এতে আশ্চর্য হওয়ার কিছু নেই। কোন বড় লেখকের মনোজীবনই একটা সোজা সরল রেখায় অগ্রসর হয় না। তার চলার পথে বাঁক থাকে, বাঁক কখনও ডাইনে কখনও বাঁয়ে মোড় নেয়; কখনও আবার পথ সম্পূর্ণ উটোমুখে ঘুরে যায়। এই অসামঞ্জস্য বা স্বতো-বিরোধ লেখককে ছোট করে না বরং শিল্পীর মানসিকতা যে প্রায়শঃ খুবই জটিলতামণ্ডিত এবং বহু পরস্পর-বিরোধিতার আধারস্থল—সেই সত্যেরই জানান দিয়ে যায় মাত্র। চিন্তার অসামঞ্জস্যহীন সরল গতি মাঝারি মাপের শিল্পীর লক্ষণ, মহৎ শিল্পীর ব্যক্তিত্বের বিবর্তনের ছকের ভিতর কিছু না কিছু আত্মখণ্ডন থাকবেই। কণ্ট্রাডিক্শন মহৎ মনের ধর্ম—এরূপ কথাও, এমনকি, কেউ কেউ বলেছেন।

শরৎ সাহিত্যের এই যে দ্বৈধতা, স্বতোবিরোধ, এর একাধিক কারণ নিশ্চয়ই মনস্তাত্ত্বিক বিশ্লেষণের আলোয় নিরূপণ করা সম্ভব; তবে মনে হয় চেষ্টা করলে শরৎচন্দ্রের জীবনীর ছক থেকেই এমনতর অসামঞ্জস্যের কিছু হেতুভূত ভিত্তি খুঁজে পাওয়া যেতে পারে। শরৎচন্দ্র হুগলী

জেলার এক নির্বিক্ত কুলীন ব্রাহ্মণ বংশে জন্মগ্রহণ করেছিলেন। রাঢ়দেশীয় কুলীন ব্রাহ্মণের বহু অন্ধ সংস্কার তাঁর মজ্জার মধ্যে ছিল। এ তিনি জীবনের শেষ দিন পর্যন্ত কাটিয়ে উঠতে পারেননি। যেমন উপবীতের মহিমায় বিশ্বাস, ছোঁয়াছুঁয়ি বাঁচিয়ে চলার সার্থকতায় বিশ্বাস, সন্ধ্যাহ্নিক পূজা-আর্চা, স্বপাক আহার, স্বপাক আহারের অভাবস্থলে কেবলমাত্র স্বজাতির প্রস্তুত আহার গ্রহণ দ্বারা দৈহিক ও মানসিক গুচিতা রক্ষার প্রয়াস প্রভৃতি ব্রাহ্মণোচিত আচার-প্রথা পালনের সার্থকতায় বিশ্বাস, জাতপাতের ভেদ মেনে চলায় বিশ্বাস, অসবর্ণ বিবাহরীতির প্রতি নিতান্ত কুণ্ঠিত সমর্থন ইত্যাকার নানা নিদর্শনের মধ্যে শরৎচন্দ্রের এই গতানুগতিক সংস্কারানুগত্যের পরিচয় পাওয়া যায়। বিধবার পুনর্বিবাহের যৌক্তিকতায়ও তিনি পূরাপূরি বিশ্বাস করতেন বলে মনে হয় না, কারণ তাঁর এমন একটি বইও নেই যার কাহিনী-বৃত্তের ঘটনা সংস্থাপনের মধ্যে বিধবার পুনরায় বিয়ে দেবার মত মনোবল তিনি সংগ্রহ করে উঠতে পেরেছেন দেখা যায়। যদিও এরকম ঘটানোর সম্ভাবনা একাধিক গল্প-উপন্যাসের কাহিনীর মধ্যেই ছিল। দৃষ্টান্তস্বরূপ, পল্লীসমাজের রমা ও রমেশের ভালবাসার উল্লেখ করা যায়। তিনি তাঁর একাধিক ভাষণে ও প্রবন্ধে বঙ্কিমচন্দ্রের বিধবাদের প্রতি নিষ্করণতার সমালোচনা করেছেন কিন্তু স্বয়ং বঙ্কিমচন্দ্রের চেয়ে অধিক উদারতা দেখিয়েছেন তারও কোন প্রমাণ নেই।

যদি বলেন শরৎচন্দ্রের প্রতি আরোপিত এ সকল অভিযোগ আমার মনগড়া কল্পনামাত্র, সেক্ষেত্রে কিছু কিছু উদাহরণের সহযোগে অভিযোগ-গুলির সারবত্তা প্রতিপাদনের চেষ্টা করতে হয়। পল্লীসমাজের রমা-রমেশের কথা এইমাত্র বলেছি। ছোঁয়াছুঁয়ি তথা আহারের গুচিতা রক্ষা প্রভৃতি সংকীর্ণচিত্ত অভ্যাসগুলির সম্পর্কে শরৎচন্দ্রের মনোভাব বোঝাবার জন্য দুটি উপন্যাসের দৃষ্টান্ত নেওয়াই যথেষ্ট—চরিত্রহীন ও পথের দাবী। চরিত্রহীনে সতীশ মদপ, মন্দ বন্ধুর প্ররোচনায় পড়ে অস্থান-কুস্থানে যাওয়ারও তার অভ্যাস আছে; কিন্তু হুবেলা তার নিয়মমাত্রিক সন্ধ্যাহ্নিক আচমনাদি না করলেই নয়। আর মেসের বি সাবিত্রীর তো একটা প্রধান কাজই হলো রোজ সকাল ও সন্ধ্যায় সতীশবাবুর সন্ধ্যাহ্নিকের জায়গা নিকানো, পূজার আসন, কোশাকুশি আর গঙ্গাজল এগিয়ে দেওয়া। এত আচারনিষ্ঠার বাড়াবাড়ি এক এক সময় আধিখ্যেতা বলে মনে হয়।

বলা হবে সতীশের চরিত্রকে নিখুঁতভাবে আঁকবার জগ্য ব্যক্তিত্বের এই দিকটাকে দেখানোর প্রয়োজন ছিল ; কিন্তু এই যুক্তির উত্তরে বলব যে, লেখকের নিজের আচার-মনস্কতাই এই ক্ষেত্রে তাঁর বর্ণিত চরিত্রের উপর প্রক্ষিপ্ত হয়েছে, নয়তো এতদূর বাড়াবাড়ি কখনও সম্ভব হতে পারতো না।

কিন্তু সবচেয়ে অবাক করে পথের দাবী উপন্যাসের অপূর্ব চরিত্রটি। হালদার বংশীয় এই যুবক বিশ্ববিদ্যালয়ের সর্বোচ্চ উপাধিদারী একজন আধুনিক শিক্ষায় শিক্ষিত ব্যক্তি—কলকাতা থেকে জীবিকার প্রয়োজনে সে তথাকথিত স্নেচ্ছের দেশ বর্মা মূলুকে এসেছে বোখা কোম্পানীর চাকরি নিয়ে। কিন্তু ছোয়াছুঁ'য়ের শুচিবাই তার আর কিছুতে ঘুচতে চায় না। আচার-বিচারের খুঁতখুঁতেপনায় বাংলার শুচিবায়ুগ্রস্ত বিধবাকেও সে হার মানায়। সে নাকি অত্যন্ত মাতৃভক্ত সন্তান, পাছে মায়ের প্রাণে ব্যথা লাগে সেই কারণে এই দূর দেশে এসেও সে আহারে-বিহারে ব্রাহ্মণোচিত আচার-পরায়ণতা রক্ষায় সতত সচেষ্ট। শুচিতার পানটি থেকে চুণটি পর্যন্ত খসবার যো নেই এমনি তার সতর্কতা! মা ছেলেকে প্রাণ ধরে বর্মা মূলুকে আসতে দেবার সময় পরিবারের অত্যন্ত বিশ্বাসী পাচক ঠাকুর তেওয়ারীকে সঙ্গে দিয়েছেন তাই রক্ষা নতুবা অপূর্ব হয়তো এই স্নেচ্ছের দেশে আসাই হতো না। তেওয়ারী মায়ের বকলমে অপূর্বকে সতত আগলে রাখে, আর অপূর্ব তেওয়ারীর বকলমে অকুস্থলে অনুপস্থিত মায়ের কাছে তার নির্ভাজ শুচিতার নিত্য পরীক্ষা দেয়। এইভাবে প্রভু ও ভৃত্য দুইয়ে মিলে রেঙ্গুন শহরের বুকুর উপর হিন্দুয়ানীর এক ঐর্ভেদ্য থুর্গ খাড়া করে তুলেছে। অপূর্ব ক্রীষ্টানের মেয়ে ভারতীকে মনে মনে ভালবাসে কিন্তু তার হাতে খেতে-ছুঁতে তার প্রবল আপত্তি। সে সরকার মশাইয়ের পরিচালিত ব্রাহ্মণ হোটেলের কদম্ন খাবে তবু ভারতীর সম্বন্ধে প্রস্তুত আহাৰ্য মুখে তুলবে না। আচারের এই গোঁড়ামির চিত্র পথের দাবী উপন্যাসের গোড়ার দিকের অনেকগুলি পৃষ্ঠা এমন জুড়ে আছে যে, ওই এককালীন রাজরোমনগ্নহীত প্রসিদ্ধ উপন্যাসের বৈপ্লবিকতার স্বাদ তার ফলে অনেকটাই ফিকে হয়ে গেছে বললেও চলে। অথচ এ জিনিস'এ বইয়ের পক্ষে অপরিহার্য ছিল না, শুধু শরৎচন্দ্রের অতিরিক্ত আচার-বিচারের 'বাই'—ব্রাহ্মণত্বাভিমান—কাহিনীর ধারার ভিতর অনুপ্রবিষ্ট হয়ে এই বিজাটের সৃষ্টি করেছে। ছোয়াছুঁ'য়ের প্রসঙ্গ বিপ্রদাস উপন্যাসেও বড় কম

নেই। শরৎ সাহিত্যে প্রসঙ্গটির উপযুক্ত পরি অবতারণা পৌনঃপুনিকতার এক-  
ঘেয়েমিতে রূপান্তরিত হয়েছে বললে অগায় বলা হয় না।

স্বপাক আহ্বারের মহিমা উদঘোষিত হয়েছে গৃহদাহ উপন্যাসের ডিহরী  
প্রবাসী সদাশয় বৃদ্ধ বাঙালী ব্রাহ্মণ রামচরণ লাহিড়ীর চরিত্রচিত্রণের মধ্য  
দিয়ে। তিনি সচরাচর নিজে বেঁধে খেতেই অভ্যস্ত, পারতপক্ষে অণুর  
রান্না ছৌন না। ব্রাহ্মদের প্রতি রামবাবুর বিতৃষ্ণার অন্ত নেই (এই বিতৃষ্ণা  
কতকটা শরৎচন্দ্রের নিজেরও ছিল, দত্তা উপন্যাসের রাসবিহারী চরিত্র আর  
গৃহদাহের কেদারবাবু চরিত্র তার প্রমাণ। এখানেও লেখকের অনীহা  
তঁার সৃষ্টি এই দুই চরিত্রে প্রযুক্ত হয়েছে বললে অগায় হয় না।); তারা হিন্দু  
সমাজের গণ্ডী ত্যাগ করে নিজেরা একটা আলাদা সমাজ গড়ে তুলেছে  
বলে তাদের তিনি মনে মনে কোনদিনই ক্ষমা করতে পারেননি। কিন্তু  
গৃহদাহের উপসংহারভাগে দেখা যায় রামবাবুর আত্মস্তিক ‘স্বজাতিপ্রীতি’  
আর আচারনিষ্ঠার দুর্গপ্রাকার শেষ অবধি তাসের ঘরের মত ভেঙে পড়েছে।  
এইখানে আর শরৎচন্দ্র সংস্কারচালিত লেখক নন, বরং সংস্কারের উদ্দেশ্যে উঠে  
নিরাসক্ত দৃষ্টিতে সমাজপ্রবাহ লক্ষ্য করার শিল্পীজনোচিত প্রকৃত শক্তিমত্তাই  
এখানে প্রকাশিত হয়েছে। রক্ষণশীলতার উপরে এখানে প্রগতির জয়  
হয়েছে। বিষয়টির আলোচনা এই প্রবন্ধেই পরে আরও করার অবকাশ  
হবে, সুতরাং এখানে প্রসঙ্গটিতে দাঁড়ি টানি।

কিন্তু কৌলিক সংস্কারের উদ্দেশ্যে শরৎচন্দ্রের ব্যক্তিত্বের আর একটি দিক  
ছিল, যেখানে তিনি বিস্ময়কররূপে স্বাধীন, মুক্ত প্রকৃতির মানুষ। তাঁর  
ভবঘুরে, বাউগুলে জীবনের বিচিত্র অভিজ্ঞতাই তাঁর এই মুক্তমনা স্বরূপের  
কারণ। চন্দননগরে প্রবর্তক সজ্জের আহূত আলাপসভায় (১৩৩৭ বঙ্গাব্দ)  
আলাপচারীর প্রসঙ্গে তিনি তাঁর প্রথম জীবনের এই দিকটির একটি অকপট  
আভাস দিয়েছিলেন এইভাবে : “অভিজ্ঞতা না থাকলে ভাল কিছুই লেখা যায়  
না। অভিজ্ঞতা লাভের জন্য অনেক কিছুই করতে হয়। অতি ভদ্র শাস্তশিষ্ট  
জীবন হবে, আর সমস্ত অভিজ্ঞতা লাভ হবে—তা হয় না। বলেছি—ইচ্ছায়  
হোক অনিচ্ছায় হোক—আমাকেও চার পাঁচবার সন্ন্যাসী হতে হয়েছিল।  
ভাল ভাল সন্ন্যাসীরা যা করেন সবই করেছি। গাঁজা মালপো কিছুই বাদ  
যায়নি।……বিশ বছর এইটাতে গেল। এই সমস্ত খানকতক বই লিখে  
ফেললুম। ‘দেবদাস’ প্রভৃতি ঐ আঠার-কুড়ির মধ্যে লেখা। তারপর গান

বাজনা শিখতে লাগলুম। পাঁচ বছর এতে গেল। তারপর পেটের দায়ে চলে গেলাম নানা দিকে। প্রচণ্ড অভিজ্ঞতা তাই থেকে। এমন অনেক কিছু করতে হত যাকে ঠিক ভাল বলা যায় না। তবে সুকৃতি ছিল, ওর মধ্যে একেবারে ডুবে পড়িনি। দেখতে থাকতাম, সমস্ত খুঁটিনাটি খুঁজে বেড়াতাম। অভিজ্ঞতা জমা হত। সমস্ত islandগুলো (বর্মা, জাভা, বোর্নিয়ো) ঘুরে বেড়াতাম। সেখানকার লোক অধিকাংশ ভাল নয়—smugglers. এইসব অভিজ্ঞতার ফল—‘পথের দাবী’। বাড়িতে বসে আর্মচেয়ারে বসে সাহিত্য-সৃষ্টি হয় না, অনুকরণ করা যেতে পারে। কিন্তু সত্যিকার মানুষ না দেখলে সাহিত্য হয় না। মানুষ কি, তা মানুষ না দেখলে বোঝা যায় না। অতি কুৎসিত নোংরামির ভিতরও এত মনুষ্যত্ব দেখেছি যা কল্পনা করা যায় না।”

উদ্ধৃতিটি একটু বিস্তৃত হয়ে গেল। কিন্তু সেটা অকারণে নয়। উদ্ধৃতির বিস্তারের মধ্যে লেখকের জীবনের যে রূপরেখাটি পাওয়া গেল তা আমাদের সচরাচর প্রচলিত বাঙালী মধ্যবিত্ত জীবনের ছাঁচের সঙ্গে একেবারেই মেলে না। এর জাত-গোত্রই আলাদা। এই জীবনীর ছাঁচ সম্পূর্ণ unconventional—গতানুগতিকত্বরহিত। শুধু unconventional বললে সবটুকু বলা হয় না, বলা উচিত বৈপ্রবিক। যে-মানুষ জীবনের চলার পথে সুন্দর-কুৎসিত কালো-ধলো জটিল-অজটিল নানা বিচিত্র বহুমুখী অভিজ্ঞতার উজান ঠেলে এগিয়ে যেতে বাধ্য হয়েছে তার গায়ে কি আর কৌলিক সংস্কার পূরাপূরি সংলগ্ন থাকতে পারে? তার জীবনযাপনের ধরনই তো তাকে বংশগতির প্রভাব থেকে মুক্ত করবার সবচেয়ে বড় সহায়ক। শরৎচন্দ্র তাঁর জীবনীর স্তরে প্রকৃত আর্টিস্টের জীবনযাপন করে গেছেন, আর বলাই বাহুল্য, আর্টিস্টের জীবনে কৌলিক সংস্কারের লেশ বড় একটা অবশিষ্ট থাকে না, থাকলেও সর্বসংস্কারমুক্তির আবেগের তলায় চাপা পড়ে নিতান্ত পিষি হয়ে পড়ে।

তবু যে শরৎচন্দ্রের সত্তায় ব্রাহ্মণত্বের অভিমান খুচেও খুচতে চায়নি, সে এই হেতু সে, তিনি সমস্ত বিবর্তন-পরিবর্তনের মধ্যেও এটিকে সজ্ঞানে সযত্নে লালন করেছেন। কতকটা তাঁর বাল্য ও কৈশোর জীবনের প্রতি মমত্ববশতঃ, কতকটা রাষ্ট্রদেশীয় ফুলীন ব্রাহ্মণের মজ্জাগত অনুদারতার জন্ম। কথাটা খানিকটা প্রাদেশিক শোনালেও আমি বলতে বাধ্য যে, এই ব্রাহ্মণের মনো-গঠনের ভিতর অন্ধ আচার-অনুষ্ঠানের প্রতি আসক্তি, ছোঁয়াছুঁয়ী জাত-বিচারের প্রবণতা, পুরাতন রীতিনীতিকে আঁকড়ে থাকবার মোহ প্রভৃতি যুক্তিহীন মনো-

বৃত্তি প্রায় দিনের সঙ্গে রাত্রি, আলোর সঙ্গে অন্ধকার অচ্ছেদ্যভাবে সংলগ্ন থাকবার মত উচ্চশিক্ষা আর সাংস্কৃতিক পালিশ সত্ত্বেও অস্তিত্বের সঙ্গে আঁঠেপৃষ্ঠে লেপ্টে আছে। এই কারণেই [শরৎচন্দ্রের ব্যক্তিত্বের ভিতর এক অদ্ভুত দ্বৈধতার সমাবেশ দেখতে পাই।--তিনি বাস্তব জীবনের বহুমুখী অভিজ্ঞতার দৌলতে একজন সর্বসংস্কারমুক্ত পুরুষ, পক্ষান্তরে কৌলিক স্তরে সংস্কারের হাতে-ধরা বশব্দ প্রকৃতির এক জীব।] নয়তো এমন অবিশ্বাস্য, অসম্ভব ব্যাপার কী করে সম্ভব হয় যে, যিনি বাংলা সাহিত্যে বিপ্লবী ঐতিহ্যের অনুসরণে অভয়া, কিরণময়ী, সবাসাচী, কমলের মত অবিস্মরণীয় সব চরিত্রের সৃষ্টি করেছেন, বিদ্রোহের জয়ধ্বজা উড়িয়ে দিয়েছেন তাদের কর্ম ও কথার মধ্যে দিয়ে, তিনিই আবার তাঁর এক স্নেহের ভগিনীর কাছে এই অকপট স্বীকারোক্তি করেছেন যে, “দিদি, আমি কোন কালে খাওয়া ছোঁওয়ার বাহ্যবিচার করিনে, কিন্তু মেয়েদের হাতে আমি কোনদিন কিছু খাইনে। শুধু খাই তাঁদের হাতে যাদের বাপ মা দুজনেই ব্রাহ্মণ এবং বিয়েও হয়েছে ব্রাহ্মণের সঙ্গে।... সমাজভুক্ত হোন তাতে আসে যায় না, কিন্তু ঐ রকম মেশানো জাত হলে আমি তাঁদের ছোঁয়া খাইনে। তারা বলে শরৎবাবু শুধু লেখেন বড় বড় কথা, কিন্তু বাস্তবিক তিনি ভারি গোঁড়া। আমি গোঁড়া নই লীলা, কিন্তু শুধু রাগ করেই এদের হাতে খাইনে।” (শ্রীযুক্ত লীলারানী গঙ্গোপাধ্যায়কে লিখিত পত্রের অংশ)।

এই স্বীকারোক্তিমূলক পত্রাংশ থেকে দুটি জিনিস পাওয়া যাচ্ছে। এক, মুখে অস্বীকার করলেও তিনি খাওয়া-ছোঁওয়ার বাহ্যবিচার মানতেন। বাহ্যবিচারের বেলায় ব্রাহ্মণের প্রতি তাঁর বিশেষ পক্ষপাত ছিল। দুই, কোন একটি বিশেষ সমাজভুক্ত মেয়েদের প্রতি তাঁর অন্তরের বিরাগ ছিল। শ্রীযুক্ত গঙ্গোপাধ্যায়কে লিখিত সংশ্লিষ্ট চিঠি ও অন্যান্য চিঠি (শরৎ-সাহিত্য-সংগ্রহ, ত্রয়োদশ সপ্তার দ্রষ্টব্য) পর্যালোচনা করলে বুঝতে অসুবিধা হয় না যে, তিনি এখানে ব্রাহ্মসমাজের মেয়েদের কথাই বলতে চেয়েছেন। একজন বহুদর্শী বহুশ্রুত মানুষের, বিশেষ করে শিল্পী মানুষের, জীবনে এরকম সাম্প্রদায়িক অনুদারতা থাকাটা যে বাঞ্ছনীয় নয় সে কথা শরৎচন্দ্রের মত সংবেদনশীল লেখকের চেয়ে আর বেশী কে জানতেন? তা সত্ত্বেও তিনি তাঁর এই সংকীর্ণচিত্ত বিরাগকে ভাষা না দিয়ে পারেননি। অতি বড় মহৎ লেখকের জীবনেও যে কত সময় কত কুসংস্কার থাকে এ তারই একটা প্রমাণ। এই নিয়ে আক্ষেপ জানানো চলে, তাই বলে হয়-কে নয় করা যায় না।



আমার মনে হয় শরৎচন্দ্রের অভিজ্ঞতার ঝুলিতে যে অফুরন্ত মালমশলা ছিল, যে-সুবিশাল মানবীয় জ্ঞানের পুঁজি ছিল, তাইতে তিনি আরও অনেক বড় লেখক হতে পারতেন, পেতে পারতেন একজন অপ্রতিদ্বন্দ্বী মননশীল লেখক-রূপে অসংশয় প্রতিষ্ঠা; শুধু তাঁর এই অনুদার প্রাদেশিকতা আর সাম্প্রদায়িকতাই তাঁকে তা হতে দেয়নি, পেতে দেয়নি।] কবিগুরু রবীন্দ্রনাথের সঙ্গে এইখানেই তাঁর মৌলিক পার্থক্য।] রবীন্দ্রনাথ জোড়াসাঁকো ঠাকুরবাড়ি থেকে জীবনারম্ভ করেছিলেন, তারপর প্রতিটি অভিজ্ঞতার অধ্যায়কে সোপান রূপে ব্যবহার করে তাদের ধাপে ধাপে পেরিয়ে, জীবনের শেষ পর্যায়ে যেখানে এসে পৌঁছেছিলেন সেখানে আন্তর্জাতিকতার বিরাট অঙ্গন বিস্তৃত ও তাতে বিশ্বের সর্বজাতির মেলা বসেছে; সেখান থেকে জন্ম-ক্ষেত্র জোড়াসাঁকো ঠাকুরবাড়িকে সুদূর নীহারিকালোকের ধূস্রপুঞ্জের মত অস্পষ্ট আভাসে চোখে পড়ে মাত্র, তার বেশী অনুভব করা যায় না। কিন্তু শরৎচন্দ্রের বেলায় তেমন নয়। [তিনি বর্মা ভাড়া বোর্নিয়ো ইত্যাদি দক্ষিণ-পূর্ব এশিয়ার দেশগুলি পরিভ্রমণ করলেও এবং জীবনে বিচিত্র-বিপুল-বিবিধ অভিজ্ঞতার শরিক হয়ে অগুণতি মানুষ চরে গেলেও তাঁর মনের এক কোণায় কিন্তু আমরণ হুগলী জিলার দেবানন্দপুর গ্রাম সংস্কৃত হয়ে ছিল। এর পেছুটান তিনি কোন সময়েই কাটিয়ে উঠতে পারেননি।] তাই তাঁর মধ্যে এত বৈসাদৃশ্য, এত অসামঞ্জস্য, এত ধ্বনিরোধ। তাই তিনি পথের দাবীর মত রাজনৈতিক বিপ্লব আর শেষ প্রশ্নের মত সামাজিক বিপ্লবের বাণীবাহক উপস্থাসের স্রষ্টা হয়েও বাংলার একজন ভ্রষ্ট গার্হস্থ্য জীবনের রূপকার, অভুতনায় পারিবারিক গল্লোপগামের অমর কথাকার। আর কী আশ্চর্য, [বাংলার পাঠক তাঁর বৈপ্লবিক রূপটাকে তেমন নেয়নি যেমন নিতে পেরেছে তাঁর এই সাধারণ সুখ-দুঃখবেদনায় ভরা গৃহসংসারের স্নিগ্ধ-মধুর চিত্রগুলিকে। তবে কি শরৎচন্দ্রের সংস্কারমুক্ত বৈপ্লবিকতা নিষ্ফল হয়েছে? [তাঁর সংস্কারানুগত গৃহবদ্ধ পারিবারিক শিল্পীর রূপটাই সব ছড়িয়ে বাঙালী পাঠকের চিত্তজয় করেছে?]

এই প্রশ্নের ঠিক ঠিক উত্তর দেওয়া সোজা নয়। তবে আটের এ এক বিচিত্র খেলাল যে, অনেক সময় তাঁর বিচারে চূড়ান্ত বিপ্লবও উপেক্ষিত হয়, 'সে আঁকড়ে ধরে থাকতে চায় গৃহ-সংসারের ছোটখাট সুখ-দুঃখকে আর তাতেই সে সমধিক স্ফূর্তি অনুভব করে। দিগন্তের অভিযাত্রী বহিরাবেগ অপেক্ষা কুপমণ্ডুকতাই যেন তার বেশী ভাল লাগে, আকাশে হাত বাড়ানো অপেক্ষা

সে যেন গৃহাঙ্গনেই লগ্ন হয়ে থাকতে বেশী পছন্দ করে। সাগরের উত্তাল তরঙ্গমালায় ছোটোপাটি খাওয়ায় তার আনন্দ নয়, বাড়ির খিড়কি পুকুরের শান্ত স্থির জলে অবগাহন-স্নানেই তার দেহের আরাম, প্রাণের তৃপ্তি।

শরৎচন্দ্রের শিল্পসৃষ্টিগুলির মূল্যায়ণে অগ্রসর হলে উপরের এই মন্তব্যের সার্থকতাই যেন বেশী চোখে পড়ে। [শিল্পের মানদণ্ডে তাঁর বিরাজ-বো, পল্লী-সমাজ, অরক্ষণীয়া, নিষ্কৃতি, পণ্ডিতমশাই, বৈকুণ্ঠের উইল প্রভৃতি পল্লীভিত্তিক পারিবারিক উপন্যাসগুলি যতটা উৎরেছে এমন বোধকরি আর কোন উপন্যাস নয়। গল্পের ক্ষেত্রে এলেও একই ব্যাপার দেখতে পাই। বিন্দুর ছেলে, রামের সুমতি, মহেশ, অভাগীর স্বর্গ, একাদশী বৈরাগী প্রভৃতি গল্পের কোন তুলনা হয় না।] অথচ সে সব রচনার বিষয়বস্তু কত তুচ্ছ, বহির্জগতে ব্যাপ্ত ভাবনা-ধারণা থেকে কত বিচ্ছিন্ন। যে-শরৎচন্দ্র বিপ্লবের বাণীবাহক, সেই শরৎচন্দ্র অপেক্ষা সংস্কারাবদ্ধ পারিবারিক অকিঞ্চিৎকর গার্হস্থ্য সুখদুঃখের রূপকার শরৎচন্দ্র বাঙালী পাঠকের অধিক প্রিয়। এর থেকে আটের নিজস্ব নিয়মনীতির বৈশিষ্ট্যটাই শুদ্ধ ধরা পড়ে। শিল্প ব্যক্তির সুখ-দুঃখ প্রেম-ভালবাসা, ব্যর্থতা নৈরাশ্য আশার উল্লাস ইত্যাদিকেই বড় করে দেখে; ব্যক্তির ভাবজীবনকে নয় বা তার আদর্শবাদকে নয়। আদর্শবাদ মননশীলতার বস্তু, পক্ষান্তরে ব্যক্তির ব্যক্তিগত হৃদয়ের সংবাদ অনুভূতির বস্তু। শিল্পের কাছে এই শেষোক্তেরই আদর বেশী। যেহেতু শিল্প ব্যক্তিভিত্তিক, সামূহিক নয়, তার কাছে ভাবজীবনের তত দাম নয়, যত ব্যক্তিগত প্রেমপ্রণয়-আশা-নিরাশার ছবির। শরৎ সাহিত্যের বেলায় এ কথাটা আমরা যত অনুভব করি এমন বোধকরি আর কারও সাহিত্যের বেলায় নয়।

কয়েকটি দৃষ্টান্ত দিলে বিষয়টি সমধিক পরিস্ফুট হতে পারে। সেই সঙ্গে শরৎচন্দ্রের ব্যক্তি, পরিবার, সমাজ ও রাষ্ট্র সম্পর্কিত ধারণাগুলিরও একটা স্পর্শকাতর ছবি পাওয়া যেতে পারে।

আমরা জানি শরৎচন্দ্র কয়েকটি বিদ্রোহিনী নারীচরিত্রের সৃষ্টি করেছিলেন। তাঁর মধ্যে ত্রীকান্ত দ্বিতীয় পর্বের অভয়া, তৃতীয় পর্বের সুনন্দা, চরিত্রহীন উপন্যাসের কিরণময়ী ও শেষ প্রশ্নের কমল সবচেয়ে উল্লেখযোগ্য। এদের মধ্যে আবার সবচেয়ে বিদ্রোহিনী অভয়া। কেবল কথায় বিদ্রোহিনী নয়, আচরণে বিদ্রোহিনী। অভয়া রোহিণীবাবুর সমভিব্যাহারে বর্মা যুদ্ধে এসেছিল বিয়ের পর থেকেই নিখোঁজ স্বামীর খোঁজ করতে। এসে দেখল স্বামী এক

বর্মিনীকে। বয়ে করে বাচ্চাবাচ্চা নিয়ে দিব্যি জমিয়ে বসেছে। এক মন্যপ উচ্ছ্বাল কর্দর্যরুচি স্বামী। স্বার ক্ষীণতম স্মৃতিও আর তার মনে জাগরুক নেই। অভয়ার সমস্ত অন্তর বিদ্রোহ করে উঠলো। ইতোমধ্যে রোহিণী তাকে ভালবেসে ফেলেছিল এবং তার সেই কামনা অব্যক্ত থাকেনি। অভয়া স্বামিহের আলস্যের পিছনে আর বৃথা ধাওয়া না করে রোহিণীকে নিয়েই ঘর বাঁধলে, তারা স্বামী-স্ত্রীরূপে বসবাস করতে লাগল। দাম্পত্য আদর্শের অভ্যস্ত মূল্যবোধে লালিত বাঙালী পাঠকের পক্ষে সাংঘাতিক চমক সন্দেহ নেই। কিন্তু এই মনোভূতিকারী আচরণেরও যুক্তি জুগিয়েছেন শরৎচন্দ্র অভয়ার জবানীতে। [অভয়া শ্রীকান্তকে বলছে : “রোহিণীবাবুকে ত আপনি দেখে গেছেন। তাঁর ভালবাসা ত আপনার অগোচর নেই; এমন লোকের সমস্ত জীবনটাকে শুধু এই দিয়ে আঁগি আর সতী নাম কিনতে চাইনে শ্রীকান্ত-বাবু।... একটা রাত্রে বিবাহ অনুষ্ঠান যা স্বামী-স্ত্রী উভয়ের কাছে স্বপ্নের মত মিথ্যা হয়ে গেছে, তাকে জোর করে সারা জীবন সত্য বলে খাড়া করে রাখবার জন্য এই এতবড় ভালবাসাটা একেবারে ব্যর্থ করে দেব? যে বিধাতা ভালবাসা দিয়েছেন তিনি কি তাতেই খুসি হবেন?”

অভয়ার মনের পরিচয় আমরা পেলুম। এনিকে প্রথরবুদ্ধিশালিনী প্রদীপ্ত আগুনের শিখারূপিণী কিরণময়ী চরিত্র যুগযুগসঞ্চিত ভারতীয় নারীর পাতিব্রতের সংস্কার আর সেই সংস্কারকে অস্বীকার করবার নির্ভীকতার অন্তর্দ্বন্দ্বের ক্ষতবিক্ষত দ্বিধাপীড়িত নারীর এক চমৎকার আলেখ্য। এই দ্বিধাদ্বন্দ্বের ভার কিরণময়ীর মত সাহসিকা মননশীল নারীও শেষ পর্যন্ত সহ্য করতে পারেনি, সে পাগল হয়ে যায়। তার পাগল হওয়ার বীজ তার স্বভাবের অন্তর্নিহিত কনট্রাডিকশনের মধ্যেই নিহিত ছিল—এইজন্য শরৎচন্দ্রকে দোষ দেওয়া বৃথা। শরৎচন্দ্র এই ক্ষেত্রে বস্তুববাদী শিল্পীর গ্যায় কিরণময়ীর স্বভাবকে অনুসরণ করে তার পরিণাম যা হতে পারে তা-ই দেখিয়েছেন, নিজের পাইণেঞ্জার দ্বারা তালিত হয়ে কিরণময়ীকে তার স্থলনের জন্য শাস্তি দিতে যাননি, বঙ্কিমচন্দ্রের উপন্যাসে যে-শাস্তি কল্পনীয় ছিল। (বিশ্ববৃক্ষের কুন্দ আর কৃষ্ণকান্তের উইলের রোহিণীর পরিণাম স্মরণীয়)। কিন্তু কিরণময়ীর জীবন স্বীয় অন্তর্দ্বন্দ্বের ভারে বিপর্যস্ত হয়ে ব্যর্থ হয়ে গেলেও বাংলা সাহিত্যে এ এক অবিস্মরণীয় চরিত্র। এমন চরিত্র শরৎচন্দ্রের কলমেও বেশী ফোটেনি।

পক্ষান্তরে কমল অন্ধহামীভক্তির একান্ত বশংবদ দাসীসুলভ আদর্শের কঠোর সমালোচক। সে ইউরোপীয় ক্ষণবাদের পূজারী, ভারতীয় সনাতন আদর্শের শাসিত, মনু প্রভৃতি বিধানদাতাদের দ্বারা জোর-করে-চাপানো পাতিব্রতের চিরস্থায়িত্বে তার আস্থা কম। সে পতি-পত্নীর বন্ধন অপেক্ষা পতি-পত্নীর ভালবাসাকে বেশী মূল্য দেয় এবং সে ভালবাসা যদি স্বল্পকালীনও হয়, তার উপরেই বেশী গুরুত্ব আরোপ করে। প্রেমহীন দাম্পত্যের বোঝা সারাটা জীবন নিষ্প্রাণ ভাবে বয়ে বেড়ানো অপেক্ষা প্রেমপূর্ণ দুদিনের দাম্পত্য তার নিকট সমধিক কাম্য। তার প্রতি শিবনাথের ভালবাসা যখন শিথিল হয়ে গেছে, সে তখন পত্নীত্বের দাবীতে শিবনাথের উপর ভার হয়ে চেপে থাকেনি, শিবনাথকে আপন কচিমাফিক নিজের পথ ও প্রবৃত্তি অনুসরণ করবার স্বাধীনতা দিয়েছে। একদিন শিবনাথের সঙ্গে মন্ত্র সাক্ষী রেখে বিয়ে হয়েছিল বলেই সেই নজীরে গোটা জীবন তার উপর স্ত্রীত্বের অধিকার খাটাতে যাবে এমন হৃদয়ের সম্পর্ক শূন্য সম্পত্তির বোধ কমলের নয়। তার প্রবল আত্মমর্যাদাই তাকে ওই অপমানকর অবস্থা থেকে সম্বন্ধে রক্ষা করেছে। আবার অগ্ন একদিন যখন অনুভব করলো তার প্রতি অজিতের ভালবাসায় কোন খাদ নেই, সে-ভালবাসা নানা কঠিন পরীক্ষায় উত্তীর্ণ, তখন অজিতকে গ্রহণ করতে তার আটকালো না, যদিও কমল জানতো আশুবারুর কণা মনোরমা এক সময় অজিতের বাগ্দত্তা ছিল। মনোরমা ও অজিতের মধ্যে ভালবাসার আকর্ষণ ফুরিয়ে গিয়েছিল বলেই কমল সেই শূন্যস্থান পূরণে আপত্তি করেনি, নয়তো শত প্রলোভনেও তাকে এ কাজে রাজী করানো যেত না।

এই যে তিনটি বিদ্রোহিনী চরিত্রের ছাঁচ এখানে আঁকা হলো তা থেকে মনে হতে পারে শরৎচন্দ্র ভারতীয় সনাতন পাতিব্রত তথা একপত্নীত্বের আদর্শকে আঘাত করবার জন্যই এই চরিত্রগুলির পরিকল্পনা করেছিলেন। ঠিক তা নয়। এই সব চরিত্র তাঁর শিল্প-পরিকল্পনার মধ্যে এসেছিল বিচ্ছিন্ন দৃষ্টান্ত হিসাবে, জীবনে বহুবিচিত্র নারী-পুরুষের সংস্পর্শে তিনি এসেছিলেন, তার থেকে বেছে এই চরিত্রগুলিকে উপহার দিয়েছিলেন। নয় তো তাঁর মনের পক্ষপাত ছিল ভারতীয় সনাতন হিন্দু একপত্নীত্বের আদর্শের দিকেই। হিন্দু দাম্পত্য আদর্শকে তিনি অত্যন্ত বড় করে তুলে ধরেছেন শুভদা, বিরাজবো, অন্নদাদিদি (শ্রীকান্ত প্রথম পর্ব), সুরবালা (চরিত্রহীন), কুসুম (পতিভ্রমশাই),

মৃণাল (গৃহদাহ) প্রভৃতি চরিত্রায়ণের সাহায্যে। বিধবার পক্ষে প্রত্যক্ষের তো কথাই নেই, চিন্তায়ও শরপুরুষের ধ্যান করা অনুচিত তার ছবিটি ফুটিয়ে-ছেন বড়দিদির মাধবী ও পল্লীসমাজের রমা চরিত্রের মাধ্যমে দিয়ে। মৃণাল বিধবা হওয়ার পরে তারও উপর তিনি একই বরাত চাপিয়েছেন। শরৎচন্দ্র পূর্বোক্তা শ্রীমতী লীলারানী গঙ্গোপাধ্যায়কে এক চিঠিতে জানিয়েছিলেন তিনি তাঁর বইতে একটি বিধবারও পুনর্বিবাহ ঘটাননি। কেন ঘটাননি সে-কারণ তিনি অগুপ্ত রেখেছেন। কারণটি বিশ্লেষণ করে বোঝাবার প্রয়োজন অনুভব করেননি। বুদ্ধিগতভাবে তিনি বিধবাবিবাহের পক্ষপাতী ছিলেন তার একাধিক নজীর তার চিঠিপত্রের মধ্যে রয়েছে; কিন্তু বুদ্ধির সমর্থন এক, হৃদয়ের অনুমোদন আর। উপর-উপর আমরা বুদ্ধি দিয়ে যা বিশ্বাস করি, সব সময় হৃদয় দিয়ে তা মেনে নিতে পারি না। সংস্কার সহজে মরতে চায় না। কঠিন পরীক্ষার ক্ষেত্রে প্রায়ই তা বুদ্ধির যুক্তিকে নাকচ করে দেয়। শরৎচন্দ্রের বেলায় এইরকম কিছু একটা ঘটেছিল কিনা তা একটা প্রশ্নচিহ্ন হয়েই রইল।

পথের দাবীর আখ্যানভাগে দেখতে পাই স্বামীর সঙ্গে বনিবনা না হওয়ায় নবতারার তার স্বামীকে ছেড়ে চলে এসেছিল। কবি ও বেহালাবাদক শশীর সঙ্গে তার বিয়ের সব ঠিকঠাক, হঠাৎ জানা গেল আহমেদ নামক এক মিলের টাইম-কিপার মুসলমান যুবককে বিয়ে করে সে শশীকে পথে বসিয়েছে। এই গল্পের মর্যাদা কী হতে পারে তা নিয়ে জল্পনা-কল্পনার অবকাশ থাকাই স্বাভাবিক, তবে লেখকের মনোগত অভিপ্রায়কে বোঝার ভুল বোধহয় হওয়ার কথা নয়। এ নবতারার নামক একটি বিশেষ মেয়ের অনুচিত স্বাধীনচারিতার প্রশ্ন শুধু নয়, ত্রায়সঙ্গ ও কারণ ব্যতিরেকে যে-কোন বিবাহিত নারীর স্বামী ত্যাগের অনৈতিকতাকেই সম্ভবতঃ এখানে ইঙ্গিতে সমালোচনা করবার চেষ্টা করা হয়েছে। (পথের দাবী উপন্যাসের আর কোথাও মুসলমানের নামোল্লেখ পর্যন্ত নেই, হঠাৎ কথা নেই বার্তা নেই নবতারার কাহিনীতে ওই মেয়েটির স্বভাব-ভারল্য ফুটিয়ে তোলবার জন্য একটি মুসলমান যুবকের আমদানী করা হলো কেন তা একটা ধাঁধা হয়ে রইল।)

আসলে খেলাচ্ছলে অথবা তুচ্ছ কারণে স্বামী ছেড়ে চলে আসার চটুলতাকে শরৎচন্দ্র আদর্শেই সহ্য করতে প্রস্তুত ছিলেন না। অভয়্যার ব্যতিক্রমী

দৃষ্টান্তের চিত্র আঁকা সত্ত্বেও এ ব্যাপারে তাঁর মনোভাব আপসহীন ছিল বলে মনে হয়। পতিগতপ্রাণা নারীচরিত্রগুলিকে প্রাণের সমস্ত দরদ ঢেলে আঁকার মধ্যেই তাঁর এই মানসিকতার পরিচয় পাওয়া যায়। অন্নদাদিদিকে তিনি কী মহীয়সী করেই না এঁকেছেন। স্বামীর শত অত্যাচারেও অন্নদা-দিদির সতীত্ব টোল খায়নি। বিরাজের সতীত্বকে তিনি তার সাময়িক বিভ্রম সত্ত্বেও শেখাবিষি অঙ্কলিত ও নিষ্কলুষ রেখেছেন। স্বামী উপন্যাসে বাল্য-প্রণয়ের অজুহাতে পরপুরুষের প্রতি আকর্ষণের আবেগকে অশ্রদ্ধেয় প্রতিপন্ন করে শেষ পর্যন্ত স্বামিভের আদর্শকে খুবই বড় করে দেখানো হয়েছে। অধঃপতিত স্বামীর হাতে বহুবিধ লাঞ্ছনা-বঞ্চনা সত্ত্বেও শুভদার অপার সহিষ্ণুতা, ক্ষমা-প্রবণতা নারীজাতির পক্ষে এক মহাঅনুকরণযোগ্য গুণরূপে কীর্তিত হয়েছে ওই নামীয় উপন্যাসে। সরযু ও কুমুমের স্বামী-পরিভ্রান্তা হওয়ার কষ্ট চরম করে দেখানো হয়েছে শুধু স্বামিভকেই গৌরবান্বিত করে তোলেবার জন্য। ষোড়শার লুপ্তপ্রায় স্বামিভের সংস্কার ভেঙ্গে উঠেছে দীর্ঘদিন বাদে জীবনন্দকে দেখার ফলে।

কিন্তু এহো বাহ। স্বামিভের গৌরব সবচেয়ে বড় করে দেখানো হয়েছে চরিত্রহীন উপন্যাসের সুরবালার মধ্যে। সুরবালার পতিভক্তির শক্তি ও পবিত্রতাকে এতটাই মহিমা দেওয়া হয়েছে যে, কিরণময়ীর মত বুদ্ধিশালিনী সনাতন শাস্ত্রশাসনের বিধিবিধান লঙ্ঘনকারিণী সাহসিকা রমণী ওই চরিত্রের সংস্পর্শে এসে একেবারেই যেন চকিতে পাণ্টে গেল। কিরণময়ীর মধ্যে যে অন্তঃসংঘাত দেখানো হয়েছে তার মূলে রয়েছে এই স্বামীঅন্তপ্রাণ নারীর প্রত্যক্ষ ও পরোক্ষ প্রভাব। সুরবালার স্বামীভক্তির প্রবলতা দেখে কিরণময়ী তার মরণোন্মুখ স্বামীকে প্রাণভরে সেবা করতে শিখলো। স্বামীকে যদিও বাঁচানো গেল না তবু তখন থেকেই শুরু হলো এই নারীর জীবনে বুদ্ধির সঙ্গে হৃদয়ের দ্বন্দ্ব। ট্রাজিডি এখানে যে, কিরণময়ী এই দ্বন্দ্বের মোমাংসা করতে পারেনি। ওই দ্বন্দ্বের ফলেই শেষ পর্যন্ত তার মস্তিষ্কবিকৃতি ঘটে।

আমি প্রবন্ধের গোড়ায় বলেছি শরৎচন্দ্র ব্যক্তির স্বাধীনতার পক্ষপাতী কিন্তু পারিবারিক ক্ষেত্রে এলেই তাঁকে অগ্ররূপে দেখতে পাই। সেখানে তিনি মূলতঃ রক্ষণশীল। সনাতন ভারতীয় ঐতিহ্য, সংস্কৃতি, ধর্ম ও আচার-প্রথাই যেন গার্হস্থ্য জীবনের স্তরে তাঁর মনোহরণ করেছে বেশী। যদিও

সঙ্গে সঙ্গে একথা অবশ্যই স্বীকার করতে হবে যে, তাঁর রক্ষণশীলতাও তাঁর শিল্পসৃষ্টির গুণে পরম আশ্রয় হয়ে উঠেছে। পক্ষান্তরে রুহন্তর সামাজিক প্রশ্নে কখনও তিনি রক্ষণশীল কখনও প্রগতিশীল। সমাজের সঙ্গে ব্যক্তির সংঘাতের প্রশ্নে কখনও তিনি সমাজকে জয়ী করেছেন (যেমন রমার বেলায়, সাবিত্রীর বেলায়), কখনও ব্যক্তিকে জয়ী করেছেন (যেমন অভয়ার বেলায়)। এই মিশ্র মানসিকতার জন্য দায়ী তাঁর ব্যক্তিক স্বভাবের গঠন, যার মূলে কৌলিক সংস্কার অনেকটাই কাজ করেছে। তাছাড়া, তাঁর বাস্তববাদও এইরকম দ্বৈধতার একটি কারণ। শিল্পী হিসাবে শরৎচন্দ্র মূলতঃ বাস্তববাদী। তিনি একাধিক জায়গায় বলেছেন, তিনি সমাজ-সংস্কারক নন, সমাজে সত্যি সত্যি যা খটেছে তাকে রূপ দিয়েই তিনি খালাস। সমাজে যে সব সমস্যা রয়েছে তার প্রতি তিনি সকলের মনোযোগ আকর্ষণ করেছেন, কিন্তু সমস্যা সমাধানের ভার তাঁর উপরে নয়। আর্টিস্ট হিসাবে সেটা তাঁর কৃতাও নয়। তিনি আর্টিস্ট, সমাজের প্রকৃত চেহারাটা ফুটিয়ে তুলতে পারলেই তাঁর কর্তব্য সমাধা হয়ে গেল।

তবু এরই মধ্যে কখনও কখনও শবৎ-মানসের প্রগতিশীল প্রাতি ঝিলকিয়ে উঠেছে। তিনি যেন কোন কোন ক্ষেত্রে সমাধান দেওয়ার কিনারায় পৌঁছে গেছেন বলে মনে হয়। কৌলীক প্রথা যে একটি অত্যন্ত অশ্রদ্ধেয় ক্ষতিকর প্রতিষ্ঠান তা তিনি ভাল করেই দেখিয়েছেন তাঁর বামুনের মেয়ে বড় গল্পে। মেল-প্রবর-গাঁই-গোত্র মেলাবার ব্যর্থ চেষ্টায় উদ্‌মকেপ ও সময় নষ্ট না করে বর ও কণ্ঠার স্বেচ্ছা-নির্বাচনের উচিতা ও সুস্থতাকে ফুটিয়ে তুলেছেন অরক্ষণীয় উপন্যাসের জ্ঞানদা ও অতুলের পারস্পরিক আকর্ষণকে শেষপর্যন্ত জয়ী করে। তেমনি দত্তা উপন্যাসে বিজয়া ও নরেনের পারস্পরিক স্বাভাবিক আকর্ষণকে মখাদা দিয়েছেন ও পরিণামে বিবাহের শীলমোহর দিয়ে তাকে পাকা করে তুলেছেন বিলাসের সঙ্গে বিজয়ার বাগ্দত্তা হওয়ার কৃত্রিমতাকে অগ্রাহ্য করে। আহারাঁদের বাছবিচার নিয়ে এত যে তাঁর খুঁতখুঁতে বাই,— তাঁর গল্পোপন্যাসে ছোঁয়াছুঁয়ির প্রসঙ্গ একটা সদাবিদ্যমান ধূয়ার মত বারে-বারেই ফিরে এসেছে—গৃহদাহ উপন্যাসের শেষটি পড়লে কিন্তু মনে হয় ছোঁয়াছুঁয়ির অন্তঃসারণ্যতাই তাঁর প্রতিবাদ। অন্ততঃ এই উপন্যাসে যে প্রতিবাদ তাতে কোন সন্দেহ থাকে না। রামবাবু তো হিন্দুধর্মের মহিমা প্রকটনের উদ্দেশ্যে অচলার কাছে স্বপাক আহ্বারের উপযোগিতা, শুদ্ধাচারী

হয়ে চলবার উপযোগিতা, হিন্দুর স্বধর্মনিষ্ঠায় স্থিত থাকবার সার্থকতা ইত্যাদি বিষয়ে কত গালভরা কথাই বললেন; কিন্তু যখন জানতে পারলেন না জেনে তিনি এক বিধর্মী ব্রাহ্মকণ্ঠার হাতের পাক অন্ন গ্রহণ করেছেন তখন তাঁর সদাশয়তার খোলসটা আর বজায় রইল না। সুরেশকে যত্নাশ্রয় শায়িত ও অচলাকে নিতান্ত অপরিচিত পরিবেশে অসহায় অবস্থার মধ্যে ফেলে রেখে তিনি তখন প্রায়শ্চিত্তনিধানের জগৎ ছুটলেন কাশীতে তড়িৎগতি। লেখক এখানে প্রকারান্তরে সংস্কারাঙ্গতার ক্রুরতাটাকেই তুলে ধরতে চেয়েছেন পাঠকের চোখে। কাহিনীর সমাপ্তিতে তিনি মহিমের মুখে যে ভাবনা বসিয়েছেন তাতেও এই ধারণার সমর্থন মেলে। মহিম মনে মনে ভাবতে লাগলো... [“কিন্তু এই আচারপরায়ণ ব্রাহ্মণের এই ধর্ম কোন্ সত্যকার ধর্ম, যাহা সামান্য একটা শ্রমের প্রতারণায় এক নিমিষে ধূলিসাৎ হইয়া গেল, যে ধর্ম অত্যাচারীর আঘাত হইতে নিজেকে এবং অপরকে রক্ষা করিতে পারে না, বরঞ্চ তাহাকেই যত্না হইতে বাঁচাইতে সমস্ত শক্তি অহরহ উদ্যত রাখিতে হয়, সে কিসের ধর্ম এবং মানব-জীবনে তাহার প্রয়োজনীয়তা কোনখানে? যে ধর্ম স্নেহের মর্যাদা রাখিতে দিল না, নিঃসহায় আর্ত নারীকে যত্নার মুখে ফেলিয়া যাইতে এতটুকু দ্বিধাবোধ করিল না, আঘাত খাইয়া যে ধর্ম এতবড় স্নেহশীল বৃদ্ধকে এমন চঞ্চল প্রতিহিংসায় একপ নিষ্ঠুর করিয়া দিল, সে কিসের ধর্ম? ইহাকে যে স্বীকার করিয়াছে, সে কোন্ সত্য বস্তু বহন করিতেছে? যাহা ধর্ম সে ত বর্মের মত আঘাত সহিবার জগ্গই! সেই তো তার শেষ পরীক্ষা!”] (শরৎ-সাহিত্য-সংগ্রহ, সপ্তম সম্ভার, পৃ. ২৬২-৬৩)

এই থেকে পরিষ্কার মনে হয়, শরৎচন্দ্র ধর্মের নামে আচার-বিচার ছোঁয়াছুঁয়ের বাড়াবাড়িকে কখনও যথার্থ সমর্থন করতে পারেননি। তিনি ধর্মের মূলবস্তুকে ধর্মের সারাংশের বলে নির্দেশ করতে চেয়েছেন—তার আনুষ্ঠানিকতা কিংবা আচারকে নয়। কিন্তু শরৎ সাহিত্যে পূর্বাপর অনুধাবন করলে এ বিষয়ে সংশয় ঘুচতে চায় না। উপরের উদ্ধৃতিতে যে-মনোভাব ব্যক্ত হয়েছে, সেই মনোভাবের সঙ্গে তাঁর রচনা সর্বত্র সামঞ্জস্য রক্ষা করে চলেনি। আহারের বাহ্যবিচার নিয়ে তাঁর চরিত্রগুলির অনেক কাটরই এত বেশী মাথাব্যথা যে, সন্দেহ হয় এই মাথাব্যথার খানিকটা গ্রন্থকারের নিজের মাথাব্যথারই প্রক্ষেপণ মাত্র। ব্রাহ্মণত্বের তথাকথিত মহিমা ও



শ্রেষ্ঠত্বের ভাবটিকে পরিষ্কৃত করবার চেষ্টা এত প্রকট এবং তাই নিয়ে চিত্র-চরিত্রের এত ছড়াছড়ি যে, কখনও কখনও ওই স্বাভাৱত্যাভিমান রীতিমত বিসদৃশতার কোঠায় গিয়ে পড়েছে। ব্রাহ্মণের শৈতেগাছটির প্রতি শরৎচন্দ্রের বড় মায়া—এমনতর মায়ায় বদ্ধ হয়ে তিনি একাধিক বৈপ্লবিক চরিত্রের স্রষ্টা হয়েও চূড়ান্ত বিচারে সংকীর্ণ প্রাদেশিকতা কিংবা সাম্প্রদায়িকতার বিরুদ্ধে উঠতে পারলেন না।

ব্রাহ্ম সমাজের প্রতি তাঁর বড়ই অনীহা। কথায় বলে, যে যে ভাবে মানুষকে দেখতে চায় সে সেই ভাবেই তাকে চিত্রিত করে। ব্রাহ্ম সমাজের প্রতি বিরাগ প্রদর্শনের জগুই তিনি যেন দত্তার রাসবিহারী চরিত্রকে ইচ্ছা করে বেশী বেশী কালির পোঁছ দিয়ে কালিমালিপ্ত করে এঁকেছেন। গৃহদাহের কেদারবাবুর অর্থলোলুপতাকে চিত্রিত করবার পিছনেও একই উদ্দেশ্য কাজ করেছে বলে সন্দেহ হয়। কোন মতঃ শিল্পীর মধ্যে এই ধরনের সাম্প্রদায়িক সংকীর্ণচিত্ততা সত্যে ভাবতে পারা যায় না। রবীন্দ্রনাথের গোঁড়ার পরেশবাবুর উদারের সঙ্গে তুলনা করলেই বুঝতে পারা যাবে এই চরিত্র দুটির অসম্পূর্ণতা ও অসঙ্গতি কোথায়? কুটকচালে বুদ্ধি ও অর্থলোলুপতা কোন এক বিশেষ সম্প্রদায়ের মানুষের মধ্যেই সীমাবদ্ধ নয় যে সেই দুটি দোষ দেখাবার জগু একটি বিশেষ সম্প্রদায়কেই বেছে নিতে হবে। ব্রাহ্ম সমাজের নেতারা হিন্দু সমাজের প্রচলিত গুণ্ডা ভাগ করে বাইরে বেরিয়ে এসে ধর্মসংস্কার করতে চেয়েছিলেন বলে শরৎচন্দ্র কোন সময়েই তাঁদের ক্ষমা করতে পারেননি। কিন্তু একবারও তাঁর এ কথাটা খেয়াল হয়নি যে, ঊনবিংশ শতাব্দীর বাংলা দেশে শিক্ষায় সমাজ সংস্কারে রাজনৈতিক চেতনার জাগরণে সাহিত্যে স্ত্রীশিক্ষা বিস্তারে একাধিক কু-প্রথার (যথা, বালাবিবাহ, নারীনিগ্রহ, সুরাপান ইত্যাদি) মূলোচ্ছেদ চেঁচায় এই ব্রাহ্ম সমাজই সবচেয়ে অগ্রণীর ভূমিকা গ্রহণ করেছিল। যে-রবীন্দ্রনাথকে নিয়ে আমাদের গর্বের শেষ নেই, তিনিও ব্রাহ্ম সমাজভুক্ত মানুষ। যদিও একথা বলাই বাহুল্য যে, কোন প্রাতিষ্ঠানিক ধর্মসম্প্রদায়ের ছাপ দিয়ে রবীন্দ্রনাথের মত বড় মনের মানুষকে চিত্রিত করতে যাওয়ার চেষ্টা বৃথা। শরৎচন্দ্র এত এত জায়গায় ঘুরে এত এত মানুষের সঙ্গে ও এত এত অভিজ্ঞতা সঞ্চয় করার পরও এমন অনুদার রয়ে যেতে পারলেন কেমন করে সে আমাদের এক স্থায়ী প্রশ্ন।

যাই হোক, এই সব ক্রটি-বিচ্যুতি অসম্পূর্ণতা অসঙ্গতির প্রশ্ন বাদ দিলে শরৎচন্দ্র কিন্তু এক অসামান্য শিল্পী। তাঁর দরদের কোন তুলনা নেই। তাঁর ভাষা ও স্টাইল চেখে চেখে ভোগ করবার মত এক পবন স্বাদ বস্তু। পল্লীভিত্তিক উপন্যাস-গল্প রচনাতেই তাঁর সৃষ্টির শিল্পোৎকর্ষ সবচেয়ে বেশী প্রকাশ পেয়েছে কিন্তু তাঁর ভাষাটি পুরাপুরি নাগরিক মেজাজের। এটা তাঁর সম্পর্কে হতবুদ্ধি হয়ে লক্ষ্য করবার মত এক অভূত ব্যাপার যে, যে-গৌড়ামি ও সংরক্ষণকামিতার জন্য এই প্রবন্ধে বারে বারে তাঁর সমালোচনা করেছি, সেই গৌড়ানি ও সংরক্ষণশীলতার আধারে রচিত তাঁর পারিবারিক গল্প-উপন্যাসগুলিতেই কিন্তু তাঁর শ্রেষ্ঠ শিল্পোৎকর্ষ ব্যঞ্জিত হয়েছে। মননশীল বইগুলি পাঠকচিত্তের উপর তেমন দাগ কাটতে পাবেনি।

পথের দাবী উপন্যাস এই ব্যর্থতার একটি নিদর্শন। উপন্যাসটির আরম্ভ হরেছিল অতি চমৎকারভাবে, সেই যেখানে সবাসাচী গৌড়েল গিরিশ মহাপাত্র রূপে বেঙ্গুনের জেটিতে আত্মপ্রকাশ করছে ও পুলিশের চোখে ধুলো দিয়ে সটকে পড়েছে, সেট অংশটির কোন তুলনা নেই। কিন্তু তার পরেই যেন বইটি কেমন মিইয়ে গেছে। রাষ্ট্র-বিপ্লব সম্পর্কে সবাসাচীর গালভরা বুলিগুলিও পড়তে ভালই লাগে কিন্তু ভারতীর সঙ্গে বসে বসে অন্তহীন কথার কচকচি এক এক সময়ে রীতিমত বিরক্তিকর ঠেকে। সবাসাচীকে যদি একজন দবদী মানবতাবাদী চরিত্র রূপে আঁকাই লেখকের উদ্দেশ্য ছিল তাহলে সূচনায় এমন কঠিন বিপ্লবের গোড়-চল্লিকা ফাঁদা হয়েছিল কেন? বইটা একেবারেই মাঠে মারা গেছে অপূর্ব-ভারতী জুটির তুচ্ছ আকর্ষণ-বিকর্ষণের পালার বর্ণনায় পাতার পর পাতা ভরাতে গিয়ে।

তবু সবাসাচীর কথাগুলির দাম আছে। এই থেকে শরৎচন্দ্রের রাষ্ট্রিক চিন্তার কাঠামোর একটা আভাস পাওয়া যায়। এই উপন্যাসের বক্তব্য ও অন্যাংগ রচনাংশ থেকে মনে হয় শরৎচন্দ্র অতিশয় তত্ত্বের বিশেষ অনুরাগী ছিলেন না, দেশের স্বাধীনতা ও তৎপরবর্তী সমাজ বিপ্লব সাধনের জন্ম সশস্ত্র পন্থার কার্যকারিতাতেই তাঁর সমধিক বিশ্বাস ছিল। তবে তাঁর চোখে রক্তারক্তিতাই বিপ্লব নয়, বিপ্লব মানে একটা 'দ্রুত আমূল পরিবর্তন' (সবাসাচী)। এই পরিপ্রেক্ষিতে বিচার করলে দেখা যায় তাঁর এই বক্তব্যের সঙ্গে তাঁর পারিবারিক উপন্যাসগুলির দৃষ্টিভঙ্গির আদৌ কোন মিল নেই।

শরৎচন্দ্রের পারিবারিক উপন্যাসগুলির পটভূমিকায় পথের দাবী না এই জাতীয় রচনা যেন একটা বৈচ্ছিন্ন শিল্পকর্ম রূপে আলাদা হয়ে বুলে আছে। শরৎচন্দ্র মূলতঃ সামন্ততান্ত্রিক ভূমিব্যবস্থায় লালিত ছায়াচ্ছন্ন পল্লীর গার্হস্থ্য জীবনের শিল্পী, তাঁর শিল্পের পরিকল্পনার মধ্যে একটা পথের দাবী কিংবা একটা শেষ প্রশ্ন উড়ে এসে জুড়ে বসেছে। এই দুই ধরনের রচনা কর্মের মধ্যে না আছে মেজাজের মিল, না চিন্তা-কল্পনার সামঞ্জস্য। একের বক্তব্য অণ্ডে খারিজ হয়ে যাচ্ছে। নিষ্কৃতি-পল্লীসমাজ-পণ্ডিতমশাই-অরক্ষণায়ার লেখকের সঙ্গে পথের দাবী-শেষ প্রশ্নের লেখককে ঠিক কেমন যেন মেলানো যায় না।

আজকাল শরৎচন্দ্রকে কোন কোন রাজনৈতিক মণ্ডল থেকে একজন প্রকৃষ্ট বৈপ্লবিক লেখকরূপে প্রতিপন্ন করার একটা চেষ্টা চলেছে দেখতে পাই। এই চেষ্টার উদ্দেশ্য মন্দ তা বলিনে, তবে শিল্প বিচারকে একপাশে সরিয়ে রেখেই যেন চেষ্টাটি করা হচ্ছে বলে মনে হয়। এই চেষ্টায় রাজনীতির উপর বড় বেশী ঝোঁক আরোপ করা হচ্ছে, তুলনায় রসের দিকটা মোটেই আমল পাচ্ছে না। শিল্পসৃষ্টির সৌন্দর্য বিচার করতে গেলে পথের দাবী, শেষ প্রশ্ন তো দূর স্থান, এমনকি গৃহদাহ, চরিত্রহীন এই দুই বহুপ্রশংসিত উপন্যাসকেও ছাপিয়ে বড় হয়ে দেখা দেবে তাঁর স্বল্পপরিসর বাঙালী জীবনের সাধারণ সুখদুঃখের কাঠামোয় রচিত গ্রামীন গল্প-উপন্যাসগুলি। এক নিষ্কৃতি বইখানাকে একশো বইয়ের সমতুল বলতে হয়। এগুলির আবেদন প্রাদেশিক, বিষয়বস্তু অকিঞ্চিৎকর, সুর কমবেশী রক্ষণশীল, কিন্তু শিল্পের পক্ষপাত এদের প্রতিই যেন বেশী সূক্ষ্ম। চিন্তার দিক দিয়ে তাদৃশ প্রগতিশীল না হয়েও কোন কোন শিল্পকর্ম পাঠকের মনকে কেন ও কেমন করে রসে তাপ্ত করে রাখে, শিল্পের এই অন্যায্য পক্ষপাতের রহস্যের মূলে কোথায় সেই ধাঁধার আজও পর্যন্ত নিরসন হয়নি। পদে পদে শরৎ সাহিত্যে এই ধাঁধার মুখোমুখি হতে হয়।

## ॥ ৬ ॥

### ছোটগল্প

শরৎচন্দ্রের ছোটগল্পের সংখ্যা বেশী নয়। গোণাগুণতি করলে দেখা যাবে বড় ও ছোটগল্পে মিলিয়ে পনেরো-ষোলটির বেশী হবে না। অথচ এই সংখ্যায়ল্লতা সত্ত্বেও তিনি একজন অসামান্য ছোটগল্পের শ্রষ্টা। তাঁর মহেশ, মামলার ফল, একাদশী বৈরাগা, অভাগীর স্বর্গ, রামের সুমতি প্রভৃতি গল্প বিশ্বসাহিত্যের যে কোন শ্রেষ্ঠ গল্পের সঙ্গে তুলনীয়। মহেশ গল্পটি একাই একশো। সামাজিক অত্যাচার-অত্যাচারের বিপক্ষে প্রতিবাদের আকৃতিতে পূর্ণ মানবিক আবেদনে সমৃদ্ধ এমন সংবেদনশীল করুণ রসের গল্প খুব অল্পই লেখা হয়েছে আমাদের সাহিত্যে; বিশ্বসাহিত্যেও যে এর দোসর খুব বেশী আছে তা মনে হয় না।

শরৎচন্দ্র আমলে ছোটগল্পেরই শিল্পী। যদিও নামতঃ ছোটগল্প তিনি অল্পই লিখেছেন। যে কটি রচনা শিল্পসৌন্দর্যের জগৎ বিশেষরূপে খ্যাত—নিষ্কৃতি, অরক্ষণীয়া, পল্লীসমাজ, বিরাজ বো, বিন্দুর ছেলে, বৈকুণ্ঠের উইল, বড়দিদি, মেজদিদি, বামুনের মেয়ে প্রভৃতি—সেগুলি উপন্যাস বলে কথিত ও পরিচিত হলেও কার্যতঃ উপন্যাসোপম বড় গল্প মাত্র। এগুলি নভেলেট, নভেল নয়; আর নভেলেটের সঙ্গে বড় ছোটগল্পের পার্থক্য শুধু নামেই, পার্থক্যের রেখাটি খুব সুচিহ্নিত নয়। শরৎচন্দ্র ছোটগল্প রচনায় আয়তন সংকোচের বিশেষ পক্ষপাতী ছিলেন না—তিনি ছড়িয়ে-ছিটিয়ে গল্প লিখতেই ভালবাসতেন। বাল্যবন্ধু প্রমথনাথ ভট্টাচার্যকে লেখা এক চিঠিতে এইরূপ মত প্রকাশ করেছিলেন যে, খুব সংক্ষিপ্ত আয়তনের গল্প লিখতে তিনি তেমন স্ফূর্তি পান না, একটু বিস্তার করে লেখাই তাঁর পছন্দ। তাঁর গল্পগুলিই তাঁর এ পছন্দের সাক্ষ্য দেবে। উল্লিখিত গল্পসমূহ এবং অন্যান্য গল্পনামধেয় রচনা কোনটারই আয়তন খুব হ্রস্ব নয়। বিন্দুর ছেলে, রামের সুমতি, বামুনের মেয়ে, ছবি, পথনির্দেশ, অনুরাধা প্রভৃতি গল্পের আকার তো রীতিমত বড়।

এই দিক দিয়ে রবীন্দ্রনাথের সঙ্গে শরৎচন্দ্রের সুস্পষ্ট তফাৎ।

রবীন্দ্রনাথের গল্পগুচ্ছের গল্প অধিকাংশই মধ্যমাকৃতি—খুব ছোটও নয় খুব বড়ও নয়। ব্যতিক্রম মেঘ ও রোদ্র, জীবিত ও মৃত, সমাপ্তি, নফ্টনীড়, রাসমণির ছেলে, ক্ষুধিত পাশাণ, হালদার গোষ্ঠী প্রভৃতি রচনা। শরৎচন্দ্রের বেলায় এই ব্যতিক্রমটাই নিয়ম। ছোটগল্প নাকি বিন্দুর মধ্যে সিদ্ধ দর্শন করায়। গোপ্পদের জলে নাকি আকাশকে বিস্তৃত করে। এই তত্ত্বটির প্রতি আজকালকাব কোন কোন ছোটগল্প লেখকের এমনই অদ্রান্ত বিশ্বাস যে, তাঁরা এটিকে তাঁদের রচনায় প্রায়ই একটি অপরিবর্তনীয় সূত্ররূপে গ্রহণ করে আদ্যজলথেকে তাঁর শৈল্পিক রূপদানে সচেষ্টিত হন। ভাবেন শিল্পের সবটুকু সৌন্দর্য এবং উৎকর্ষ এই আয়তন সংক্ষেপের মধ্যেই নিহিত। কিন্তু তাঁদের খেয়াল হয় না যে, বিশিষ্ট এক শিল্পকর্মের আদর্শের প্রতি আনুগত্য দেখানোর নামে এটা নিজেসই অজান্তে পরিশ্রম বাঁচানোর এক সুশ্ল কৌশলও হতে পারে। ভাষার সম্পদ যার নেই কিংবা ভাষা-শিল্পের দুনিপুণ সবিস্তার প্রয়োগে যার দক্ষতা দুষ্টিগ্রাহকরূপেই কম, তাঁর পক্ষেই এই জাতীয় চূর সংক্ষেপিতকরণের আড়ালে আশ্রয় নিতে চাওয়া স্বাভাবিক। কিন্তু শরৎচন্দ্র এমনওর প্রয়োজনের দ্বারা বদ্ধ ছিলেন না। তাঁর ভাষার শক্তি ছিল অসাধারণ—কাহিনীবয়ন ক্ষমতা ছিল অতিশয় উচ্চস্তরের। তাই তিনি অক্লেশে, অবাধে গল্পের সূতোয় ঢিল দিয়ে কাহিনীকে যথাইচ্ছা খেলাতেন এবং ওই বিস্তারের মধ্য দিয়ে চমৎকার সব গল্পের সৃষ্টি করতেন।

মহেশ শরৎচন্দ্রের সবচেয়ে প্রসিদ্ধ গল্প। বিশ্ববিদ্যালয়ের কল্যাণে গল্পের কাহিনীটি সুবিদিত। একটি গরুকে নিয়ে গল্প। আর এই গল্পের মধ্য দিয়ে গ্রামের ক্ষমতাবান শ্রেণীর শোষণ ও অত্যাচার আর ততদরিদ্র শ্রেণীর চাষীর অধাব-রিক্ততা ও অসহায়তার ছবি অতি নগ্নভাবে প্রকটিত হয়েছে রচনাটিতে অপূর্ব শিল্পসুখময় মণ্ডিত হয়ে। গাঁয়ের জমিদার শিবচরণবাবু, হিন্দুশাস্ত্রশাসনের ক্রুরতার প্রতীক ঝায়রত্ন, গরীব চাষী গফুর জোলা ও তার দশ বছরের মেয়ে আমিনা আর এক গৃহপালিত ঘাঁড় (মহেশ)—এই কটি এই গল্পের চরিত্র। রচনার গুণে অবোলা জীবও যে কেমন করে গল্পের মধ্যে একটি কেন্দ্রীয় চরিত্রের মর্যাদা পেতে পারে মহেশ গল্পে তা আশ্চর্য শিল্পসিদ্ধির সঙ্গে অঙ্কিত হয়েছে। গল্পের শেষে আছে গো-হত্যার ঘটনা—অভাবের তাড়নায় আর অত্যাচার নিষ্পেষণের ফলে সাময়িক আশ্র-

বিশ্বস্তির বশে দিগ্বিদিক্ জ্ঞানশূন্য হয়ে গফুর নিজের হাতেই তার প্রাণাপেক্ষা প্রিয় মহেশের প্রাণসংহার করলে। তারপর দুঃখে শোকে অনুশোচনায় যন্ত্রণাবিক্র হতভাগা ওই চাষী, মেয়ের হাত ধরে গ্রাম ছেড়ে চলে গেল। চটকলে কাজ করলে নাকি মান-সম্মান ইজ্জৎ থাকে না। কিন্তু নিকৃষ্টপায় গফুরের সামনে বাঁচবার আর কোন পথ খোলা ছিল না। গাঁয়ের জমি থেকে উৎপাটিত হয়ে কারখানার এই অসম্মানের জীবনকেই সে শেষ পর্যন্ত বরণ করে নিতে বাধ্য হলো। কৃষক কী করে অবস্থার চাপে কলের মজুর হয় তার একটি সংকেত এই গল্পের মধ্যে পাওয়া যায়।

গল্পে গো-হত্যার দৃশ্য আছে বলে নাকি এই অনবদ্য গল্পটি বিশ্ববিদ্যালয়ের রচনা-সংকলনে একদা স্থান পেয়েও পরে প্রত্যাখ্যত হয়েছিল। তার জায়গায় পাঠ্য হয়েছিল কোন এক বৈষ্ণবকুলচূড়ামণি কীর্তনীয়ার লেখা প্রেমের ঠাকুর নামক এক ওঁচা গল্প। এই না হলে আর লোকে বিশ্ব-বিদ্যালয়ের কর্তাব্যক্তিদের রসবুদ্ধির তারিফ করবে কেন! শরৎচন্দ্র নিজে এই ঘটনাটিতে খুবই ক্ষুব্ধ হয়েছিলেন। তাঁর সেই ক্ষোভের প্রকাশ দেখতে পাওয়া যায় মুসলিম সাহিত্য সমাজের দশম বার্ষিক অধিবেশনে প্রদত্ত সভাপতির ভাষণের মধ্যে। ওই ভাষণে তিনি মহেশ গল্পটির একটি সংক্ষিপ্ত-সার বিবৃত করে তারপর এরূপ মন্তব্য করেছেন [“এই হ’ল গো-হত্যা। এই পড়ে হিন্দুর ছেলের বুকে শেল বিঁধবে। তার চেয়ে পড়ুক ‘প্রেমের-ঠাকুর’। তাতে ইহলোকে না হোক তাদের পরলোকে সদৃগতি হবে।” (শরৎ-সাহিত্য-সংগ্রহ, ষষ্ঠ সম্ভার, পৃ. ৩৫৭)]

রামের সুমতি আর মামলার ফল এই দুটি গল্পের মধ্যে বিষয়গত কিছু সাদৃশ্য আছে। দুটি রচনারই মূলরস—বাৎসল্য। রামের সুমতির রাম আর মামলার ফলের গয়্যারাম দুজনাই গোঁয়ার-গোবিন্দ গোছের দুর্দান্ত স্বভাবের কিশোর বালক। রামের যতকিছু আবদার তার বৌদি নারায়ণীর কাছে, আর গয়্যারামের আবদার তার জ্যাঠাইমা গঙ্গামণির কাছে। কিন্তু উভয় ক্ষেত্রেই আবদার যতই অসঙ্গত আর অযৌক্তিক হোক না কেন, মাতৃস্নেহ সেই সব আবদার-উৎপাত-দৌরাণ্ড্য সহ্য করে বাৎসল্যের গভীর টানে। এই বাৎসল্যের ভাবটিকেই পরম রমণীয় করে প্রকাশ করা হয়েছে দুটি গল্পে। গল্প দুটির শিল্প-সৌন্দর্যের কোন তুলনা নেই। তবে খতিয়ে দেখতে গেলে তুলনায় রামের সুমতিকেই উৎকৃষ্টতর রচনার মর্যাদা দিতে হয়। কেননা

এই গল্পে স্নেহের আকর্ষণটিকে অনেক বেশী মধুর করে আঁকা হয়েছে, আর চরিত্রগুলির বিকাশের দিকেও অধিকতর মনোযোগ দেওয়া হয়েছে। সর্গত দ্বিজেন্দ্রলাল রায় এই গল্পটিকে শরৎচন্দ্রের অন্তঃসংগ্রেষ্ঠ গল্প আখ্যা দিয়ে গেছেন।

এই দুই গল্পেরই সংগোত্র কিন্তু স্নাদে গন্ধে কিছু ভিন্ন বিন্দুর ছেলে গল্পটি। বিন্দুর ছেলেও বাংসল্যের গল্প তবে এই বাংসল্য এখানে তীব্রতর হয়েছে বন্ধ্যানারীর সন্তানস্নেহপিপাসার রূপ ধরে এবং পরের সন্তানকেই নিজের সন্তানের স্তলাভিষিক্ত করে। অন্নপূর্ণা ও বিন্দুবাসিনী দুই জা। অন্নপূর্ণা খাদবের পত্নী, বিন্দু মাধবের। একান্নবর্তী পরিবার। বিন্দুর ছেলেপুলে হয়নি, দিদি অন্নপূর্ণার সন্তান অমূল্যকে ঘিরেই তার মত কিছু সাধ-আত্মদাদ, স্নেহের উৎসার। বিন্দু ধনী পিতার কন্যা তাই কিছু গরবিনী কিন্তু মনটি তার সাদা। অমূল্যর সামান্য অনাদর হলেও সে তা সহ্য করতে পারে না এবং তার ফলে কথার পৃষ্ঠে কথার উত্তেজনায় আত্মবিস্মৃত হয়ে দেবদেবীভুল্য ভাসুর ও ভাসুরপত্নীকে টাকার পেঁটা দিতে ছাড়ে না। এই থেকে পরিবারে মনোমালিগ ও বিচ্ছেদ। সেই বিচ্ছেদকে ত্বরান্বিত করতে সাহায্য করে নন্দ এলোকেশী। রামের সুমতি গল্পে যেমন দিগম্বরী, এই গল্পে তেমনি এলোকেশী। শেষপর্যন্ত দুই ভাই আর দুই জা-এর মধ্যে পুনর্মিলনে গল্পের পরিসমাপ্তি। অমূল্যকে নিজের কাছে ফিরে পেয়ে বিন্দুর অশান্তির শেষ।

প্রসঙ্গতঃ উল্লেখ্য, দেবোপম ভাসুরচরিত্র সৃষ্টিতে শরৎচন্দ্রের শিল্পকুশলতার কোন তুলনা হয় না। যিনি ভাসুর, তিনিই আবার জ্যেষ্ঠাগ্রহ। এই দাদা-ভাসুর চরিত্র শরৎচন্দ্রের হাতে পড়ে এক আত্মভোলা, সমদর্শী, পরিবারের সকলের সুখের জন্য সর্বস্বার্থবিসর্জনকারী বৈরাগী চরিত্রে পরিণত হয়েছে। অনেকটা ভোলা মহেশ্বরের মত। এমই আদল পাই বিন্দুর ছেলের যাদব চরিত্রের মধ্যে, আর নিষ্কৃতির গিরিশের মধ্যে। এই টাইপটি বিলীয়মান বা প্রায়বিলুপ্ত বাঙালী যৌথ পারবারিক প্রথার মানবিক দিকের এক সুন্দর নমুনা।

মন্দির গল্পটি কিছু অবাস্তব। এক তরুণীবিধবার (অপর্ণার) আত্মাস্তিক দেবসেবা প্রীতির ছবি। স্বামীর উপাসনাকে ছাড়িয়েও তার মন্দিরে স্থাপিত বিগ্রহের উপাসনার আগ্রহ, যে-অস্বাভাবিক আগ্রহ তরুণীটির অকাল বৈধব্যের কারণ হলো। তারপর দেখানো হয়েছে মন্দিরের যুবক সেবায়েৎ

শক্তিনাথের সঙ্গে অপর্ণার আকর্ষণ-বিকর্ষণের দ্বন্দ্ব, শক্তিনাথের মৃত্যুতে তার পরিসমাপ্তি। এটি শরৎচন্দ্রের আদি বয়সের লেখা গল্পগুলির অন্যতম। প্রথম মুদ্রিত গল্প। তৎকালীন 'বু-গুলীন' পুরস্কার প্রাপ্ত। পুরস্কার প্রতিযোগিতায় পাঠানোর সময় মামা সুরেন্দ্রনাথ গঙ্গোপাধ্যায়ের নামে পাঠানো হয়েছিল। সেই নামেই ছাপা হয়। কাঁচা প্লট, মনস্তত্ত্ব-চিত্রণ অবাস্তব, পূর্বেই বলেছি। তবে ভাষার মুসিয়ানা আছে। লেখাব ধাঁচের ভিতর একজন পাকা গল্পকার লুকিয়ে আছে তার আভাস পাওয়া গিয়েছিল।

আঁধারে আলো আর একটি প্রথম দিক্কার গল্প। এটির কাহিনীও অবাস্তব। কলকাতায় 'পাঠরত' এক তরুণ জমিদারপুত্র ও এক বাঈজীর ভালবাসার গল্প। শরৎচন্দ্রের রচনাসমূহের মধ্যে এটিই বোধহয় সর্বপ্রথম সিনেমায় রূপায়িত হয়েছে।

শরৎচন্দ্র তাঁর পথনির্দেশ গল্পটিকে বিশেষ প্রীতির চক্ষে দেখতেন। বঙ্কু প্রমথনাথ ভট্টাচার্যকে লেখা একাধিক চিঠিতে তিনি এই গল্পটির প্রতি তাঁর পক্ষপাত ঘোষণা করে গেছেন। বলেছেন, রামেব সুমতি, বিন্দুব ছেলে জাতীয় গল্প লেখা খুব কঠিন নয়, কিন্তু এই গল্পের প্রকৃতি তেমন নয়। স্পর্ষ্যই এতে নায়ক-নায়িকা চরিত্রের কিছু মনস্তাত্ত্বিক জটিলতার উন্মোচন করা হয়েছে। সুলোচনা তার স্বামীর মৃত্যুর পর কিশোরী কণা হেমনলিনীকে নিয়ে কলকাতায় উদারচরিত ধনী ব্রাহ্ম-যুবক গুণীন্দ্রের গৃহে আশ্রয় পেল। গুণীন্দ্র আর হেমের মধ্যে ভালবাসা জন্মে এবং দুইয়ের মধ্যে বিবাহ হলে এই ভালবাসা স্বভাবতই সার্বকতা পেতে পারতো এবং সেইটাই হতো তার উচিত পরিণতি। কিন্তু ব্রাহ্মের সঙ্গে মেয়ের বিয়ে দেওয়ায় সুলোচনার ঘোরতর আপত্তি। জাতপাত দেখে হেমের বিয়ে দেওয়া হলো মফস্বলের এক ধনাঢ্য জমিদারের (কিশোরীমোহন) সঙ্গে। এই বিবাহ সুখের হলো না এবং এক বছরের মাথায়ই হেম বিধবা হয়ে মাতৃসকালেশে ফিরে এলো। গল্পের প্রকৃত শুরু এইখান থেকে। সদা বিধবার হৃদয়ের সহজ ভালবাসার প্রবৃত্তির সঙ্গে ভারতীয় নারীর যুগযুগসঞ্চিত পাতিব্রতের সংস্কারের ঘটলো দ্বন্দ্ব—গুণীনের উন্মত্ত প্রাণের সমস্ত আশাকে নিমূল করে শেষ পর্যন্ত সংস্কারের হলো জয়। হেম তার অন্তরের মধ্যেই তার পথনির্দেশ পেয়ে গেল।

গল্পের আলেখ্যটি কিছু অবাস্তব। এখানে বাস্তববাদী শিল্পী শরৎচন্দ্রকে



আড়াল করে রক্ষণশীল শিল্পী শরৎচন্দ্র সামনে এগিয়ে এসেছেন। আলো ও ছায়া গল্পটিতেও একই রকমের অবাস্তব চিত্রণ পাই। এই গল্পটিতেও এক যুবক ও এক বিধবা যুবতীর নিত্য কাছে থেকেও দূরত্বের ব্যাখ্যান রক্ষা করে চলার ছবি আঁকা হয়েছে। মনস্তত্ত্বের দিক দিয়ে এই দূরত্ব শুধু অবাস্তবই নয়, অস্বাভাবিকও বটে। যজ্ঞদত্ত ও সুরমা এক গৃহে বাস করেও পরস্পরের বন্ধু মাত্র। যজ্ঞদত্ত আলো ও সুরমা তার ছায়া। এই আলোছায়ার বন্ধুত্বের হাঁড়িকাঠে বলি দেওয়া হলো এক নিরীহ নির্বিরোধ সত্য-বাহ্য গরিব ঘরের মেয়েকে, যে সুরমার ইচ্ছায় এই গৃহে বন্ধু হয়ে এসেছিল। যজ্ঞদত্ত একদিনের জ্ঞাও বউকে আদর করেনি বরং সর্বদা দূরে দূরে সরিয়ে রেখেছে, ফলে বউয়ের মনোভঙ্গ হয়ে অসুখ, অসুখ থেকে মৃত্যু। অদ্ভুত মানসিকতার গল্প— এমন অস্বাভাবিক কাহিনী শরৎচন্দ্রের লেখনীতে বিশ্বাস্যকর মনে হয়। খেন একালীন কোন মর্নিড গল্প পড়ছি।

বিন্যাসা গল্পের কাহিনীটি ককণ। এক সাপুড়ে মেয়ে (বিলাসী) প্রেমে পড়ে কায়োতের ছেলের (মৃত্যুঞ্জয়) জাত দেওয়ার কাহিনী। সাপের ছোবল খেয়ে শেষ পর্যন্ত মৃত্যুঞ্জয়ের মৃত্যু হলো। বড়ই শোকাবহ পবিণতি। গ্রাম্য সমাজের নিষ্ঠুরতার প্রাসঙ্গিক চিত্রটিও কম তাৎপর্যপূর্ণ নয়।

সতী গল্পের কাহিনীতে পাই সতীপনার বাড়াবাড়িতে দাম্পত্য জীবনের সুখ শান্তি বিপর্যস্ত হওয়ার মর্মান্তিক চিত্র। বিজ্ঞপাশ্রক গল্পের এক চমৎকার কুশলী নমুন। হবিলদার গল্পে পাই এই গ্রামীণ পবিবাবের পারস্পরিক সংঘাতের চিত্র। ধনের দোমাক ও দারিদ্র্যের আত্মমর্যাদার লড়াইয়ের এক বাস্তব আলোচনা। তবে গল্পটি পুরাপুরি রসোত্তীর্ণ হয়েছে এমন কথা বলা যায় না।

শরৎচন্দ্রের দুটি শ্রেষ্ঠগল্প হলো একাদশী বৈরাগী ও অভাগীর স্বর্গ। একাদশী বৈরাগীতে এক সুদখোর বৈরাগীর আপাত-কার্পণ্য ও অতিসতর্ক হিসাবীবুদ্ধির অন্তরালবর্তী অস্বাভাবিক সত্যনিষ্ঠার ছবি ভুলে ধরা হয়েছে। বাইরে থেকে বৈরাগীকে কসাই বলে মনে হয়, সে সুদের এক আধলাও কাউকে মাপ দেয় না। কিন্তু এই লোকটি কিনা বিনা পরিচয়ে বিনা সাক্ষ্যপ্রমাণে শুধু মুখের কথায় বহু বছর আগে তার কাছে গচ্ছিত রাখা অনেকগুলি টাকা তার শ্রায়সম্পত্তি ওয়ারিশানকে অক্লেশে ফিরিয়ে দেয়। শুধু তাই নয়, নিজের বিধবা বোনের (গোরীর) ঘোঁষনে পদস্থলন হয়েছিলো, সমস্ত সমাজের

প্রতিকূলতা ও একঘরে হওয়ার শাস্তি অগ্রাহ্য করে তাকে নিজগৃহে স্থান দেয় ও সর্বপ্রকার সামাজিক নিপীড়ন থেকে তাকে বুক দিয়ে আগলে রাখে। তারই কর্মচারী ঘোষাল বর্ণশ্রেষ্ঠত্বের অভিমানে সুদখোর বোফ্টম একাদশীকে মনে মনে তাচ্ছিল্য করে কিন্তু কার্যকালে দেখা যায় বৈরাগীর সততার কণামাত্রও ওই ব্রাহ্মণপুষ্পবের মধ্যে নেই বরং কী করে গরিব মেয়েছেলের টাকা ও গয়না ফাঁকি দিয়ে কৌশলে সেগুলি আত্মগত করতে পারে তারই সে ভাল খুঁজছিল। গৌরীর তৎপরতায় তার সেই জারিজুরি সফল হতে পারলো না। এই সুলিখিত গল্পটির যদি কোন মরাল থাকে তো তা হলো এই যে, বহিরঙ্গ বিচারের দ্বারা কোন মানুষকেই বিচার করতে নেই, তার আন্তর-পরিচয়ই হলো তার আসল পরিচয়।

অভাগীর স্বর্গ একটি অত্যাশ্চর্য গল্প—বোধকরি শিল্প বিচারে মহেশের পরেই তার স্থান। এই গল্পে গ্রামীণ সমাজে ধনী ও দরিদ্রের সুস্থির পার্থক্য ও তথাকথিত নীচু জাতের প্রতি উচ্চবর্ণের সমাজের মানুষদের মর্মান্তিক অবজ্ঞা ও অবিচারের একটি নিখুঁত চিত্র পাওয়া যায়। গল্পটি মহেশের মতই সামাজিক তাৎপর্যে ভরা।

## উপন্যাস

শরৎচন্দ্রের উপন্যাসের সংখ্যা পঁচিশ-তিরিশখানা হবে। তার মধ্যে পল্লী-ভিত্তিক উপন্যাসই বেশী। শতরের পটভূমি অবলম্বন করে যে সব উপন্যাস তিনি লিখেছেন তার প্রায় সব কয়টিই একটু বেশী বয়সের রচনা, যেমন চরিত্রহীন, গৃহদাহ, পথের দাবী, শেষ প্রশ্ন প্রভৃতি। গোড়ার দিকের অধিকাংশ উপন্যাসই বাংলার সনাতন পল্লীর চিত্র ও চরিত্রের অবলম্বনে রচিত। যেমন শুভদা, দেবদাস, বিরাজ বৌ, নিকুতি, অরক্ষণীয়া, পল্লীসমাজ, পণ্ডিতমশাই প্রভৃতি।

শিল্পসংক্রিয় উপন্যাসটির বিচারে শরৎচন্দ্রের পল্লীভিত্তিক উপন্যাসগুলিকেই তুলনায় শ্রেষ্ঠত্বের মর্যাদা দিতে হয়। তার কারণ এই উপন্যাসগুলির মধ্য দিয়ে গ্রামবাংলার একটা অকৃত্রিম প্রাকৃতিক রূপ ফুটে উঠেছে। সে রূপে চোখ মুগ্ধ হওয়ার কথা নয়, কিন্তু পাঠকের সঙ্গেই মনে হবে এ পল্লীবাংলার অত্যন্ত খাঁটি স্বাভাবিক রূপ—ভালয়-মন্দির, সুন্দরে-কুৎসিতে মেশানো বাস্তব রূপ। বহির্জগৎ থেকে বিচ্ছিন্ন, নানাবিধ কুসংস্কারে আচ্ছন্ন, গতানুগতিক আচার-আচরণের গোঁড়ামিতে পূর্ণ শরৎচন্দ্রের চিত্রিত বাংলার গ্রাম তবু যে বাঙালী পাঠকের চিত্ত একান্তভাবে তরণ করেছে তার কারণ হলো, এই দক্ষণশীল বন্ধু আবহাওয়ার পৃষ্ঠপটে শরৎচন্দ্র গ্রামের যেসব নরনারীর ছবি আঁকেছেন তারা দোষেগুণে সবলেই নড় কঁড়ে মানুষ্য কাউকে অপরিচিত অনাগ্রায় মনে হয় না। একদিকে সংকার্ণতা ঘৃণা বিদ্বেষ হিংসা নীচতা প্রভৃতি দোষগুলির সঙ্গে যেমন পরিচয় হয়, তেমনি পরিচয় হয় অপরিসীম স্নেহ-বাৎসল্য, সহৃদয়তা, সেবাপরায়ণতা, উদারতা প্রভৃতি বিচিত্র সদৃশ্যের সঙ্গে। শিক্ষার সুযোগ বঞ্চিত সংস্কারাক্রম সামন্ততান্ত্রিক এ দো পাড়াগাঁয়ে চিত্তকার্পণ্যের পরিচায়ক নানা অসুন্দর ঘটনা ও দৃশ্যাদির সাক্ষাৎ পাওয়া আশ্চর্য নয় কিন্তু অমন অনুন্নত পরিবেশের ভিতর এত প্রাণের সম্পদ কেমন করে থাকতে পারে সে একটা রহস্য। বিশেষ করে নারীচরিত্রগুলিতে লেখক যে প্রাণের ঐশ্বর্য পরিস্ফুট করে তুলেছেন তার কোন তুলনা হয়

না। শুভদা, বিবাজ, পার্বতী (দেবদাস), সরযু (চন্দ্রনাথ), সিদ্ধেশ্বরী (নিষ্কৃতি), হেমাঙ্গিনী (মেজদিদি), রমা ও জ্যাঠাইমা (পল্লীসমাজ), পোড়াকাঠ (অরক্ষণীয়), কুসুম (পণ্ডিতমশাই), ঘোড়শী (দেনা-পাওনা), সৌদামিনী (স্বামী), যুগল (গৃহদাহ), সুনন্দা (শ্রীকান্ত ত্রয় পর্ব) প্রভৃতি চরিত্রগুলির মধ্য দিয়ে গ্রন্থকার বাংলার পল্লীবাসিনী নারীর কোন না কোন একটি মহত্বের দিক প্রকটিত করেছেন। অথচ যে-আবহাওয়ায় তাদের স্থিতি ও গতি, তা কতই না পশ্চাৎপদ। বৃহত্তর পৃথিবীর কোন আলোই সেখানে ঢুকতে পায় না, এমনকি কলকাতার সমাজ-সংস্কার কিংবা স্বদেশী আন্দোলনের এতটুকু কল্লোলও গ্রামজীবনের নিস্তরঙ্গ অবস্থাকে আলোড়িত করেছে তার প্রমাণ মেলে না, শিক্ষাদীক্ষার ন্যূনতম আয়োজনও বলতে গেলে অনুপস্থিত—এমন হতদশাগ্রস্ত মলিন পারিপার্শ্বিকের মধ্যে নারীহৃদয়ে এত মাদুর্য্য করুণা সহনশীলতা সেবার নিষ্ঠা কী করে সম্মিত থাকে ভেবে পাওয়া যায় না। বোধহয় সমাজপরিবেশের এই পশ্চাৎমুখীনতার কারণেই থাকে। শরৎচন্দ্রের অঙ্কিত গ্রামীণ নারীচরিত্রগুলি গ্রামের পশ্চাৎপদ পরিবেশ সত্ত্বেও মহীয়সী এ রকম বললে ঠিক বলা হবে না, তারা পশ্চাৎপদ পরিবেশের কারণেই মহীয়সী—এ রকম বলাটাই বোধহয় ঠিক। কেননা গ্রামে আধুনিক শিক্ষার প্রভাব ছড়িয়ে পড়লে গ্রামগুলির এই চেহারা ও গ্রামীণ নারীচরিত্রসমূহের অমনতর আদল থাকত কিনা সন্দেহ।

আমি আমার ‘সমাজ-চেতনা’ প্রবন্ধে দেখিয়েছি এখানেও তার পুনরাবৃত্তি করছি যে, শিল্পসৃষ্টির এ এক বিচিত্র খেলায় যে, রক্ষণশীল তথা সংস্কারাচ্ছন্ন পরিবেশের পৃষ্ঠপোষক রচিত শরৎচন্দ্রের গ্রামীণ উপন্যাসগুলিই তার শ্রেষ্ঠ শিল্পকীর্তি। এই অসম্ভব সংঘটন কেমন করে সংঘটিত হয় জানি না, কিন্তু সংঘটিত হয় এইটেই পরীক্ষিত অভিজ্ঞতা। অন্ততঃ শরৎচন্দ্রের বেলায় আমাদের পরীক্ষিত অভিজ্ঞতা। পল্লীসমাজ ও নিষ্কৃতি শরৎচন্দ্রের দুটি অতুল্যকৃষ্টি উপন্যাস। (এসম্পত্তঃ লিখি, কাব্য ও সাহিত্যের সপ্তসিদ্ধমন্ত্রনকারী যোগী শ্রীঅরবিন্দ নিষ্কৃতিকে শরৎচন্দ্রের অন্যতম শ্রেষ্ঠ গ্রন্থের মর্যাদা দিয়েছেন। দিলীপকুমার রায়কে লিখিত শরৎচন্দ্রের পত্র দ্রষ্টব্য।) মনস্তত্ত্ব চিত্রণের ক্ষেত্রে পণ্ডিতমশাই ও দেনা-পাওনা উপন্যাসের উৎকর্ষ স্বতঃই মনে পড়ে। মান্নের কলঙ্কের অজুহাতে স্বামিগৃহ থেকে পরিত্যক্ত হওয়ার আহত অভিমানে কুসুমের আত্মমর্যাদাবোধের স্ফুরণ কিংবা চণ্ডীমন্দিরের ভৈরবী পদে সমাসীন

হবার পরও ষোড়শীর স্রামিকের আদর্শের পায়ে উৎসর্গীকৃত ভারতীয় বিবাহিতা নারীর পত্নীত্বের সংস্কার দ্বারা। মথিত হওয়ার অন্তর্সংঘাত জটিল মনস্তাত্ত্বিক দ্বন্দ্বের উন্মোচন চেষ্টার দুটি কুশলী নিদর্শন। দুটি নারীর অন্তর্দ্বন্দ্বই মাতৃত্বের ক্ষুব্ধাকে কেন্দ্র করে আবর্তিত হয়েছে। কুসুমের কাছে বৃন্দাবন যেন উপলক্ষ্য, আসল লক্ষ্য বৃন্দাবনের মাতৃহারা সন্তান চরণের প্রতি বাৎসল্যরসের পরিতৃপ্তি। বাজগায়ের জমিদার জীবানন্দ চৌধুরী যত বড় মদ্যপ আর লম্পটই হোক না কেন, যেহেতু তারই সঙ্গে একদা অলকার (ষোড়শীর গৃহাশ্রমের নাম) বিয়ে হয়েছিল, ষোড়শী সে-স্মৃতি কোনমতেই ভুলতে পাবে না। বিয়ের রাতেই স্ত্রীকে ফেলে স্বামী পালায়। তারপর দার্যকালের অদর্শনের পর সম্পূর্ণ নূতন প্রতিবেশে স্বামীর সঙ্গে ষোড়শীর সাক্ষাৎ। শরৎচন্দ্র যে একজন কত বড় নিপুণ মনস্তাত্ত্বিক লেখক পণ্ডিতমশাই ও দেনা-পাওনা উপন্যাসে তার অসংশয় ছাপ পড়েছে। অনেকে এই প্রসঙ্গে পল্লীসমাজের রমা চরিত্রের নামোল্লেখ করবেন। কিন্তু এই চরিত্রে মনস্তত্ত্বের চিত্রণ তত উজ্জ্বল নয় সতটা দেখানো হয়েছে। ব্যক্তিমেনেব উপর সামাজিক অনুশাসনের উৎপীড়নের দ্বন্দ্ব। বিধবার প্রেম সমাজ-নিষিদ্ধ প্রেম। সেই প্রেম বাল্যপ্রণয়ের স্মৃতিকে কেন্দ্র করে উজ্জীবিত হলেও নিষেধ-বিধির কঠোরতার হ্রাস হয় না। রমা ও রমেশের প্রেম শেষোক্ত গোত্রের প্রেম। কিন্তু রমার অন্তর্দ্বন্দ্বের চেয়েও রমার জীবন ব্যর্থ হওয়ার পরিণামটাই বেশী ফুটেছে এই উপন্যাসে। সার্থক একটি উপন্যাস কিন্তু এটিকে মনস্তাত্ত্বিক উপন্যাস বললে সংজ্ঞানিরূপণ যথার্থ হবে না।

শরৎচন্দ্র শহরের পটভূমিতে যে সব উপন্যাস লিখেছেন তাদের গঠন-বৈশিষ্ট্যের ভিতর মননশীলতার দীপ্তি রয়েছে, স্টাইলের ওজ্জ্বল্য রয়েছে, মতামত একাংশের ক্ষেত্রে অনেক প্রগতিশীল, বিদ্রোহী, এমনকি বিপ্লবী আদর্শের ঘোষণা আছে কিন্তু চরিত্রসৃষ্টির স্বাভাবিকত্ব নাগরিক উপন্যাসগুলি গ্রামীণ উপন্যাসগুলির পাশে দাঁড়াতে পারে না। পথের দাবী কিংবা শেষ প্রশ্নের কথা ধরা যাক। দুটি উপন্যাসেই সংস্কারমুক্ত অগ্রসর চিন্তার পরিচায়ক অনেক মনোমুগ্ধকর কথার ফুলগুরি ছিটানো হয়েছে কিন্তু চরিত্রগুলি যেন কেমন দানা বাঁধতে পারেনি। চরিত্রগুলির কথার বৈদগ্ধ্যের আড়ালে চরিত্রগুলির স্বভাবানুগতা হারিয়ে গিয়েছে। চরিত্রগুলির কথার বুদ্ধির দীপ্তি চরিত্রগুলির হৃদয়ের উত্তাপ শুধে নিয়েছে। সব্যসাচীর আত্মপ্রকাশ ঘটেছিল একটি অতুজ্জ্বল বৈপ্লবিক চরিত্র রূপে, কিন্তু শেষ

অবধি নানা গালভরা কথার বাহন হওয়া সত্ত্বেও কেমন যেন সে মিইয়ে গেছে। উপন্যাসের মধ্যে ও শেষাংশে তাকে বিপ্লবী চরিত্র রূপে পাই না, পাই অপূর্ব ও ভারতীর প্রেমের সমঝার ফয়সালাকরণে ব্যস্ত মূলতঃ এক মানবিক চরিত্র রূপে। এই যদি লেখকের মনে ছিল তো এমন ঘটনা ও আয়োজন করে গঁজেল মিস্ত্রী গিরিশ মহাপাত্র রূপে তাকে রেঙ্গুনের জাহাজ-ঘাটায় অবতারণা করার কোনই প্রয়োজন ছিল না। পথের দাবী উপন্যাস 'বহুবারস্তে লধুক্ৰিয়া'র একটি স্মরণীয় দৃষ্টান্ত হয়ে রইল।

অন্যপক্ষে শেষ প্রশ্নের কমল চমক-লাগানো কথার একটি পিপে বিশেষ। তার মুখে সাংঘাতিক সাংঘাতিক কথা লেগেই আছে। সে পাশ্চাত্য সুখবাদী দর্শন ক্ষণিক তত্ত্বে বিশ্বাসী, ভারতীয় সভ্যতা ও সংস্কৃতির আবহমান-কাল প্রচলিত মূল্যবোধগুলিকে সে কানাকড়ির মূল্যও দেয় না, দাম্পত্য বন্ধনের স্থায়িত্ব অপেক্ষা দাম্পত্য প্রেমের ক্ষণকালীন নিবিড়তায় তার আস্থা অধিক। এই সব আপাত-পিলে-চমকে-দেওয়া মতামতের অভিব্যক্তি দিতে গিয়ে তার মুখে কথার খই ফুটছেই ওবু ফুটছে। কিন্তু মানুষটি কেমন যেন বড় নিরামিষ। কথার সঙ্গে আচরণের তেমন মিল নেই। তার উপর কতকগুলি প্রবাসী বাঙালী অবসরভোগী শান্তিপ্রিয় নিরীহ মধ্যবিত্ত ভদ্রলোক শ্রেণীর মানুষের মধ্যে তার ক্রমিক বিচরণ তার বৈপ্লবিকতায় সন্দেহ জাগায়। কথায় বিপ্লবী অনেকেই সাজতে পারে কিন্তু শুধু কথায় চিঁড়ে ভেজে না। ভেজে না যে তার প্রমাণ রাজেনের মত সত্যিকারের বিপ্লবী পরহুৎখকাতর নির্ভীক যুবকের সাম্নিখে এসে কমল একেবারেই মিইয়ে গেল। রাজেনের কাছে কমলের পরাজয় ঘটলো। রাজেন স্ফলবাক্ কিন্তু কাজে অমিতবিক্রম। পাছে তার কাজের ব্যাঘাত ঘটে সেইজন্ম নারীর ছলাকলা-বিভ্রমকে সে তার কাছ ধঁষতেও দেয় না। উপন্যাসের উপসংহারে দেখানো হয়েছে একটি বিপ্লব পরিবারকে আশ্রয় থেকে উদ্ধার করতে গিয়ে সে তার প্রাণ বিসর্জন দিলে। এহেন বসিষ্ঠ তেজস্বী আদর্শনিষ্ঠ যুবাব কাছ কমলের মত তীক্ষ্ণবুদ্ধি কিন্তু কথামাএসার নারীর পরাজয় না ঘটে কি পারে?

শরৎচন্দ্রের নগরকেন্দ্রিক উপন্যাসগুলি তাঁর গ্রামকেন্দ্রিক উপন্যাসগুলির মত শিল্পোৎকর্ষের দিক দিয়ে তেমন খোলেনি তার একটা কারণ বোধহয় এই যে শরৎচন্দ্রের গ্রামজীবনের সঙ্গে যেন গভীর ও অন্তরঙ্গ পরিচয় ছিল, তেমন শহরজীবনের সঙ্গে ছিল না। সত্য বটে তিনি স্কুলজীবনে ভাগলপুর,

যৌবনে কিছুকাল কলকাতা, পরে রেঙ্গুন শহরে এক যুগেরও বেশী বাস করেছিলেন, তাহলেও প্রথম বয়সের দেখা বাংলার গ্রাম তাঁর স্মৃতির মধ্যে সংগৃহীত হয়ে গিয়েছিল। আয়ুত্যা তিনি এই স্মৃতিভার নিজের মধ্যে বহন করেছেন। গ্রামকে তিনি যত কাছে থেকে দেখেছিলেন, শহরকে তেমন করে কাছে থেকে দেখার তাঁর সুযোগ হয়নি। সেটাজন্যই গ্রাম তাঁর লেখায় শিল্পীর অপূর্ব তুলিকাপাতে মহনীয় হয়ে উঠেছে।

বাংলার গ্রামের সঙ্গে তাঁর এই এককালীন নিবিড় অন্তরঙ্গতা তাঁর রচনার শক্তিমত্তারও যেমন উৎস, আবার এক হিসাবে দেখতে গেলে দুর্বলতারও উৎস। শরৎচন্দ্রের চিন্তার ছাঁচের মধ্যে শেষ বয়স অবধি একটা রক্ষণশীলতার প্রভাব দেখতে পাওয়া যায়। তাঁর অমোচনীয় ব্রাহ্মণ্য সংস্কার, ছোয়াছুঁয়ি-জাত-বিচার নিয়ে অতিরিক্ত খুঁতখুঁতে বাতিক, এই রক্ষণশীলতার আওতায় পড়ে। এটা নিশ্চিতই চিন্তার এক পশ্চাৎ-টান। এই পশ্চাৎ-টানের মূল খুঁজতে গেলে বাংলার গ্রাম্য সংস্কারের মধ্যে তাকে খুঁজে পাওয়া যাবে। বাংলার সংস্কার তাঁর মনোমধ্যে এমন আঁঠেপৃষ্ঠে সংলগ্ন হয়ে গিয়েছিল যে, তিনি চেষ্টা করেও পরিণত জীবনে সেই পেছুটানের প্রভাব মন থেকে মুছে ফেলতে পারেননি। তা-ই যদি না হবে তো এই অবিশ্বাস্য ব্যাপার কেমন করে সম্ভব হয় যে, যিনি চরিত্রহীন, শ্রীকান্ত প্রথম ও দ্বিতীয় পর্ব, গৃহদাহ, পথের দাবী, শেষ প্রপ্তের মত দৃশ্যতঃ সংস্কারমুক্ত সব বই লিখেছেন, শেষ বয়সে তিনিই আবার বিপ্লবী আদর্শে জলাঞ্জলি দিয়ে বিপ্রদাস ও শেষের পরিচয়-এর মত দুটি সুস্পষ্ট প্রতিক্রিয়াশীল উপগাস লিখতে পারলেন? বিপ্রদাসের মূল প্রতিবাদ্য কী? আধুনিক শিক্ষাদীক্ষার প্রচ্ছন্ন সমালোচনা নম্ন কি? গ্রামের যৌথ পরিবার-প্রথার কল্লিত মহত্ব, ধর্মীয় আচার-অনুষ্ঠানের মহিমা, প্রজাপুরজনের পরিবর্তে জবরদস্ত হাতে জমিদারী শাসনের প্রয়োজনীয়তা, অভিভাবক কর্তৃক কন্ডার বরনির্বাচনের যৌক্তিকতা—এসব দেখানোই কি এই অগৃথ্য-সুলিখিত উপগাসটির মূল উদ্দেশ্য নয়? বন্দনা তার আধুনিক শিক্ষার যত্নার্জিত সম্পদকে ত্যাগ করে গ্রামের একান্নবর্তী জমিদারী সংসারের রক্ষণশীল পারিবারিক বন্ধন স্বেচ্ছায় বরণ করে নিল—এই চিত্রের ভিতর কোন্ প্রগতিশীলতার বার্তা ঘোষিত হয়েছে? বিপ্রদাসের সংসার ছেড়ে সন্ন্যাসী হওয়ার মধ্যে চরিত্রমাহাত্ম্য থাকতে পারে কিন্তু তার সমগ্র জীবন-দর্শনটাই যে রক্ষণশীলতার চোরাবালির উপর প্রতিষ্ঠিত ছিল তা কি একালের

ভাবধারায় লালিত পাঠক-পাঠিকাকে বুঝিয়ে বলবার আবশ্যকতা আছে ? আর শেষের পরিচয় উপন্যাসটি তো বৈষ্ণব বিগ্রহের অন্তর্হীন পূজাঅর্চনার এক অপরিসীম ক্লাস্তিকর ইতিবৃত্ত মাত্র। বেশ বুঝতে পারা যায় শরৎচন্দ্রের সৃজনী আবেগ এই বইয়ের রচনাকালে একেবারেই তলানিতে এসে ঠেকেছিল। ঐতিহ্যলালিত গতানুগতিক হিন্দুমনের কাছে এই উপন্যাসের কাহিনীর আবেদন থাকতে পারে কিন্তু আধুনিক পাঠকের কাছে নয়।

যাই হোক, যে-কথা বলছিলাম। নগরভিত্তিক উপন্যাসগুলির অণু অনেক অসম্পূর্ণতা থাকা সত্ত্বেও গৃহদাহ উপন্যাসটি কিন্তু চমৎকার উৎরেছে। সমালোচকদের মতে এটি শরৎচন্দ্রের অন্যতম শ্রেষ্ঠ উপন্যাস; কেউ কেউ এটিকে তাঁর শ্রেষ্ঠ উপন্যাস আখ্যা দিতে চান। উপন্যাসটির নিটোল গড়ন, আধুনিককালীন পাঠকের মনোযোগকে সবলে আকর্ষণ করার মত উপযুক্ত বিষয়বস্তুর সমাবেশ, চরিত্রগুলির মনস্তাত্ত্বিক দ্বন্দ্ব-সংঘাতের নিপুণ বিশ্লেষণ স্বতঃই এটিকে শিল্পোৎকর্ষমণ্ডিত করে তুলেছে। কাজেই এই উপন্যাসটির যৎকিঞ্চিৎ স্বতন্ত্র আলোচনা প্রয়োজন।

গৃহদাহ একটি ত্রিকোণ প্রেমের কাহিনী। মহিম, অচলা ও সুরেশ এই তিনে মিলে ত্রিকোণ রচিত হয়েছে। মহিম ও অচলা পরস্পরকে ভালবেসে বিয়ে করেছে। অচলার ব্রাহ্মসমাজভুক্ত বলে গোড়ার দিকে অচলাদের সমাজের প্রতি মহিমের ঘনিষ্ঠ বন্ধু সুরেশের বিতৃষ্ণার অন্ত ছিল না এবং মহিম যাতে এই বিবাহ না করে তার জন্য সুরেশ চেষ্টার কসুর করেনি। কিন্তু অদৃষ্টের পরিহাসে নিজেই সুরেশ শেষ পর্যন্ত অচলার আকর্ষণে মুগ্ধ হলো এবং ব্রাহ্মদের প্রতি তার পূর্বতন বিদ্বেষ কাটিয়ে ঘন ঘন অচলার পিতৃগৃহে উপস্থিত হতে দেখা দিতে লাগলো। অনাহূত সে মহিমের গাঁয়ের বাড়িতেও গিয়ে উপস্থিত হলো, যেখানে মহিম তার সদ্যবিবাহিত পত্নীকে নিয়ে সবে সংসার পেতে বসেছে। সুরেশ ধনীসন্তান, উদারপ্রাণ, নিজের প্রাণ বিপন্ন করেও সে দুই-দুবার মহিমকে নিশ্চিত মৃত্যুর কবল থেকে রক্ষা করেছে, কিন্তু তার স্বভাবের প্রধান ত্রুটি এইখানে যে, সে আত্মসংযমে অপারগ। প্রবৃত্তির চালনায় তার দ্বারা যে কোন অঘটন ঘটা সম্ভব। আর শেষ অবধি সেই অঘটন ঘটলোও। এই উপন্যাসের ‘গৃহদাহ’ নাম বাস্তব এবং রূপক দুই অর্থেই যথাপ্রযুক্ত। সুরেশের অন্ধ আকর্ষণের কামবহ্নিতে মহিম ও অচলার সদ্যরচিত গৃহস্থালী পুড়ে ছাই হয়ে গেল।



মহিমের স্বভাব সুরেশের সম্পূর্ণ বিপরীত। গভীর-গভীর, স্বল্পবাক্য, কর্তব্যনিষ্ঠ, আঘাতের বদলে প্রতিঘাতে অশক্ত ও নীরব দুঃখসহনে সদা-অভ্যাস্ত এবং সর্বোপরি অচলার প্রতি নিবিড় প্রেমে প্রেমময় হয়েও বাইরে প্রেমের প্রকাশে সম্যকোচ্চ, সর্বদা স্বভাব-সংযমের বর্মে আবৃত—এই হলো মহিম। অচলা এই দুই বিপরীত প্রকৃতির টানা-পোড়েনের মধ্যে পড়ে দিশেহারা। একদিকে মহিমের আত্মবিলোপকারী গভীর প্রেমের প্রবল টান সে অস্বীকার করতে পারে না, অন্যদিকে সুরেশের প্রাণোচ্ছলতা, হৃদয়াবেগের প্রাচুর্য, পার্থিব ধনৈশ্বর্যের আকর্ষণ—এগুলিও তাকে দুর্নিবার টানে টানে। (ধনসম্পদের প্রতি নাকি ব্রাহ্মদের একটু দুর্বলতা আছে—এই অভিযোগের কতদূর ভিত্তি আছে বলা মুশকিল, তবে দেখা যাচ্ছে শরৎচন্দ্র এই অভিযোগের সুযোগ নিয়ে অচলা ও অচলার পিতা কেদারবাবুকে ওই দুর্বলতার শিকার করে এঁকেছেন। এটা সাম্প্রদায়িক সংকীর্ণচিত্ততার কোঠায় পড়ে—শরৎচন্দ্রের মজ্জাগত ব্রাহ্মণ্য সংস্কারেরই এটি একটি রকমফের কিনা তা একটা প্রশ্নচিহ্ন হয়েই রইল।) শেষ পর্যন্ত দুই বিপ্রতীপ আকর্ষণের আলোড়নে-বিলোড়নে ক্ষতবিক্ষত হয়ে একসময়ে আত্মবিস্মৃত মুহূর্তে সে সুরেশকে বলেই ফেলে, সুরেশবাবু, যাকে ভালবাসিনে তার সঙ্গে ঘর করার যন্ত্রণা থেকে উদ্ধার করে আমায় আর কোথাও নিয়ে চলুন। এই সদস্ত উক্তি মহিমের প্রতি এবং অচলার নিজের অন্তর-প্রকৃতির প্রতিও যে কত বড় অবিচার, অচলা সেই বিস্মরণের মুহূর্তে সে-কথা বোঝেনি, বুঝেছিল পরে, অনেক দুঃখের মূল্যে, অজস্র চোখের জলের ভিতর দিয়ে।

উপন্যাসটির বিষয়বস্তু কিছু নতুন নয়। এদেশে এবং বিদেশে একাধিক উপন্যাস ত্রিকোণ প্রেমের কাহিনী অবলম্বনে রচিত হয়েছে। আমাদের সাহিত্যে এই বিষয়বস্তুর উপন্যাসের শ্রেষ্ঠ একটি দৃষ্টান্তস্থল রবীন্দ্রনাথের ঘরে-বাইরে। বিশ্বসাহিত্যের যে সব উপন্যাসের ভিতর অনুরূপ বিষয়বস্তুর চিত্রণ আছে তার মধ্যে পড়ে—টলস্টয়ের আনা ক্যারেনিনা, টমাস হার্ডির জুড দ্য অবসকিউর, এইচ. জি. ওয়েলস-এর দ্য ওয়াইফ অব সার আইজাক হ্যামিলটন, গলসওয়ার্ডির ফরসাইট সাগা (সোমস-আইয়িন-ফিলিপ পর্ব), আনাতোল ফ্রাঁসের রেড লিলি, প্রভৃতি। শরৎচন্দ্র এই সমস্ত উপন্যাস পড়েছিলেন কিনা, পড়ে থাকলে তাদের দ্বারা প্রভাবিত হয়েছিলেন কিনা জানা যায় না তবে ঘরে-বাইরে তিনি বিশেষ মনোযোগ

সহকারে পড়েছিলেন সে কথা সহজেই বোঝা যায়। দুই উপন্যাসের প্রকাশকালের মধ্যেও পার্থক্য খুব কম। মাত্র পাঁচ বছরের ব্যবধান। শরৎচন্দ্র রবীন্দ্র-রচিত প্রতিটি উপন্যাসই অতিশয় তন্ন তন্ন করে পড়েছিলেন।

তবে ঘরে-বাইরের সঙ্গে গৃহদাহের বহিরঙ্গে যতই মিল থাকুক, অন্তরঙ্গে মিলের চেয়ে অমিল বেশী। নিখিলেশের চরিত্র মহিমের চেয়েও অনেক বেশী মহান্। তত্পরি সে সূক্ষ্ম কবিস্বভাব বিশিষ্ট, মহিমে কবিত্বের সংবেদনশীলতা অনুপস্থিত। সন্দীপ সচেতন স্থল কামনার দ্বারা বিমলাকে অধিগত করতে চায় এবং তার পরিকল্পনার মধ্যে ভালবাসার কোন স্থান নেই, লালসাই তার আকর্ষণের চালিকা শক্তি। পক্ষান্তরে সুরেশ প্রবৃত্তি চালিত যুবক হলেও খেই মুহূর্তে বুঝলো অচলা তাকে অন্তর থেকে ভালবাসেনি, তার আসল ভালবাসা পড়ে রয়েছে মহিমের অভিমুখে, তন্মুহূর্তে সে তার ভুল বুঝতে পেরে অচলার কাছ থেকে আপনাকে সংবৃত্ত করে স্বেচ্ছামৃত্যুর দিকে পা বাড়ালো। সন্দীপ সচেতন পাপী, সুরেশের পাপের ভিতর আছে অচলাকে বুঝতে না পারার স্বভাব-সারল্য। একজন জবরদস্তির নীতিতে বা অনীতিতে বিশ্বাসী; অগ্ন্যজ্ঞান জবরদস্তি-পাওয়া থেকে স্বেচ্ছায় হাত গুটিয়ে নিলে। অচলার চরিত্রে সচ্ছলতার মোহ দেখানো হয়েছে; বিমলার পক্ষে সচ্ছলতার হাতছানিতে আকৃষ্ট হবার কোনই কারণ নেই কেননা তার স্বামী জমিদার, তাদের নিজের গৃহই বিত্ত-সচ্ছলতার প্রতীক। অবশ্য আত্মবিস্মৃতির ধরনে দুজনার মধ্যে যথেষ্ট মিল আছে।

মোট কথা, সব জড়িয়ে বিচার করলে গৃহদাহ যে একটি বিশেষ সুলিখিত উপন্যাস সে বিষয়ে কোনই সন্দেহ থাকে না।

শরৎচন্দ্রের চরিত্রহীন আর একটি শক্তিশালী উপন্যাস। এই উপন্যাসের দুটি কেন্দ্রীয় নারী চরিত্র। সাবিত্রী ও কিরণময়ী। তুলনায় কিরণময়ী অনেক বেশী ব্যক্তিগতসম্পন্ন, প্রথরবুদ্ধিশালিনী, আত্মসচেতন নারী। সাবিত্রীকে মূলতঃ একটি প্রেমময়ী সহনশীলা সেবাপরায়ণা নারী রূপে আঁকা হয়েছে। কিন্তু যেহেতু তার চরিত্রে একদা নাকি কলঙ্ক স্পর্শ করেছিল এবং সে পরিচারিকার কাজ করে, সেই কারণে তাকে আর ভদ্র সমাজের আওতার মধ্যে আনাই হলো না, তাকে তার সেবার আদর্শ মাথায় ধরে সমাজের বাইরেই জীবন কাটাতে হলো। সতীশ ও সরোজিনীর দাম্পত্য বন্ধনের যুগ্মে সে আপনাকে উৎসর্গ করে সকলের মনোযোগের বৃত্ত থেকে

নীরবে সরে গেল, মৃত্যুপথযাত্রী উপেন্দ্রের শেষ দিনগুলির সেবার ভার নিয়ে ॥

এই ক্ষেত্রেও শরৎচন্দ্র রক্ষণশীলতার উদ্দেশ্যে উঠতে পারেননি। সামাজিক প্রশ্নে বঙ্কিমচন্দ্রকে রক্ষণশীল বলা সমালোচকদের মধ্যে একটা রেওয়াজ হয়ে দাঁড়িয়েছে। কিন্তু দেখা যায় শরৎচন্দ্র বঙ্কিমের অনেক পরে জন্ম গ্রহণ করেও গুরুত্বপূর্ণ একাধিক প্রশ্নে বঙ্কিমের অনুবর্তী হয়েই চলেছেন—বঙ্কিমের চেয়ে খুব বেশী উদার মনোভাবের পরিচয় দিতে পারেননি। সতীশের সঙ্গে সাবিদ্রীর বিয়ে হওয়াটাই প্রত্যাশিত ছিল, কিন্তু কোন্ এক ধনীকণা ব্যারিস্টারের ভগিনী কুলেশীলে সতীশদের সমান ঘরের পাত্রীর অনুকূলে আপন দাবি ত্যাগ করে সাবিদ্রীকে চিরকাল দাসীবৃত্তি করেই যেতে হলো—তার অপরিমেয় ভালবাসার কোন মূল্যই লেখক দিলেন না। ‘বড় প্রেম শুধু কাঁচের টানে না, দূরেও সরিয়ে দেয়’—এই উক্তি শরৎচন্দ্রের। কিন্তু দেখা গেল এই আপ্তবাক্য শুধু বঙ্কিতা, পতিতা শ্রেণীর নারীদের জন্যই তোলা রইল; উচ্চবর্ণের নারীর জন্য অণু বিধান, অণু পীতি সংরক্ষিত থাকলো।

কিরণময়ী চরিত্রের বিশ্লেষণ আমি এই বইয়ের অগ্রজ করেছি। (উপক্রমণিকা ও ‘নারীচরিত্র’ অধ্যায় দ্রষ্টব্য।) কাজেই এখানে আর তার পুনরুক্তি করলুম না। তবে পুনরাবৃত্তির ঝুঁকি নিয়েও একথা বারবার বলতে হবে, কিরণময়ী বাংলা সাহিত্যের এক আশ্চর্য সৃষ্টি। বাংলা উপন্যাসে এ চরিত্রের কোন দোসর নেই—আগেও ছিল না, আজও নেই।

শরৎচন্দ্রের আর একটি বিশিষ্ট শিল্পকীর্তি শ্রীকান্ত উপন্যাস পর্যায়! চার পর্বে এই পর্যায় সমাপ্ত। অনেকে বলেন এটি শরৎচন্দ্রের আত্মকাহিনী—জায়গায় জায়গায় কল্পনার মিশোল দেওয়া। হতেও পারে, কেননা উপন্যাসচতুষ্টয়ের কিছু-কিছু আখ্যান ও বিবৃতি শরৎচন্দ্রের জীবনীর ছাঁচটিকে মনে করিয়ে দেয়। প্রথম পর্বের ভাগলপুরের কৈশোর-কথা, দ্বিতীয় পর্বের বর্মা প্রবাস, শ্রীকান্তের সন্ন্যাসীর চালাগিরি করা—এ সব স্পষ্টতই লেখকের নিজ জীবনের স্মারক। তবে শ্রীকান্ত উপন্যাসমূলা আত্মকথাই হোক আর কল্পকথাই হোক এটি যে একটি বিশেষ শক্তিশালী রচনা সে বিষয়ে সমালোচকদের মধ্যে মতভেদ নেই।

প্রথম পর্বের ছুটি উজ্জ্বল চরিত্র ইন্দ্রনাথ ও অন্নদাদিদি। দ্বিতীয় পর্বের সবচেয়ে স্মরণীয় চরিত্র অভয়া। তৃতীয় পর্বে সুনন্দা, বজ্রানন্দ ও অগ্রদানী

ব্রাহ্মণ দম্পতী। চতুর্থ পর্বে কমললতা ও গহর। আর প্রতিটি পর্বে স্থায়ী একটি সুরের মত রাজলক্ষ্মী ও শ্রীকান্তের আকর্ষণ-বিকর্ষণের লীলাযুক্ত ভালবাসার কাহিনী অন্তহীন স্রোতে প্রবাহিত হয়ে চলেছে।

প্রথম পর্বের ইন্দ্রনাথ একটি অবিস্মরণীয় চরিত্র। ইন্দ্রনাথ দুর্দান্ত গৌরৱ ভর্যহীন কিন্তু মনটি তার মায়ের প্রাণের মত কোমল। সে মানুষের দুঃখ সহিতে পারে না আর কারও দুঃখের মুখোমুখি হয়ে সে-দুঃখের শান্তি না হওয়া পর্যন্ত সে নিজের প্রাণে কোন শান্তি পায় না। অন্নদাদিদির সংসারের অভাব মোচনের জন্ত তার প্রাণপাত প্রয়াস তার চরিত্রটিকে একটা বিরল মহিমায় ভূষিত করেছে। বিপন্নকে রক্ষা করতেও তার সমান তৎপরতা। গুণ্ডাদের আক্রমণ থেকে শ্রীকান্তকে রক্ষা করবার জন্ত সে যেভাবে আপন প্রাণ তুচ্ছ করে বুক দিয়ে এগিয়ে এসেছিল তাইতে শ্রীকান্ত ইন্দ্রনাথের চিরকালের কেনা হয়ে পড়েছিল এবং তার পর থেকে সকল কাজে তাকে ছায়ার ন্যায় অনুসরণ করেছে। অন্ধকার নিশীথে গঙ্গায় মাছ চুরির ঘটনা ইন্দ্রনাথ চরিত্রটির সমস্ত বৈশিষ্ট্য যেন একটি ঘটনার আধারে সংহত করে উপস্থিত করেছে। তার একাকী শ্মশানচারি-তার মধ্যে পাওয়া যায় একই ধরনের অসংশয়-আত্মনির্ভর অকুতোভয়তার নিশানা। আশ্চর্য চরিত্র এই ইন্দ্রনাথ। চার খণ্ডে সমাপ্ত শ্রীকান্ত উপন্যাসের প্রথম খণ্ডের প্রাথমিক অধ্যায়ে মাত্র কিছুকালের জন্ত তার আবির্ভাব ও অবস্থিতি। কিন্তু ওই ক্ষণিকের আত্মপ্রকাশের দ্বারাই সে গোটা উপন্যাসমালার উপর একটা অমোচনীয় প্রভাব বিস্তার করেছে। এবং সমগ্র উপন্যাসের মূল সুরটি বেঁধে দিয়েছে। সে সুর হলো বিদ্রোহের, বাঁধন ছেঁড়ার, শাসননাশন প্রবৃত্তির। শুনতে পাওয়া যায় বাস্তব জীবনের যে-চরিত্রটির আদলে ইন্দ্রনাথের চরিত্র পরিকল্পিত হয়েছিল সে পরে সন্ন্যাসী হয়ে সংসার ছেড়ে চলে যায়। সেটা বিচিত্র নয়। দুর্দমনীয় আবেগ আর দুঃসাহসিকতায় ভরা এমন যে গৌরৱ-গোবিন্দ চরিত্র, সে যদি বাস্তব জীবনে সন্ন্যাসী হয়ে গৃহত্যাগ করেই যায়, তাকে মোটেই অস্বাভাবিক বা অসম্ভব বলে মনে হয় না। এমন চরিত্রের একরূপ পরিণামই কল্পনীয়। সংসার এমন চরিত্রকে তার আপন সংকীর্ণ গণ্ডিতে বেঁধে রাখতে পারবে তার ,সাধ্য কী।

অন্নদাদিদি চরিত্রে ভারতীয় নারীর প্রবাদবিদিত সহনশীলতা ও স্বামী-আনুগত্যের একটি বেদনাকরুণ মর্মস্পর্শী চিত্র ফুটিয়ে তোলা হয়েছে।

অন্নদাদিদির স্বামী একটি নির্জলা পাষণ্ড, তৎসত্ত্বেও অন্নদাদিদি তাকে সব অবস্থায় ছায়ার গায় অনুসরণ করেছে, এমনকি স্বামীর জন্ম জাত দিয়েছে। জন্মেছিল হিন্দু উচ্চকুলে, কপালদোষে হয়েছে মুসলমান সাপুড়ের ঘরণী সাপুড়ানী, সাপ ধরে ও সাপ খেলিয়ে দুজনার জীবিকার উপায় হয়। তাও আসল সাপুড়ে নয়, হত্যার দায় এড়াবার জন্ম পুলিশের চোখে ধুলো দেবার উদ্দেশ্যে লম্পট স্বামী নাম ভাঁড়িয়ে সাপুড়ে সেজেছিল। পতির ধর্মই স্ত্রীর ধর্ম, এই মজ্জাগত সংস্কার বশে স্ত্রী ধর্ম পরিবর্তনে মুহূর্তেকের দ্বিধা করেনি। কিন্তু এততেও অন্নদার দুঃখের শেষ হয়নি। নেশায় বেহুঁশ হয়ে শাহজী প্রায়ই অন্নদাকে মারধোর করত, আর অকথ্য গালিগালাজ তো লেগেই ছিল। তা সত্ত্বেও লাক্ষিতা নিপীড়িতা নারী স্বামী ত্যাগ করেনি। ইল্লনাথদের অঞ্চল থেকে বাস তুলে নিয়ে অগ্রজ চলে যাওয়ার প্রাক্কালে অন্নদা তার প্রাণের ভাই ইল্লনাথকে যে চিঠি লিখে গিয়েছিল তার ভাষা বেদনার্ত হৃদয়ের রক্তে রঞ্জিত। বাস্তবে এমন চরিত্র সম্ভব কিনা জানি না, তবে বাস্তব কখনও কখনও কল্পনাকেও হার মানায়। সুতরাং কিছুই বলা যায় না।

দ্বিতীয় পর্বের অভয়ার সম্বন্ধে এই বইয়ের অগ্রজ আলোচনা করা হয়েছে। ('সমাজ-চেতনা' ও 'নারীচরিত্র' অধ্যায় দ্রষ্টব্য।) তৃতীয় পর্বের সুনন্দা একটি নির্ভীক আদর্শনিষ্ঠ অগ্ন্যায়-প্রতিরোধী চরিত্র। তার ভাসুর ঠাকুর অগ্ন্যায়-মানাহ্ হলেও এক বিধবা গরিব তাঁতি-বোয়ের মাথা গোঁজবার ভিটেমাটি ও জমিজমা মিথ্যা দেনার দায়ে নিলেম বন্দির আত্মসং করেছিলেন। সেই জলজ্যান্ত অগ্ন্যায়ের প্রতিবাদে সুনন্দা তাঁর স্বামী ও শিশুপুত্রসহ একান্নবর্তী ভাসুর-গৃহ ত্যাগ করে য়েচ্ছায় কঠিন দারিদ্র্য বরণ করে নিলে। তৃতীয় পর্বের অগ্রদানী ব্রাহ্মণ দম্পতীর আলেখ্যটিও সুন্দর। তারা সীমাহীন অভাব-অনশনের মধ্যেও তাদের হৃদয়ের সহজাত মায়া-মমতার বৃত্তি হারায়নি। বিশেষ, ব্রাহ্মণীর আপাত-রুদ্ধ বহিঃপ্রকৃতির অন্তরালে ফল্গুধারার গায় বহমান সেবা ও মমতার চিত্রটি গভীরভাবে হৃদয় স্পর্শ করে। এটি শ্রীকান্ত উপন্যাসের নিতান্তই একটি পার্শ্ব-উপাখ্যান। কিন্তু শুধু দরিদ্রের হৃদয়ের ঐশ্বর্য দেখানোই এর একমাত্র উদ্দেশ্য নয়। সেই সঙ্গে অগ্ন্যায় সামাজিক শাসন ও উৎপীড়নে কেমন করে হিন্দু সমাজের কাঠামো ক্রমক্ষয়িষ্ণু হয়ে জীর্ণতার শেষদশায় এসে পৌঁচেছে তারও একটি মর্যাস্তিক ছবি এই উপ-কাহিনীর মধ্যে মেলে।

চতুর্থ পর্বের কমললতা বৈষ্ণবীর চরিত্রটি সুন্দর। কেমন করে, কোন্ অবস্থায়, বৈষ্ণব সাধন-ভজনের পথে সে এলো, এসে শ্রীকৃষ্ণে সর্ব-সমর্পণ কর নিশ্চিন্ত হয়েছে, তার বৃত্তান্ত সমাজের একটি স্বল্প-পরিণীত দিকের বাস্তবতাকে উদ্ঘাটিত করে। ধনীসন্তান কিন্তু স্বভাবে উদাসী মুসলমান কবি গহরের কমললতার প্রতি নীরব প্রেমের মাধুর্য ও সৌন্দর্য দুই-ই চিত্র-স্পর্শী। মুসলমান চরিত্র শরণ-সাহিত্যে কম। এই চরিত্রটি তার ব্যতিক্রম। এমন আরও কিছু চরিত্র শরণচন্দ্র সৃষ্টি করে যেতেন তো মুসলিম পাঠক সমাজের কাছে তাঁর আবেদন আরও নৈকট্যমণ্ডিত হতে পারতো।

কিন্তু পর্বের পর পর্ব জুড়ে রাজলক্ষ্মী-শ্রীকান্ত প্রণয়োপাখ্যানের অতি-সবিস্তার, প্রায়-অন্তহীন, বর্ণন শ্রীকান্ত বইয়ের পর্বগুলিকে কিছুটা বাহ্য-ভারাক্রান্ত করেছে, সে কথা সম্যকদর্শী ব্যক্তিমাত্রেই স্বীকার করতে বাধ্য হবেন। সাধারণ পাঠকের নিকট যে-কোন রকমের প্রেমকাহিনীর দুর্নিবার আকর্ষণ থাকলেও, এই প্রেমকাহিনীটির এমনতর অতিফেনায়িত পৌনঃ-পুনিক বর্ণনের কী আবশ্যিকতা ছিল ভাল বুঝতে পারা যায় না। এক এক সময় শ্রীকান্তকে ঘিরে রাজলক্ষ্মীর আশঙ্কা ও উদ্বেগের উচ্ছ্বাস রীতিমত ক্লাস্তিকর ঠেকে। তাছাড়া, এই কাহিনীর সামাজিক তাৎপর্যও তেমন স্বাস্থ্যপ্রদ নয়। একটি শক্ত-সমর্থ কর্মের ক্ষমতায়ুক্ত অথচ বাউণ্ডুল-স্বভাব যুবক দিনের পর দিন পড়ে পড়ে এক বাঈজীর উপার্জনের উপর খাচ্ছে এ বিবরণ সুস্থও নয়, লোকের সামনে ধরে দেওয়ার মত আদর্শ দৃষ্টান্তও নয়। তাছাড়া, কাহিনীটি পুরাপুরি বিশ্বাস্যও বলা যায় না, কাল্পনিক হলেও মূলেতেই সম্ভাব্যতার সীমা অতিক্রম করে গিয়েছে। কবে কোন্ সুদূর বাল্যে পাঠশালায় পড়বার কালে রাজলক্ষ্মী শ্রীকান্তের গলায় বৈটী ফুলের মালা পরিয়ে দিয়েছিল তারই স্মৃতি আজন্ম বহন করে পরিণত বয়সে পিয়ারী বাঈজী এক চালচুলোহীন ভবঘুরে ভাবুকের পায়ে ঐশ্বর্য সম্পদ সেবা স্বাচ্ছন্দ্য সর্বস্ব সমর্পণ করে দেবে, বাল্যস্মৃতির এতটা সর্বাতিশায়ী শক্তি কল্পনা করে নিলে মানবীয় মনস্তত্ত্বকেই অস্বীকার করা হয়—এমনকি দুজোঁয়া বলে কথিতা নারীর মনস্তত্ত্বের পক্ষেও এ জিনিস বিশ্বাস্য নয়। এই অতিকথনদুষ্ট কাহিনীটি তার সীমাহীন অস্বাদ্য আর লক্ষ্যহীনতা নিয়ে শ্রীকান্ত উপন্যাস-মালিকার উপর একটা অবাস্তবতা আর অনৈতিকতার বাতাবরণ বিছিয়ে

দিয়েছে। সমালোচকেরা যে খাঁট বলুন, রাজলক্ষ্মী-শ্রীকান্ত আখ্যান শ্রীকান্ত উপন্যাসচতুষ্টয়ের শক্তির নিদর্শন নয়, দুর্বলতার নিদর্শন।

উপরে যে সব উপন্যাসের আলোচনা করা হয়েছে সেট সব রচনা বাদে অগ্ন্যাণ্ড কয়েকটি উপন্যাসের সংক্ষেপ-পরিচিতি অর্থাৎ চূষক দিচ্ছি। এই সব রচনার কি? প্রথম বয়সেব, কিছু উত্তর কালের।

কাশানাত এক অধ্যয়ননিষ্ঠ বিষয়-বিরাগী উদারপ্রাণ যুবকের কাহিনী।

দেবদাস বাল্যপ্রণয়ের অভিষেপে বিপর্যস্ত এক সম্পন্ন গৃহের গ্রামা যুবকের জীবন ব্যর্থ হয়ে যাওয়ার বিয়োগান্ত কাহিনী। মেলোড্রামাটিক গল্প তবে লেখার গুণে হৃদয়গ্রবণকারী।

শুভদা উপন্যাসের নামচরিত্রে ভারতীয় বিবাহিত নারীর যে-সহনশীলতা ও ক্ষমার ছবি ফোটানো হয়েছে তা শুধু একমাত্র সর্বসহা ধরিত্রীতেই কল্পনীয়।

বড়দিদি এক শিক্ষিত কিন্তু পদে পদে পরনির্ভরশীল যুবকের প্রতি এক বালবিধবার মাতৃকল্প সেবা ও পরিচর্যার গল্প।

বিরাজ বৌ-এর গল্পাংশে ভারতীয় কুলবধূর পতিভক্তি ও সতীত্বের মহিমা প্রকটিত করা হয়েছে। অভাবের দায়ে বিরাজের সাময়িক বিভ্রম ঘটলেও দেহমনে সে ছিল শুদ্ধা, পতিঅন্তপ্রাণতাব এক ভাবাবেগসমৃদ্ধ কাহিনী।

চন্দ্রনাথ বিনা দোষে অথবা সামান্য দোষে স্ত্রীর পতিপরিভ্রাত্ত হওয়ার কাহিনী। স্বামী-স্ত্রীর পুনর্মিলনে গল্পের শেষ। কৈলাসখুড়ো এই উপন্যাসের এক অবিস্মরণীয় চরিত্র।

মেজদিদি, বিন্দুর ছেলে, নিষ্কৃতি, রাণের সুখতি এর প্রত্যেকটিই মাতৃস্নেহের গল্প।

অরক্ষণীয়া, নামেই প্রকাশ, অনুচা কন্যাকে পাণ্ডিত্য করার সমস্যার কাহিনী।

বামুনের মেয়ের আখ্যানভাগে দৌলিগ প্রথার সর্বনাশ। প্রভাব চিত্রিত হয়েছে।

ছবি, বর্মার পটভূমিতে রচিত এক স্বাধ প্রেমের গল্প।

পরিণীতা একটি মধুর প্রেমের গল্প।

স্বামী আত্মকথার আকারে ভারতীয় নারীর অন্তরে স্বামী নামক আইডয়ার সূক্ষ্ম কিন্তু সুনিশ্চিত প্রভাবের কাহিনী।

বৈকুণ্ঠের উইল অনাবিল ভ্রাতৃস্নেহের এক অনবদ্য গল্প।

দত্তা প্রেমের গল্প। শরৎচন্দ্রের সবচেয়ে সুখপাঠ্য উপন্যাস।

## ॥ ৮ ॥

### নারীচরিত্র

শরৎচন্দ্র তাঁর নারীচরিত্রগুলিকে বিশেষ মমতা ও দরদের সঙ্গে অঙ্কিত করেছেন এ বিষয়ে সকল সমালোচকই একমত। এমনকি যে সব নারী অবস্থাবৈগুণ্যে সমাজের বাইরে নিষ্কণ্ট হয়েছেন, পতিভারূপে দ্বিষ্ট ও নিন্দিত, তাদেরও তিনি তাঁর সাহিত্যে বিশেষ ঠাঁই দিয়েছেন ও তাদের বেশ সহানুভূতির সঙ্গেই এঁকেছেন। বাংলার নারীকূলের প্রতি শরৎচন্দ্রের এই বিশেষ মমত্বের অভিব্যক্তি শিল্পী হিসাবে তাঁর বৈশিষ্ট্যকেই যে শুধু চিহ্নিত করে তাই নয়, তাঁর সমাজ-সচেতন মনটিকেও আমাদের কাছে প্রকাশ করে। তিনি তাঁর বাস্তবজীবনের নানামুখী ব্যাপক অভিজ্ঞতার ফলে বুঝেছিলেন আমাদের এই পুরুষশাসিত সমাজে নারী নানাভাবে নিগৃহীত ও অবহেলিত। মুখে তাঁদের দেবী বললেও আমরা তাঁদের দাসীর অধম জীবনের স্তরে বেঁধে রেখেছি। তাঁদের আদ্যাশক্তির অংশসম্পত্তা বলে স্তব করি কিন্তু কার্যতঃ তাদের স্থূল ভোগ ও সেবালাভের সহজ উপায় ভিন্ন আর কিছু জ্ঞান করিনে। মনুর বিধান নিয়ন্ত্রিত এই অসম-সমাজে স্ত্রীপুরুষের সমানাধিকারের তো কোন প্রশ্নই ওঠে না। মেয়েদের ন্যূনতম ব্যক্তিত্ব বিকাশেরও কোন সুযোগ নেই এ সমাজে। মেয়েদের ব্যথা-বেদনা অভাব-অভিযোগের প্রতি মনোযোগী হওয়া তো পরের কথা, মনোযোগী হওয়াটা যে প্রয়োজন সে খেয়ালও আমাদের নেই।

ভারতীয় সমাজে নারীজাতির প্রতি এই দীর্ঘদিনের অগ্রাঙ্গ শরৎচন্দ্রকে গভীরভাবে বেজেছিল। তাঁর অন্তরটি ছিল সহজাত দরদ ও সমবেদনায় ভরা, তাই তিনি তাঁর গল্পে ও উপন্যাসে নারীচরিত্রকে বিশেষ যত্ন ও সহানুভূতির সঙ্গে এঁকেছেন এবং এ কাজে তাঁর সবটুকু প্রাণের আবেগ ঢেলে দিয়েছেন। নারীর প্রতি তাঁর বিশেষ মমত্বের পরিচয় তিনি শুধু তাঁর কথা-সাহিত্যের পরিসরের মধ্যেই সীমিত রাখেননি, এই উদ্দেশ্যে তিনি প্রবন্ধ সাহিত্যের সাহায্যও গ্রহণ করেছিলেন। দেশে বিদেশে পুরুষ আদিম কাল থেকে এ পর্যন্ত নারীকে কী শোচনীয় অবমাননাকর অবস্থার মধ্যে রেখেছে



তা পরিস্ফুট করে তোলবাব জগৎ অনিলা দেবীর নামের ছদ্মাবরণে তিনি একদা নারীর মূল্য নামক একখানা গ্রন্থ লিখেছিলেন। বইখানি নৃতাত্ত্বিক ও সমাজতাত্ত্বিক বিশ্লেষণে পূর্ণ। নারীর প্রতি মনুষ্যসমাজের দৃষ্টিভঙ্গীর বিভিন্ন দিক উন্মোচন করে এরূপ দশখানা বই লেখবার কথা তিনি ভেবেছিলেন। কিন্তু নানা ব্যস্ততা নিবন্ধন সে-পরিকল্পনা তিনি কার্যগত করে যেতে পারেননি। কিন্তু সে সব বই তিনি লিখুন আর নাই লিখুন, নারী সমস্যা তাঁর অন্তর কতখানি জুড়ে ছিল এই থেকে তার প্রমাণ হয়।

শরৎচন্দ্রের অঙ্কিত নারীচরিত্রগুলি পর্যালোচনা করলে দেখা যায় তারা কয়েকটি বিশেষ টাইপের প্রতীক। পরপর এই টাইপগুলির বর্ণনা করছি। (১) স্নেহশীলা মাতৃস্বভাবমণ্ডিতা নারী—বিন্দু, নারায়ণী, বড়দিদি মাধবী, মেজদিদি, জ্যোঠাইমা প্রভৃতি ; (২) সেবাপরায়ণা নারী—মৃণাল, রাজলক্ষ্মী, সাবিত্রী, চন্দ্রমুখী প্রভৃতি ; (৩) পতিব্রতা নারী—বিরাজ বো, অন্নদাদিদি, শুভদা, সুরবালা প্রভৃতি ; (৪) বিদ্রোহিনী নারী—অভয়া, সুনন্দা, কিরণময়ী, কমল, সুমিত্রা প্রভৃতি ; (৫) সমাজশাসনে নিপীড়িতা নারী—সরযু, রমা, কুসুম, জ্ঞানদা প্রভৃতি। এমনি আরও দু-একটি টাইপ চেষ্টা করলে খুঁজে বার করা যেতে পারে, তবে বিভিন্ন উপন্যাস ও গল্প থেকে যে টাইপগুলি চয়ন করে দেখানো হয়েছে সেগুলিই সবচেয়ে প্রতিনিধিত্বমূলক বলে মনে হয়। কোন টাইপের মতোই পড়ে না, প্রত্যেকটি একক বৈশিষ্ট্যে সমৃদ্ধ, এমনি দু-চারটি নারীচরিত্রও আছে। যেমন অচলা, বিজয়া, ঘোড়শী, পদ্মা প্রভৃতি। উল্লিখিত নাম তালিকা থেকে নীচে কয়েকটি নারীচরিত্রকে বেছে নিয়ে তাদের আলোচনা করছি। অগাধ অধ্যায়ে নারীচরিত্র সম্বন্ধে যে-আলোচনা আছে এই আলোচনাকে তার পরিপূরক মনে করতে হবে।

ভারতীয় নারীর সহনশীলতা ও ক্ষমাপ্রবণতার রূপটি সবচেয়ে বেশী ফুটেছে শ্রীকান্ত প্রথম পর্বের অন্নদাদিদি ও শুভদা উপন্যাসের নাম-চরিত্রের মধ্যে। জন্মজন্মান্তরের ধারাবাহী পতিব্রতের সংস্কারে বদ্ধ ভারতীয় নারীর সহিষ্ণুতা যে একমাত্র সর্বসহা ধরিত্রীর সঙ্গেই তুলনীয়, এই দুটি চরিত্রের সংস্পর্শে এলে সে কথা বোঝা যায়। অন্নদাদিদি তার স্বামীকে ভালবেসে বিয়ে করেছিল। কিন্তু তার স্বামী ছিল এক পয়লা নম্বরের লম্পট। সে তার বিধবা শালিকার প্রতি আসক্ত হয়ে তাকে হত্যা করে পালিয়েছিল। হত্যাকারীরূপে আত্মগোপনরত অবস্থায় সে পুলিশের চোখে ধোলা দেবার

জন্ম মুসলমান ধর্ম ও নাম ভাঁড়িয়ে সাপুড়ের বৃত্তি গ্রহণ করে। এত সব অবস্থান্তরের মধ্যেও কিন্তু অন্নদাদিদি তার স্বামীকে ত্যাগ করেনি। স্বামী মুসলমান হয়েছে সুতরাং সেও মুসলমান হলো। স্বামীর ধর্মই তার ধর্ম। শাহজী এক এক দিন বেঘোর মত্ত অবস্থায় অন্নদাদিদিকে প্রচণ্ড মারধোর করে, অন্নদাদিদি নীরবে সব সহ্য করে। তার উপরে আছে নিতা অভাবের তাড়না। অতি কষ্টে সংসার চলে। সেই কষ্ট আরও বহুগুণিত হয় স্বামীর কদর্য ব্যবহার ও গালিগালাজের অশ্রান্ততার দ্বারা। কিন্তু এততেও অন্নদাদিদির ধর্ম কিংবা পতিপ্রেম বিচলিত হয় না। স্বামিহের আদর্শের যুগ্মমূলে উৎসর্গীকৃতা এই নারীর দুঃখসহনের শক্তি সত্যিই অতুলনীয়। মনে হয় অন্নদাদিদির ভিতর পতিপ্রেম অপেক্ষা পতিপ্রেমের সংস্কারটাই বেশী কাজ করেছে। ভারতীয় সমাজে নারীর এমনতর সংস্কার দ্বারা চালিত হওয়ার দৃষ্টান্ত অল্প নয়। সতীধর্মপালনে ভারতীয় নারীর আত্মোৎসর্গ কোন্ সীমা পর্যন্ত পৌঁছুতে পারে অন্নদাদিদি তারই উদাহরণ। কবি-সমালোচক মোহিতলাল মজুমদার এই উদাহরণকে সতীত্বের তপস্কার কোঠায় ফেলেছেন। তিনি অন্নদাদিদিকে এক মহা-তপস্বিনীরূপে দেখেছেন। (শ্রীকান্তের শরৎচন্দ্র, পৃ. ৬৩)। এই বিচার ও দর্শন যথার্থ বলে মনে হয়।

শুভদাও প্রায় অনুরূপ ছাঁচে গড়া এক অসাধারণ সহিষ্ণু চরিত্র। তার স্বামী হারাণ গেঁজেল গুলীখোর জুয়াড়ী। একদা জমিদারী সেরেস্ভাতে কাজ করতে, তহবিল তছরূপের দায়ে তার চাকরি যায়। তারপর থেকে চেয়েচিন্তে ধার করে নানারকম ফেরেপবাজি করে সে তার নেশার খোরাক জোটায়ে। আত্মসম্মানের শেষ অবলম্বনটিও সে খুইয়েছে। সংসার প্রতিপালনে সে তো সাহায্য করেই না, সে ক্ষমতাও তার নেই, উল্টো যখন-তখন টাকার জন্য স্ত্রীর উপর উৎপাত করে। শুভদাকে তার সন্তানদের নিয়ে মাঝে মাঝেই উপোস করে থাকতে হয়। কিন্তু এততেও শুভদার ক্ষমাপ্রবণতা ক্ষুণ্ণ হয় না। অথ উপায় নেই বলে সে স্বামীর অত্যাচার সহ্য করে এ কথা বললে শুভদার চরিত্রের যথার্থ পরিমাপ করা হয় না, বলা উচিত ভারতীয় নারীর পাতিব্রতের মজ্জাগত সংস্কারটাই তার সহনশীলতার মূল উৎস। গভীর দুঃখ সত্ত্বেও এই নারী আপন মহিমা থেকে বিচ্যুত হয়নি।

বিদ্রোহিনী নারীচরিত্রের মধ্যে নিঃসন্দেহে সবচেয়ে বলিষ্ঠ শ্রীকান্ত

দ্বিতীয় পর্বের অভয়া চরিত্র। তার নির্ভীকতার কোন তুলনা হয় না। প্রতিবেশী যুবা রোহিণীকে সহায়স্বরূপ সঙ্গে নিয়ে সে এসেছিল বহুদিন নিরুদ্দেশ স্বামীর খোঁজে বর্মা মূলুকে। এসে দেখে তার স্বামী এক বর্মিনীকে বিয়ে করে একগুণা ছেলেপিলে নিয়ে ওই দেশেই স্থিতি করেছে। কদর্য তার জীবনযাত্রা, রুচি অতি কুৎসিত। অভয়া স্বামী নামক আদর্শের আলেয়ার পশ্চাতে আর বৃথা ধাওয়া না করে রোহিণীর ভালবাসাকে মর্যাদা দিয়ে তার সঙ্গেই স্বামী-স্ত্রীরূপে বাস করতে লাগলো! খে-যুক্তিতে অভয়া তার এই কাজের সমর্থন করলো তা তার নিজের মুখেই শোনা যাক :

“আমাকে যিনি বিয়ে করেছিলেন, তাঁর কাছে না এসেও আমার উপায় ছিল না, আর এসেও উপায় হলো না। এখন তাঁর স্ত্রী, তাঁর ছেলেপুলে, তাঁর ভালবাসা কিছুই আমার নিজের নয়। তবুও তাঁরই কাছে তাঁর একটা গণিকার মত পড়ে থাকতেই কি আমার জীবন ফুলে ফলে ভরে উঠে সার্থক হতো শ্রীকান্তবাবু? আর সেই নিষ্ফলতার হুংখটাই সারা জীবন বয়ে বেড়ানোই কি আমার নারীজন্মের সবচেয়ে বড় সাধনা? রোহিণীবাবুকে তো আপনি দেখে গেছেন। তাঁর ভালবাসা তো আপনার অগোচর নেই; এমন লোকের সমস্ত জীবনটাকেই পঙ্গু করে দিয়ে আমি আর সতী নাম কিনতে চাইনে শ্রীকান্তবাবু!...একটা রাত্রির বিবাহ অনুষ্ঠান যা স্বামী-স্ত্রী উভয়ের কাছে স্বপ্নের মত মিথ্যা হয়ে গেছে, তাকে জোর করে সারা জীবন সত্য বলে খাড়া করে রাখবার জন্য এই এতবড় ভালবাসাটা একবারে ব্যর্থ করে দেব? যে বিধাতা ভালবাসা দিয়েছেন তিনি কি তাতেই খুসি হবেন?”

প্রশ্ন উঠতে পারে রোহিণীর ঔরসে অভয়ার গর্ভে যে সন্তান জন্মলাভ করবে তাদের সামাজিক স্থান কোথায় হবে? এরও উত্তর অভয়ার কথায় পাওয়া যায়। সে পূর্ববর্তী স্তব্যের জের টেনে শ্রীকান্তকে বলছে : “আমাকে আপনি যা ইচ্ছা হয় ভাববেন, আমার ভাবী সন্তানদের আপনারা যা খুসি বলে ডাকবেন, কিন্তু যদি ধৈর্য থাকি শ্রীকান্তবাবু, আমাদের নিষ্পাপ ভালবাসার সন্তানরা মানুষ হিসাবে জগতে কারও চেয়ে ছোট হবে না—এ আমি আপনাকে নিশ্চয় বলে রাখলুম। আমার গর্ভে জন্মলাভ করাটা তারা দুর্ভাগ্য বলে মনে করবে না। তাদের দিয়ে যাবার মত জিনিস তাদের বাপ-মায়ের হয়ত কিছুই থাকবে না; কিন্তু তাদের মা তাদের এই বিশ্বাসটুকু

দিয়ে যাবে যে, তারা সত্যের মধ্যে জন্মেছে, সত্যের মত বড় সম্বল সংসারে তাদের আর কিছু নেই।”

এই দুটি উক্তি থেকেই বোঝা যায় চরিত্রটি কত সত্যের ভেঙ্গে পূর্ণ। এই ভেঙ্গেই তাকে বিদ্রোহের পথে পা বাড়ানোর বল জুগিয়েছে।

চরিত্রহীন উপন্যাসের কিরণময়ী বিদ্রোহিনী সন্দেহ নেই কিন্তু সে তার বিদ্রোহের শেষ রক্ষা করতে পারেনি। বাইরে সে নিরীশ্বরবাদিনী, ভারতীয় শাস্ত্রবাক্যগুলিকে সে মোটেই মূল্য দেয় না। আচরণও তার নিষ্কলুষ নয়, স্বামী বেঁচে থাকতেই সে অনঙ্গ ডাক্তারকে তার রূপমোহে ভোলাতে চেষ্টা করে, পরে দিবা করকে ভাগিয়ে রেখুনে নিয়ে যায়, কিন্তু ভিতরে ভিতরে তার অন্য একটি সত্তা আছে। সেখানে সে প্রেমতৃষিত; পাতিত্রতোর মাধুর্যের দ্বারা নিজেকে মগ্নিত করে তুলতে একান্ত উৎসুক। বাহির ও ভিতরের এই দুই পরস্পরবিরোধী প্রবণতার মধ্যে সংঘাতের ফলে যে tension-এর সৃষ্টি হয়েছে তা তাকে শেষ পর্যন্ত বেচাল করে দিল, তাকে পাগল বানিয়ে ছাড়ল। কিরণময়ীর বিদ্রোহ সার্থক হতে পারলো না।

শেষ প্রশ্নের কমল কথার বুড়ি বিশেষ। তার আচরণে যত না, তার কথার মধ্যে তার চেয়ে অনেক বেশী বিদ্রোহ প্রকাশ পেয়েছে। কমলের কথাগুলি এক একটি বিদ্রোহের গোলা। শব্দের বিশ্লেষক শক্তি যদি কথার কথা না হয়, তার অগ্ন্যুদগিরণ ক্ষমতা যদি স্বীকার্য হয়, তা হলে বলতেই হবে যে, কমল একটি বিদ্রোহিনী চরিত্র। তবে এমন যে বিদ্রোহিনী নারী, সেও রাজেনের কাছে একবারে চুপসে গেছে। রাজেনের অসাধারণ সাহস, সেবাদর্শ, বৈপ্লবিক ক্রিয়াকলাপ, যে কোন সময় মৃত্যুর মুখে ঝাঁপিয়ে পড়ার দ্বিধাহীনতা ও শেষ পর্যন্ত বিপন্নকে রক্ষা করতে গিয়ে মৃত্যুবরণ সচরাচর বাক্যের সরণিতে চলায় অভ্যস্ত। কমলকে নিশ্চিন্ত করে দিয়েছে।

শ্রীকান্ত তৃতীয় পর্বে সুন্দার বিদ্রোহের প্রকৃতি কিছু ভিন্ন। তার বিদ্রোহ নারীত্ব সম্পর্কিত নয়। সে একটি সামাজিক অগায়ের বিরুদ্ধে বিদ্রোহ করেছিল। পুরুষের অগায়ে মুখ বুঁজে সহ্য করাটাই মেয়েদের অভ্যাস— এই গতানুগতিক নিয়মের বিরুদ্ধাচরণ করে সুন্দা বাংলার গ্রামীণ নারী সমাজে একটি মহদ্‌ক্ষান্ত স্থাপন করেছে। এ বিষয়ে উপক্রমণিকার আলোচনা দ্রষ্টব্য।

অন্তর্দ্বন্দ্বের সংঘাতে পীড়িত নারীহৃদয়ের প্রতীক হিসাবে অচলার

চরিত্রটির কিছু বিস্তারিত আলোচনা করা যেতে পারে। এটি একটি জটিল চরিত্র—বোধ হয় শরৎচন্দ্রের সৃষ্ট নারীচরিত্রগুলির মধ্যে সবচেয়ে জটিল। রবীন্দ্রনাথের ঘরে-বাইরে উপন্যাসের বিমলা চরিত্রের সঙ্গে অচলার বাহ্যিক মিল অনেকখানি, কিন্তু তাদের হৃদয়ের অন্তরপ্রকৃতিতে বেমিল রয়েছে। বিমলা নিজে বৈভবের মধ্যে বর্ধিতা, তার স্বামী নিখিলেশ জমিদার, সুতরাং ঐশ্বর্যের মোহ তার নেই, কিন্তু অচলা চরিত্রে এই ঐশ্বর্যের মোহ অনেকখানি কাজ করেছে। সুরেশের বৈভব, অর্থব্যয়ক্ষমতা আকর্ষণীয়ভাৱে দৃষ্টিশক্তি পিতার কথা অচলার চোখে দরিদ্র স্বামী মহিমের দাম কমিয়ে দিয়েছিল, সে বিষয়ে কোন সন্দেহ নেই। তার উপর মহিমের গাম্ভীর্য, স্বভাবগত বাককুঠা ও নিজেকে আবৃত রাখার অর্থাৎ নিজের দাবিকে জোরের সঙ্গে প্রতিষ্ঠিত করতে না চাওয়ার অভ্যাসের পাশে সুরেশের অলঙ্কার আশ্বাষণ ও আকাঙ্ক্ষার প্রবলতা অচলার চিত্তকে আরও বেশী দ্বিধাবিত্ত করে তুলেছিল। অচলা মনেতেই পারেনে সে মহিমকে ভালবাসে কি সুরেশকে ভালবাসে। আর যদি দুইয়েরই প্রতি এককালীন প্রেম তার চিত্তে ঘনিয়ে থাকে তো কার প্রতি তার পক্ষপাত গম্ভীর্ণ তা সে নিরূপণ করে উঠতে পারেনি। আপনাকে না চিনতে পারার এই মুহূর্তমতাই তার জীবনে ট্রাজিডি ঘনিয়ে তুলেছিল। তবে অচলার সপক্ষে এই এক বলবার কথা যে, সুরেশের কাছে আশ্রয়লাভের মুহূর্তেও ভারতীয় নারীর যুগযুগসঞ্চিত স্বামিত্বের সংস্কার তাকে ত্যাগ করেনি। সে অন্তরের অন্তরে পাতিলভের আদর্শিক লালন করেছে। আর এইটেই বুঝি শেষ পর্যন্ত তার উদ্ধারের কারণ হয়েছে। অন্ততঃ গৃহদাহের উপসংহার থেকে সেইরূপই মনে হয়।

## চাষীচরিত্র

সুপ্রসিদ্ধ কথাসাহিত্যিক শরৎচন্দ্র চট্টোপাধ্যায়ের রচনাবলীতে বাংলার কৃষক সমস্যার প্রত্যক্ষ চিত্রায়ণ খুব বেশী পাওয়া না গেলেও এটা মনে করা চলে যে, তিনি গ্রামের যে-স্তরের মানুষের ছবি সচরাচর তাঁর গল্পে-উপন্যাসে ফুটিয়ে তুলেছেন—মধ্য ও নিম্নবিত্ত হিন্দুসমাজভুক্ত সাধারণ নরনারীর জীবন—তাদের রসদের উপকরণ কোথা থেকে আসে সে বিষয়ে তিনি পূর্ণমাত্রায় সচেতন ছিলেন। রোদ জল ঝড় উপেক্ষা করে ক্ষেতে ও খামারে চাষীর উদয়াস্ত খাটুনিটাই যে গ্রামের মধ্যবিত্ত মানুষের টিকে থাকার মূল অবলম্বন এই বোধ তাঁর মনে বিলক্ষণ মাত্রায় উপস্থিত না থাকলে তিনি মহেশ্বের মত অনবদ্য গল্প লিখতেই পারতেন না। অগাধ্য কাহিনীর মধ্যেও ইতস্ততঃ খণ্ড-বিচ্ছিন্নভাবে চাষীজীবনের যে সমস্ত টুকরো-টুকরো ছবি পাওয়া যায় তাতেও প্রমাণ হয়, বাংলার কৃষকের সনাতন দ্বংখ-দারিদ্র্যের বাস্তব ভিত্তি এবং অর্থনৈতিক পশ্চাৎপট দুইয়ের বিষয়ে তিনি সম্যক অবহিত ছিলেন। তাঁর মত সমাজচৈতন্য-প্রদীপ্ত লেখক বাংলার গ্রামীণ জীবনের সর্বপ্রধান সমস্যাটির বিষয়ে অজ্ঞান থেকে মধ্যবিত্ত নিম্নবিত্ত শ্রেণীর হিন্দু ভদ্রলোকশ্রেণীর গ্রামবাসীদের জীবনাবলম্বনে লেখনী চালনা করেছেন এ হতেই পারে না। এরূপ ভাবে গেলে শরৎচন্দ্রের অপরিমীম মানবদরদপূর্ণ শিল্পিগ্ৰন্থকেই অস্বীকার করতে হয়।

তবে যে শরৎচন্দ্র তাঁর গল্পোপন্যাসে চাষীজীবনের ব্যথা-বেদনাকে তেমন ব্যাপকভাবে রূপায়িত করেননি—রূপায়িত করবার জগ্ন সচেত্ হননি—তার অগ্ন কারণ আছে। সব শিল্পীকেই নিজ নিজ প্রবৃত্তি ও ষৌক অনুযায়ী স্বীয় বিষয়বস্তু নির্বাচন করতে হয়। এই ক্ষেত্রে অভিজ্ঞতার ব্যাপ্তি ও গঁভীরতাটাই তাঁর নির্বাচনের দিক নির্দেশ করে। শরৎচন্দ্র চাষীজীবনের সমস্যাদির সঙ্গে পরিচিত থাকলেও, তিনি নিজে গ্রামসমাজের যে শ্রেণী থেকে উদ্ভূত হয়েছিলেন সেই শ্রেণীর মানুষের জীবনযাত্রার ছক, ভাবনা-চিন্তার ঝাঁচ, অভাব-অভিযোগের স্বরূপ, দ্বংখ-বেদনার প্রকৃতি ইত্যাদির সঙ্গে

প্রত্যক্ষ মেলামেশার সূত্রে সবচেয়ে ঘনিষ্ঠরূপে পরিচিত ছিলেন বলে, সেই মানুষদের জীবনবৃত্তটাই তাঁর লেখায় বারে বারে মূখ্য মনোযোগের বিষয় হয়ে উঠেছে। তিনি চাষীদের নিয়েও লিখতে পারতেন কিন্তু সে লেখা এমন প্রকৃষ্টরূপে জীবন্ত হয়ে উঠতে পারতো না, যেমনটা হয়ে উঠেছে তাঁর পল্লীসমাজ, নিষ্কৃতি, বিরাজ বো, বৈকুণ্ঠের উইল, মেজদিদি, চন্দ্রনাথ, দেবদাস, কাশীনাথ, অরক্ষণীয়া, শ্রীকান্ত (তৃতীয় পর্ব), বিন্দুর ছেলে ও রামের স্মৃতি প্রভৃতি উপন্যাস ও গল্পের একান্ত হিন্দুসমাজভিত্তিক সাধারণবিত্ত ও নির্বিত্ত ভদ্রলোকশ্রেণীর গ্রামীণ নরনারীর জীবনচিত্রের রূপায়ণের মধ্য দিয়ে। যে-সম্প্রদায়ের লোকদের সঙ্গে তাঁর সবচেয়ে জানাচেনা ছিল, সেই সম্প্রদায়ের কথা লিপিবদ্ধ করে তিনি তাঁর শিল্পিস্বভাবকে বিশ্বস্ততার সঙ্গে অনুসরণ করেছেন, এর দ্বারা চাষীজীবনের প্রতি তাঁর ওদাসীণ্য বা উপেক্ষা বোঝায় না।

চেষ্টা করলে তিনি গফুর জোয়ার মত চরিত্র আরও দু-একটি সৃষ্টি করতে পারতেন, তবে সেটা তাঁর পক্ষে সহজাত্যন্ত ব্যাপার হতো না, তাঁর স্বাভাবিক চলাচলের ও অভিজ্ঞতাব গভীর বাইরে গিয়েই তাঁকে এ কাজ করতে হতো। চাষীজীবনের প্রতি মমত্ব থাকা এক কথা আর চাষীজীবনকে তার ভালয়মন্দয় মিশিয়ে পুঙ্খানুপুঙ্খ ও নিবিড়ভাবে চিত্রিত করা আর এক কথা। এই দুটি এক জিনিস নয়। শরৎচন্দ্র বিবেকবান লেখক ছিলেন, তাই তিনি তাঁর শিল্পিস্বভাবের সীমা অবিরোধে মেনে নিয়েছিলেন। চাষীজীবনকে তার স্ব-স্বরূপে এবং সমস্ত দিক পরিবেষ্টন করে চিত্রিত করতে পারেন একমাত্র সেই লেখক, যিনি স্বয়ং চাষীরই মত ‘মাটির কাছাকাছি’ স্তর থেকে উদ্ভূত হয়েছেন। শরৎচন্দ্র মাটির কাছাকাছি স্তরোদ্ভূত লেখক ছিলেন না, তিনি ছিলেন হিন্দু ব্রাহ্মণ্য সংস্কারের সীমাবদ্ধতার মধ্যে জাত সামাজিক বিশ্বাসে ক্রিয়ৎপরিমাণে রক্ষণশীল অথচ মানবপ্রীতিতে ভরপুর একজন দরদী কথাকার। তিনি তাঁর গল্পে-উপন্যাসে বাংলার চাষীর সামগ্রিক চিত্র উত্থাপনের চেষ্টা করেননি এ তাঁর অপ্রমাদ ক্ষেত্রাক্ষেত্রনির্বাচনী প্রতিভারই পরিচয় দেয়।

অবশ্য ঢাকা বিশ্ববিদ্যালয় থেকে যখন শরৎচন্দ্রকে ‘ডক্টর অব্ লিটারেচার’ উপাধিতে ভূষিত করা হয় তখন তিনি সখেদে জানিয়েছিলেন যে, বাংলার মুসলমান সমাজকে তিনি তাঁর গল্পে-উপন্যাসে তেমন করে ফুটিয়ে তুলতে

পারেননি ; এখন থেকে তাঁর একটা সম্ভাবন চেফ্টা হবে এই সমাজের মানুষের মুখদুঃখ ব্যথাবেদনাকে তাঁর রচনার একটি অগুতম প্রধান উপজীব্যরূপে গ্রহণ করা। অবশ্য এই ঘোষণার পর শরৎচন্দ্র আর বেশীকাল জীবিত ছিলেন না, ফলে ওই সাধু সংকল্পকে কার্যে পরিণত করে যাওয়ার অবসর আর তেমন হয়নি তাঁর জীবনে। বাংলার মুসলমান সমাজ বলতে শরৎচন্দ্র বাংলার চাষী সমাজকেই বুঝিয়েছেন কেন না বাংলার মুসলমান সমাজের শতকরা প্রায় নব্বুই ভাগ মানুষই গ্রামবাসী আর তাদের জীবিকার প্রধান উপায় অথবা অনুপায় কৃষিকর্ম। এদের মধ্যে জমিহীন চাষীর সংখ্যাই বেশী, পরের জমিতে তাদেরই দেওয়া হাল বলদ বীজ ইত্যাদির সাহায্য নিয়ে লাঙল চষার দিনমজুরি বৃত্তি বেশীরভাগ এই জাতীয় মানুষের মূলশ্রম। যখন চাষবাসের কাজ থাকে না তখন হয় উপোস করে থাকতে হয়, না হয় তো সম্পন্ন চাষী গৃহস্থের ঘরে ‘মুনিষ’ খেটে, ঘরামি কিংবা কাঠ চেরা-কাঁড়া কিংবা মাটি কাটা জাতীয় নানা কঠিনশ্রমসাধ্য কাজ করে দিন গুজরানোর চেফ্টা করতে হয়। তাও কাজ জোটাতে পারা না-পারার উপর রোজগারের সম্ভাবনা নির্ভর করে। অধিকাংশ ভূমিহীন চাষীরই ভিটেমাটি দেনার দায়ে মহাজনের ঘরে বাঁধা। ভিটা থেকে উচ্ছন্ন হওয়ার ঘটনা এত বেশী যে ব্যতিক্রমদৃষ্টান্ত না থেকে সেইটাই নিয়মে দাঁড়িয়ে গেছে।

বলা বাহুল্য, শরৎচন্দ্র এই শ্রেণীর মানুষের চিত্রচরিত্রের উপর তাঁর শৈল্পিক মনোনিয়ন গুস্ত করার বিস্তৃত সুযোগ কিংবা উপলক্ষ খুঁজে পাননি তাঁর লেখকজীবনে। দৈবাৎ দু-একটি গফদুর (মহেশ) কিংবা আকবর লাঠিয়াল (পল্লীসমাজ) কিংবা সাগর সর্দার (দেনা-পাওনা) তাঁর লেখায় আকস্মিকভাবে উঁকিঝুঁকি দিয়ে উঠেছে কিন্তু এই শ্রেণীর মানুষ তাঁর সমস্ত মনোযোগ কেড়ে নিতে পারেনি। কিংবা অপেক্ষাকৃত উচ্চ সাংগাজিক পর্যায়ের মুসলমান চরিত্র ফকির সাহেব (দেনা-পাওনা) অথবা গহর (শ্রীকান্ত চতুর্থ পর্ব) সাময়িক আর বিচ্ছিন্ন ভাবেই তাঁর মনোযোগ আকর্ষণ করেছে, ওই শ্রেণীর মানুষের উপর তিনি তাঁর অখণ্ড মনোযোগ অর্পণ করার চেফ্টা করেননি। সে-মনোযোগ তিনি অর্পণ করেছেন তাঁর স্ব-সমাজের নরনারীর জীবনবেদনার উপর—ভালতের সঙ্গে সঙ্গে তাদের পশ্চাৎপদতা সমেত। অবশ্য যখন তিনি মুসলমান চাষী চরিত্র এঁকেছেন, প্রাণের সমস্ত আবেগ ঢেলেই এঁকেছেন কিন্তু অভ্যস্ত



বিষয়বস্তু থেকে তাঁর লেখনার এই পার্থক্য-পরিবর্তন কচিৎ ঘটেছে। এই নিয়ে আমরা আক্ষেপ করতে পারি কিন্তু অবস্থার বদল ঘটাতে পারি না। বরং এই ক্ষেত্রে শরৎচন্দ্রের তুলনায় পরবর্তীকালের তারাশঙ্কর বন্দ্যোপাধ্যায়, মানিক বন্দ্যোপাধ্যায় প্রমুখ লেখকগণ সমধিক সময়চেতনার পরিচয় দিয়েছেন বলে মনে হয়। মুসলমান লেখকদের কথা অবশ্য আলাদা। তাঁদের গল্প-উপন্যাসের বর্ণিত চরিত্রগুলির মধ্যে স্বভাবতঃই মুসলমান চরিত্রের আধিক্য লক্ষ্য করা যায় কিন্তু হিন্দু লেখকদের পক্ষে তাঁদের শ্রেণী-লক্ষ্যপাত আর মজ্জাগত মধ্যবিত্ত মানসিকতার নিগড় ভেঙে বেরিয়ে আসা সহজ ব্যাপার নয়। তবু এরই মধ্যে শরৎচন্দ্র যতটা সম্ভব তাঁর সহানুভূতিকে স্বীয় গভীর বাইরে সম্প্রসারিত করবার চেষ্টা করেছিলেন। তাঁর কাছ থেকে এই খাতে যতটা পাওয়া গেছে ততটাই লাভ বলে গণ্য করতে হবে।

মুসলমান চাষীজীবনের সমস্যাটির সঙ্গে অভিজ্ঞতালব্ধ পরিচয় থাকা সত্ত্বেও শরৎচন্দ্রের মুসলমান চিত্র-চরিত্র এড়িয়ে যাবার পক্ষে আরও একটি কারণ থাকা অসম্ভব নয়। পূর্বেই বলেছি শরৎচন্দ্রের শিল্পী হৃদয়ের ভিতর অপরিমিত মানবপ্রীতির সঞ্চয় ছিল, কিন্তু সামাজিক ধ্যান-ধারণার ক্ষেত্রে তাঁর দৃষ্টিভঙ্গী বোধহয় ততটা উদার ছিল না। ব্রাহ্মণ্য সংস্কার চালিত এক ধরনের রক্ষণশীলতা তাঁর চিত্তকে কমবেশী অধিকার ক'রে ছিল জীবনের শেষ দিন পর্যন্ত। কুলীন ব্রাহ্মণের মজ্জাগত চিত্তসংকীর্ণতার উদ্দেশ্যে ওঠা তাঁর মত স্বভাবদরদী শিল্পীর পক্ষেও সম্ভব হয়নি। তিনি তাঁর সামাজিক মতামতের ক্ষেত্রে বেশ কিছু পরিমাণে সাম্প্রদায়িক মনোভাবাপন্ন ছিলেন। শরৎচন্দ্রের ব্রাহ্মবিদ্বেষ সুবিদিত। দত্তা, গৃহদাহ প্রভৃতি উপন্যাসে এ কথার অসংশয় প্রমাণ ছড়িয়ে আছে। হিন্দু সমাজের একাংশ সম্পর্কেই যেখানে চিত্তের এমনতর অনুদারতা, সেখানে স্বভাবতঃ সংস্কারাচ্ছন্ন রাঢ় দেশীয় কুলীন ব্রাহ্মণসম্প্রদায়ভুক্ত একজন লেখক হয়ে তিনি নিজ ধর্মসম্প্রদায়ের গণ্ডী অতিক্রম করে মুসলমান সম্প্রদায়ের প্রতি চিত্তসংকীর্ণতা পরিহারে সক্ষম হবেন এমনতর মনে করলে মনুষ্যস্বভাবের প্রচলিত গঠনের বিরুদ্ধ-অনুমান করা হয়। আসলে, শরৎচন্দ্র সামাজিক বিশ্বাসে, বঙ্কিমচন্দ্রের মতই, কিয়ৎ-পরিমাণে মুসলমানবিমুখ ছিলেন। তাঁর এই সাম্প্রদায়িক বিচ্ছিন্নতার মনোভাব তাঁর রচনাবলীর আভ্যন্তরীণ প্রমাণ থেকে উদ্ধার করা যায়—একে উদাহরণ ও উদ্ধৃতি প্রয়োগে চিহ্নিত করা খুব কঠিন ব্যাপার নয়। শরৎচন্দ্র

ঢাকায় গিয়ে সম্মান ও আতিথেয়তার মুগ্ধতার বশে ভাবোচ্ছ্বাসের মুখে তাঁর সাহিত্যে মুসলমান চিত্রচরিত্র রূপায়ণের আকাঙ্ক্ষা ব্যক্ত করে একটা কুলুপ-আঁটা সদিচ্ছার আগল খুলে দিয়েছিলেন সন্দেহ নেই, কিন্তু সাময়িক আবেগের প্রকাশের অতিরিক্ত সংকল্পের গভীরতা তাতে ছিল কিনা বলা মুশকিল। তা যদি থাকত তো মুসলমান চাষীজীবন নিয়ে একখানা অন্ততঃ পূর্ণাঙ্গ উপন্যাস তার পরে তিনি লিখে যেতেন। কিন্তু দুর্ভাগ্যবশতঃ পাঠকদের এ ব্যাপারে বন্ধিতই থেকে যেতে হয়েছে শেষাবধি।

তবে কি তাঁর মানবপ্রীতি, দরদ, সহানুভূতি এ সবে কোন খাদ ছিল? মোটেই নয়। শরৎচন্দ্রের মত এতবড় স্বভাবদরদী আবেগসমৃদ্ধ লেখক বাংলা কথাসাহিত্যে খুব বেশী আবির্ভূত হয়নি। তা যদি হয় তো তাঁর এই সহজাত মানবিকতার সঙ্গে তাঁর এই সাম্প্রদায়িক অনৌদার্যকে মেলানো যায় কী করে? যিনি ব্যক্তিস্তরে কোন একটি মানুষের দুঃখে বিগলিতহৃদয়, সমবেদনায় আত্মহারা, তিনিই আবার সেই মানুষটিকে একটি বিশেষ সম্প্রদায়ভুক্ত কল্পনা করে অনুদারতায় কঠিন হয়ে ওঠেন কেমন ভাবে? কিন্তু আচরণের এই স্বতোবিরোধে আশ্চর্য হওয়ার কিছু নেই—মনুষ্য স্বভাবের ধরনটাই এই রকমের। যে শরৎচন্দ্র সহজাতভাবে মানবদরদী ছিলেন এবং জীবনের বিচিত্র অভিজ্ঞতা আর ভবঘুরেপনার মধ্য দিয়ে যিনি সেই স্বাভাবিক মানবকরণাকে আরও বেশী প্রগাঢ় করে তুলতে পেরেছিলেন, তিনিই আবার হিন্দু ব্রাহ্মণ্য সংস্কারের দ্বারা চালিত হয়ে নিজেকে নিজে খণ্ডন করতে উদ্যত হয়েছিলেন। মানুষের মনস্তত্ত্ব এমনিধারা জটিলতার আলো-আঁধারির মধ্য দিয়েই সচরাচর পথ করে চলবার চেষ্টা করে। ব্যক্তিগত স্তরে গফুর আর তার মেয়ে আমিনার দুঃখে শরৎচন্দ্রের আর্তির সীমা-পরিসীমা ছিল না কিন্তু ওই দুই প্রাণীকেই একটি বিশেষ সম্প্রদায়ের প্রতিনিধি জ্ঞান করে তাদের সম্পর্কে সুব্যবস্থা করতে বললে শিল্পী শরৎচন্দ্রের স্থলাভিষিক্ত সামাজিক শরৎচন্দ্রের করুণা কতখানি উচ্ছলিত হয়ে উঠত বলা কঠিন। ভাগ্যিস শিল্পীরা মানুষকে পিণ্ডাকারে বিচার করেন না, বিচার করেন এক একটি স্বতন্ত্র ব্যক্তিগত সত্তা হিসাবে, তাই রক্ষা; নয় তো কী বিপর্যয়ই না ঘটতে পারতো! অন্ততঃ শরৎচন্দ্রের বেলায় এ বিপর্যয় ঘটায় যে সম্ভাবনা ছিল তা তাঁর সাম্প্রদায়িক দৃষ্টিভঙ্গীর আদল থেকে একপ্রকার বিনা দ্বিধাতেই বলা যায়। হৃদয়ত ভালবাসা আর বুদ্ধিগত চিন্তাসংকীর্ণতার দ্বন্দ্ব কাটিয়ে ওঠা

কিংবা ক্ষুরধার শিল্পচেতনা আর সাম্প্রদায়িক কুসংস্কারের বিরোধ মেটানো অনেক সময় প্রথম শ্রেণীর শিল্পীর পক্ষেও সম্ভব হয় না। আমাদের সাহিত্যে শরৎচন্দ্র এ কথার এক নিদর্শন হলেও একমাত্র নিদর্শন নন। এ ব্যাপারে তিনি ‘সুমহান সঙ্গে’ রয়েছেন। বঙ্কিমচন্দ্র এ ক্ষেত্রে তাঁর পূর্বসূরী।

২

শরৎসাহিত্যে বঙ্কিত চাষীজীবনের দুঃখের শ্রেষ্ঠ দৃষ্টান্ত মহেশ গল্পটি। শিল্পকর্ম হিসাবে তো বটেই, নিপীড়িত শোষিত সর্বরিক্ত মানুষের দুঃখের চিত্রায়ণ হিসাবেও এ গল্পের উৎকর্ষের কোন তুলনা হয় না। শুধু তাই নয়, এ গল্পে সর্বহারা মানুষের বেদনার পাশে পাশে অবোলা একটি পণ্ডুর আত্ননাদ অনুভূতিকেও শ্রেষ্ঠ শিল্পসৌন্দর্যে মণ্ডিত করে প্রকাশ করা হয়েছে। এই গল্পে একদিকে ফুটে উঠেছে জমিদারের নৃশংসতা, হিন্দু সমাজপতি শ্রেণীর এক প্রভুত্বগর্বী ব্রাহ্মণের ক্রুরতা; অন্যদিকে ফুটে উঠেছে বঙ্কিত পীড়িত এক দরিদ্র মুসলমান চাষীর নিষ্করণ অভাব-অনটন ও মর্মান্তিক অসহায়তা, দারিদ্র্যের ধু-ধু করা মরুভূমির তলায় ফল্গুধারার মত নিয়তবহমান স্নেহবাৎসল্যের অদৃশ্য স্রোত, নিয়তর এক প্রাণীর ক্ষুৎপিপাসার কাতর কারুণ্য, সর্বোপরি শূন্যতার অভিশাপ। গল্পের সামাজিক তাৎপর্য খুব গভীর। কেমন করে, কোন্ প্রক্রিয়ায়, ক্ষেতের চাষী চাষের জমি থেকে উৎখাত হয়ে কলে-কারখানায় শ্রমিকশ্রেণীর সংখ্যা বৃদ্ধি করে তারই একটি নিপুণ ইঙ্গিত এই গল্পের উপসংহারভাগে করা হয়েছে। গল্পের এই অর্থবহ সমাজতাত্ত্বিক সংকেত অসাধারণ শিল্পনৈপুণ্যের উপরে রচনাটির একটি অতিরিক্ত সম্পদ। এই গল্পের বক্তব্য অনুযায়ী শিল্প-কারখানার শ্রমিকজীবন ছিন্নমূল কৃষিজীবনেরই গতান্তরহীন রূপান্তরণ মাত্র। বক্তব্যটি খাঁটি।

পল্লীসমাজ উপন্যাসের নায়ক রমেশ অনেক দিন বাদে গ্রামে ফিরে এসে স্বগ্রামের উন্নতি সাধন চেষ্টায় আত্মনিয়োগ করেছিল কিন্তু গ্রামের প্রতিপত্তিশালী কুচক্রী হিন্দু সমাজপতিদের বাধাদানের ফলে প্রতিহত হয়ে পাশের মুসলমানপ্রধান গ্রাম পীরপুরের চাষীদের মধ্যে উন্নয়নের কাজ শুরু করে দেয়। রমেশ চাষীর ছেলেদের জন্য নিজ ব্যয়ে আলাদা স্কুল করে দেয় এবং রোজ সন্ধ্যায় পীরপুরে সমাগত হয়ে চাষীদের নিয়ে বৈঠক করে তাদের

মধ্যে জাগরণের বাণী শোনাতে থাকে। চাষীরা রমেশকে দেবতার মত ভক্তি করে এবং তার জন্ম জান দিতে প্রস্তুত। পার্শ্ববর্তী গ্রামের হিন্দু জমিদার শ্রেণীর একজন যুবকের সঙ্গে গরিব ও মুসলমান চাষীদের যে সম্পর্কের চিত্র আঁকা হয়েছে তার মধ্যে আদর্শবাদী পরোপকারেচ্ছার একটা সুন্দর আলেখ্য পাওয়া গেলেও বর্তমান অগ্রসর সমাজতান্ত্রিক চিন্তাধারার মানদণ্ডে একে ভাববাদী আবেগপ্রসূত ব্যক্তিকেন্দ্রিক ফিলানথ্রপির মনোভাব ছাড়া আর কোন নাম দেওয়া যায় না—এর মধ্যে শ্রেণীস্বরূপ ঘোচাবার চেষ্টার কোন কথাই নেই। সুতরাং রমেশের এই জাতীয় কৃষক-উপচিকীর্ষা গোড়া থেকেই সন্দেহস্থল, তত্পরি অকার্যকরও বটে। অবাস্তব কর্মসূচী থেকে বাস্তব ফল আশা করা যায় না, এই ক্ষেত্রেও রমেশের কৃষক শ্রেণীর ভাগ্যোন্নয়ন চেষ্টা তাদৃশ ফলপ্রসূ হয়নি, বলা অনাবশ্যক।

তবে পল্লীসমাজ উপগ্রাসের দু-একটি চিত্র তাৎপর্যপূর্ণ। যেমন বাঁধের মুখ খুলে দেওয়ার ব্যাপারে বেণী ঘোষালের সঙ্গে রমেশের বিরোধের ঘটনাটি। অবিশ্রান্ত বৃষ্টিপাতে চাষীদের একশ' বিঘে পরিমাণ মাঠ ডুবে যাওয়ায় সমস্ত ধান নষ্ট হয়ে যেতে বসেছে। তাদের গোটা বছর উপোস থাকার উপক্রম। মাঠের দক্ষিণ ধারে ঘোষাল ও মুখুজ্যেদের একটা বাঁধ, সেই বাঁধ দিয়ে জলনিকেশ করা হলে মাঠের ধান রক্ষা পায় কিন্তু বাঁধের গায়ে একটা জলা আছে—বছরে দুশো টাকার মাছ ওতে পাওয়া যায়। বেণীবাবু বাঁধের মুখ আটকে রেখেছেন। রমেশ চাষীদের হয়ে বেণীবাবুর কাছে দরবার করতে এলো কিন্তু বেণী রমেশের শত অনুরোধ-উপরোধ সত্ত্বেও বাঁধের মুখ খুলতে রাজী হলেন না। বললেন, চাষীদের ধানের দাম পাঁচ হাজারই হোক আর পঞ্চাশ হাজারই হোক, তিনি “ও শালাদের জগে” তাঁর হকের দুশো টাকা মাছের দাম কোনমতেই ছেড়ে দিতে পারেন না। রমেশ শেষ চেষ্টা করে বলল, “তবে চাষীরা খাবে কি?” বেণী মুখ ভেংচে জবাব দিলেন, “খাবে কি? দেখবে ব্যাটার। যে যার জমি বন্ধক রেখে আমাদের কাছেই টাকা ধার করতে ছুটে আসবে।...ওরা খাবে কি? ধার-কর্জ করে খাবে। নইলে আর ব্যাটারদের ছোট লোক বলেচে কেন?”

এই বিরোধের পরিণতিতে ঘটলো দাঙ্গা-হাঙ্গামা। রমেশ জোর করে বাঁধের মুখ খুলে দিতে গেল, তাকে আটকাবার চেষ্টা করতে গিয়ে বেণী ও

রমার প্রেরিত লাঠিয়ালের দল—আকবর আলি ও তার দুই ছেলে—বেদম মার খেলো। বেণীবাবু আকবরকে উত্তেজিত করতে লাগলেন থানায় গিয়ে শরীরের আঘাত দেখিয়ে রমেশের বিরুদ্ধে এজাহার দাখিল করতে। কিন্তু আকবরকে এ প্রস্তাবে রাজী করানো গেল না। তার দৃষ্ট উত্তরঃ “কি কও বড়বাবু, সরম নেই মোর? পাঁচখানা গায়ের লোক মোরে সর্দার কয় না? দিদি ঠাকুরাণ (রমাকে উদ্দেশ্য করে), তুমি হুকুম করলে আসামী হয়ে জ্যাল খাটতে পারি, ফেরিদি হব কোন্ কালামুখে?... না দিদিঠাকুরাণ, আর সব পারি, সদরে গিয়ে গায়ের চোট দেখাতে পারি না। ওঠরে গহর (ছেলেকে উদ্দেশ্য করে), এইবার ঘরকে যাই। মোরা নালিশ করতি পারব না।”

এই গ্রামচিত্রের মধ্য দিয়ে মুসলমান চাষী আর হিন্দু ভদ্রলোক জোতদার শ্রেণীর মানবদেব মনোভাবের যে-পার্থক্য দেখানো হয়েছে তা খুবই অর্থপূর্ণ। শরৎচন্দ্র বাস্তববাদী কথাকার হিসাবে এখানে বাস্তববাদকে পূর্ণ সম্মান দিয়েছেন।

দেনা-পাওনা উপহাসে হরিহর সর্দার ও সাগর সর্দার নামক খুড়ো-ভাইপো দুই লাঠিয়ালের চরিত্র চিত্রিত হয়েছে। সাগর সর্দারের চরিত্রটাই বেশী বিস্তার করে দেখানো হয়েছে। এরা চণ্ডীগড়ের ভূমিজ চাষী সম্প্রদায়ের লোক, এককালে এই সম্প্রদায়ের সকলেই গৃহস্থ কৃষক ছিল, কিন্তু এখন অধিকাংশই ভূমিহীন—পরের ক্ষেতে মজুরি করে বহু দিনপাত করে। সমস্ত জমিজমা হয় জমিদার নয় জমিদারের কর্মচারীর দল স্বনামে বেনামে গিলে খেয়েছে। জোতদারের অত্যাচারও তাদের বঞ্চিত হওয়ার একটি বড় কারণ। ফলে ভূমিহীন ভূমিজদের কষ্টের অবশি নেই। এদেরই দুই প্রতিনিধি হরিহর ও সাগর উপায়হীনতার ক্ষোভে মরিয়া হয়ে ডাকাতির পেশা আশ্রয় করেছে। গোটা তল্লাটে মারদাঙ্গা করতে তাদের জুড়ি কেউ নেই। কিন্তু দুজনেই দেনা-পাওনার মূল নারীচরিত্র চণ্ডী মন্দিরের ভৈরবী ষোড়শীর খুবই অনুগত, ভৈরবী মায়ের হুকুমে যে কোন সময় প্রাণ বিপন্ন করতে প্রস্তুত, জমিদারের লোকেদের সঙ্গে কাজিয়া করে একাধিকবার জেল খেটে এসেছে। আবারও মায়ের হুকুমে জেলে যেতে তৈরী। সাগর সর্দারের চরিত্রের রূপরেখাটি খুবই দরদের সঙ্গে উপহাসে অঙ্কিত হয়েছে।

বাংলার জমিদার, অভিজাত ও মধ্যবিত্ত সম্প্রদায়ভুক্ত লেখকদের চোখে লাঠিয়ালদের আনুগত্যের ভূমিকাটাকে বারবার অত্যন্ত বড় করে দেখানো হয়েছে, এক্ষেত্রেও তার ব্যতিক্রম হয়নি। লাঠিয়াল, সে হিন্দু সম্প্রদায়ভুক্তই হোক আর মুসলমান সম্প্রদায়ভুক্তই হোক, তার কোন রকমে বেঁচে থাকাটা যেন তার জীবনের চরমতম সার্থকতা। মানুষের মর্মঘাতী দারিদ্র্যের বেদনাকে খাট করে এই শ্রেণীর চিত্রণে বড় করে দেখানো হয়েছে এমন এক মূল্যবোধকে, যা অগত্যা-শ্রদ্ধেয় হলেও কাল্পনিক স্বার্থকে বাঁচিয়ে রাখতেই বরং সাহায্য করে এবং স্বশ্রেণীর বঞ্চনার দুঃখকে আরও দীর্ঘায়িত করে। এই জাতীয় প্রমাদপূর্ণ আনুগত্যের মাহাত্ম্যকীর্তন শরৎচন্দ্রের আগেও হয়েছে, পরেও হয়েছে—শরৎচন্দ্রই একক উদাহরণ নন। আদৌ মূল্য না দিয়ে কিংবা সামান্যই মূল্য দিয়ে পরের সেবা পেতে অভ্যস্ত আমরা তথাকথিত হিন্দু ভদ্রলোক শ্রেণীর বুদ্ধিজীবীরা তথাকথিত অন্ত্যজ শ্রেণীর লাঠিয়ালদের আমাদের কারণে জান মান ইজ্জত, এক কথায় সর্বস্ব খোয়ানোর সদাপ্রস্তুত মনোভাবকে একটা মহাশূণ্যরূপে কীর্তন করতে সর্বদাই ব্যগ্র কিন্তু ভুলেও ভেবে দেখি না আমাদের প্রতি তাদের এই প্রহরী আনুগত্য নিবেদনের মধ্য দিয়ে তাদের জীবনের দারিদ্র্যের অভিশাপটাই চিরস্থায়ী হয়ে ওঠে মাত্র। মনিবের প্রতি ভৃত্যের বিশ্বস্ততা একটা মন্ত বড় গুণ সন্দেহ নেই, কিন্তু ভৃত্যের প্রতি মনিবের কর্তব্য পালনের দিকটাও সমভাবে কীর্তিত হওয়া উচিত। শুধু লাঠিখেলার ‘মন্ত্রশক্তি’র মহিমার উদ্ঘোষণা দ্বারা সত্যের একটা প্রান্তকেই তুলে ধরা হয় মাত্র, অন্য প্রান্তটি সম্পূর্ণ চোখের আড়ালে থেকে যায়।

আকবর আলি, সাগর সর্দার, ঈশ্বর লাঠিয়াল—শ্রেণীর প্রত্যেকটি চরিত্রই বাংলা সাহিত্যের একটি পরিচিত ছকের চরিত্র, লাঠিয়াল শ্রেণীর এরা ‘আর্কেটাইপ’; কিন্তু ক্রমাগত একই ধারায় উপস্থাপিত হতে হতে ছকটি বড়ই পুরনো আর একঘেয়ে হয়ে উঠেছে। গ্রামীণ লাঠিয়াল সম্প্রদায় আজ আর তার পূর্ব স্বরূপে নেইও। সুতরাং এমনতর চরিত্র যদি রাখতেই হয়, ছকটির নবীকরণ দরকার। ন্যায়-অন্যায় নির্বিশেষে প্রভুর জগৎ জান দেওয়ার সংস্কার দেশে পরিবর্তিত রাষ্ট্রিক ও সামাজিক স্থিতিতে একটি শ্রাঘনীয় মূল্যবোধ হিসাবে আর প্রশংসা না পাওয়াই ভাল।

## রবীন্দ্রনাথ ও শরৎচন্দ্র

কবিগুরু রবীন্দ্রনাথ ও জনচিত্তহারী কথাশিল্পী শরৎচন্দ্রের মধ্যে গুরু শিষ্যের সম্পর্ক বিদ্যমান ছিল, সম্পর্ক ছিল অগ্রজ ও অনুজের, শ্রদ্ধা ও স্নেহের। কিন্তু মাত্র এইটুকু বললে সম্পর্কটির প্রকৃতির সঠিক নিরূপণ হয় না। আপাত-দৃষ্টিতে যা দেখা যায় তার চেয়ে এই সম্পর্ক জটিলতর ছিল বলে মনে হয়। কেন না দুইয়ের পারস্পরিক সম্পর্ক অনুধাবন করে এ কথা মনে না করে পারা যায় না যে, এই সম্পর্কের স্রোতধারায় কখনও জোয়ারের প্রাবল্য এসেছে কখনও জাঁটার টান লেগেছে, দুই পক্ষেই কখনও অনুরাগ ও প্রীতির উচ্ছলতা প্রকাশ পেয়েছে, কখনও প্রীতির প্রকাশ স্পষ্টতঃই মন্দীভূত হয়েছে। উভয়ের মনোভাবের অভিব্যক্তির ক্ষেত্রে একান্তরক্রেমে এই যে আলো-আঁধারির লীলা দেখতে পাওয়া যায়, তার মূলে নানাবিধ সাময়িক ঘটনার উপদ্রব যে কখনও কখনও উত্তেজক কারণরূপে বর্তমান ছিল তা অনুমান করে নিতে কষ্ট হয় না। এই দুই অসাধারণ প্রতিভাবান শ্রষ্টা লেখককে কেন্দ্র করে বিপরীত মানসিকতাসম্পন্ন যে দুই ভক্তমণ্ডলী বিরাজিত ছিল তাঁদের প্রভাবও জ্ঞাতে বা অজ্ঞাতে সম্পর্কটিকে জটিল করে তুলতে সাহায্য করেছে সে কথাও বুঝে নিতে অসুবিধা হয় না। তবে কারণ যাই হোক, মহৎ ৬টি মানুষের মনস্তত্ত্বের গভীরতার পরিমাপ করা খুব সহজ ব্যাপার নয়। এখানে রবীন্দ্রনাথ-শরৎচন্দ্র সম্পর্কের আদলের একটা রূপরেখা মাত্র আমি তুলে ধরবার চেষ্টা করব, কখন কোন্ মনোভাবের বশে তাঁরা একে অণ্ডের প্রতি কী ব্যবহার করেছেন বা কী বলেছেন তা বিশ্লেষণ করতে যাব না। অর্থাৎ তাঁদের আচরণের প্রতি উদ্দেশ্য আরোপ করা আমার অভিপ্রায় নয়; শুধু দুইয়ের পারস্পরিক সম্পর্কের বর্ণনা করেই ক্ষান্ত থাকব।

সাময়িক পত্রিকার পৃষ্ঠায় কোনও একজন সমালোচক এইরূপ ইঙ্গিত করেছেন যে, শরৎচন্দ্রের প্রতি কবির মনে স্নেহ-প্রীতির সম্পর্ককে ছাপিয়ে এক ধরনের ঈর্ষাতুর মনোভাব ছিল। এ কথার প্রমাণ স্বরূপে তিনি পথের দাবী উপন্যাস পাঠের পর শরৎচন্দ্রকে লেখা রবীন্দ্রনাথের চিঠির উল্লেখ

করেছেন ও অগ্নি আরও কয়েকটি ছোট-বড় নজিরের প্রতি পাঠকের দৃষ্টি আকর্ষণ করেছেন। কিন্তু এই অভিযোগ যথার্থ মনে হয় না। এই অভিযোগ স্বীকার করে নিলে রবীন্দ্রনাথের সর্বাতিশায়ী প্রতিভার প্রতি অবিচার করা হয় এবং মানুষ হিসাবে তাঁর অবমূল্যায়ণ করা হয়। রবীন্দ্রনাথের ব্যক্তিগত মহত্ব ও উদারতার দৃষ্টান্ত এত ভুরি ভুরি যে, তাঁর চেয়ে কমপক্ষে চোদ্দ বছরের কনিষ্ঠ একজন লেখকের সাহিত্যিক খ্যাতিতে তিনি ঈর্ষান্বিত হবেন, এমন কথা ভাবতে পারা যায় না। আসলে পথের দাবী উপন্যাসটির উপর যখন রাজদ্রোহের অভিযোগে সরকারী নিষেধাজ্ঞা আরোপিত হয় তখন সাময়িক কারণে আবহাওয়া অত্যন্ত ঘুলিয়ে উঠেছিল। বইটির উপর থেকে নিষেধাজ্ঞা প্রত্যাহারের অনুকূলে কিছু লেখবার জগ্ন শরৎচন্দ্রের অনুরোধ প্রত্যাখ্যান করে কবি তাঁর অনুজ সতীর্থের প্রতি বিরাগ প্রকাশ করেননি, আসলে যেটা করতে চেয়েছিলেন তা একটা নীতি বা আদর্শের উপর গুরুত্ব আরোপ। এই নীতি বা আদর্শের যুক্তিযুক্ততা সম্বন্ধে মতভেদ থাকতে পারে, থাকাই স্বাভাবিক; কিন্তু তার জগ্ন কবির উদ্দেশ্যের প্রতি অভিসন্ধি আরোপ করাটা উচিত হয় না। শরৎচন্দ্রের প্রতি কবির মনে অসূয়ার ভাবই যদি থাকবে তো এরই কয়েক বছর পরে শরৎচন্দ্রের জন্মোৎসব উপলক্ষে কবি যেরূপ উচ্ছ্বসিত ভাষায় প্রশংসা করে বাণী পাঠিয়েছিলেন তা পাঠানো কখনই সম্ভব হতো না। আমি যথাস্থানে এই ভাষণটি থেকে উদ্ধৃতি দেব, আপাতত শুধু এই বলা যায় যে, মহাপুরুষদের মনস্তত্ত্বের পরিমাপ সাধারণের মাপকাঠিতে না করাই ভাল—তাতে বিচারভ্রান্তি ঘটবার সম্ভাবনা পদে পদে।

রবীন্দ্রনাথ শরৎচন্দ্র সম্পর্কে প্রথম অবহিত হন ১৩১৪ সালে। সেই সময় শ্রীযুক্তা সরলা দেবী সম্পাদিত ভারতী পত্রিকায় পর পর দুই সংখ্যায় নামহীন ভাবে বড়িদিদি উপন্যাসের কিস্তি ধারাবাহিক ভাবে প্রকাশিত হয়। লেখাটির সৌন্দর্যে মুগ্ধ হয়ে অনেকেই জল্পনা করতে থাকেন কে এই লেখক এবং একাধিক জনের ভুল করে ধারণা হয় যে, রবীন্দ্রনাথই নাম গোপন করে রচনাটি লিখেছেন—কবি ভিন্ন অগ্নি কারও কলমে এমন চমৎকার গল্প উৎপন্নো সম্ভব নয়। কেউ কেউ সোজা কবির দরবারে ছুটে গিয়ে তাঁকে প্রশ্ন করেন, লেখাটিতে তিনি তাঁর নাম দেননি কেন। রবীন্দ্রনাথ প্রথমে প্রশ্নের ভাৎপর্য বুঝতে পারেননি, পরে সচকিত হয়ে কৌতূহল বশে লেখাটি



আনিয়ে পড়ে বুঝতে পারেন বাংলা কথাসাহিত্যে এক নূতন প্রতিভার আবির্ভাব হয়েছে। তাকে কালে-দিনে সবাইকেই স্বীকার করতে হবে। খোঁজ নিয়ে রবীন্দ্রনাথ শরৎচন্দ্রের পরিচয় জানতে পান, সেই থেকে দুইয়ের মধ্যে সম্পর্কের সূচনা। সাক্ষাৎ সম্পর্কের না হলেও ( কারণ শরৎচন্দ্র তখন রেঙ্গুনপ্রবাসী ) মানসিক অবস্থিতির সম্পর্কের। রতনেই রতন চিনতে পারে। শক্তিমানেরই শুধু অগ্নি শক্তিমানের শক্তির অস্তিত্ব টের পায়। এর পর থেকে কবির পক্ষে শরৎচন্দ্রকে অগ্রাহ্য বা উপেক্ষা করার আর কোন উপায় রইল না। প্রতিভাবান অনুজের সম্পর্কে প্রতিভাবান অগ্রজের এই সচেতনতা ঈর্ষার কোঠায় পড়ে না, এটি প্রীতিমণ্ডিত গুণগ্রাহিতারই রকমফের মাত্র।

অগ্নিপক্ষে শরৎচন্দ্র ছিলেন অন্তরে অন্তরে কবির পরম ভক্ত। বালাবন্ধু প্রমথনাথ ভট্টাচার্যকে লেখা একাধিক পত্র ও অগ্নি সূত্র থেকেও জানতে পারা যায় শরৎচন্দ্র রেঙ্গুনে থাকতে রবীন্দ্র-সাহিত্য ও কাব্য গভীর আগ্রহ ভরে অনুশীলন করেছিলেন, বিশেষ করে রবীন্দ্রনাথের গল্পোপন্যাস তিনি তন্ন তন্ন করে পড়েছিলেন। শরৎচন্দ্রের স্টাইলের উপর রবীন্দ্ররচনার প্রভাব একটু মনোযোগী হলেই অনুভব করা যায়। এই প্রভাব আর কিছুই নয়, দীর্ঘকালস্থায়ী অভিনিবেশ ও সশ্রদ্ধ রবীন্দ্রচর্চার ফল। শরৎচন্দ্রের রেঙ্গুন প্রবাসকালে রবীন্দ্রনাথ একবার রেঙ্গুন শহরে পদার্পণ করেছিলেন। রেঙ্গুন-প্রবাসী ভারতীয় ও বাঙালীদের পক্ষ থেকে তাঁকে যে সংবর্ধনা করা হয় তার মানপত্রটি লিখে দিয়েছিলেন শরৎচন্দ্র, যদিও নিজে তিনি এটি পাঠ করেননি। তাঁর স্বভাব-সলজ্জতাই এই আত্মগোপনকারী নৈপথ্যচারিতার কারণ। পরেও একাধিক উপলক্ষে শরৎচন্দ্র মানপত্রে ও ভাষণে কবিশ্রুতির প্রশস্তি কীর্তন করেছেন, চিঠিতে কবির প্রতি প্রাণের শ্রেষ্ঠ অনুরাগ ও ভক্তি নিবেদন করেছেন। কবিকে তিনি কী গভীর শ্রদ্ধার দৃষ্টিতে দেখতেন এ সব নানা পরিচয়িকা তার প্রমাণ বহন করছে।

তবে এ কথা অস্বীকার করবার উপায় নেই যে, মাঝে কিছুদিন দুইয়ের সম্পর্কের ভিতর কিছু মালিণ্যের খাদ প্রবেশ করেছিল। ভুল-বোঝাবুঝি থেকে এই মালিণ্যের জন্ম। ভুল-বোঝাবুঝির উদ্ভব হয়েছিল রাজনীতিগত দৃষ্টিভঙ্গীর পার্থক্য, পথের দাবী সম্পর্কিত মতবিরোধ এবং কয়েকটি সাহিত্যিক বিতর্কে কেন্দ্র করে। রবীন্দ্রনাথ যখন পথের দাবীর উপর থেকে নিষেধাজ্ঞা প্রত্যাহারের দাবীর অনুকূলে লেখনী ধারণ করতে

অস্বীকার করলেন তখন শরৎচন্দ্র খুবই মর্মান্বিত হয়েছিলেন। তিনি রবীন্দ্রনাথের পত্রের উত্তরে নিজ বক্তব্যকে ব্যাখ্যা করে আত্মপক্ষ সমর্থনে একটি পত্র লিখেছিলেন। বন্ধুদের পরামর্শে সে পত্র অবশ্য শেষ পর্যন্ত ডাকে দেননি। পত্রটির বয়ান এম. সি. সরকার অ্যাণ্ড সন্স প্রকাশিত শরৎ-সাহিত্য-সংগ্রহের ত্রয়োদশ সম্ভারের উপসংহার ভাগে পত্রসঙ্কলন অংশে মুদ্রিত আছে। জিজ্ঞাসু পাঠক সেই বয়ানটির উপর চোখ বুললে দেখতে পাবেন আপন বক্তব্যে অবিচলিত থাকার দৃঢ়তায়ুক্ত প্রত্যয়শীলতার সঙ্গে বিনম্র শ্রদ্ধার কী চমৎকার পাশাপাশি সহাবস্থান। কবির প্রত্যাখ্যানে ক্ষুব্ধ, এমনকি উত্তেজিত বোধ করবার যথেষ্ট কারণ থাকা সত্ত্বেও শরৎচন্দ্র প্রত্যুত্তরে কবির উদ্দেশে একটিও রূঢ় শব্দ প্রয়োগ করেননি। এই থেকেই বোঝা যায় কবির প্রতি শরৎচন্দ্রের শ্রদ্ধা কত গভীর ছিল। সাময়িক মতভেদের আলোড়নে সেই শ্রদ্ধা হম্মতো ক্ষণিকের জগ্ন ঘুলিয়ে উঠেছে কিন্তু সময়ের ব্যবধানই আবার অবস্থা শান্ত হতে শ্রদ্ধা তার পূর্বস্থিতিতে ফিরে এসেছে, থিতানো ঘোলাজল পুনরায় নির্মলতা প্রাপ্ত হয়েছে।

কবি লিখিত বিচিত্রা মাসিকের ‘সাহিত্যের ধর্ম’ প্রবন্ধটিকে কেন্দ্র করে আজ থেকে আটচল্লিশ বছর আগে বাংলা সাহিত্যে প্রচণ্ড বিতর্কের সূত্রপাত হয়েছিল। বাংলা সাহিত্যের অনুসন্ধিৎসু ছাত্র মাত্রেই জানেন এই বিতর্কের উপলক্ষে বাংলার সাহিত্যিক কুল পরস্পর-বিরুদ্ধ দুটি শিবিরে বিভক্ত হয়ে গিয়েছিলেন। শরৎচন্দ্র রবীন্দ্রনাথের প্রতিপক্ষ শিবির-ভুক্ত হয়ে কবির প্রবন্ধের জবাবে বঙ্গবাণী মাসিক পত্রিকায় ‘সাহিত্যের রীতি ও নীতি’ নামে একটি কড়া নিবন্ধ লেখেন। তাতে কবিকে তাক করে অনেক চোখা চোখা কথার বাণ নিক্ষিপ্ত হয়েছিল। অস্বীকার করবার যো নেই যে, এই সব বাক্যশরের কতক যুদ্ধের নিয়ম লঙ্ঘন করে ছোঁড়া হয়েছিল—কয়েকটি আক্রমণে ওরবারির আঘাত কোমরবন্ধের নিয়ন্ত্রণ স্পর্শ করেছিল। মামলাটা ছিল সাহিত্যের স্নীলতা অস্নীলতার প্রশ্ন নিয়ে। রবীন্দ্রনাথ তদানীন্তন কিছু তরুণ লেখকের সমালোচনা প্রসঙ্গে এই মন্তব্য করতে বাধ্য হয়েছিলেন যে, তাঁরা তাঁদের লেখান সাহিত্যধর্মের সীমানা মেনে চলছেন না বরং কোন কোন স্থলে স্পষ্টতঃই বে-আক্রতার প্রশয় দিচ্ছেন। যদিও কবির প্রতিবাদ ছিল খুবই মৃদু ধরনের, তা হলেও এইটেই নবীন সাহিত্যের ভীমরূপের চাকে ঘা দেবার পক্ষে যথেষ্ট ছিল। শরৎচন্দ্র নবীনদের পক্ষে লেখনী ধারণ করে

কবিকে এক হাত নেবার চেষ্টা করেছিলেন। কথাগুলি কিছু ভীক্ষুবিদ্রূপাত্মক হয়ে পড়েছিল। সেইটেকেই আমি উপরে বাক্য্যুৎকের নিয়মলঙ্ঘন বলে বর্ণনা করেছি।

কিন্তু শরৎচন্দ্র অবিবেকী ছিলেন না। পরে শ্রীযুক্তা রাধারাণী দেবীকে লেখা এক চিঠিতে তিনি স্বীকার করেছিলেন যে, রবীন্দ্রনাথ কর্তৃক পথের দাবী সংক্রান্ত অনুরোধের প্রত্যাখ্যান তাঁকে গভীরভাবে বেজেছিল বলেই বোধ করি বাদানুবাদের বেলায় কবির সম্পর্কে তাঁর মন্তব্যে কিছু ঝাঁঝ প্রকাশ পেয়েছিল। “ঠিক বলতে পারিনে হয়ত এই কথা আমার মনের মধ্যে অলক্ষ্যে ছিল যখন সাহিত্যের রীতি-নীতি লিখি। তাতেই বোধ হয় কোথাও কোন জায়গায় একটু আধটু ভীততার ঝাঁঝ এসে গেছে।”

তাছাড়া এ সম্বন্ধে আরও একটু কথা আছে। শরৎচন্দ্র যখন সাহিত্যের ধর্মের বিতর্কে পুত্র কবিকে ঝাঁঝালো ভাষায় আক্রমণ করেছিলেন তখন তিনি সমালোচিত তরুণ লেখকদের সব লেখা পড়েননি। আক্রমণের পিছনে যত না তথ্যের জোর ছিল তার চেয়ে ভাবাবেগের ভূমিকা ছিল বেশী। পরে শরৎচন্দ্র এক বছর যাবৎ বিশেষ মনোযোগের সঙ্গে তরুণ সাহিত্যিকদের লেখা-পত্র পড়ে এই সিদ্ধান্তে উপনীত হন যে, রবীন্দ্রনাথের সমালোচনার যথেষ্ট সঙ্গত ভিত্তি ছিল। তরুণ লেখকেরা সত্যি বড় বাড়াবাড়ি শুরু করে দিয়েছেন। শরৎচন্দ্র তাঁর ভুল স্বীকার করেছেন নবীন লেখকদের সভায় প্রদত্ত একটি ভাষণে, যার বয়ান মুদ্রিত হয়েছিল ১৩৩৭ সালে আশ্বিন মাসের বসুমতীতে। তাতে এই কথাগুলি আছে : “আজ রবীন্দ্রনাথের সেই কঠোর কথাটাই (‘সাহিত্যের ধর্ম’ প্রবন্ধের বক্তব্য) আমার বারম্বার মনে পড়ে। সেদিন অনেকেই মনে করলেন যেন আমি তাঁর কথার পাণ্টা উত্তর দিয়েছিলাম। কিন্তু তা করিনি। কোন দিন করবো বলে মনে করি না। সেদিন তাঁর কথা আমার এতটা না বললেও হতো। কারণ, অতখানি বোধ করি অত্যন্ত কঠোর ঠেকেছিল। মনে হয়েছিল সত্য ছিল না। কিন্তু এক বৎসর পরে এ আর আমি বলতে পারিনে।” (স্বদেশ ও সাহিত্য, পৃ. ২১২)।

এই থেকেই বোঝা যায় শরৎচন্দ্রের মন কত সত্যনিষ্ঠ ছিল। ভুল যখন তাঁর চোখে ধরা পড়লো তখন তা কবুল করতে তাঁর মুহূর্তেকের দ্বিধা হয়নি এবং অকপটে অনুশোচনা প্রকাশ করেছেন। মহতেরই এটা লক্ষণ।

এদিকে শরৎচন্দ্রের প্রতি কবির স্নেহ নানা সময়ে নানা ভাবে প্রকাশ

পেয়েছে। সত্য বটে পথের দাবীর উপর প্রযুক্ত সরকারী নিষেধাজ্ঞার বিরুদ্ধে প্রতিবাদ জানাতে অস্বীকার করে রবীন্দ্রনাথ শরৎচন্দ্রকে বেশ কিছুটা নিরাশ করেছিলেন, কিন্তু যে-পত্রে তিনি এই অস্বীকারের কথা জানিয়েছিলেন সেই পত্রেরই শেষাংশে শরৎচন্দ্রের রচনাশক্তি সম্বন্ধে এই কথাগুলি ছিল : “কিন্তু তোমার মত লেখক গল্পচ্ছলে যে কথা লিখবে তার প্রভাব নিয়ত চলতেই থাকবে। দেশে ও কালে তার ব্যাপ্তির বিরাম নেই—অপরিশ্রুত বয়সের বালক বালিকা থেকে আরম্ভ করে বৃদ্ধরা পর্যন্ত তার প্রভাবের অধীনে আসবে। এমন অবস্থায় ইংরেজ রাজা যদি বই প্রচার বন্ধ না করে দিত তাহলে এই বোঝা যেত যে, সাহিত্যে তোমার শক্তি ও দেশে তোমার প্রতিষ্ঠা সম্বন্ধে তার নিরতিশয় অবজ্ঞা ও অজ্ঞতা। শক্তিকে আঘাত করলে তার প্রতিঘাত সইবার জগ্রে প্রস্তুত থাকতে হবে।”

এরই বছর ছয়েক বাদে, ১৩৩৯ সালের ৩১শে ভাদ্র তারিখে, দেশবাসীর পক্ষ থেকে শরৎচন্দ্রের জন্মজয়ন্তী উপলক্ষে তাঁকে টাউন হলে অভিনন্দন জানানো হয়। সেই সভায় রবীন্দ্রনাথের পৌরোহিত্য করবার কথা ছিল কিন্তু অনিবার্য কারণে আসতে না পারায় তিনি একটি আশীর্বাণী পাঠান। সেই বাণীতে কবি উচ্ছ্বসিত ভাষায় শরৎচন্দ্রের সাহিত্য প্রতিভার প্রশংসা করেছেন এবং আরও জানিয়েছেন জন্মদিন উপলক্ষে ‘কালের যাত্রা’ নাটকটি তিনি তাঁরই নামে উৎসর্গ করেছেন। এই শেষ নয়। ওই আশীর্বাণীর সঙ্গে শরৎচন্দ্রের উদ্দেশ্যে একখানি ব্যক্তিগত পত্র ছিল। তাতে এই ছত্রগুলি ছিল : “তোমার প্রতিভার দ্বারা দেশের হৃদয়কে তুমি জয় করেছ, দেশের গভীর অন্তরে তোমার প্রবেশাধিকার। তোমার লেখনী বাঙালীর চিত্ততন্তকে হাসি ও অশ্রুর নবতর ও গভীরতর ব্যঞ্জনায় অভিযুক্ত করে তুলেছে।”

শরৎচন্দ্রের ৬১তম জন্মতিথি উপলক্ষে রবিবাসরের পক্ষ থেকে শরৎচন্দ্রকে অভিনন্দিত করা হয়। এই অভিনন্দন সভায় রবীন্দ্রনাথ স্বয়ং উপস্থিত থেকে লিখিত অভিভাষণে শরৎচন্দ্রকে অভিনন্দিত করেছিলেন। ভাষণের একাংশ এইরূপ : “আজ শরৎচন্দ্রের অভিনন্দনে বিশেষ গর্ব অনুভব করতে পারতুম যদি তাঁকে বলতে পারতুম তিনি একান্ত আমারি আবিষ্কার, কিন্তু তিনি কারো স্বাক্ষরিত অভিজ্ঞানপত্রের জগ্রে অপেক্ষা করেননি। আজ তাঁর অভিনন্দন বাঙলা দেশের ঘরে ঘরে উচ্ছ্বসিত। শুধু কথাসাহিত্যের পথে নয় নাট্যাভিনয়ে চিত্রাভিনয়ে তাঁর প্রতিভার সংস্রবে আসবার জগ্রে বাঙালীর ঔৎসুক্য

বেড়ে চলেছে। তিনি বাঙালীর বেদনার কেন্দ্রে আপন বাণীর স্পর্শ দিয়েছেন।”

অগ্রপক্ষে শরৎচন্দ্র কোন্ ভাষায় ও কী ভাবে রবীন্দ্রনাথের প্রতি তাঁর শ্রদ্ধা জ্ঞাপন করেছিলেন তাও অনুধাবনযোগ্য। কবির সত্তর বৎসর পূর্তি উপলক্ষে দেশবাসীর পক্ষ থেকে আয়োজিত জন্মজয়ন্তী সভার সভাপতির ভাষণে শরৎচন্দ্র বলেছিলেন : “কবির জীবনের সপ্ততি বৎসর বয়স পূর্ণ হলো বিধাতার এই আশীর্বাদ শুধু আমাদের কাছে নয়, সমস্ত মানবজাতিকে ধন্য করেছে। সৌভাগ্যের এই স্মৃতিকে আনন্দোৎসবে মধুর ও উজ্জ্বল করে আমরা উত্তরকালের জগৎ রেখে যেতে চাই এবং সেই সঙ্গে নিজেদেরও এই পরিচয়টুকু দিয়ে যাবো যে, কবির শুধু কাব্যেই নয় তাঁকে আমরা চোখে দেখেছি, তাঁর কথা কানে শুনেছি, তাঁর আসনের চারিধারে ঘিরে বসবার ভাগ্য আমাদের ঘটেছে। মনে হয়, সেদিন আমাদের উদ্দেশ্যেও তার নমস্কার জানাবো।” সেই সভারই জগৎ লিখিত মানপত্রে শরৎচন্দ্র কবিকে অভিনন্দিত করেছেন এইভাবে : “তোমার কাছে আমরা পেয়েছি অনেক কিন্তু তোমার হাত দিয়ে বিশ্বকে দিয়েছিও অনেক।”

এই সব উক্তির মধ্য দিয়ে কবির প্রতি শরৎচন্দ্রের যে মনোভাব প্রকাশ পেয়েছে তা একজন শ্রেষ্ঠ ভক্তের ছবি আমাদের সামনে তুলে ধরে। অগ্রদিকে শরৎচন্দ্রের প্রতিও কবির একান্ত স্নেহশীল মনোভাব অব্যক্ত থাকেনি। তার পরিচয় পূর্বেই দেওয়া হয়েছে। মোটকথা, সাময়িক বাদ-প্রতিবাদের আঁধারে এই দুই দিক্‌পাল সাহিত্যস্রষ্টা এঁদের একের প্রতি অণুর দৃষ্টিভঙ্গীকে মোটেই আচ্ছন্ন বা অভিভূত হতে দেননি। সাময়িক কুয়াশার মালিগা ভেদ করে দুইয়ের যে চিত্র আমাদের মনশ্চক্ষে প্রতিভাত হয় তা একদিকে অপরিসীম স্নেহ অগ্রদিকে গভীর শ্রদ্ধার বিচ্ছুরণে দীপ্ত। সেই ছবির ভিতর দুইয়ের মহত্ত্বও সমান প্রকটিত।

## রাজনৈতিক চিন্তা

পূর্ব প্রবন্ধে রবীন্দ্রনাথ ও শরৎচন্দ্রের মধ্যে যে-মতভেদের ইঙ্গিত করা হয়েছে তা মূলতঃ রাজনীতির প্রশ্নকে কেন্দ্র করে। উভয়ের মধ্যে রাজনৈতিক ধ্যান-ধারণায় যথেষ্ট পার্থক্য ছিল সেটা এই দুই দিক্‌পাল লেখকের রচনার ধারা এবং জীবনের ছক বিচার করলেই ধরতে পারা যায়। আপাতত রবীন্দ্রনাথ আমাদের মনোযোগের বিষয়ীভূত নন; ভিন্ন কোন উপলক্ষে তাঁর রাজনৈতিক চিন্তার বৈশিষ্ট্য নিয়ে আলোচনা করা যেতে পারে। এই রচনার আলোচ্য শরৎচন্দ্রের রাজনৈতিক মতাদর্শ, যা কিনা তাঁর সৃষ্টিধর্মী লেখা এবং প্রবন্ধ-সাহিত্য এই দুইয়ের মধ্যেই প্রতিফলিত দেখা যায়।

দুটি বইকে এই প্রসঙ্গে সবচেয়ে প্রতিনিধিমূলক মনে করা যায়—পথের দাবী উপন্যাস ও তরুণের বিদ্রোহ প্রবন্ধগ্রন্থ। অগাধ প্রবন্ধ-নিবন্ধের মধ্যেও তাঁর রাজনৈতিক চিন্তার আদল খুঁজে পাওয়া যায়, তবে চিন্তাচর্চার দিক দিয়ে তরুণের বিদ্রোহ বইটিই বোধহয় সবচেয়ে গুরুত্বপূর্ণ।

প্রথমে পথের দাবী উপন্যাসের প্রসঙ্গ ধরা যাক।

পথের দাবী উপন্যাস প্রথম প্রকাশিত হয় ১৯২৬ সালের আগস্ট মাসে। তার আগে একাদিক্রমে চার বছর ধরে মাঝে মাঝে বিরতিহেদ দিয়ে উপন্যাসটি ‘বঙ্গবাণী’ মাসিক পত্রিকার পৃষ্ঠায় ধারাবাহিকক্রমে প্রকাশিত হয়। গ্রন্থাকারে প্রকাশের সঙ্গে সঙ্গেই উপন্যাসটি ইংরেজ সরকার কর্তৃক রাজদ্রোহ প্রচারের অভিযোগে বাজেয়াপ্ত হয়ে যায়। তের বছর বইটির উপর সরকারী নিষেধাজ্ঞা বলবৎ ছিল। বইখানার রাজরোষ মুক্ত দ্বিতীয় সংস্করণ প্রকাশিত হয় ১৩৪৬ বঙ্গাব্দের বৈশাখ মাসে।

উপন্যাসস্থানাতে কী এমন ছিল যার জন্য ইংরেজ সরকারের পক্ষে বই প্রকাশের সঙ্গে সঙ্গে সাত-তাড়াতাড়ি তার কঠরোধ করবার প্রয়োজন ঘটলো? রাজরোষ তো অপরাধের এক সাধারণ বর্ণনা, বর্ণিত রাজরোষের প্রকৃতি কী ছিল সেইটেই বিবেচ্য।

পথের দাবী উপন্যাস পড়লে বোঝা যায় লেখক এতে কেবলমাত্র এদেশে

ইংরেজ সরকারের স্বরূপ বর্ণন করেই ক্ষান্ত থাকেননি, প্রকৃতপক্ষে দেশে দেশে ইংরেজ প্রভুত্বের যথার্থ রূপটিকে উন্মোচন করে দেখানোতেও সমান সচেষ্ট হয়েছেন। শরৎচন্দ্রের তীক্ষ্ণ সমালোচনাপ্রবণ মনের ব্যবচ্ছেদী শলাকায় বার বার বিদ্ধ হয়ে বিশ্বের দিকে দিকে ছড়ানো উপনিবেশগুলিতে ক্রিয়াশীল ইংরেজ সাম্রাজ্যবাদ ফালাফালা হয়ে গেছে। এই সাম্রাজ্যবাদের চিরাভাস্ত নির্ধূরতা কুটিলতা অত্যাচার শোষণ লুণ্ঠনতৎপরতা কিছুই রাজনীতিসচেতন সূক্ষ্মদর্শী লেখকের দৃষ্টিকে ফাঁকি দিতে পারেনি; তাঁর সুতীত্র ভৎসনা ও নিন্দা নির্মম বজ্রাগ্নির মত নেমে এসেছে ওই সাম্রাজ্যবাদকে ধিক্কৃত করে পদে পদে—যেখানেই এমনতর ধিক্কারবাণীর উপলক্ষ উপস্থিত হয়েছে তার সুযোগ নিয়ে। উপন্যাসের বিপ্লবী চরিত্র সব্যসাচীকে করা হয়েছে এই সুতীক্ষ্ণ সমালোচনার মুখপাত্র, যদিও বুঝতে অসুবিধা হয় না সব্যসাচীর অনেক কথাই শরৎচন্দ্রের নিজেরও কথা, শরৎচন্দ্রের অনুভবটাই বহুলাংশে সব্যসাচীর বাচনিক পরিবেশিত হয়েছে বইয়ের মধ্যে। সব্যসাচীর কথাগুলি যদি কাল্পনিক হতো, নিছক উপন্যাস সৃষ্টির প্রয়োজনে কাহিনীর ধারায় সংযোজিত হতো, তাহলে পাঠকের মনের উপর তার এমন প্রভাব পড়তো কিনা সন্দেহ। কিন্তু যারা এই বই বাজেয়াপ্ত করার আদেশ ঘোষণা করেছিল তাদের এ কথা মনে করার যথেষ্ট কারণ ছিল যে, এ বই বাঙালার সংগ্রামী চেতনাকে গভীরভাবে আলোড়িত করেছে এবং ভবিষ্যতেও করবে, সুতরাং রাজদ্রোহের অভিযোগ খাড়া করে বইখানির প্রচার এখনি বন্ধ করে দেওয়া দরকার। সরকারী কর্তৃপক্ষের নিষেধাজ্ঞা খতই অবাহিত ও অণায় হোক, তাদের স্বার্থের দিক থেকে তারা যে খুব ভুল করেছিল তা মনে হয় না। উপযুক্ত বইয়ের উপরেই তাদের খরদৃষ্টি পতিত হয়েছিল, কেননা বইখানার বৈপ্লবিক সম্ভাবনা ছিল প্রভূত আর সেই উদ্দেশ্যেই বইখানা লেখা হয়েছিল।

অবশ্য শিল্পের মানদণ্ডে বিচার করলে উপন্যাসখানাকে পূরাপূরি সন্তোষজনক মনে করা যায় না। শরৎচন্দ্র বইখানাকে করতে চেয়েছিলেন একটি বৈপ্লবিক উপন্যাস কিন্তু এদেশের জলবায়ুর গুণে অথবা দোষে সেটি হয়ে উঠেছে শেষ পর্যন্ত একটি মানবিক উপন্যাস—অপূর্ব-ভারতীর ভাবাবেগসমৃদ্ধ প্রেম সব্যসাচীর বহুযত্নে তৈরী সাধের বিপ্লবের আয়োজনকে মধ্যপথে কাটিয়ে দিয়েছে। বিপ্লবের আপসহীনতা নরনারীর রোমান্টিক ভালবাসার সংস্পর্শে এসে অনেকখানি তরল আর নমনীয় হয়ে পড়েছে। উপন্যাসে জৈবপ্রেমের

চিত্রণ দেখাতেই হবে এমন কোন কথা নেই। অন্ততঃ যে-উপন্যাসের মূল প্রতিপাদ ইংরেজ সাম্রাজ্যবাদের ক্রুর-কুটিল স্বরূপের উন্মোচন ও বিপ্লবের উদ্ঘোষণ, সে-বইয়ের পক্ষে এমনতর প্রেমের পরিবেশনা অত্যাবশ্যক ছিল না। আদর্শের সমপ্রাণতা ও কর্মের সমানত্বের মধ্য দিয়ে যে-প্রেম গড়ে ওঠে তাকে বিপ্লবী উপন্যাসের আখ্যানভাগের উপজীব্য রূপে গ্রহণ করা যায়। কিন্তু অপূর্ব-ভারতীর প্রেম সে জাতের নয়। এই প্রেম বিপ্লবকে এগিয়ে দেয় না, পেছনে টেনে রাখে। কাজেই অপূর্ব-ভারতী জুটির ভালবাসার মানবিক কাহিনী পথের দাবী উপন্যাসকে সমৃদ্ধ করেনি, তার মূল্যাপকর্ষ ঘটাবার হেতু হয়েছে। ম্যাক্সিম গর্কির মানদার বিপ্লবী উপন্যাস—সংগ্রামী রাজনীতির অভীক্ষায় ভরা। তিনি কিন্তু নরনারীর জৈব আকর্ষণভিত্তিক হৃদয়সংবাদকে তাঁর সেই উপন্যাসে কিছুমাত্র প্রশ্রয় দেননি, আগাগোড়া বিপ্লবের চড়া সুরে উপন্যাসের কাহিনীটিকে বেঁধে রেখেছেন। শরৎচন্দ্র কেন যে পথের দাবী উপন্যাস লিখতে গিয়ে এই রীতির অন্যথাচরণ করলেন ভাল বোঝা যায় না। খুব সম্ভব বাঙালী মনের রোমান্টিক মাধুর্যকে মর্যাদা দিতে গিয়েই এ রকমটা করা হয়েছে। কিন্তু তার ফলে বইটি আর পূরাপূরি বৈপ্লবিক থাকেনি, লেখকের অজ্ঞাতসারেই মানবিকতার খাতে চালান হয়ে গিয়েছে।

মাই হোক এ তো হলো বইয়ের শিল্পবিচার। তা বলে পথের দাবী উপন্যাসের সব্যসাচীর মুখের কথাগুলির দাম কমে যায় না। কিংবা তারই বিপ্লবী দলের প্রচ্ছন্ন সদস্য নীলকান্ত যোশীর শিষ্য মারাঠী যুবক রামদাস তলোয়ারকরের ভূমিকা বা বক্তব্য মিথ্যে হয়ে যায় না। ওরা দুজনই এদেশে ইংরেজ রাজত্বের আপসহীন শত্রু। তাদের ওই দ্ব্যর্থহীন বৈরিতার মনোভাব এই বইয়ের কোথাও গোপন থাকেনি—দীপ্ত মধ্যাহ্নের প্রথর রৌদ্রালোকে কিছুই যেমন ঢাকা পড়ে না, তেমনি তাদের ইংরেজ-বিযুখতাও অত্যন্ত রুঢ়-রুক্ষ সত্যের স্মারক স্পষ্ট-প্রত্যক্ষ হয়ে উঠেছে বারংবার। এমন অকুণ্ঠিত বলিষ্ঠ নির্ভীক ঘোষণার সামনে এদেশের তদানীন্তন পরদেশী শাসকশক্তি বিচলিত বোধ করবে না তো কিসে করবে?

দু-একটি দৃষ্টান্ত দিলেই শরৎচন্দ্রের মনোগত অভিপ্রায় সম্পর্কে ভুল ধারণা করবার কোন অবকাশ থাকবে না। তিনি এই দুটি চরিত্রের সঙ্গে বলতে গেলে নিজেকে একাত্মভাবে মিশিয়ে দিয়েছিলেন। আর সেখানেই বইটির শিল্পগত ক্রটি থাকা সত্ত্বেও সত্যিকারের জোর। রামদাস তলোয়ারকরের



বক্তব্য দিয়েই শুরু করা যাক। অপূর্ব রেঙ্গুন থেকে ভামোর উদ্দেশে ট্রেন ভ্রমণ কালে তলোয়ারকরের কতকগুলি কথা নিয়ে মনে মনে নাড়াচাড়া করছিল। রেঙ্গুন এসে অবধি অপূর্বর লাঞ্ছনার সীমা-পরিসীমা ছিল না। এই ট্রেনে ভ্রমণকালেও প্রথম শ্রেণীর আরোহী হওয়া সত্ত্বেও সে যেহেতু গোরার আরোহী নয় সেই কারণে রেল কর্মচারীর দ্বারা অযথা অপমানিত হয়েছে। তারই পরিপ্রেক্ষিতে রামদাসের কথাগুলি একটা বিশেষ তাৎপর্য নিয়ে তার সামনে প্রতিভাত হলো। ব্রহ্মদেশের পূর্ব-ইতিহাস ওই কথাগুলির সঙ্গে জড়ানো, কী ভাবে ইংরেজ বর্মাকে আপন কুক্ষিগত করেছিল তার ইতিহাস। ‘বাবুজী, শুধু কেবল শোভা সৌন্দর্যই নয়, প্রকৃতি মাতার দেওয়া এত বড় সম্পদও কম দেশে আছে! ইহার বন ও অরণ্য অপরিমেয়, মাটির মধ্যে ইহার অফুরন্ত তেলের প্রস্রবণ, ইহার মহামূল্য রত্নখনির মূল্য নিরূপিত হয় না, আর ওই যে আকাশচুম্বি মহাদ্রুমের সারি, জগতে ইহার তুলনা কোথায়? সে বেশি দিনের কথা নয়, সংবাদ পাইয়া একদিন ইংরাজের লুপ্তদৃষ্টি ইহারই প্রতি একেবারে একান্ত হইয়া পড়িল। তাহার অনিবার্য পরিণাম অত্যন্ত সংক্ষিপ্ত এবং সোজা। বিবাদ বাধিল, মানোয়ারি জাহাজ আসিল, বন্দুক কামান আসিল, সৈন্য সামন্ত আসিল, লড়াই বাধিল, যুদ্ধে হারিয়া দুর্বল অক্ষম রাজা নির্বাসিত হইলেন এবং তাঁহাদের রাণীদের গায়ের গহনা বেচিয়া লড়াইয়ের খরচ আদায় হইল। অতঃপর দেশের ও দেশের কল্যাণে, মানবতার কল্যাণে, সভ্যতা ও ন্যায়ধর্মের কল্যাণে ইংরাজ রাজশক্তি বিজিত দেশের শাসনভার গ্রহণ করিয়া তাহাদের অশেষবিধ ভালো করিতে কায়েনে লাগিয়া গেলেন।’

শেষের কথা কয়টির প্রচ্ছন্ন শ্লেষ ব্যাখ্যা করে বোঝাবার প্রয়োজন নেই। রামদাসের উদ্দিষ্ট বক্তব্য অতি পরিষ্কার। আর সেই বক্তব্যের আলোড়নে অপূর্বর মনে যে কথাগুলি যতই ভেসে উঠলো তা হলো এই: ‘তাই ত আজ তথায় সতর্কতার অবধি নাই, তাই ত সেই বিজিত দেশের পুলিশ কর্মচারী তাহারই মত আর এক পরাধীন দেশের নিরীহ ব্যক্তিকে বারংবার ঘুম ভাঙাইয়া নিঃসংকোচে বলিতে পারিল, তুমি ত সাহেব নও যে তোমাকে অপমান করিতে আমার বাধিবে?’ অপূর্ব মনে মনে কহিল, ‘বটেই ত, বটেই ত! ইহার অধিক আমাকে সে কি দিবে? ইহার বড় আমিই বা কোন্ মুখে তাহার কাছে দাবী করিব?’

ভারতী একদিন সব্যাসাচীর আবাসস্থলের ভয়ঙ্করতার উল্লেখ করে বিন্ময় ও তিরস্কারমিশ্রিত কণ্ঠে জিজ্ঞাসা করেছিল, “দাদা ওপারের এমনি একটা ভয়ঙ্কর স্থান থেকে আর একটা তেমনি ভয়ঙ্কর জায়গায় নিয়ে এলে। বাঘ-ভালুকের মত এ-ছাড়া কি তোমরা আর কোথাও থাকতে জানো না? আর কিছু ভয় না কর সাপের ভয়টা ত করতে হয়?”

“ডাক্তার হাসিয়া কহিলেন, ‘সাপ বিলাত থেকে আসেনি দিদি, তাদের ধর্মজ্ঞান আছে, বিনা অপরাধে কামড়ায় না।……আর বাঘ-ভালুক বোন? কতদিন ভাবি, এই ভারতবর্ষে মানুষ না থেকে যদি কেবল বাঘ-ভালুকই থাকতো! হয়ত বিদেশ থেকে শিকার করতে এরা আসতো, কিন্তু এমন অহর্নিশি রক্ত শোষণের জগ্য কামড়ে পড়ে থাকত না।’ ”

ইউরোপীয়, বিশেষ, ইংরেজের বিরুদ্ধে কী অপরিসীম ঘৃণা এই কথাগুলির মধ্য দিয়ে ব্যক্ত হয়েছে তা একটু চিন্তা করলেই বুঝতে পারা যায়। ভারতীর এত বিদ্বেষ আর ঘৃণার অভিব্যক্তি ভাল লাগে না। সে যদিও ‘পথের দাবী’ প্রতিষ্ঠানের সভ্য এবং বিপ্লবের মন্ত্রে অঙ্গীকারবদ্ধ, তাহলেও দেশ স্বাধীন করবার জগ্য রক্তারক্তি কাটাকাটির পথ ছাড়া আর কোন পথ খোলা নেই এ কথা ভাবতে তার মন সায় দেয় না। “সমস্ত জাতি-নির্বিশেষে কাহারও এতখানি বিদ্বেষ তাহাকে অত্যন্ত ব্যাধিত করিত। বিশেষ করিয়া এই মানুষটির (সব্যাসাচীর) এত বড় বিশাল বক্ষতল হইতে যখন গরল উছলিয়া উঠিত, তখন হুই চক্ষু তাহার জলে পরিপূর্ণ হইয়া যাইত। নিভের মনে প্রাণপণে বলিতে থাকিত, ইহা কখনও সত্য নয়, কিছুতে সত্য নয়। এমন হইতেই পারে না।” অগ্রত্বে ভারতী সব্যাসাচীকে বলছে, ‘ভারতের মুক্তি আমরা চাই—অকপটে, অসঙ্কোচে, মুক্তকণ্ঠে চাই। দুর্বল, পীড়িত, ক্ষুধিত ভারতবাসীর অন্নবস্ত্র চাই। মনুষ্য-জন্ম নিয়ে মানুষের একমাত্র কাম্য স্বাধীনতার আনন্দ উপলব্ধি করতে চাই। ভগবানের এত বড় সত্য উপস্থিত হবার এই নিষ্ঠুর পঙ্খ ছাড়া আর কোন পঙ্খ খোলা নেই, এ আমি কোনমতেই ভাবতে পারিনে। পৃথিবী ঘুরে তুমি শুধু এই পথের খবরটাই জেনে এসেচ,……কিন্তু বিশ্ব-মানবের একান্ত শুভ-বুদ্ধি, তার অনন্ত বুদ্ধির ধারা কি এমনই নিঃশেষ হয়ে গেছে যে, এই রক্ত-রেখা ছাড়া আর কোন পথের সন্ধানই কোনদিন তার চোখে পড়বে না? এমন বিধান কিছুতেই সত্য হতে পারে না। দাদা, মনুষ্যত্বের এত বড় পরিপূর্ণতা তুমি ছাড়া আর কোথাও আমি দেখিনি,—

নিষ্ঠুরতার এই বারংবার চলা-পথে তুমি আর চোলো না। দুয়ার হয়ত আজও রুদ্ধ আছে, তাই তুমি আমাদের জগৎ খুলে দাও—এ জগতের সবাইকে ভালবেসে আমরা তোমাকে অনুসরণ করে চলি।’

স্পর্ষিতঃই সব্যসাচী আর ভারতীর পথ ভিন্ন। একজন বিপ্লবের রক্ত-রঞ্জিত দুর্কহ পথ বেছে নিয়েছে, অগ্ৰজনার চোখে সেই পথ বিভীষিকার আতঙ্ক সৃষ্টি করে; যদিও দুইয়ের চূড়ান্ত লক্ষ্য এক : ভারতবর্ষের স্বাধীনতা, এবং পরিণামে মানবজাতির মুক্তি। কিন্তু সব্যসাচীর হৃদয়ে সমগ্র মানব-জাতির জন্য এত বিশাল প্রেম থাকা সত্ত্বেও তিনি কেন জাতীয় মুক্তি তথা মানবমুক্তি সাধনে রক্তাক্ত বিপ্লবের পথ ছাড়া আর কোন পথ পরিক্রমায় বিশ্বাস স্থাপন করতে পারলেন না? একটি মাত্র উপায়ের উপরেই কেন তাঁর চিন্তের সমগ্র মনোযোগ ও পক্ষপাত অর্পিত?

সেটি বুঝতে হলে সব্যসাচীর প্রথম জীবনের আখ্যায়িকায় ফিরে যাওয়া প্রয়োজন। তিনি ইংরেজের প্রতি স্বতঃই বিরূপতা নিয়ে জন্মাননি, অভিজ্ঞতাই তাঁকে এদেশে ইংরেজ শাসনের স্বরূপ সম্পর্কে সচেতন করে তুলেছে, তাঁর মনে ওই শাসনের বিরুদ্ধে জ্বালা ধরিয়ে দিয়েছে। পরাধীনতার মর্মযাতনা ও অপমান যে কাকে বলে তা তিনি নিজ জীবনেই উপলব্ধি করেছেন। বলে তাঁর ওই মনোভাবের ব্যাখ্যা করে তিনি ভারতীকে তাঁর এক জ্যাঠাতুত দাদার গল্প শুনিয়ে ছিলেন, যে দাদা সম্পূর্ণ নিরস্ত্র আর অসহায় অবস্থায় ডাকাতের গুলিতে প্রাণ দিয়েছিলেন, ডাকাতের আগমন-সংবাদ পূর্বে জানা থাকা সত্ত্বেও ডাকাতের প্রতিরোধের জন্য থানার সাহায্য চেয়েও সে-সাহায্য পাননি। এক অত্যাচারী পুলিশ ইনস্পেক্টরের কান মলে দেবার জন্য তাঁর দু’মাস জেল হয়েছিল, সেই অপরাধে জিলার সাহেব-ম্যাজিস্ট্রেট তাঁর হাতে বন্দুক তুলে দিতে অধীকার করে, ফলে একপ্রকার অভিমান বশেই তিনি স্বেচ্ছায় ডাকাতের গুলির সামনে দাঁড়িয়ে প্রাণ বিসর্জন দেন। সেই থেকে সব্যসাচী ইংরেজের ক্ষমাহীন বৈরী আর ওই ইংরেজকে এ দেশ থেকে উৎখাত করাই তাঁর একমাত্র ধ্যান জ্ঞান সাধনা। ‘ভারতী, আমার দেশ গেছে বলেই আমি এদের শত্রু নই। একদিন মুসলমানের হাতেও এ দেশ গিয়েছিল। কিন্তু সমস্ত মনুষ্যত্বের এতবড় পরম শত্রু জগতের আর নেই। স্বার্থের দায়ে ধীরে ধীরে মানুষকে অমানুষ করে তোলাই এদের মজ্জাগত সংস্কার। এই এদের ব্যবসা, এই এদের

মূলধন। যদি পারো দেশের নর-নারীকে শুধু এই সত্যটাই শিখিয়ে দিও।’

দাদার হত্যায় সব্যসাচীর মনে ইংরেজ শাসনের বিরুদ্ধে দুর্জয় প্রতিরোধের সংকল্প জেগে উঠেছিল, সে সংকল্পের দীপশিখা আর কখনও নেভেনি, বরং বয়ঃপ্রাপ্তির সঙ্গে সঙ্গে জ্ঞান ও অভিজ্ঞতা বৃদ্ধির সহিত তাল রেখে তা আরও অনেক বেশী প্রদীপ্ত হয়ে উঠেছিল। কল্লিত ঘটনার এই ছাঁচ লেনিনের জীবনের বাস্তব ঘটনার ছাঁচকে স্মরণ করিয়ে দেয়। লেনিনও জারতন্ত্রের বিরুদ্ধে অনমনীয় সংগ্রামে লিপ্ত হয়েছিলেন কৈশোরে স্বেচ্ছাচারী জারতন্ত্রের হাতে তাঁর দাদার শোচনীয় হত্যার ঘটনা প্রত্যক্ষ করে। লেনিনের জীবনে সেই সংগ্রামের আর কখনও বিরাম হয়নি পরিণামে জয়যুক্ত না হওয়া পর্যন্ত। রাশিয়ার বুক থেকে জারতন্ত্রের উচ্ছেদ করে তবে তিনি দেশ সংগঠনের কাজে মন দিতে পেরেছিলেন—তার আগে নয়। শরৎচন্দ্র লেনিনের জীবনধারার সঙ্গে সম্যক পরিচিত ছিলেন, তাঁর রচিত গ্রন্থাবলীও তিনি পাঠ করেছিলেন তার আভ্যন্তর প্রমাণ আছে। রাজনৈতিক বিজ্ঞান তাকে সত্তাই আকৃষ্ট করত, তাঁর নিজমুখের স্বীকৃতি থেকেই সে কথা জানতে পারা যায়। হয়ত সব্যসাচী চরিত্রের পরিকল্পনায় লেনিনের জীবনবৃত্তের ছাঁচ তাঁর অজ্ঞাতসারেই তাঁকে কিছু পরিমাণে প্রভাবিত করে থাকবে।

ভারতীর শান্তি ও অহিংসার ক্রমাগত মাহাত্ম্য কীর্তনে অধৈর্য হয়ে এক সময় সব্যসাচী বলেই ফেলেন, ‘শান্তি! শান্তি! শান্তি! শুনে শুনে কান একেবারে কালাপালা হয়ে গেছে। কিন্তু এ অসত্য এতদিন কারা প্রচার করেছে জানো? পরের শান্তি হরণ করে যারা পরের রাস্তা জুড়ে অট্টালিকা প্রাসাদ বানিয়ে বসে আছে তারাই এই মিথ্যামন্ত্রের স্বামী। বঞ্চিত, পীড়িত, উপদ্রুত নর-নারীর কানে অবিশ্রান্ত এই মন্ত্র জপ করে করে তাদের এমন করে তুলেছে যে, আজ তারাই অশান্তির নামে চমকে উঠে ভাবে এ বুঝি পাপ, এ বুঝি অমঙ্গল! বাঁধা গরু অনাহারে দাঁড়িয়ে মরতে দেখেচ? সে দাঁড়িয়ে মরে তবু সেই জীর্ণ দড়িটা ছিঁড়ে ফেলে মনিবের শান্তি নষ্ট করে না।…… না ভারতী, সে হবে না। ও প্রতিষ্ঠান (শান্তি ও অহিংসা তত্ত্ব) যত প্রাচীন, যত পবিত্র, যত সনাতনই হোক,—মানুষের চেয়ে বড় নয়,—আজ সে-সব আমাদের ভেঙে ফেলতেই হবে। ধুলো ত উড়বেই, বালি ত ঝরবেই, ইট পাথর খসে মানুষের মাথায় পড়বেই ভারতী, এই ত স্বাভাবিক।’

এর পর আর সব্যসাচীর মানসিকতাকে ভুল করবার কোন যো থাকে না। মানুষের কল্যাণ যারা করতে চায়, নির্বিरोধ শান্তির পথ তাদের জন্ম নয়। অধিকাংশ ক্ষেত্রেই অহিংসা হিংসা পরিহারের অজুহাতে নিষ্ক্রিয়তার নামান্তর মাত্র এবং স্থিতিবস্থাকে বাঁচিয়ে রাখার অনুকূলে কায়েমী স্বার্থবাদীদের চতুর মন্ত্রণা। এ যুক্তিতে ভোলে তারাই, যারা সর্বাবস্থায় ঝগড়াটি এড়িয়ে চলতে ভালবাসে এবং বরাবর ন্যূনতম প্রতিরোধের রাস্তায় চলতে অভ্যস্ত। সব্যসাচী এই রকমের অকার্যকর শান্তি ও অহিংসাকে আঁকড়ে ধরে ভারতের স্বাধীনতাকে অনির্দিষ্টকালের জন্ম পিছিয়ে দিতে প্রস্তুত নন।

তিনি বিপ্লবের যে-কার্যসূচী গ্রহণ করেছেন তাতে অগ্ন্যাগ্ন কার্যক্রমের মধ্যে সত্ত্বাসবাদী কর্মতৎপরতা আছে, আছে সৈন্যদলের মধ্যে বিদ্রোহ ঘটাবার চেষ্টা ও বিদেশ থেকে অস্ত্র আমদানীর আয়োজন, আছে অগ্ন্যাগ্ন দেশের বিপ্লবী আন্দোলন ও তার নেতাদের সঙ্গে যোগস্থাপনের দূর-বিস্তৃত প্রয়াস। ভারতের ইংরেজ শাসনের ইতিহাসে ইংরেজ শক্তিকে উচ্ছেদ করবার জন্ম এত বহুবিস্তারী ব্যাপক বৈপ্লবিক অভ্যুত্থানের চেষ্টা হয়ত বাস্তবে হয়নি তবে প্রথম বিশ্বমহাযুদ্ধকালে বিপ্লবী যতীন্দ্রনাথ মুখোপাধ্যায়, রাসবিহারী বসু, মানবেন্দ্রনাথ রায় প্রমুখের চেষ্টার ধারার সঙ্গে পূর্ববর্ণিত কার্যক্রমের কিছু অংশের অন্তর্ভুক্তি মিল আছে, সে লক্ষণ অতি স্পষ্ট। সমালোচকদের মধ্যে কারও কারও খারগা, সব্যসাচী চরিত্রের আদল মানবেন্দ্রনাথ রায়ের তৎকালীন ক্রিয়াকলাপের ছক থেকে গ্রহণ করা হয়েছে। কথাটা একেবারে বেঠিক নাও হতে পারে। তবে কোন বিশিষ্ট চরিত্রের পরিকল্পনায় ঔপন্যাসিকেরা তথা নাট্যকারেরা বাস্তব থেকে কত ভাগ গ্রহণ করেন আর কল্পনা থেকেই বা কত অংশ নেন তা নিরূপণ করা অতিশয় কঠিন। কাল্পনিকতার ক্রিয়া বড়ই সূক্ষ্ম। সৃজনী তৎপরতার মধ্যে বাস্তবের সঙ্গে কাল্পনিকতা এমন অবলীলায় মিশে থাকে যে তাদের দুইকে বিচ্ছিন্ন করা শক্ত। খুব সম্ভব সব্যসাচীর অঙ্কনে দুই প্রভাবই সত্য—তাতে লেনিনও মিশে আছেন, মানবেন্দ্রনাথও মিশে আছেন। দুই এক দেহে লীন হয়ে গেছেন।

বর্ষীয়ান সমালোচক সুপণ্ডিত ডক্টর সুবোধচন্দ্র সেনগুপ্ত তাঁর শরণচন্দ্র বিষয়ক বইতে এই ধরনের মন্তব্য করেছেন যে, সব্যসাচীর বিপ্লবের আয়োজন সবটাই ভারতের বাইরে থেকে পরিচালিত, ভারতের স্বাধীনতা

অর্জন চেফ্টার সঙ্গে তার বিশেষ কোন সম্পর্ক নেই। সব্যসাচীর সঙ্গে যদি-বা ভারতের কিছু যোগ আছে, পথের দাবী সংস্থার নেত্রী সুমিত্রার সেটুকু যোগও নেই—সুমিত্রার যে-চরিত্র ও জীবনের পশ্চাৎপট আঁকা হয়েছে তার থেকে তাকে ভারতের স্বাধীনতা সংগ্রামের সঙ্গে সহানুভূতিগতভাবে যুক্ত মনে করতে পারা একটু কঠিন। এই অভিযোগ বাহ্যতঃ সত্য তবে এই অভিযোগের উত্তরে এই বলা চলে যে, সশস্ত্র বৈপ্লবিক অভ্যুত্থানের রূপ ও প্রকরণ অনেকটা এই ছাঁচেরই হয়ে থাকে—সব দেশেই এমনতর চেফ্টার পটভূমি আন্তর্জাতিক। রুশ বিপ্লবের মূল নেতা লেনিন ১৯১৭ সালের অক্টোবর বিপ্লব সংগঠিত হবার আগে দেশের বাইরে ছিলেন এবং সেখান থেকেই আন্দোলন পরিচালনা করেছিলেন, বিপ্লবের কিছুকাল আগে মাত্র দেশে প্রত্যাবর্তন করেন। এমনি অগ্ন্যাগ্ন দেশের ইতিহাসেও দেখতে পাওয়া যায়। কাজেই সব্যসাচীর ভারতের বাইরে সংস্থিত থেকে সশস্ত্র অভ্যুত্থান চেফ্টার মধ্য দিয়ে ভারতের স্বাধীনতার আন্দোলনকে সার্থক করার উদ্যম অস্বাভাবিক মনে হয় না। এমনতর উদ্যোগকে সাফল্যমণ্ডিত করতে হলে দেশের সীমানা ছাড়িয়েও দূর দূর অঞ্চলে কর্মকাণ্ড বিস্তৃত করা কিংবা বিদেশের বিপ্লবী নেতাদের সঙ্গে যোগ স্থাপন করা অপরিহার্য হয়ে পড়ে। পরবর্তীকালে নেতাজী সুভাষচন্দ্রের চেফ্টার মধোও এ কথার প্রমাণ রয়েছে।

ভারতের অভ্যন্তরে ইংরেজ শাসনের অপসারণকল্পে বুর্জোয়া জাতীয় নেতৃত্বের অধীনে নিয়মতান্ত্রিক যে-আন্দোলন চলছিল তার কার্যকারিতায় সব্যসাচীর বিন্দুমাত্র আস্থা ছিল না, বরং সুযোগ পেলেই ভারতীর কাছে তার হাস্যাস্পদ মধ্যবিত্ত চরিত্র নিয়ে ব্যঙ্গ-বিদ্রূপ করেছেন। এমনতর মানুষের ধ্যানে বিপ্লবী আন্দোলনের আদর্শ আন্তর্জাতিক হওয়াই প্রত্যাশিত আর তা কার্যতঃ হয়েও ছিল। কী চরিত্র পরিকল্পনায় কী ঘটনার বর্ণনায় শরৎচন্দ্রের নিয়মতান্ত্রিক আন্দোলনের প্রতি বিমুখতা অথবা আন্তর্জাতিক সশস্ত্র আন্দোলনের প্রতি পক্ষপাত কোনটাই অনভিব্যক্ত থাকেনি। তথাকথিত সন্ত্রাসবাদীদের প্রতি পথের দাবী উপগ্রাস লেখকের সহানুভূতি অতি স্পষ্ট।

পাস্ত্রাজ্যবাদের মত ইউরোপের ক্রীষ্টান সভ্যতার স্বরূপ সম্পর্কেও লেখকের মনোভাব অনুরূপ আপসহীন। বাংলা ভাষায় ইউরোপীয় সভ্যতার এমন কঠোর শিকার খুব কমই উচ্চারিত হয়েছে। শরৎচন্দ্রের বিশ্লেষণের সঙ্গে এই ক্ষেত্রে অন্ততঃ মহাত্মা গান্ধীর হিন্দু স্বরাজ (১৯০৯) বইয়ের বিশ্লেষণ

চমৎকার মিলে যাচ্ছে। সবাসাচী ভারতীকে বলছেন, 'লজ্জাহীন উলঙ্গ স্বার্থ এবং পশু-শক্তির একান্ত প্রাধিকায়ই এর (ইউরোপীয় ক্রীষ্টান সভ্যতার) মূল মন্ত্র। সভ্যতার নাম দিয়ে দুর্বল, অক্ষমের বিরুদ্ধে এতবড় মুষল মানুষের বুদ্ধি আর ইতিপূর্বে আবিস্কার করেনি। পৃথিবীর মানচিত্রের দিকে চেয়ে দেখ, ইউরোপের বিশ্বগ্রাসী ক্ষুধা থেকে কোন দুর্বল জাতিই আজ আর আত্মরক্ষা করতে পারিনি। দেশের মাটি, দেশের সম্পদ থেকে দেশের ছেলেরা বঞ্চিত হয়েছে কোন্ অপরাধে জানো ভাবিতী? একমাত্র শক্তিশালীতার অপরাধে। অথচ ন্যায়ধর্মই সকলের বড় এবং বিজিতের অশেষ কলাণের জগ্নেই এই অধীনতার শৃঙ্খল তার পায়ে পরিয়ে সেই পশুর সর্বপ্রকার দায়িত্ব বহন করাই ইউরোপীয় সভ্যতার চরম কর্তব্য—এই পরম অসত্য লেখায় বক্তৃতায় মিশনারির ধর্মপ্রচারে, ছেলেদের পাঠ্যপুস্তকে অবিশ্রান্ত প্রচার করাই তোমাদের ক্রীষ্টান সভ্যতার রাজনীতি।'

পণের দাবী উপাখ্যাসের আর একটি লক্ষণীয় বৈশিষ্ট্য এইখানে যে, এই বইয়েই প্রথম শরৎচন্দ্র শ্রমিক সমস্যার বিষয়ে তাঁর চেতনার পরিচয় দিয়েছেন। ফ্লোর-মাঠে যেদিন পণের দাবীর প্রথম সভা হয় তার আগের দিন ভারতী অপূর্বকে একপ্রকার তার ইচ্ছার বিরুদ্ধেই মজুরদের লাইনের ঘরে টেনে নিয়ে গিয়েছিল মজুররা কিভাবে জীবনযাপন করে তা সরেজমিনে দেখাবার জন্য। দেখে অপূর্বর চক্ষুস্থির, বোধশক্তি স্তম্ভিত। কুলি ব্যারাকের জীবনযাত্রা-পদ্ধতি সম্পর্কে তার মোটামুটি একটা ধারণা ছিল কিন্তু সে সে এত বীভৎস কদর্য আত্মক্ষয়কর হতে পারে স্বপ্নেও তা সে কল্পনা করতে পারেনি। এই-খানেই সে মানিক মিস্ত্রী, রামিয়া, যত্ন, পাঁচকড়ি, কালাচাঁদ, ছালাল প্রভৃতি শ্রমিকেরা পণ্ডরও অধম যে দুঃখের জীবন যাপন করে তার সাক্ষাৎ পরিচয় পেল। এই প্রথম অপূর্বর চেতনায় এই ভাবের উপলব্ধি হলো এরা সভ্যতা-প্রদীপের পিলসুজ, তলায় থেকে কালিঝুলি মেখে প্রদীপকে ধারণ করে রেখেছে। রামদাসকে অপূর্ব তার এই বস্তু-দর্শনের অভিজ্ঞতার কথা বলতে রামদাসও ঠিক একই ভাবের অভিব্যক্তি দিলে, বললে, 'বাবুজী, আত্মত্যাগের উৎসই এখানে। দেশের সেবার বনেদ ওর 'পরে, ওর নাগাল না পেলে যে আপনার সকল উদ্যম সকল ইচ্ছা মরুভূমির মত হুদিনে শুকিয়ে উঠবে।' ফ্লোর-মাঠের বক্তৃতায়ও রামদাস এই ভাবের কথাই আরও সজোরে বললে, শ্রমের গুরুত্ব ও অপরিমিত মূল্যবত্তার ধারণা শ্রোতাদের

অন্তরে মুদ্রিত করে দেবার জন্য উচ্চকণ্ঠে ঘোষণা করলে, ‘বিনাশ্রমে সংসারে কিছুই উৎপন্ন হয় না—তাই শ্রমিকও ঠিক তোমাদেরই মত মালিক—ঠিক তোমাদের মতই সকল বস্তু, সকল কারখানার অধিকারী।’ আর এই কথা উচ্চারিত হওয়া মাত্রই সর্দার-গোরা গর্জন করে বলল ‘সুপ, এ চলবে না, এতে শান্তিভঙ্গ হবে। এ রাজদ্রোহ।’

আঁতে ঘা লাগলে অর্থাৎ ঠিক মোক্ষম জায়গায় হাত পড়লে কায়েমী স্বার্থবাদীরা কীভাবে আঁতকে ওঠে, এই বর্ণনায় তারই হৃদিশ মিলেছে। বক্তৃতার এই অংশের জন্যই বিশেষ করে রামদাসকে গ্রেপ্তার করা হলো ও মিটিং ভুল করে দেওয়া হলো। শরৎচন্দ্র এখানে শ্রমিক-সমস্যার অভ্যন্তরীণ বিশ্লেষণ করেছেন এবং ওই সমস্যার প্রতিকারেরও পথ বাতলেছেন। ঐক্য আর সজ্জশক্তির জাগরণই যে শ্রমিক-মুক্তির একমাত্র উপায় সে কথাটি তাঁর পথনির্দেশনার মধ্যে ব্যক্ত হয়েছে। শ্রমিক ও শ্রমের প্রশ্নের বৈজ্ঞানিক সমাজ-তাত্ত্বিক বিশ্লেষণের সঙ্গে শরৎচন্দ্রের এই বিশ্লেষণের মিল আছে।

পথের দাবী উপন্যাসে দুটি চিন্তা পাশাপাশি বয়ে চলেছে—একটি সবাসাচীর বৈপ্লবিক আদর্শ, অন্যটি ভারতীর মানবিক মতবাদ। এই দুই বিপরীত ধারণার মধ্যে কোন্‌টির প্রতি শরৎচন্দ্রের স্বভাব-পক্ষপাত তা রচনার ধারায় অস্পষ্ট থাকেনি। শরৎচন্দ্র চরিত্রাঙ্কন করতে গিয়ে সবাসাচীর সঙ্গে তদ্ব্যবস্তিত হয়ে গিয়েছেন। আর এই তন্ময়তার গুণে সবাসাচীর মুখ দিয়ে তিনি যা-যা বলিয়েছেন তা তাঁর নিজের কথা বলেই মনে হয়েছে।

তবে শিল্পবিচারের প্রশ্নে, পূর্বেই বলেছি, পথের দাবীর বৈপ্লবিকতা অনেকখানি ফিকে হয়ে গিয়েছে অপূর্ব-ভারতীর প্রেমোপাখ্যানের সংস্পর্শ-দোষে। এই প্রেমকাহিনীকে অতিরিক্ত গুরুত্ব দিতে গিয়ে বৈপ্লবিকতাকে আড়াল করে মানবতাবাদ প্রধান হয়ে উঠেছে। সবাসাচীর বৈপ্লবিক ভাব-মূর্তিটিও শেষপর্যন্ত অক্ষুণ্ণ থাকেনি, তা মানবিকতার সরণিতে অনেকখানি সরে গেছে, যা খুব সম্ভব গোড়ায় লেখকের অনভিপ্রেত ছিল।

শরৎচন্দ্র বর্মা থেকে ফিরে আসার পর অবিভক্ত বাংলার রাজনীতির সঙ্গে জড়িয়ে পড়েছিলেন। তিনি অনেক দিন হাওড়া জিলা কংগ্রেস কমিটির সভাপতি ছিলেন। কংগ্রেসের রাজনীতিতে উপদলীয় মতসংঘাতের ক্ষেত্রে



তিনি ছিলেন দেশবন্ধু চিত্তরঞ্জন ও তাঁর ভাবশিষ্য সুভাষচন্দ্রের সমর্থক। এই থেকেও তাঁর রাজনৈতিক দৃষ্টিভঙ্গীর আদল খানিকটা বোঝা যায়। কেননা চিত্তরঞ্জন ও সুভাষচন্দ্র দুজনাই ছিলেন ভিতরে ভিতরে বিপ্লবীদের প্রতি সহানুভূতিসম্পন্ন এবং তাঁদের জন্ম অনেক কিছু করেছিলেন। দুজনেরই রাজনীতি কংগ্রেস উচ্চকোটির চালিত রাজনীতির বিপক্ষে ছিল—শরৎচন্দ্র এই মতভেদের ক্ষেত্রে একান্তভাবেই চিত্তরঞ্জন ও সুভাষচন্দ্রের ভাগ্যের সঙ্গে স্বীয় ভাগ্যকে যুক্ত করেছিলেন। চিত্তরঞ্জন ও সুভাষচন্দ্র শরৎচন্দ্রকে গভীর শ্রদ্ধা করতেন, তেমনি দুইয়ের প্রতি শরৎচন্দ্রেরও প্রাণের টান ছিল অত্যন্ত আন্তরিক। চিত্তরঞ্জনের সঙ্গে শরৎচন্দ্রের সম্পর্ক ছিল শ্রদ্ধার ও সৌখ্যের, আর অগ্রজত্বের কারণে সুভাষচন্দ্রের প্রতি বরাবর অকৃত্রিম স্নেহপাশে বদ্ধ ছিলেন শরৎচন্দ্র। দেশবন্ধুকে তিনি কী দৃষ্টিতে দেখতেন তার পরিচয় আছে তাঁর দেশবন্ধুর তিরোধানের পর লিখিত ‘স্মৃতিকথা’ প্রবন্ধটিতে, যা ১৩৩২ আষাঢ় দেশবন্ধু স্মৃতিসংখ্যা মাসিক বসুমতীতে প্রকাশিত হয়েছিল ও পরে তাঁব স্বদেশ ও সাহিত্য গ্রন্থে সংকলিত হয়। সুভাষচন্দ্রের উপরে অবশ্য শরৎচন্দ্রের আলাদা কোন নিবন্ধ নেই, তবে তরুণের বিদ্রোহ গ্রন্থে সংকলিত প্রবন্ধাবলীতে শরৎচন্দ্র যে মতাদর্শের প্রচার করেছেন তার মধ্য দিয়ে সুভাষচন্দ্রের পরিপোষিত তরুণের স্বপ্নকেই সমর্থন দান করা হয়েছে বলে মনে করতে পারা যায়। সুভাষচন্দ্র অবশ্য ১৩৪৪ বঙ্গাব্দের ফাল্গুন সংখ্যা ভারতবর্ষের এক প্রবন্ধে শরৎচন্দ্রের ঐকান্তিক স্বদেশপ্রেমের উল্লেখ করে বাংলার এই চিত্তজয়ী লেখকের প্রতি তাঁর অন্তরের শ্রদ্ধা নিবেদন করেছেন।

মহাত্মাজীর রাজনৈতিক মত ও পথ শরৎচন্দ্র কখনোই প্রাণের থেকে সমর্থন করতে পারেননি, বিশেষতঃ গান্ধীজীর চরকা-নীতির তিনি একজন ঘোরতর সমালোচক ছিলেন। তাহলেও ব্যক্তিগত স্তরে তিনি গান্ধীজীকে যে কতখানি শ্রদ্ধা করতেন তার পরিচয় রয়েছে তাঁর ‘মহাত্মাজী’ নামক প্রবন্ধটিতে (নারায়ণ, বৈশাখ ১৩২৯, স্বদেশ ও সাহিত্য গ্রন্থে সংকলিত)। এই প্রবন্ধে মহাত্মাজীর নির্ভীকতা ও সত্যনিষ্ঠাকে তিনি সর্বোচ্চ সম্মান দিয়েছেন। যখন সমগ্র দেশ চোরীচোরার কারণে সত্যগ্রহ আন্দোলন প্রত্যাহারের ঘটনায় ক্ষুব্ধ হয়ে গান্ধীজীর কঠোর সমালোচনায় রত তখন গান্ধীজীর কর্মপন্থার সমর্থক না হয়েও শুধু তাঁর বিশ্বাসের দৃঢ়তার জগ্ন শরৎচন্দ্র তাঁকে অকুণ্ঠ শ্রদ্ধা জানিয়েছেন।

যিনি সুভাষচন্দ্রের নীতির সমর্থক তিনি একই সঙ্গে কেমন করে মহাত্মা-জীকে শ্রদ্ধা নিবেদন করেন? এই সময় কি আসলে স্ববিরোধিতা নয়? এইখানেই চিন্তাচর্চার ক্ষেত্রের একটি বৃহৎ ধাঁধার সন্মুখীন হতে হয়। দেখা যায় যে, বৃহৎ ও মহৎ মানুষদের সকলেরই মধ্যে এমন কিছু বিরল গুণ থাকে যা মতবাদ-নিরপেক্ষ এবং যেগুলিকে মতবৈষম্যের সীমারেখা অতিক্রম করে সম্পূর্ণ পরস্পর-বিরুদ্ধ শিবিরে অবস্থান করতেও দেখা যায়। এই সব বিরল গুণের কাছে সকলেই মাথা নোয়াতে বাধ্য। যেমন সত্যনিষ্ঠা, শৌর্যবীর্য, বিশ্বাসের দৃঢ়তা, সংসাহস, আন্তরিকতা ইত্যাদি। এই সব গুণের ক্ষেত্রে মহৎ মানুষেরা তাঁদের ব্যক্তিত্বের ভেদ আর মতামতের ভেদ সমেত অস্তিত্বের সমভূমিতে বিরাজ করেন। আর সেই কারণেই দুই পরস্পর-বিরুদ্ধ মতের প্রবক্তাকে একই কালে শ্রদ্ধা জানাতে অসুবিধা হওয়ার কথা নয়, যদি তাঁদের মধ্যে কীর্তনীয় একাধিক গুণের সমাবেশ হয়। এই দৃষ্টিতে দেখলে একই কালে গান্ধীজী ও সুভাষচন্দ্রকে শ্রদ্ধা জানানো কেন সম্ভব বুঝতে কষ্ট হয় না এবং সময়ের তত্ত্বটিও অনুধাবন করা সহজ হয়।

যাই হোক, তারুণ্যের আদর্শটিকে শরৎচন্দ্র কেমনভাবে দেখেছেন, তাঁর তরুণের বিদ্রোহ ( ১৯২৯ ) বইটিকে কেন্দ্র করে তার উপর এক-নজর চোখ বুলনো যাক। প্রথমেই তরুণ সমাজের রাজনীতির সংস্রবে থাকার উচিত্য তিনি স্বীকার করে নিয়েছেন। তরুণের জাগরণকে তিনি দেশের রাজনীতির পক্ষে অপরিহার্য জ্ঞান করেছেন। আর শুধু রাজনীতি কেন, সমাজনীতি অর্থনীতি সর্ববিধ নীতির ক্ষেত্রেই তিনি তরুণ-শক্তির উদ্বোধন কামনা করেছেন। এটি একটি নতুন দৃষ্টিভঙ্গী, স্ববিরোধের উপরে তারুণ্যের, প্রাবীণ্যের উপরে নাবীণ্যের বিজয়-কেতন ওড়ানোর অপ্রাপ্ত সংকেত। স্বাধীনতার প্রকৃতি নির্দেশ করতে গিয়ে নবীনের পূজারী শরৎচন্দ্র বলেছেন—‘কিন্তু স্বাধীনতা শুধু কেবল একটা নাম মাত্রই ত নয়। দাতার দক্ষিণ হস্তের দানেই ত একে ভিক্ষার মত পাওয়া যায় না—এর মূল্য দিতে হয়। কিন্তু কোথায় মূল্য? কার কাছে আছে? আছে শুধু যৌবনের রক্তের মধ্যে সঞ্চিত। সে অর্গল যতদিন না মুক্ত হবে, কোথাও এর সন্ধান মিলবে না। সেই অর্গল মুক্ত করার দিন এসেছে। কোনক্রমেই আর বিলম্ব করা চলে না।’

বিপ্লবের সংজ্ঞা সম্বন্ধে পথের দাবী উপন্যাসের একাধিক স্থলে আলোচনা আছে। সেখানে সব্যসাচী দ্ব্যর্থহীন ভাষায় বলেছেন যে, বিপ্লব মানেই

রক্তারক্তি কাণ্ড নয়, বিপ্লব মানে একটা দ্রুত আমূল পরিবর্তন। তরুণের বিদ্রোহ বইতেও অনুরূপ ভাবের কথা আছে। অর্থহীন অকারণ বিপ্লবের নিষ্ফলতার উল্লেখ করে তার বিরুদ্ধে তরুণ সমাজকে সতর্ক করে দিয়ে শরৎ-চন্দ্র বলেছেন—‘বিপ্লবের সৃষ্টি মানুষের মনে, অহেতুক রক্তপাতে নয়। তাই ধৈর্য ধরে তার প্রতীক্ষা করতে হয়। ক্ষমাহীন সমাজ, প্রীতিহীন ধর্ম, জাতিগত ঘৃণা, অর্থনৈতিক বৈষম্য, মেয়েদের প্রতি চিত্তহীন কঠোরতা, এর আমূল প্রতিকারের বিপ্লব-পন্থাতেই শুধু রাজনৈতিক বিপ্লব সম্ভবপর হবে। নইলে অসহিষ্ণু অভিলাষ ও কল্লনার আতিশয্য তোমাদের ব্যর্থতা ছাড়া আর কিছুই দেবে না।’

পুরাতনপন্থীদের দৃষ্টিভঙ্গির সমালোচনা করে শরৎচন্দ্র বলেছেন—‘একটা কথা পুরোনোপন্থীদের মুখে শ্রুত করে প্রায়ই বলতে শোনা যায় যে, সেকালে এমনটি ছিল না। এখন চাষারা পর্যন্ত জামা পরে, পায়ে জুতো দিতে চায়, মাথায় ছাতা ধরে, তাদের মেয়েরা গায়ে সাবান মাখে, বাবুয়ানিতে দেশটা উচ্ছিন্নে গেল। প্রত্যুত্তরে তাদের এই কথাই তোমাদের বলা চাই যে, এই যদি সত্য হয় তো আনন্দের কথা। দেশ উচ্ছিন্নে না গিয়ে উন্নতির দিকে মুখ ফিরিয়েছে, তারই আভাস দেখা দিয়েছে। মানুষ যত চায়, ততই তার পাবার শক্তি বাড়ে। অভাব জয় করাই জীবনের সফলতা—তাকে স্বীকার করে তার গোলামী করাটাই কাপুরুষতা। একদিন যা ছিল না, তাকে অহেতুক বাবুয়ানি বলে ঝিকার দিয়ে বেড়ানোই দেশের কল্যাণ কামনা নয়।’

এই দীর্ঘ উদ্ধৃতিটি দেবার প্রয়োজন অনুভব করেছি এই কারণে, এক-কালের বঞ্চিতরা কিছু একটা ভোগের উপকরণ সংগ্রহের সামর্থ্য অর্জন করলেই তাকে বিলাসিতা আর ছোটলোকের বেয়াদর্প বলে চালাবার যে-মধ্যবিত্ত মানসিকতা আজও আমাদের মধ্যে ঘাপটি গেড়ে রয়েছে তার তীব্র প্রতিবাদ করা হয়েছে এই বক্তব্যে। এই প্রতিবাদের প্রয়োজন ছিল। অবস্থার চাপে বাধ্য হয়ে কৃচ্ছসাধন করাটাই ভাগ্যের পরাকার্য নয়।

পূর্বেই বলা হয়েছে যে, তরুণের বিদ্রোহ বইয়ের বাইরেও রাজনৈতিক বক্তব্যের প্রবন্ধ-নিবন্ধ আছে। ‘সত্যশ্রয়ী’ এইরূপ একটি প্রবন্ধ। এতে লেখক যৌবনের সংজ্ঞা নির্দেশ করেছেন এইভাবে—‘অতীত যার কাছে অতীতের বেশী নয়, সে যত বৃহৎ হোক, মুগ্ধ-চিত্ত-তলে তাকেই লালন করে

কালক্ষেপের অবসর যার নেই, যার বৃহত্তর আশা ও বিশ্বাস অনাগতের অন্তরালের কল্পনায় উদ্ভাসিত—সেই তো যৌবন ।’

সত্যের প্রকৃত স্বরূপ কী? এই প্রশ্নে জ্ঞানী ও ভাবুকদের মধ্যে মতপার্থক্য রয়েছে। কেউ কেউ বলেন সত্য অপরিবর্তনীয় ধ্রুব। কতকগুলি সত্য আছে, যার কখনও কোন নড়চড় হয় না। শরৎচন্দ্র এই দৃষ্টিভঙ্গীর সঙ্গে একমত নন। তাঁর কথা হলো—‘সত্যের কোন শাস্ত্রত সংজ্ঞা আমার জানা নেই। দেশ, কাল বা পাত্রের যে সম্বন্ধ বা relation তা দিয়েই সত্যের যাচাই হয়। দেশ-কাল-পাত্রের পরস্পরের সম্বন্ধের সত্যজ্ঞানই সত্যের স্বরূপ। একের পরিবর্তনের সঙ্গে অপরের পরিবর্তনও অবশ্যস্বাভাবী। এই পরিবর্তনকে বুদ্ধিপূর্বক মেনে নেওয়াই সত্যকে জানা ।’

শরৎচন্দ্রের এই বক্তব্যের সঙ্গে আজকের প্রগতিশীল বৈজ্ঞানিক দৃষ্টিকোণের যথেষ্ট সাদৃশ্য আছে। এতে তাঁর অগ্রসরমুখী মনেরই শুধু পরিচয় পাওয়া যায়।

## পরিশিষ্ট : শরৎচন্দ্রের আত্মকথা

“আমার শৈশব ও যৌবন ঘোর দারিদ্র্যের মধ্য দিয়ে অতিবাহিত হয়েছে। অর্থের অভাবেই আমার শিক্ষালাভের সৌভাগ্য ঘটেনি। পিতার নিকট হতে অস্থির স্বভাব ও গভীর সাহিত্যানুরাগ ব্যতীত আমি উত্তরাধিকারসূত্রে আর কিছুই পাইনি। পিতৃদত্ত প্রথম গুণটি আমাকে ঘরছাড়া করেছিল— আমি অল্প বয়সেই সারা ভারত ঘুরে এলাম। পরে পিতার দ্বিতীয় গুণের ফলে জীবন ভরে আমি কেবল সপ্ন দেখেই গেলাম। আমার পিতার পাণ্ডিত্য ছিল অগাধ। ছোট গল্প, উপন্যাস, নাটক, কবিতা—এক কথায় সাহিত্যের সকল বিভাগেই তিনি হাত দিয়েছিলেন, কিন্তু কোনটাই তিনি শেষ করতে পারেননি। তাঁর লেখাগুলি আজ আমার কাছে নেই—কবে কেমন করে হারিয়ে গেছে, সে কথা আজ মনে পড়ে না। কিন্তু এখন স্পষ্ট মনে আছে, ছোটবেলায় কতবার তাঁর অসমাপ্ত লেখাগুলি নিয়ে ঘন্টার পর ঘন্টা কাটিয়ে দিয়েছি। কেন তিনি এগুলি শেষ করে যাননি, এই বলে কত দুঃখই না করেছি। অসমাপ্ত অংশগুলি কি হতে পারে, ভাবতে ভাবতে আমার অনেক বিনীত রজনী কেটে গেছে। এই কারণেই বোধ হয় সন্তের বৎসর বয়সের সময় আমি গল্প লিখতে সুরু করি। কিন্তু কিছুদিন বাদে গল্প-রচনা অকেজোর কাজ মনে করে আমি অভ্যাস ছেড়ে দিলাম। তারপর অনেক বৎসর চলে গেল। আমি যে কোন কালে একটি লাইন লিখেছি, সে-কথা ভুলে গেলাম।

আঠার বৎসর পরে একদিন লিখতে আরম্ভ করলাম। কারণটা দৈব ষ্টিষ্টনারই মত। আমার গুটিকয়েক পুরাতন বন্ধু একটি ছোট মাসিক পত্র বের করতে উদ্যোগী হলেন। কিন্তু প্রতিষ্ঠাবান লেখকদের কেউই এই সামান্য পত্রিকায় লেখা দিতে রাজী হলেন না। নিরুপায় হয়ে তাঁরা কেউ কেউ আমাকে স্মরণ করলেন। বিস্তর চেষ্টায় তাঁরা আমার কাছ থেকে লেখা পাঠাবার কথা আদায় করে নিলেন। এটা ১৯১৩ সনের কথা। আমি নিম্নরাজী হয়েছিলাম। কোন রকমে তাঁদের হাত থেকে রেহাই পাওয়ার জগে আমি লেখা দিতেও স্বীকার হয়েছিলাম। উদ্দেশ্য, কোন রকমে একবার রেঙ্গুন পৌছতে পারলেই হয়। কিন্তু চিঠির পর চিঠি আর টেলিগ্রামের ভাড়া আমাকে অবশেষে সত্য নতাই আবার কলম ধরতে প্ররোচিত করল। আমি তাঁদের নবপ্রকাশিত ‘যমুনা’র জগ্য একটি ছোট গল্প পাঠালাম। এই গল্পটি প্রকাশ হতে না হতেই বাঙলার পাঠক সমাজে সমাদর লাভ করল। অম্মিও একদিনেই নাম করে বসলাম। তারপর আমি অদাবি নিয়মিত ভাবে লিখে আসছি। বাঙলাদেশে বোধ হয় আমিই একমাত্র সৌভাগ্যবান লেখক যাকে কোনদিন বাধার ধুর্ভোগ ভোগ করতে হয়নি।”



॥ ১২ ॥

## শিল্পের জগৎ

অপরাধেয় কথাশিল্পী শরৎচন্দ্র চট্টোপাধ্যায়ের শিল্পের জগৎ মূলতঃ বাংলার গ্রামজীবনকে কেন্দ্র করে আবর্তিত। বাংলার গ্রামের সঙ্গে তাঁর নিবিড় পরিচয় ছিল—জন্মসূত্রে এবং সহানুভূতিগত সূত্রে। যদিও তিনি জীবনের উত্তর-পর্ব মূলতঃ শহরেই অতিবাহিত করেছেন, প্রথমে রেঙ্গুন ও পরে কলকাতায়, তাহলেও বলা যায় শহর অপেক্ষা গ্রামই তাঁর মনোযোগের কেন্দ্রে অধিক প্রতিষ্ঠিত ছিল। সেই যে অতি বাল্যকালে বাংলার পল্লীর সঙ্গে তাঁর গভীর সৌহার্দ্য বন্ধন স্থাপিত হয়েছিল, সেই সৌখ্যবন্ধন পরে আর কখনও শিথিল বা নাদিন হয়নি। খুব সম্ভব পল্লীর প্রতি তাঁর সহজাত দরদ ও ভালবাসার জন্ম তিনি পরিণত বয়সেও একটা উল্লেখযোগ্য সময় শহরে না থেকে গ্রামেই বাস করেছেন। জীবনের শেষের দিকে অনেক দিন (১৯২৬-৩৮) হাওড়া জিলার রূপনারায়ণ নদ তাঁরস্থ সামতাবেড়-পানিত্রাস পল্লাতে বাস এ কথার সাক্ষ্য বহন করছে।

কিন্তু শরৎচন্দ্র যে চোখে বাংলার গ্রামকে দেখেছেন তা কিন্তু আমাদের দেশের পল্লীগতপ্রাণ ‘নষ্টালজিক’ লেখকদের চোখে দেখা থেকে বেশ কিছু ভিন্ন রকমের দেখা। শেষোক্ত শ্রেণীর লেখকেরা সচরাচর বাংলার পল্লীকে একটা আদর্শ জনপদরূপে কল্পনা করে আনন্দ পেতেন। তাঁদের অভ্যস্ত লেখনীতে গ্রাম প্রতিভাত হতো সুখ-সমৃদ্ধি প্রাচুর্য ও শান্তির আগাররূপে। ক্ষেতে সোনার ধানের ঐশ্বর্য, গোহালে ঘুঘের বগা, পুকুরে মাছের সমারোহের কল্পিত স্মৃতি স্মরণ করে প্রায়ই এই সমস্ত লেখকদের—তার মধ্যে কবি ও কথাসাহিত্যিক দুই বর্গের ব্যক্তিরাই আছেন—অন্তরে পিছনে ফেলে-আসা গ্রামের জন্ম সেকাতর দীর্ঘশ্বাস পড়তো। কিন্তু বলাই বাহুল্য, গ্রামের এই সমৃদ্ধি ও প্রাচুর্যের চিত্র যত না এঁদের অভিজ্ঞতার অন্তর্গত ছিল তার চেয়ে বেশী ছিল তাঁদের কল্পনায়। কল্পনার রঙীন তুলিকাপাতে বাংলার গ্রামকে বর্ণাঢ্য ভঙ্গিমায় অঙ্কিত করে এই সমস্ত লেখকের দল তাঁদের বাস্তব জীবনের

অতৃপ্তিকে ভুলে থাকার ও অবাস্তব চিত্রণ থেকে কাল্পনিক সন্তোষ লাভের একটা উপায় খুঁজে বার করেছিলেন। বাংলার গ্রাম যথার্থ যা নয় তা-ই তাকে ভেবে নিয়ে এঁরা নিজেকেও ভুলিয়েছেন, অপরকেও ভোলাবার চেষ্টা করেছেন।

কিন্তু শরৎচন্দ্র এই কৃত্রিম অদর্শায়নের ধার দিয়েও যাননি। তিনি যেহেতু ছিলেন রিয়ালিস্ট ধাতের শিল্পী সেই কারণে বাংলার গ্রামকে তিনি তাঁর ভালয়-মন্দে আলে-আঁধারিতে কালো ও ধলোতে মিলিয়েই উপস্থিত করেছেন। তাঁর শিল্পের পরিকল্পনায় যেমন বাংলার গ্রামের মানুষদের অপরিস্রব হৃদয়বস্তুর সম্পদের সম্মান পাই, তেমনি অশ্লীলকে সেই হৃদয়-বস্তাকে কাঁচিয়ে তোলবার জন্য গ্রামেরই অশ্লীল এক শ্রেণীর মানুষের মধ্যে কুটিলতা, কলহপ্রিয়তা, শত্রুতাবুদ্ধিরও আয়োজন বড় কম দেখি না। অর্থাৎ শরৎচন্দ্র গ্রামকে তার স্ব-স্বরূপে উপস্থিত করেছেন—তার ভালর দিকটা দেখাতে যেমন কার্পণ্য করেননি তেমনি মন্দের দিকটাও সমান নির্লিপ্ততায় হাজির করেছেন। বাস্তববাদী শিল্পীর এইটেই রীতি। নিরপেক্ষ সত্যনিষ্ঠায় হৃদয়ের ঐশ্বর্য ও দারিদ্র্য দুটোই পরিবেশন করতে তাঁর হাত কাঁপে না।

হৃদয়ের ঐশ্বর্য তুলে ধরার ক্ষেত্রে তিনি নারী-সমাজকে অগ্রাধিকার দিয়েছেন। হৃদয়বস্তায় নারীর এই অগ্রাধিকারের স্বীকৃতি অযৌক্তিক মনে হয় না। বাংলার গ্রামগুলি অশিক্ষায় ও কুশিক্ষায় জর্জরিত এবং বৃহত্তর পৃথিবীর আলোর স্পর্শ থেকে শোচনীয়রূপে বঞ্চিত হলেও তার সাধারণ নরনারীর মধ্যে, বিশেষ নারীর মধ্যে, এখনও যে কত প্রাণের সম্পদ নিহিত আছে তার পরিচয় দু'হাতে উজাড় করে ঢেলে দিয়েছেন শরৎচন্দ্র তাঁর গ্রাম-ভিত্তিক গল্প ও উপন্যাসগুলির ভিতর। দেবদাস, শুভদা, বিরাজবো, নিষ্কৃতি, অরক্ষণীয়া, পল্লীসমাজ, পণ্ডিতমশাই, মেজদিদি, বৈকুণ্ঠের উইল প্রভৃতি উপন্যাস এবং রামের সুমতি, বিন্দুর ছেলে, মামলার ফল, বিলাসী, অনুরাধা প্রভৃতি বড় ও ছোট গল্পগুলির কাহিনীবস্তুর মধ্যে নারীর এই হৃদয়ৈশ্বর্যের প্রমাণ অপরিস্রব ছড়িয়ে আছে। বলা হয় বাংলার গ্রামীণ নারীকুলের প্রতি তিনি কিঞ্চিৎ পক্ষপাত দেখিয়েছেন। কিন্তু এই পক্ষপাতের প্রত্যক্ষ অভিজ্ঞতাগত ভিত্তি আছে। গাঁয়েই জন্ম তাঁর এবং বালা ও কৈশোরের অনেকটা কালই তিনি গ্রামে কাটিয়েছিলেন। কাজেই গ্রামকে তাঁর খুব কাছে থেকে দেখার অবসর হয়েছিল। সেই নিকট-অভিজ্ঞতারই ফলজাত তাঁর এইসব নারীচিত্র।



কোনটাই রোমাণ্টিকতার পরকল। চে-খে এঁটে দেখা চরিত্র নয়। অবশ্য স্বীকার করতে হবে যে, শরৎচন্দ্রের সহজাত মানবপ্রীতি ও সমৃদ্ধ হৃদয়্যাবেগ এই সব বাস্তব চিত্রণের উপর এক ধরনের স্নিগ্ধতার প্রলেপ বুলিয়েছে, কিন্তু মানবপ্রেম আর হৃদয়্যাবেগের ঐশ্বর্য ছাড়া কে কবে বড় শিল্পী হতে পেরেছেন? শরৎচন্দ্রের অফুরন্ত হৃদয়্যাবেগ তাঁর শিল্পের স্ফূর্তির অনুরায় হয়নি বরং সহায়ক হয়েছে। তবে কখনও কখনও যথার্থ শিল্পোৎকর্ষের বাধক হয়েছে সে কথা মানতেই হবে। নারীর চোখের জলের বন্যাস্রোতের সঙ্গে কোন কোন বইতে অজানিতে মেলোড্রামার শৈবাল ভেসে এসেছে।

যাই হোক, শরৎচন্দ্রের দেখা ও দেখানো গ্রামের একটা সমাজতাত্ত্বিক জরীপ করলে মন্দ হয় না। তা থেকে বোঝা যাবে কেন তাঁর গ্রামের মানুষগুলির জীবনে মিশ্র আলো-ছায়ার লীলা, ভাল ও মন্দের অনিবার্য দ্বৈধতা। শরৎচন্দ্র যে-গ্রামকে তাঁর গল্প ও উপন্যাসগুলিতে চিত্রিত করেছেন সে-গ্রাম এই শতাব্দীর গোড়ার দিকের নিকষ সামন্ততান্ত্রিক ভূমি-বাবস্থার আশ্রিত নির্জীব হস্তশাস্ত্র্য নিরানন্দ গ্রাম। বেশীর ভাগই অজ-পাড়াগাঁ, কালাজুর-ম্যালেরিয়া রোগে বিশীর্ণ, কূপমণ্ডুকতায় জর্জরিত। বাইরের আলো-হাওয়া তাতে সামান্যই প্রবেশ করতে পায়, প্রবেশের কোন ছিদ্রপথও নাই। অদূরেই কলকাতা শহর (শরৎচন্দ্রের অঙ্কিত অধিকাংশ গ্রামই হাওড়া কিংবা হুগলী জিলায় অবস্থিত, অভ্যন্তর প্রমাণ থেকে সে কথা বোঝা যায়) কিন্তু কলকাতা শহরের কোন অগ্রসর রাজনৈতিক আন্দোলনের বার্তা অথবা প্রগতিশীল সমাজ-সংস্কার আন্দোলনের জাগরণ-ধ্বনি ওই সব এঁদো গ্রামের নিস্তরঙ্গ জীবনে কোন ঢেউ তোলে না। এমনকি বঙ্গভঙ্গের মত এতবড় একটা আলোড়ন-সৃষ্টিকারী আন্দোলনের সামান্য রেখাপাতেরও প্রমাণ নেই ওই সব গল্প-উপন্যাসের পরিবেশের ভিতর। এতে শরৎচন্দ্রের রাজনৈতিক চেতনার অভাব বোঝায় না (তিনি যে কতখানি রাজনীতি-সচেতন ছিলেন তার প্রমাণ আছে তাঁর পথের দাবী উপন্যাসে ও বিবিধ প্রবন্ধাবলীতে, বিশেষ করে তরুণের বিদ্রোহ প্রবন্ধ গ্রন্থে); বোঝায় এই কথা যে, তিনি তাঁর সময়কার চোখে-দেখা বাংলার গ্রামকে তার অবিকৃত স্বরূপেই উপস্থিত করিতে চেয়েছিলেন, তার উপর কৃত্রিমতার পোছ চড়াতে যাননি। কিন্তু গ্রাম অনুন্নত আর শিক্ষাদীক্ষা-সময়চেতনাবিহীন হলেও তার কিছু কিছু মানুষের ভিতর যে প্রাণের ঐশ্বর্যের অভাব ছিল না এটা তিনি প্রতিপাদন করতে

চেয়েছিলেন। আর এ কাজে তিনি প্রভূত পরিমাণে সফল হয়েছিলেন, শরৎ-সাহিত্যের পাঠকমাত্রেই সে কথা জানেন।

শরৎ-বণিত গ্রামে জমিদারের দোর্দণ্ড প্রতাপ। চিরস্থায়ী ভূমি-ব্যবস্থার আওতায় লালিত এই সব জমিদার নিজ নিজ এলাকার দণ্ডমুণ্ডের এক একজন কেষ্টবিশ্ব বিশেষ। এর নজির স্বরূপ পল্লীসমাজের বেণী ঘোষাল, দেনা-পাণ্ডনার জীবানন্দ চৌধুরী, মহেশ গল্লের শিবচন্দ্র রায়, বামুনের মেয়ের গোলক চাটুজ্যে প্রভৃতি চরিত্রের উল্লেখ করা যেতে পারে। এদের অত্যাচার ও শোষণের সহায় রূপে উপস্থিত যাজকতন্ত্রের প্রতিনিধি স্বরূপ কতকগুলি শাস্ত্রব্যবসায়ী কুচুটে ব্রাহ্মণ; যেমন পল্লীসমাজের গোবিন্দ গাঙ্গুলী ধর্মদাস ও পরান, দেনা-পাণ্ডনার শিরোমণি, মহেশ গল্লের তর্করত্ন ঠাকুর। প্রত্যেকেই মনুষ্যত্বহীনতার এক একটি জ্বলজ্বালন্ত প্রতিমূর্তি। অত্যাচারী জমিদার আর কুচক্রী পুরোহিতেই শোষণের বৃত্ত পূর্ণ হয়নি, সেই সঙ্গে এসে যোগ দিয়েছে সুদখোর মহাজনের অপরিমিত অর্থলালসার অক্টোপাশ-বন্ধন। এই তিনের শাঁড়াসি চাপে গ্রামজীবন অতিমাত্রায় ক্লিষ্ট, পীড়িত ও অবসন্ন। রাজতন্ত্র, যাজকতন্ত্র আর বণিক্তন্ত্রের গ্রাম্য সংস্করণের একত্র সমাহার বাংলার গ্রামকে প্রায় ধ্বংসের কিনারায় এনে ফেলেছে—এই ছবিই শরৎচন্দ্র দেখিয়েছেন তাঁর পল্লাভিত্তিক রচনাবলীর মাধ্যমে।

বঙ্কিমচন্দ্রের সঙ্গে শরৎচন্দ্রের এই এক মৌলিক পার্থক্য যে, বঙ্কিমচন্দ্র তাঁর অনেকগুলি উপন্যাসেই জমিদারকে তাদের নায়করূপে অঙ্কিত করেছেন। বয়সে তারা যুবা এবং বহু নায়কোচিত গুণে ভূষিত। পক্ষান্তরে, শরৎচন্দ্রের অঙ্কিত জমিদারেরা অমিকাংশই প্রৌঢ় কিংবা বৃদ্ধ এবং চরিত্রায়ণের ক্ষেত্রে স্বভাবতঃই পার্শ্ব-ভূমিকায় স্থাপিত। অত্যাচার ও শোষণের তারা এক একটি নিষ্ঠুর যন্ত্রবিশেষ। কাজেই এই একটা মূল জায়গায় বঙ্কিমচন্দ্র আর শরৎচন্দ্রের মধ্যে প্রভূত পার্থক্য বিদ্যমান। বঙ্কিমচন্দ্রে জমিদারী ব্যবস্থার নবযৌবন; শরৎচন্দ্রে জমিদারী ব্যবস্থার প্রৌঢ়ত্ব। জমিদারী ব্যবস্থা দিন থেকে দিনে বাংলা-দেশে কতটা ক্রুরতামশ্রিত আর নিষ্ঠুর হয়ে উঠেছিল বঙ্কিম থেকে শরৎ সাহিত্যের বিবর্তনের মধ্যে তার একটা ছক ধরা পড়বে। জমিদারী ব্যবস্থাকে ঘিরে বঙ্কিম-যুগের রোমাণ্টিক স্বপ্ন-কুয়াশার আবরণ শরৎচন্দ্রের যুগে একেবারেই খসে গিয়েছিল—চুন-বালির পলস্তারার ভিতরকার হাঁ-করা ইট বাইরে

বেরিয়ে পড়েছিল। অল্প অনেক দিকের মত এই দিক দিয়েও শরৎচন্দ্রের বাস্তবতা অগ্রসর চিন্তা ভাবনার দ্যোতক। তিনি জমিদারী ব্যবস্থার ক্ষয়িষ্ণুতাকে খুব ভাল করেই এঁকে গিয়েছিলেন।

কিন্তু আশ্চর্যের কথা এই যে, এমন যে অনগ্রসর অনুন্নত পশ্চাৎপদ গ্রাম তারই ভিতর কত স্নেহশীল। মমতাময়ী সেবাপরায়ণা মাতৃহৃদয়া নারীর সন্ধান তিনি পেয়েছেন। তাদের চরিত্র তিনি তাঁর প্রাণের সমস্ত দরদ ঢেলে এঁকেছেন। এই এঁদো ডোবা সদৃশ গ্রামগুলির মধ্যে এমন অফুরন্ত হৃদয়ের সম্পদ লুকিয়ে ছিল—এ শরৎচন্দ্রের আগে কে কবে ভাবতে পেরেছিল। পাতিব্রত্যের পরাকর্ষ্য প্রদর্শনে বিরাজ বৌ ও অন্নদাদিদি (শ্রীকান্ত প্রথম পর্ব); স্নেহশীলতায় নারায়ণী (রামের সুমতি-), বিন্দুবাসিনী (বিন্দুর ছেলে), গঙ্গামণি (মামলার ফল), সিদ্ধেশ্বরী (নিষ্কৃতি), হেমঙ্গিনী (মেজদিদি); ধরিত্রীকল্প সহিষ্ণুতায় শুভদা (শুভদা); ক্ষমাশীলতায় (সরযু); সেবাপরায়ণতায় মাধবী (বৎসদিদি) ও মৃণাল (গৃহদাহ); অত্যায়ে প্রতিরোধে সুন্দা (শ্রীকান্ত তৃতীয় পর্ব) ও পোড়াকাঁঠ ভামিনী (অরক্ষণীয়া); অপক্ষপাত ন্যায়পরায়ণতায় বিশ্বেশ্বরী (জ্যাঠাইমা, পল্লীসমাজ); স্বামী পরিত্যক্তা হয়েও স্বামিত্বের সংস্কারের কাছে অনিবার্যরূপে আত্মসমর্পিতা অথচ মর্গদাপরায়ণা কুসুম (পণ্ডিত মশাই) ও ষোড়শা (দেনা-পাওনা)—কত নাম করল। গ্রামের পশ্চাৎপদতার পৃষ্ঠপটে এই নারী চরিত্রগুলি যেন আরও মহীয়সী হয়ে ফুটে উঠেছে। অঙ্কনের এতই ঔজ্জ্বল্য যে এক এক সময় এমন অবৈজ্ঞানিক কথা পর্যন্ত ভাবতে ইচ্ছা হয় যে, সমাজ-ব্যবস্থার ওই সমর্থনের অযোগ্য অবস্থানই যেন শরৎ-অঙ্কিত নারী চরিত্রগুলির হৃদয়ের মহিমা আর ঐশ্বর্যের প্রকটনের এত সহায়ক হয়েছে।

আসলে ব্যাপারটা ঠিক তা নয়। শরৎচন্দ্র গ্রামীণ অনগ্রসরতার পরি-প্রেক্ষিতে নারীচরিত্রের মহিমা প্রকটিত করেছেন সত্য কথা; কিন্তু তার মানে এ নয় যে, তিনি গ্রামীণ অনগ্রসরতাকে সমর্থন করতে চেয়েছেন কিংবা তার সপক্ষে যুক্তি জুগিয়েছেন। বরং তাঁর অভিপ্রায় ছিল সম্পূর্ণ ভিন্ন। আমাদের সমাজে নারী নিতান্ত অনাদৃত-অবহেলিত-বিড়ম্বিতার জীবন যাপন করে। মনুর বিধান চালিত এ সমাজে পুরুষই সমস্ত মূল্যবোধের নিয়ন্তা এবং তার স্বার্থেই বিবিধ প্রকারের নিয়মবিধি রচিত। শাস্ত্রগুলিতে নারীকে দেবীরূপে অনেক স্তব-স্তুতি করা হলেও কার্যতঃ তাকে দাসার অধম জীবনযাপনে আমরা

বাধ্য করি। নারীর কাছ থেকে প্রভূত পরিমাণ সেবা আদায় এবং নারীকে ভোগের উপকরণরূপে ব্যবহার—এই দুই ভূমিকা ছাড়া নারীর আর কোন ভূমিকা যেন স্বীকৃতই নয় পুরুষের চোখে।

নারীর প্রতি আচরিত এই দর্শনের অঙ্গায় শরৎচন্দ্রের সংবেদনশীল অন্তরে খুবই বেজেছিল। তাই তিনি তাঁর প্রাণের সমস্ত আবেগ ঢেলে নারী চরিত্রগুলি একেছিলেন। এমনকি সমাজে যে সকল নারী নীতিশ্রুতিতে বলে ধিকৃতা এবং সেই কারণে সমাজের স্বীকৃত গণ্যের বাইরে নিষ্কিন্দা, তাদেরও তিনি ঘৃণা করেননি, তাদের স্থলন পতনের মধ্যেও তাদের নারীত্বের মহিমাকে প্রতিষ্ঠিত করেছেন। এমনকি কয়েকটি চরিত্র হলো চন্দ্রমুখী (দেবদাস), বিজলী (আঁধারে আলো), সাবিত্রী (চরিত্রহীন) ও রাজলক্ষ্মী (শ্রীকান্ত গ্রন্থপরিচয়)। এসব চরিত্রায়ণ ভিন্ন কতকগুলি অশ্রুধরনের স্বাধীন চরিত্রও তিনি একেছেন, যারা ব্যক্তিতে বলিষ্ঠা, ইচ্ছার স্বাতন্ত্র্যে তেজস্বিনী। যেমন অভয়া (শ্রীকান্ত দ্বিতীয় পর্ব), বিজয়া (দত্তা), কিরণময়ী (চরিত্রহীন), কমল (শেষ প্রশ্ন), সুমিত্রা (পথের দাবী) প্রভৃতি। এগুলি অবশ্য গ্রামাঞ্চল নারী-চরিত্র নয়, তবু ভারতীয় নারী তো বটে। আর সর্বক্ষেত্রে নারীর মনুষ্যত্বকেই তিনি বড় করে দেখিয়েছেন, দুই একটি ছোটখাট চরিত্র ছাড়া নারীকে হেয় করে আঁকেননি কোথাও। জটিল-কুটিল-কুচক্রী পুরুষের তুলনায় শরৎ-সাহিত্যে এমনিধারা স্বভাবের নারীর সংখ্যা খুবই কম।

নিশ্চয়ই এ ঘটনার কিছু তাৎপর্য আছে। খুব সম্ভব শরৎচন্দ্রের মনোগত বাসনা ছিল এই দেখানো যে, এই পুরুষশাসিত অত্যাচারপীড়িত অসম সমাজেই যখন নারীর হৃদয়ের এত ঐশ্বর্য, অবিচার ও শোষণমুক্ত সমসমাজে না জানি নারীর মহিমা আরও কত সুউচ্চ হতে পারতো। সমাজের এত পশ্চাদ্বেশী অবস্থা সত্ত্বেও নারী তার স্বাভাবিক হৃদয়বৃত্তিকে খোঁসায়নি, অত্যাচার নিষ্পেষণেও তার স্নেহ-মমতা-প্রেম-প্রীতি-সেবার ইচ্ছা অবদমিত হয়নি। তাই যদি হয় তো অত্যাচারমুক্ত উন্নত সমাজে আরও কত দিকেই না তার চরিত্রের বিস্তার হতে পারতো! আরও কত ভাবেই না তার অধিকারের বিস্তৃতি ঘটতে পারতো। শরৎ-সাহিত্য বাংলার নারীজাতির মর্মকথার দর্পণ স্বরূপ। এমন করে আর কোন লেখক বাংলার নারীকুলকে মর্যাদা দিয়েছেন কিনা সন্দেহ।

শরৎচন্দ্রের পল্লীভিত্তিক রচনার জগৎ ছেড়ে নগরভিত্তিক গল্প-উপন্যাসের

জগতে এলে দেখতে পাই, এ সব রচনায় বুদ্ধির ঔজ্জ্বল্য যত প্রখরভাবে প্রকাশ পেয়েছে, শিল্পরসের স্ফূর্তি ততদূর সার্থকতায় প্রকাশিত হতে পারেনি। শিল্পোৎকর্ষের বিচারে শরৎচন্দ্রের পল্লীভিত্তিক রচনাগুলি নিঃসন্দিক্ধভাবে সমধিক কৃতিত্ব দাবী করতে পারে। নিষ্কৃতি বা পল্লীসমাজ বা দেনা-পাওনা তাঁর যে কোন নগরভিত্তিক রচনা অপেক্ষা শ্রেষ্ঠ, যদিও সমালোচকদের একাংশের মত হলে। এই যে সব জড়িয়ে বিচার করলে একটি নিটোল শিল্পকর্ম-রূপে গৃহদাহ উপন্যাসটিকেই শ্রেষ্ঠত্বের মর্যাদায় ভূষিত করতে হয়। এই গৃহদাহের যথার্থতা-অযথার্থতা নিয়ে বিতর্কে প্রবৃত্ত হতে চাইনে। তবে সবিনয়ে একটা কথা বলতে চাই যে, মস্তিষ্ক অপেক্ষা হৃদয়বৃত্তির উদ্ঘাটনেই কথাশিল্পী হিসাবে শরৎচন্দ্রের উৎকর্ষ বেশী প্রকাশ পেয়েছে। এরকম ঘটবার একটা কারণ সম্ভবতঃ এই যে, গ্রামের সঙ্গে তাঁর যেমন নিবিড়-অন্তরঙ্গ-ঘনিষ্ঠ পরিচয় ছিল শহরের সঙ্গে তেমন ছিল না। যদিও তথ্যের দিক থেকে এক কথা অকট। যে, শহরেও তাঁর যুবা, প্রৌঢ় ও বার্ধক্য-কবলিত জীবনের অনেকগুলি বৎসর অতিবাহিত হয়েছে। গ্রামেই ছিল তাঁর চৈতন্যের মূল শিকড়। সেই যে ছোটবেলায় জন্ম ও শৈশবের বন্ধনসূত্রে গ্রামকে তিনি অত্যন্ত আপন কবে পেয়েছিলেন, সেই গভীর নৈকট্যচেতনা আর সারা জীবনে ঘোচেনি। বিচিত্র অবস্থান্তর আর বিচিত্রতর অভিজ্ঞতার ব্যাপ্তির মধ্যেও তাঁর বাল্যের দেখা গ্রাম তাঁর অস্তিত্বের মর্মমূলে সংসক্ত হয়ে ছিল। চেতনার এই ধরনের সংলগ্নতা এক প্রকারের fixation, তার হাত থেকে কারও পার পাবার উপায় নেই। চৈতন্যের সংসক্তি বা সংলগ্নতার বিষয়ের ভেদ হতে পারে, কিন্তু কোন-না-কোন বিষয়বস্তুতে চেতনা সংসক্ত হয়ে থাকবে এইটেই নিয়ম। শরৎচন্দ্রের বেলায় দেখা যায় তাঁর চৈতন্য পরিণত জীবনেও গ্রামে সংলগ্ন হয়ে ছিল, তাঁর রেঙ্গুন প্রবাস বা জাভা বোর্নিও সুমাত্রা পরিভ্রমণের পরিপক্ক অভিজ্ঞতা এ ক্ষেত্রে কোনও কাজে লাগেনি। শরৎচন্দ্রের গ্রামভিত্তিক রচনাগুলি কেন এত জনচিত্তহারী, শহরের পটভূমিকায় রচিত উপন্যাসগুলি তাদের স্বীকৃত মননশীলতা আর বৈদগ্ধ্য সত্ত্বেও কেন জনমনে গ্রামীণ রচনাগুলির মত দাগ কাটতে পারেনি—তার মূল উপরের ব্যাখ্যার মধ্যে খুঁজে পাওয়া যাবে বলে মনে করি।

তবে একটা কথা স্বীকার করতেই হবে যে, শরৎচন্দ্র যতগুলি বিদ্রোহী চরিত্র সৃষ্টি করেছেন—কি নারী কি পুরুষ—তার প্রায় সবই নাগরিক

উপন্যাসগুলির অন্তর্গত। যেমন অভয়া, কিরণময়ী, কমল, সুমিত্রা, ইন্দ্রনাথ, রাজেন, সব্যসাচী। এরকম হতেই হবে। বিদ্রোহ বা প্রতিবাদ হৃদয়ের ধর্ম নয়, মস্তিষ্কের ধর্ম। ভাব বা আইডিয়া তার মূল সঞ্চালিকা। শক্তি রূপে কাজ করে। এবং যেহেতু শরৎচন্দ্রের নগরভিত্তিক উপন্যাসগুলিতে মস্তিষ্কের জিয়া বেশী, মস্তিষ্কজীবিতা বেশী, স্বভাবতঃই সেই মস্তিষ্কজীবিতার হাত ধরে বিদ্রোহী বা প্রতিবাদী চরিত্রগুলির আবির্ভাবের পথ অধিকতর সুগম হয়েছে। গ্রামে এ জিনিস তেমন সম্ভব হতো না, তার কারণ গ্রামের পরিবেশ গতানুগতিক, সেই পরিবেশে লালিত মানুষগুলির মনের ধরনও বেশ কিছু পরিমাণে গতানুগতিক। সনাতন ধ্যান-ধারণারই সেখানে কমবেশী আধিপত্য। শরৎচন্দ্র মূলতঃ গ্রামের মধ্যবিত্ত আর নিম্নবিত্ত হিন্দু ভদ্রলোক শ্রেণীর নরনারীর ছবিই বেশা এঁকেছেন। বলা নিষ্প্রয়োজন যে, এই কাঠামোর চরিত্রে বিদ্রোহের আকৃতির সুযোগ তেমন নেই। তিনি মধ্য ও নিম্নবিত্ত হিন্দু সমাজের চিত্র-চিত্র না এঁকে যদি চার্বী সমাজের চিত্র ব্যাপকভাবে পরিবেশন করতেন তাহলেও না হয় অর্থনৈতিক সংগ্রামের সূত্রে বিদ্রোহ, প্রতিবাদ বা প্রতিরেধের ছবি ফুটিয়ে তোলার কিছু অবকাশ থাকতো। কিন্তু সে পথে তিনি তেমন পা বাড়াননি। একমাত্র পল্লীসমাজ, দেনা-পাওনা, জাগরণ প্রভৃতি উপন্যাস এবং মহেশ গল্লে ছাড়া কৃষকনিপীড়নের চিত্র তাঁর লেখনীতে পরিবেশিত হয়নি। বিদ্রোহ বিপ্লব প্রতিবাদ বা প্রতিরোধের কথা স্বাভাবিক কারণেই তাঁর গ্রামান্ত্রিত বইগুলির কাহিনী-বৃত্তের ভিতর অনুজ্ঞ থেকে গেছে।

এই অবশ্য করণীয় কার্যটি তিনি করেছেন তাঁর নগরান্ত্রিত উপন্যাসাবলীর কাহিনীর সাহায্যে। পথের দাবীর সব্যসাচী চরিত্রের কথা ধরা যাক। সব্যসাচী ইংরেজদের ঘোরতর শত্রু এবং এ দেশ থেকে সশস্ত্র বিপ্লবের পন্থায় ইংরেজ বিতাড়নে বদ্ধপরিকর। এ দেশের জাতীয়তাবাদী নেতৃবর্গের মধ্যবিত্তসুলভ আবেদন-নিবেদন-সম্মল রাজনৈতিক কর্মসূচীর সার্থকতায় তার এক তিল আস্থা নেই, প্রকৃতপক্ষে যে কোন নিয়মতান্ত্রিক আন্দোলনেরই সে একজন আপসহীন সমালোচক। সে বিপ্লবী কর্মপন্থায় বিশ্বাসী এবং দেশে দেশে তার বৈপ্লবিক কর্মকাণ্ডের আয়োজন বিস্তৃত। একাধিক বিদেশী রাষ্ট্র থেকে অস্ত্র সংগ্রহ করে তার সাহায্যে আকস্মিক অভ্যুত্থান ঘাট্টিয়ে সে এদেশ থেকে ইংরেজ উৎখাতে প্রতিজ্ঞাবদ্ধ। এমন একটি দুর্ধর্ষ চরিত্রের আদল

শহরজীবনের পটভূমিতেই কল্পনা করা যায়, গ্রামের পরিপ্রেক্ষিতে যায় না। কিংবা কিরণময়ী চরিত্রের কথা ভাবা যাক। কী অসাধারণ ধীশক্তি-শালিনী স্বাধীনচিত্তবৃত্তিসম্পন্ন নারী চরিত্র। গ্রামের কাঠামোয় এ রকম প্রথরবুদ্ধিদীপ্ত স্বাতন্ত্র্যময়ী নারীর কথা কল্পনাই করা যায় না। কিরণময়ী শাস্ত্র মানে না, সে ঈশ্বরের অস্তিত্বে অবিশ্বাসিনী, ভারতবর্ষের সনাতন ঐতিহ্য ও আদর্শের প্রতি তার কণামাত্র শ্রদ্ধা নেই, এমনকি প্রচলিত নীতিবোধেরও সে বড় একটা ধার ধারে না। তার আচরণই এ কথার প্রমাণ। কিন্তু এমন যে অসামান্য স্বাধীন নারী, সে কিন্তু শেষ রক্ষা করতে পারেনি। সে নিজের ভারে নিজে ভেঙে পড়েছে। শরৎচন্দ্র দেখিয়েছেন কিরণময়ীর বিদ্রোহিনী সত্তার তলায় তলায় ভালবাসার জন্ম একটা প্রবল পিপাসা ছিল এবং সে পিপাসার পরিতৃপ্তির জন্ম সে যে কোন প্রকার ত্যাগ স্বীকার ও কষ্টবরণে প্রস্তুত ছিল। একদিকে বিদ্রোহের বৈনাশিক প্রবৃত্তি, অন্যদিকে ভালবাসার ধূন্দনায় আবেগ—এই দুই পরস্পরবিরোধী প্রক্ষেপের ভিতর সামঞ্জস্য ঘটতে না পারার দরুন কিরণময়ীর জীবনে ট্রাজিডি ঘটলো—কিরণময়ী পাগল হয়ে গেল। শরৎচন্দ্র যে কত নিপুণ মনস্তাত্ত্বিক শিল্পী কিরণময়ীর পরিণাম চিত্রণে তার অসংশয় পরিচয় পাওয়া যায়। কিরণময়ীর উন্মাদাবস্থা প্রাপ্ত হওয়াটা লেখক কর্তৃক বাইরে থেকে চাপানো কোন আরোপিত পরিণাম নয়, কিরণময়ীর স্বভাবেরই স্ফায়সঙ্গত প্রত্যাশিত পরিণতি। এক্ষেত্রে লেখক শিল্পের নিজস্ব নিয়মকেই অনুসরণ করেছেন, সমাজ শাসনের দণ্ডভাব নিজের হাতে গ্রহণ করতে যাননি। বাস্তববাদী লেখককে সমাজ শাসনের রাশ আপন হাতে তুলে নিলে চলে না, তাঁকে বাস্তববাদেব সক্রিয় ঝোঁকটাকেই বিশ্বস্ততার সঙ্গে স্বীকার কবে নিতে হয়। শরৎচন্দ্রের শিল্পকর্মে এমনতর বাস্তবনিষ্ঠার ছবিই আমরা পাই।

## ॥ ১৩ ॥

### পল্লীচিত্র

পূর্ববর্তী প্রবন্ধে আমরা দেখিয়েছি শরৎ সাহিত্যে বাংলা র পল্লী প্রতিভাত হয়েছে তার মিশ্র রূপে। একদিকে শরৎচন্দ্র বাংলার পল্লীর সাধারণ নরনারীর হৃদয়সম্পদের ডালি উজাড় করে ঢেলে দিয়েছেন, অন্যদিকে বাংলার পল্লীর জনসাধারণের একাংশের কুচক্রা কুটিল বিদ্বেষ ও অভিসন্ধি-পরায়ণ রূপটিকেও নির্মোহ নগ্নতায় ফুটিয়ে তুলেছেন। শরৎচন্দ্রের দৃষ্টিতে বাংলার পল্লী তাব ভালয়-মন্দে আলো-অঁধারিতে পুণ্য ও পাপে একটা দ্বৈত সত্ত্বয় অধিষ্ঠিত হয়েছে। প্রতি মানুষের মধ্যেই কম বেশী দ্বৈত সত্ত্বা বিরাজ করে : সেটা যদি এক মানবীয় ব্যক্তিক জৈবসত্ত্বার স্তরে সত্য হতে পারে তবে অনেক মানুষের সমষ্টি এক সামাজিক জৈবসত্ত্বার স্তরেই কেন না সত্য হবে ?

বাংলার পল্লীকে তার এই বাস্তব স্ব-স্বরূপে দেখানোর একান্ত প্রয়োজন ছিল, আর শরৎচন্দ্রই সেই প্রয়োজনটি সিদ্ধান করে গেছেন সবার চেয়ে সার্থক-ভাবে। শরৎচন্দ্রের আগে বাংলা সাহিত্যে বাংলার পল্লীর যে রূপ দেখতে পাই তা তার আদর্শায়িত রূপ—বৈষয়িক ক্ষেত্রে সুখশান্তি সমৃদ্ধি প্রাচুর্য আর মানষিকতার ক্ষেত্রে সরলপ্রাণতা প্রতিবেশিপরায়ণতা ধর্মভী রুতা প্রেমপ্রীতি আতিথেয়তা ইত্যাদি বহুবিধ সদৃশ্যের আধারহুলরূপে কল্পিত হয়েছে বাংলার সেই পল্লী। কম বা বেশী পরিমাণ ঝোঁকের তারতম্য অনুযায়ী বঙ্কিমচন্দ্র থেকে শুরু করে শিবনাথ শাস্ত্রী, দামোদর মুখোপাধ্যায়, পণ্ডিত সুরেন্দ্রমোহন ভট্টাচার্য, রায়-পরিবার খ্যাত সতীশচন্দ্র চক্রবর্তী, পণ্ডিত নারায়ণ ভট্টাচার্য, জলধর সেন, ইস্তক রবীন্দ্রনাথ পর্যন্ত গ্রামের এই সুখ প্রাচুর্যভরা স্বপ্নিল (idyllic) রূপেরই সমাবেশ দেখতে পাই বাংলা কথাসাহিত্যের বিস্তৃত প্রাঙ্গণ জুড়ে অনেক কাল পর্যন্ত একাদিক্রমে। ব্যতিক্রম ছিলেন শুধু তারকনাথ গঙ্গোপাধ্যায়। তিনি তাঁর স্বর্ণলতা উপন্যাসে বাংলার পল্লীর কল্পিত সৌন্দর্যের ভাবের কুয়াশার পর্দা নির্মম হাতে ছিঁড়ে দিয়েছেন।

আর এক উল্লেখযোগ্য ব্যতিক্রম শরৎচন্দ্র। বাংলার পল্লীকে নিয়ে আমাদের কথাসাহিত্যিকদের ও একশ্রেণীর কবিদের আত্যন্তিক গৃহগত-



প্রাণতার অভ্যাস শরৎচন্দ্রের লেখনীতে প্রশ্রয় পায়নি। বাংলার গ্রাম বলতেই আমাদের চোখে একদা ভেসে উঠত মাঠে সোনার ধানের তরঙ্গ, গোহালে হুধের বগা, পুকুরে মাছের ছড়াছড়ি, বার মাসে তের পর্বণ, চণ্ডীমণ্ডপ-নাট্যমন্দির-দোলমঞ্চ ইত্যাদি। সেটা যে সত্যের এক দিক মাত্র এবং সত্যের অল্প একটা দিককে আবৃত করবার কৌশল—শরৎচন্দ্রের বাস্তববাদী দৃষ্টিতে সেকথা যেমনভাবে ধরা পড়েছে এমন বোধহয় আর কারও দৃষ্টিতে নয়। ছেড়ে-আসা গ্রামকে ঘিরে আমাদের মনের নন্দ্যালজিক ভাবালুতার সংস্কারকে তিনি সজ্ঞানে আঘাত করেছেন। গ্রামে ভালও আছে আবার মন্দও আছে; সচ্ছলতাও আছে আবার চরম অভাবও আছে এবং অব্যবসায়ী সম্মিশ্রিত সর্বব্যাপক। ভালবাসা প্রেম প্রতি মমতা স্নেহ বাৎসল্য সেবা করুণার নিদর্শন যেমন অটল ছড়িয়ে আছে গ্রামের দবদালান থেকে কুঁড়েঘর পর্যন্ত সর্বত্র, তেমনি কুচুটেপনা তিসাবী আব মতলবা বুদ্ধি মামলা-মোকদ্দমায় পরকে জ্বল করার অশুচিত ক্ষুধা দাঙ্গাবাজি প্রভৃতি বাসনের চর্চারও কমতি নেই তার আনাচে-কানাচে। শরৎচন্দ্র গ্রামের এই অবিসম্বাদা মিশ্র রূপেরই রূপকার—গ্রামকে অবলম্বন করে একরঙা একাক্ষী আদর্শবাদী ভাবালুতায় নিজেকে বিহ্বল হতে দেননি তিনি কখনও।

শরৎচন্দ্রের পল্লী চিত্রের দ্বিতীয় লক্ষণ এই যে, গ্রাম সমাজেব যেটা। মধ্যস্তর, অর্থাৎ মধ্যবিত্ত ও স্বল্পবিত্ত স্তর, সেই অংশের নরনারীদের আশা-আকাঙ্ক্ষা অভাব-অভিযোগ গুণ্ধ-বেদনার উপরেই তিনি তাঁর দৃষ্টি মূলতঃ কেন্দ্রীভূত করেছেন, যাকে বলে সমাজের একেবারে উপর-তলা অথবা সমাজের একেবারে নীচুতলা। তার কোনটিকেই তিনি তাঁর রচনার উপজীব্য করেননি। উচ্চ ভূম্যধিকারী সমাজের মানুষের জীবনচিত্র কখনও কখনও তাঁর লেখনী উকিঝুঁকি না দিয়েছে এমন নয় (যেমন দেনা-পাওনার জীবনন্দ চৌধুরী, জাগরণ-এব অকুস্থলে অনুপস্থিত ভূস্বামী রে সাহেব, বিপ্রদাস উপন্যাসের বিপ্রদাস প্রমুখ), কিংবা চাষী সমাজের মানুষের শোচনীয় দৈন্য আর শোষণের চিত্রও যে তিনি না এঁকেছেন এমন নয় (যেমন মহেশ গল্পের গফুর জেলা, পল্লীসমাজ-এর পীরপুরের মুসলমান প্রজার দল, অথবা দেনা-পাওনার ভূমিহীন ভূমিজ সম্প্রদায়ের লেঠেলগণ); কিন্তু এগুলি শরৎ-সাহিত্যে ব্যতিক্রম-চিত্র, তাঁর মূল অভিনিবেশ গ্রাম সমাজের মধ্যবর্তী স্তরকে আশ্রয় করে আবর্তিত হয়েছে বরাবর। তাঁর পল্লীভিত্তিক প্রায় সব কয়টি গল্প উপন্যাস

রচনাতেই দেখতে পাই মধ্যবিত্ত শ্রেণীর নরনারীর আনাগোনা, খুব কম ক্ষেত্রেই তাঁর দৃষ্টি মধ্যবিত্ত শ্রেণীর এপাশে বা ওপাশে হেলেছে। কাশীনাথ, শুভদা, দেবদাস, চন্দ্রনাথ, বিরাজ বো, মেজদিদি, বৈকুণ্ঠের উইল, নিষ্কৃতি, বামুনের মেয়ে, পণ্ডিতমশাই, অরক্ষণীয়া, পল্লীসমাজ প্রভৃতি উপন্যাস এবং রামের সুমতি, বিন্দুর ছেলে, হরিলক্ষ্মী, অনুরাধা প্রভৃতি গল্প সর্বত্র এ কথার প্রমাণ মেলে। এমনকি আত্মকথামূলক উপন্যাস শ্রীকান্তের চারটি পর্বের প্রায় আড়াইখানা পর্ব জুড়ে যে-গ্রামজীবনের ছবি তিনি এঁকেছেন তাতেও মধ্য আর নিম্নবিত্ত শ্রেণীর 'ভদ্রলোক' গ্রামবাসীরাই তাঁর মনোযোগের বারো-আনা দখল করে রয়েছে। গ্রামের এই সমাজের সঙ্গেই শরৎচন্দ্রের আবালা পরিচয় ছিল এবং সবচেয়ে অন্তরঙ্গ পরিচয় ছিল। সুতরাং অত্যন্ত সংগত কারণেই তাঁর লেখনী এই শ্রেণীর মানুষদের জীবনচিত্রের উদ্ঘাটনে সর্বাধিক স্ফূর্তি লাভ করেছে।

শ্রেণীগত বিষয়বস্তুর নির্বাচনে শরৎচন্দ্রের এমনতর সাহিত্যিক পক্ষপাতিত্বের একটা সমাজতাত্ত্বিক কারণও দেখানো চলে। বঙ্কিমচন্দ্রের যুগ আর আধুনিক সাহিত্যিকদের যুগের ঠিক মধ্যবর্তী অবস্থানে দাঁড়িয়ে আছেন শরৎচন্দ্র। এই দুই যুগের এক প্রান্তে সামন্ততন্ত্র, অগ্ন প্রান্তে গণতন্ত্র ও সমাজ-তন্ত্র। এই দুই প্রান্তীয় দিক্‌চিহ্নের ঠিক মধ্যস্থলে অবস্থানকারী যে লেখক, তাঁর শিল্পচেতনা মধ্যবিত্ত মানসিকতায় বিধ্বস্ত না হয়ে পারে না। আর ঠিক এই মানসিকতারই প্রকাশ ঘটেছে শরৎচন্দ্রের লেখনায় মুখ্যাংশে। এমন নয় যে তিনি তাঁর রচনায় বিদ্রোহ ও বিপ্লবের কথা বলেননি, প্রতিবাদ ও প্রতিরোধের বার্তা প্রচার করেননি, করেছেন ঠিকই তবে সেটা করেছেন তাঁর নিজ যুগ থেকে এগিয়ে গিয়ে, তাঁর স্বকালের সাম্যবদ্ধতাকে অতিক্রম করে (প্রমাণ অভয়া, সুনন্দা, দব্যসার্চ, কমল প্রভৃতি চরিত্র)। আবার মধ্যবিত্ত মানসিকতার মধ্যে যে পশ্চাদ্গতির টান আছে তারও প্রভাব তাঁর লেখনায় অতি সুস্পষ্ট (তাঁর যে কোন গ্রামভিত্তিক গল্পোপন্যাসের শিল্পবিচার ছেড়ে দিয়ে নিছক বিষয়বস্তুর বিচার করলে এ কথার প্রমাণ মিলবে)। আর ঠিক এইটাই কারণ যে-জগৎ শরৎচন্দ্রের রচনাবলীতে চিন্তার ও চেতনার পূর্বাপর সামঞ্জস্য খুঁজে পাওয়া যায় না, দ্বৈধতা ও স্বভাববিরোধের লক্ষণ শরৎ সাহিত্যের এখানে সেখানে সামঞ্জস্যের মাথা ফুঁড়ে বেরিয়ে রয়েছে। শরৎচন্দ্র প্রভূত শক্তিশালী লেখক সন্দেহ নেই, কিন্তু যেহেতু তিনি মধ্যবিত্ত স্তরোদ্ভূত লেখক ও মধ্যবিত্ত

মানসিকতায় ধৃত লেখক, সেই কারণে মধ্যবিত্তের মজ্জাগত দোলাচলচিত্ততার হাত এড়ানো তাঁর পক্ষে সম্ভব হয়নি। বরং তাঁর বিপ্লবী ভূমিকাটাই কেমন যেন তাঁর পক্ষে অনভ্যস্ত ভূমিকা বলে মনে হয়। তেলে জলে যেমন মিশ খায় না, অনভ্যাসের ফোঁটা যেমন চড়চড় করে, তেমনি তাঁর মধ্যবিত্ত শ্রেণী-অবস্থানের সঙ্গে তাঁর বৈপ্লবিক অগ্রচ্যাবিতার সহাবস্থান কেমন যেন সর্বত্র ভাল মিশ খায়নি।

যাই হোক, এটা তো হলো রচনার বুদ্ধিগত বিচার, শিল্পবিচারের প্রসঙ্গ দ্বতন্ত্র। বলা আবশ্যক, শিল্পবিচারের দিব্য দিয়ে শরৎচন্দ্র একজন অসামান্য শিল্পী। তাঁর স্টাইলের কোন তুলনা হয় না। তাঁর ভাষাভঙ্গীর স্বাভূত চেখে চেখে ভোগ করবার মত বিষয়। তিনি তাঁর গল্প-উপন্যাসগুলির মধ্য দিয়ে গতানুগতিক মূল্যমানের বক্তব্যই রাখুন আর অগ্রসর বক্তব্যই রাখুন, যে-ভাষারাতির আশ্রয়ে তিনি এই কার্য সম্পাদন করেছেন তা অতিশয় উচ্চস্তরের শিল্পরসাম্বিত ভাষা। তাঁর ভাষা শাঁখের করাতে মত এদিকেও কাটে ওদিকেও কাটে। বিপ্লব বা বিদ্রোহ, প্রতিবাদ ও প্রতিরোধের আকৃতির প্রকাশে এ ভাষা যেমন ধ্বংস; তেমনি প্রচলিত ভাবাদর্শের মাহাত্ম্য কীর্তনেও এ ভাষার কার্যকারিতার সামা নেই।

শেষোক্ত কথাব প্রমাণরূপে তাঁর পল্লীভিত্তিক রচনাগুলির বিশেষ উল্লেখ করা যায়। লক্ষ্য করলে দেখা যাবে তিনি এই সব গল্পে ও উপন্যাসে আমাদের সনাতন কতকগুলি ধ্যান-ধারণা ও লোকাচারপুষ্ট সংস্কারের জয়গান করেছেন। যেমন ভারতীয় নারীর সনাতন পাতিব্রত্যের আদর্শ (অন্নদাদিদি, বিরাজ বৌ, শুভদা, ষোড়শী, কুসুম, সরযু, সুরবালা প্রভৃতি), সেবাপরায়ণতার আদর্শ (মৃণাল), গ্রামীণ যৌথ পরিবার প্রথার অভঙ্গুরতার আদর্শ (নিষ্কৃতি, বিন্দুর ছেলে, শ্রীকান্ত তৃতীয় পর্ব—কুশারী পরিবারের কাহিনী দ্রষ্টব্য), বৈষ্ণব ভাবালুতার সুন্দরতায় বিশ্বাস (শ্রীকান্ত চতুর্থ পর্বের মুরারিপুকুর গ্রামের আখড়ার চিত্র ও কনকলতা চরিত্র এবং শেষের পরিচয় উপন্যাস), দোর্দণ্ডপ্রতাপে জমিদারী শাসনের মহিমার উদ্ঘাটন (বিপ্রদাস উপন্যাসের বিপ্রদাস চরিত্র), প্রভৃতি। অবশ্য, এইসব প্রচলিত মূল্যমানের পিঠে, গ্রামজীবনের অনুশঙ্গে, তিনি কিছু কিছু বিদ্রোহের বার্তাও গুনিয়েছেন। যথা, কোলিগ প্রথার অশ্রদ্ধেয়তা প্রতিপাদন (বামুনের মেয়ে, অনুরাধা প্রভৃতি রচনা), সামাজিক অগ্নায়ের বিরুদ্ধে রোষ

ও ক্ষোভের অভিব্যক্তি (শ্রীকান্ত তৃতীয় পর্বের সুনন্দা চরিত্র ও অগ্রদানী ব্রাহ্মণ দম্পতির কাহিনী), জমিদারী অত্যাচার ও শোষণের বিরুদ্ধে নিপীড়িত-বঞ্চিত মানুষের বেদনার প্রকাশ (মহেশ, অভাগীর স্বর্গ, পল্লীসমাজ, দেনা-পাওনা, জাগরণ প্রভৃতি গল্পোপন্যাস), সমাজ কর্তৃক পরিত্যক্তা ও নিন্দিতা পতিতা নারীতে মানবমহিমার আরোপ (চন্দ্রমুখী, রাজলক্ষ্মী প্রভৃতি)। কিন্তু সব জড়িয়ে বিচার করলে দেখা যায়, শরৎচন্দ্রের গ্রামভিত্তিক গল্প-উপন্যাসগুলিতে ট্র্যাডিশনেরই জয়জয়কার। অথচ সে-জয়জয়কারের সুরে কত মাধুর্য, কত সৌন্দর্য! পতিব্রতা সতী বিরাজ বোয়ের দুঃখে কার না প্রাণ ঝাঁদে? কোন্ পাষণ্ড অন্নদাদিদি ও শুভদার অপার কষ্টসহিষ্ণুতা ও স্বামীর কারণে অপরিসম লাজনা বরণের দৃষ্টান্তের সামনে স্থির থাকতে পারে? বিনাদোষে স্বামী-পরিত্যক্তা সরস্ব, কুসুম ও অলকা (ষোড়শা)-র ভাগ্যে যে-বিড়ম্বনা ঘটেছে তার জন্ম কার না অন্তর ব্যথাহত হয়? বয়স্যা হয়েও দারিদ্র্য আর কুরপের জন্ম পাত্রস্থ হতে না পারা জ্ঞানদার জন্ম কার না সহানুভূতিতে চিওঁ বিগলিত হয়? রামের সুমতি, মামলার ফল আর বিন্দুর ছেলে গল্পত্রয়ীতে যে-স্নেহবাৎসল্যের চিত্র ধরে দেওয়া হয়েছে তার রূপ হতে পারে ট্র্যাডিশনাল, যে-সমাজ-কাঠামোর ভিত্তিতে এই গল্পগুলির কাহিনী দাঁড় করানো হয়েছে তা হতে পারে সনাতন সমাজ-ব্যবহার দ্যোতক; কিন্তু পারিপার্শ্বিক ও প্রতিবেশের ওই দৃষ্টিগ্রাহ্য সীমাবদ্ধতার মধ্যেই যে-অপূর্ব মাতৃস্নেহ গল্পগুলিতে ব্যঞ্জিত হয়েছে তার মহিমা সন্দর্শন করেও ভাবেচ্ছুকসে উদ্বেল হন না এমন কোন পাঠক-পাঠিকা কি আছেন?

শিল্পের এ এক বিচিত্র রহস্য যে, কনটেন্টের দিক দিয়ে পুরাপুরি বা অনেকাংশে গতানুগতিক বক্তব্যের ধারক গল্প-উপন্যাসও নিছক শিল্প-সৌন্দর্যের কারণে পাঠকের মনোহরণ করতে পারে। শরৎচন্দ্রের গ্রামভিত্তিক রচনাগুলিই তার প্রমাণ। এ বিষয়ে সমালোচকেরা প্রায় সকলেই একমত যে, শিল্পোৎকর্ষের মানদণ্ডে শরৎচন্দ্রের গ্রামকেন্দ্রিক রচনাগুলি যত উৎরেছে, শহরকেন্দ্রিক রচনাগুলি তত উৎরায়নি। শহরকেন্দ্রিক রচনাগুলিতে আছে বুদ্ধির ওজ্জ্বল্য, চরিত্রচিত্রণে বলিষ্ঠতা, নানা সামাজিক-রাজনৈতিক প্রশ্ন ও সমস্যার অবতারণা, কখনও কখনও বিপ্লব ও বিদ্রোহের দ্যোতনা; কিন্তু মননশীলতার সঙ্গে না মিশিয়ে নিরবচ্ছিন্ন শিল্পবিচারটাকেই যদি মূল্যায়নের প্রধান নিরিখ করা হয় তাহলে বলতেই হবে যে, শরৎচন্দ্রের গ্রামীণ পটভূমির রচনাগুলিই

তঁার শ্রেষ্ঠ রচনা। পল্লীসমাজ, নিষ্কৃতি, পণ্ডিতমশাই, দেনা-পাওনা প্রভৃতি উপন্যাসের জুড়ি মেলা ভার। মহেশ, অভাগার স্বর্ণ-এর মত গল্প বিশ্বসাহিত্যেও খুব বেশী লেখা হয়েছে কিনা সন্দেহ। আসল কথা, শরৎচন্দ্রের বিষয়বস্তু ও বক্তব্যের প্রকৃতি যা-ই হোক, হোক তা বলিষ্ঠ বা আটপোরে সমাজ-চিত্র। তিনি একজন অসাধারণ গোত্রের সাহিত্য-শিল্পী। তাঁর স্টাইল তাঁর শ্রেষ্ঠ সম্পদ। তাঁর মত এমন অসদ্বিধভাবে বাঙালীর চিত্তজয় করতে আর কোন লেখক সমর্থ হননি—না কেউ তাঁর আগে না তাঁর পরে। রবীন্দ্রনাথ শরৎচন্দ্রের সম্পর্কে যথার্থই লিখেছেন যে “অন্য লেখকেরা অনেকে প্রশংসা পেয়েছে, কিন্তু সর্বজনীন হৃদয়ের এমন আতিথ্য পায়নি।” শরৎচন্দ্রকে প্রদত্ত এই সর্বজনীন হৃদয়ের আতিথ্যের মূলে আছে তাঁর অনবদ্য শিল্পদৃষ্টি, অপরিমেয় মানবপ্রীতি ও অনবদ্য ভাষা। গ্রামের চিত্র-চরিত্রের রূপায়ণেই যেন এই তিন বৈশিষ্ট্য সমধিক স্ফুর্তিময় হয়ে উঠেছে।

শরৎচন্দ্রের সামাজিক গল্প ও উপন্যাসগুলির আলোচনা প্রসঙ্গে কোন কোন সমালোচক সামন্ততন্ত্রের প্রসঙ্গ উত্থাপন করে বলেছেন যে, সামন্ততান্ত্রিক ভূমিব্যবস্থার অত্যাচার, শোষণ ও অবক্ষয় দেখানোটাই ছিল তাঁর রচনার মূল লক্ষ্য। এরকম কোন সজ্ঞান ইচ্ছা শরৎচন্দ্রকে চালিত কবেছিল তাঁর কোন স্পষ্ট প্রমাণ পাওয়া যায় না। জমিদারের অত্যাচার তিনি দেখিয়েছেন ঠিকই কিন্তু সেটা সমাজতান্ত্রিক আদর্শের প্রতি আনুগত্যবশতঃ কতটা আর গ্রাম-জীবনের ধারার সঙ্গে অবিচ্ছেদ্যভাবে জড়িত বাস্তব স্ଥିতির রূপায়ণ চেষ্টা হিসাবে কতটা, তা একটা প্রশ্নিচ্ছ হয়েই বইল। অর্থাৎ আমরা বলবার কথা এই যে, শরৎচন্দ্র মননশীল প্রত্যয় জাত সজ্ঞান ইচ্ছার তাড়নায় গ্রামের সামন্ততান্ত্রিক সমাজ-কাঠামোর ভাঙন দেখাতে যাননি, যা-কিছু ভাঙন বা অবক্ষয়ের ছবি তাঁর লেখায় ফুটেছে তা কাহিনীর প্রয়োজনে অবলীলায় ফুটেছে—গ্রামের একজন বাস্তববাদী শিল্প-রূপকার হিসাবে শরৎচন্দ্র আর কোন ভাবেই তাকে ফাটাতে পারতেন না। শরৎচন্দ্রের পল্লীচিত্রে হৃদয়-ধর্মেরই প্রাধান্য, মননশীলতার বিশেষ কোন ভূমিকা নেই। বুদ্ধিগত ভাবে ভেবেচিন্তে, একটি সুগঠিত সমাজ-দর্শনের অংশ হিসাবে, তিনি সামন্ততন্ত্রের অবক্ষয়ের ছবি কোথাও তুলে ধরেননি; তাঁর সহজাত মানবধর্ম আর অফুরন্ত সহানুভূতিই তাঁকে সামাজিক ও অর্থনৈতিক অবিচারের শিকার স্বরূপ উৎপাদিতজনদের পক্ষে কাহিনী-বৃত্ত রচনায় প্রেরণা

জুগিয়েছে। শিল্পীর ভূমিকাটাই এ স্থলে মুখ্য, বুদ্ধিবাদীর ভূমিকা নিতান্ত গৌণ।

কথার আভ্যন্তর প্রমাণও কিছু-কিছু আছে। শরৎচন্দ্র যে সময়ের পটভূমিকায় তাঁর গ্রাম কাহিনীগুলিকে উপস্থিত করেছেন তাব পরিধি মোটা-মুটিভাবে ১৮৯০—১৯১৫ সালের পরিসরে বিস্তৃত। তাঁর জন্ম ১৮৭৬ সালে, কুড়ি বছর বয়সকালের মধ্যেই তিনি পাঁচ-সাতখানা গ্রামভিত্তিক উপন্যাস লিখে শেষ করেন। তারপর বর্তমান শতাব্দীর সূচনায় জীবিকার সন্ধানে রেঙ্গুন চলে যান এবং সেখানে বছর তের-চোদ্দ থাকেন। রেঙ্গুন বাসেব প্রথম দশ বছর প্রায় বিশেষ কিছুই লেখেন না, তারপর ভাবতীতে বড়দিদি প্রকাশিত হবার পর পত্রিকা সম্পাদকদের তাগিদে পুনরায় লেখাবৃত্তি অবলম্বন করেন। এবার আর খাপছাড়াভাবে খেয়ালখুশিমিফিক লেখা নয়, বিধিবদ্ধ রচনাভ্যাস। রেঙ্গুন প্রবাসের শেষ তিন চার বছরে আরও কয়েকটি গ্রাম্য গল্প-উপন্যাস গ্রন্থ রচনা করেন। রেঙ্গুনের পাট সাজ করে দেশে ফিরে আসার পরও তিনি গ্রামভিত্তিক গ্রন্থ প্রণয়ন করেছেন, তবে এই সময় থেকে তাঁর মূল ঝোঁকটা গ্রাম ছেড়ে ক্রমেই শহরাভিমুখী হতে থাকে।

শরৎচন্দ্রের ব্যক্তিজীবনের এই তথ্য উদ্ধৃত করবার উদ্দেশ্য এটা দেখানো যে, তাঁর চিত্রিত গ্রাম বিশ শতকের প্রথম দুই দশক সময়-সীমার এদিকে কোনক্রমেই এগিয়ে আসতে পারে না এবং যদি তিনি সমসাময়িক জীবনের রূপকার হন তো তাঁর লেখনীর উপজীব্য গ্রাম উনিশ শতকের শেষতম দশকের ওপারে কখনই যেতে পারে না। বাস্তবেও ঠিক তা-ই ঘটেছিল। তিনি বাংলার যে-গ্রামকে তুলে ধরেছেন তার অবস্থান তাঁর সম-সময়ে প্রসারিত, অর্থাৎ ১৮৯০ থেকে কমবেশী ১৯১৫ সাল পর্যন্ত তার কালিক স্থিতি। সমসাময়িকতা শরৎচন্দ্রের রচনার একটি প্রধান লক্ষণ। তাঁর দেখা গ্রাম আর তাঁর লেখা গ্রাম দুই এক বিন্দুতে এসে মিলে গেছে।

কিন্তু কী আশ্চর্য, যে-কালটাকে তিনি গ্রামের চিত্র-চরিত্রের পটভূমি হিসাবে মনোনয়ন করেছেন সেই কালটা ছিল বাংলার রাজনীতি, ধর্ম ও সমাজ সংস্কার আন্দোলনের একটি প্রচণ্ড আলোড়ন-বিলোড়নের কাল, অথচ তাঁর লেখায় আদৌ কোন ছাপ পড়েনি সে সবে। ১৮৮৫ সালে ভারতীয় জাতীয় কংগ্রেসের প্রতিষ্ঠা হয়েছে, বাংলায় স্বদেশপ্রেমের জোয়ার বইতে শুরু করেছে। ধর্মের ক্ষেত্রে একদিকে ব্রাহ্মসমাজের একাধিক প্রগতিশীল উন্নয়ন-

চেষ্টা অশুদ্ধিকে রামকৃষ্ণ-বিরেকানন্দের ভক্তিবাদী মরমী তত্ত্ব একই কালে দুটি বিপরীতমুখী আদর্শরূপে কলকাতার শিক্ষিত সম্প্রদায়ের মনে প্রবল ভাব-সংঘাতের সৃষ্টি করেছে। উনিশ শতকের শেষ সিকি-ভাগের গোটা কাল জুড়ে আমরা দেখতে পাচ্ছি বাংলার নাগরিক শিক্ষিত মানুষের চিত্ত এই ভাবদ্বন্দ্বের টানাপোড়েনে মথিত—ঘড়ির দোলকের মত কখনও যুক্তিবাদের কখনও যুক্তিহীন বিশ্বাসের অভিমুখে দোল খাচ্ছে। অগ্রসর ভাবনা আর পশ্চাদ্গতির সে এক ঐতিহাসিক সংঘর্ষ। তারপর এলো বঙ্গভঙ্গ। ১৯০৫ সালের আগে ও পরের বছরগুলিতে সে কাঁ জাগরণ। সমগ্র বাংলাদেশ যেন এই এক ঘটনায় একটি মানুষে সংহত ও প্রতিরোধে দ্বার হয়ে উঠেছিল।

অথচ ভাজ্জবেব ব্যাপার, শরৎচন্দ্রের অঙ্কিত গ্রামচিত্রে এ সব আন্দোলনের সামান্য প্রভাবও পড়েনি। তাঁর দেখা গ্রাম যেন শহর থেকে দূরবর্তী এবং শহর থেকে বিযুক্ত এক এঁদো বদ্ধ কুপমণ্ডুক জনপদ—শহরের কোন ভাব-তরঙ্গেরই অভিঘাত সেখানে গিয়ে পৌঁছয় না। এমন স্নায়ু-সম্পূর্ণ আপনাতে-আপনি-তৃপ্ত অজ পাড়ার ধাবণা শরৎচন্দ্র কোথা থেকে পেয়েছিলেন জানি না কিন্তু দেখা যায় তাঁর লেখনীতে এই ধরনের গ্রামের ছবিই বার বার মূর্ত হয়ে উঠেছে। অবশ্য, পুনরপি বলি, যে অজ-পাড়াগাঁব ছবি তিনি আমাদের সামনে মেলে ধরেছেন তার শিল্পরূপের কোন তুলনা নেই কিন্তু তাতে বুদ্ধি-বাদের ভূমিকা অনুপস্থিত। শরৎচন্দ্রের এই পর্যায়ের সৃষ্টিগুলিতে হৃদয়ধর্ম, মননশীলতা তথা মননজীবিতাকে ভাসিয়ে নিয়ে গেছে বললেও চলে।

আভ্যন্তর প্রমাণ থেকে আরও বোঝা যায় যে, শরৎচন্দ্রের অঙ্কিত প্রায় সব কয়টি গ্রামেরই অবস্থান হুগলী কিংবা হাওড়া জিলায়। তাঁর নিজের বাড়ি ছিল হুগলী জিলার দেবানন্দপুর গ্রামে—এই গ্রামটিকে কেন্দ্রবিন্দু স্বরূপে ধরে নিয়ে তিনি তাঁর সাহিত্যে গ্রামের জগতের পরিসীমা রচনা করেছিলেন। তা যদি হয় তো বুঝতে হবে সব গ্রামই কলকাতা শহরের অদূরে অবস্থিত। কলকাতায় এত এত লালোড়ন-বিলোড়নকারী ভাবের আন্দোলন চলছে অথচ তারই অদূরস্থিত গ্রামগুলিতে সে সবার এতটুকুও ঢেঁটে গিয়ে আছড়ে পড়ছে না—কেমন যেন অস্বাভাবিক মনে হয়। সত্য বটে পল্লীসমাজ উপন্যাসে তিনি রমেশের মাধ্যমে নাগরিক ভাবজীবনের কিছু ছায়াপাত ঘটিয়েছেন, রমেশ নাগরিক শিক্ষায় শিক্ষিত হয়েই গ্রামে এসেছিল, এসে গ্রামের সংস্কারে মন দিয়েছিল; কিন্তু সেখানেও কথা আছে। রমেশের ভিতর ফিলানথ্রপি

কিনা পরোপচিকীর্ষার ভঙ্গিমাটাই প্রবল, সামন্ততন্ত্রের দুর্গে আঘাত হেনে তাকে পথ্যুদন্ত করে তার সমাধির উপর গণজীবনের ভিত্তি রচনা করার মনোভাব তাঁতে চোখে পড়ে না।

অবশ্য, এই অপূর্ণতার জন্য শরৎচন্দ্রের শ্রেণীস্বরূপই দায়ী। শিল্পদৃষ্টিতে তিনি মহান; শ্রেণীস্থিতিতে তিনি একাধিক বাধায় খণ্ডিত। পূর্বেই বলেছি, বাংলা সাহিত্যে তিনি এই প্রান্তর সামান্তরেখার ঠিক মধ্যবর্তী স্তরে অবস্থান করেছেন—অভিজাততন্ত্র ও গণতন্ত্রের মধ্যস্থানে যে-বুর্জোয়া ও পাতিবুর্জোয়ার বিচরণক্ষেত্র, তারই ভূমির উপর দাঁড়িয়ে তিনি তাঁর অনবদ্য গল্প-উপন্যাসগুলি বচনা করেছেন। এই বিশেষ অবস্থানের গুণ ও দোষ, সুবিধা ও অসুবিধা, দুইই তাতে সমান হারে বর্তিয়েছে। গুণের কথা গোড়াতেই বলেছি; দোষের মধ্যে, গ্রামকে তিনি দেশের বৃহত্তর সমাজপ্রবাহ থেকে বিল্লিষ্ট স্বয়ংনির্ভর জগৎরূপে কল্পনা করেছেন। তা কখনও হয় না, হতে পারে না। শহর আর গ্রামের মধ্যে শ্রাবের আদানপদান, যোগাযোগের আদানপ্রদান অনবরত হয়ে চলেছে। তাদের পবম্পরের উপর পবম্পরের অভিধাত ঘটিছে। বিশেষ করে রাজধানী-শহরের বৃহত্তমার সামান্য দূরে যে-সব গ্রামের অধিষ্ঠান, তা রাজধানীর ভাবজীবনের প্রভাব থেকে কখনও মুক্ত থাকতে পারে না।

বুদ্ধিবাদকে আভাল কবে হৃদয়ধর্মের উপর গ্রামকে একান্তরূপে প্রতিষ্ঠা করতে গিয়ে শরৎচন্দ্র তাঁর শিল্পের সদর্থক ও নতুর্গক দুটি দিক একই সঙ্গে প্রকটিত করেছেন। হৃদয়সম্পদের সৌন্দর্যের উন্মোচনে এই জনচিহ্নহারী লেখকের ক্ষমতার কোন তুলনা নেই কিন্তু মননশাসনায় তাঁর লেখনা কিছু খাটো, এ কথা স্বাকার করতেই হবে। অন্ততঃ, তাঁর গ্রামাঙ্গ বচনান্ত্রটির অনুষঙ্গে এ কথা নঃ মেনে পারা যায় না।



## পতিতা চরিত্র

শরৎচন্দ্রের অঙ্কিত পতিতা চরিত্রের সংখ্যা খুব বেশী নয়—সঠিক হিসাবে তিন-চারটির বেশী হবে কিনা সন্দেহ। বিজলী ( আধারে আলো ), চল্লিশুখী ( দেবদাস ), রাজলক্ষ্মী ( শ্রীকান্ত ) ও সাবিত্রী ( চরিত্রহীন )। এদের মধ্যে আবার সাবিত্রীকে ঠিক পতিতা চরিত্র বলা চলে না। অবস্থাবিপাকে কলঙ্কিনী নাম কিনলেও সে প্রকৃত অর্থে পতিতা নয়। সে পতিতার জীবন যাপন করে না, যদিও আর দশটি পতিতার মতই গণিকাপূর্ণিতে তার বাস। মালিন্যবিমুক্ত সুন্দর জীবনের প্রতি তার আকাঙ্ক্ষার তীব্রতার প্রমাণ স্বরূপে এই বলাই যথেষ্ট যে, সে নিজেকে নষ্ট করবার বহুতর সুযোগ পেয়েও নিজেকে নষ্ট হতে দেয় না—ক্রেদাক্ত পথে অর্থোপার্জনের বদলে ভদ্র জীবনের কাছাকাছি থাকার জগুই যেন সে বিশেষ করে দেখায় মেসেব পরিচারিকা বৃত্তি অবলম্বন করে জীবন ধারণের চেষ্টা করছে। মেসেব দিগের কাজ মুস্থ জীবনাকাঙ্ক্ষিনী কোন নারীর পক্ষে মনোমত কাজ না হলেও হয় কাজ নয়। বহুতঃ প্রেমের দ্বারা জীবননির্বাহী কাজ মাই, বড় হোক ছোট হোক, শ্রদ্ধেয়।

পতিতা চরিত্রের প্রতি পক্ষপাতিত্বের কারণে কেউ কেউ শরৎচন্দ্রকে ঊর্নীতির দায়ে অভিযুক্ত করতে চান। কিন্তু এই রকম বিচার নীতিবাদের বিচার হতে পারে, সাহিত্যের বিচার নয়। লেখকের মনোগত অভিপ্রায় দিয়ে লেখকের রচনার ভালমন্দের বিচার হওয়া উচিত। এই মানদণ্ডের নিরিখে পরিমাপ করলে দেখা যায়, শরৎচন্দ্র তৎসৃষ্ট পতিতা চরিত্রগুলির অবতারণার দ্বারা ঊর্নীতির পোষকতা তো করেনই নি, উল্টো, যথার্থ মনুষ্যত্বের মহিমাকেই উচ্চ তুলে এরেছেন। পতিতা নারীর জীবন দেহ ব্যবসায়ের দ্বারা কলুষিত হলেও একবার যদি তার অন্তরে সত্যিকার ভালবাসার সঞ্চার হয়, তাহলে সেই প্রেমের প্রভাবে তার জীবন কেমন করে ধীরে ধীরে অগ্নিশুদ্ধ হয়ে ওঠে তারই অপূর্ব শিল্পরূপ প্রকাশিত হয়েছে শরৎচন্দ্রের লেখনীমুখে পতিতা চরিত্রের চিত্রায়ণের মধ্য দিয়ে। ভালবাসার জাদুতে খাদকলঙ্কময় জীবন সোনা হয়ে যায়—এইটাই এ-জাতীয় চিত্রায়ণের মূল প্রতিপাদ্য।

শরৎচন্দ্র আমাদের দেশের নারীসমাজকে খুবই নিগূহীত শ্রেণী বলে উল্লেখ করেছেন। তার মধ্যে আবার পতিতাদের সব চাইতে অত্যাচারিতা ও শোষিতা বলে অভিহিত করেছেন। সর্বপ্রকার শোষিত ও নির্যাতিত শ্রেণীর নরনারীর প্রতি ছিল শরৎচন্দ্রের সহজ প্রাণের দরদ—সেই কারণেই পতিতা সম্প্রদায়ের অভিমুখে তাঁর সহানুভূতি স্বভাবতঃই বিশেষ বেগে প্রধাবিত হয়েছিল। পতিতা নারীর চরিত্রাঙ্কনের প্রতি যদি তাঁর কোন পক্ষপাত থেকে থাকে তো সে এই কারণেই যে, পতিতার সমাজের সবচেয়ে *oppressed and depressed* অংশেব মানুষের প্রতীক। দুর্নীতির চিত্র আঁকবার জন্য তিনি তাদের তাঁর সাহিত্যে আনেননি, এনেছিলেন মানবতার মতিমা প্রকাশের জন্য। পতিতার আশ্রয়দৃষ্টিতে যত অধঃপতিত আর ঘৃণিত জীবনের পক্ষকুণ্ডেই নিমজ্জিত হয়ে থাকুক না কেন, কখনও কখনও ভালবাসার পাবকম্পর্শে তাদের জীবনে যে অভাবনীয় মনুষ্যত্বের বিকাশ দেখা যায় তারই ছবি ফুটিয়ে তুলতে তিনি চেয়েছেন।

শরৎচন্দ্রের জীবনীর ছকের সঙ্গে পরিচিত ব্যক্তিত্বটাই জানেন যে, শরৎচন্দ্র একদা পতিতাদের জীবন নিয়ে সমাজতাত্ত্বিক অনুসন্ধান চালিয়েছিলেন। এই অনুসন্ধান কার্যের প্রকরণরূপে প্রায় ছয়শো-সাতশো পতিতার কাহিনী তিনি সংগ্রহ করেছিলেন। ডায়েরীতে লিপিবদ্ধ সেই সব কাহিনীর বিবরণ থেকে শরৎচন্দ্র এই সিদ্ধান্তে উপনীত হন যে, বেশীরভাগ পতিতাই পতিতারূপেই অবলম্বন করে নিরুপায়তার ফলে, যৌনতার আবেগ চালিত হয়ে নয়। এদের একটা বড় অংশই এসেছে গৃহস্থ-সংসার থেকে, আর তাদের ভিতর কুমারী বা বিধবা অপেক্ষা সধবার সংখ্যাই বেশী। দারিদ্র্যের জ্বালা, স্বামীর অবহেলা, শাশুড়ী-ননদ-ভাজের অত্যাচার, কিংবা এই জাতীয় অথবা কোন কারণ অধিকাংশ ক্ষেত্রে তাদের গৃহত্যাগের হেতু। অর্থনীতির নিষ্পেষণে কুলবধু বারবধুতে রূপান্তরিত।

এই বিশ্লেষণের আলোকে বিচার করলে বোঝা যাবে কেন শরৎচন্দ্র তাঁর শিল্প-পরিকল্পনার ভিতর পতিতাকে একটা বিশেষ মমত্বের স্থান ছেড়ে দিয়েছিলেন। সমাজের আদি প্রলিটারিয়েট নারী জাতির প্রতি ছিল তাঁর সহজ সহানুভূতি, সেই প্রলিটারিয়েটেরও আবার সবচেয়ে নীচের পৈঠার বাসিন্দা হলো এই পতিতা শ্রেণী। সুতরাং অত্যন্ত শ্রাসঙ্গত কারণেই তিনি এই শ্রেণীর কয়েকটি প্রতিনিধিকে তাঁর শিল্প-মনোযোগের বিষয়ীভূত

করেছিলেন এবং তাদের রূপায়ণে প্রাণের সমস্ত দরদ ঢেলে দিয়েছিলেন। নয়ত নিছক পতিতাকে পতিতা রূপে চিত্রিত করবার জন্য শরৎচন্দ্র এক আঁচড় কালিও বায় করতেন কিনা সন্দেহ।

বিজলী, চন্দ্রমুখী, রাজলক্ষ্মী, সাবিদ্রী—সকলেরই প্রাণের আকৃতি দেখা যায় শুদ্ধতার দিকে, ভালবাসার পবিত্রতার দিকে। উদ্ধরণই তাদের চরিত্রের মূল প্রবৃত্তি। দেহ-সম্পর্কের আবিলতার দ্বারা তারা তাদের প্রণয়্যাস্পদকে আপনার অভিযুগে আকর্ষণ করতে চায় না, বরং দেহ-সম্পর্ক থেকে তাদের দূরে ঠেলে রাখতে চায়, পাছে পতিতার অন্তি-স্পর্শে দয়িতের অমঙ্গল হয়। এই মঙ্গলকামনা অমল ভালবাসার দান, আর এই অমল ভালবাসাই সব কয়টি পতিতার চরিত্রকে তাদের অভ্যন্তর পরিবেশের মালিগা থেকে মুক্ত করে ওক দীবনের উদ্ধরণের অভিযুগে সঞ্চালিত করেছে—তাদের মানবতার মহিমায় ভূষিত করেছে।

গঙ্গার ঘাটে গ্রাম্য জমিদারনন্দন সত্যেন্দ্রনাথের সঙ্গে রূপোপজীবিনী বিজলীর দেখা। কয়েকবার এরূপ দেখা-সাক্ষাতের পর বিজলী তার পেশা-নিপুণ ছলাকলা-বিভ্রমের দ্বারা আকর্ষণ করে সত্যেন্দ্রকে তার আলয়ে নিয়ে যায়। সেখানে সত্যেন্দ্রনাথ বিজলীর আসল পরিচয় পেয়ে ঘৃণায় তার দিক থেকে মুখ ফিরিয়ে নেয় এবং দ্রুত পতিতালয় ত্যাগ করে। এই অবহেলা ও ঘৃণার আঘাতে বিজলীর জীবনে দেখা দেয় পরিবর্তন—সে মনে মনে সত্যেন্দ্রকে ভালবাসে। ভালবাসা জাগিয়ে তোলে তার এতাবৎ আচরিত জীবনযাত্রা পদ্ধতির প্রতি গভীর বিতৃষ্ণা, বিজলী পতিতারূপে ত্যাগ করে শুদ্ধাচারিণী হয়। পরে এক সম্পূর্ণ অভিনব পরিবেশে বিবাহিত সত্যেন্দ্রনাথের গৃহে ছেলের অনুরোধে উপলক্ষ্যে আয়োজিত কীর্তন গানের আসরে বিজলীর সঙ্গে সত্যেন্দ্রনাথের সাক্ষাৎ হয় কিন্তু ততদিনে বিজলী সম্পূর্ণ নতুন মানুষে রূপান্তরিত, ত্যাগ-তিতিক্ষা ও নিকষিতহেমতুল্য কামবাসনাহীন প্রেমে পরিশুদ্ধ। ‘আঁধারে আলো’ নামের ভিতর এই ব্যঙ্গনারই ইঙ্গিত করা হয়েছে। আঁধারে আলো অর্থাৎ পক্ষের মধ্যে পদের উন্মীলন।

বিষয়টি সুন্দর তবে শিল্প-রূপায়ণে ত্রুটি আছে। বিজলীর পরিবর্তনকে বড়বেশী আকস্মিকতামণ্ডিত করে দেখানো হয়েছে, অত দ্রুত কারও অন্তরের রূপান্তর হয় না। সত্যেন্দ্রের সঙ্গে বিজলীর ঘনিষ্ঠতারই অবসর হলো না।

তো সত্যোজ্জের প্রতি বিজলার ভালবাসার আকুলতা পরিস্ফুট হবে কী প্রকারে? সম্যক্ যত্ন নিয়ে বা বিস্তার নিয়ে বিজলীর প্রেমের পটভূমিকাটি তৈরী করা হয়নি, তাই আঁধারে আলো গল্প হিসাবে কম-বেশী অসার্থক।

দেবদাস উপন্যাসের চন্দ্রমুখী একটি সার্থক চরিত্র। চন্দ্রমুখী সত্যই দেবদাসকে ভালবেসেছিল এবং তার অধঃপাতকে রোধ করতে চেয়েছিল। গ্রামের এক ধনবান রূপবান স্বাস্থ্যবান যুবক তার দয়িতাকে জীবনে লাভ করতে না পারার হতাশায় বার্থতার মনস্তাপে নেশার কাছে আত্মসমর্পণ করে তিলে তিলে জীবনকে ক্ষয় করে চলেছে, এ সে চোখ চেয়ে দেখতে পারছিল না এবং প্রাণপণে অনিবার্য ধ্বংসের কবল থেকে দেবদাসকে রক্ষা করার চেষ্টা করছিল। প্রেমিকের প্রতি স্বার্থলেশশূন্য ভালবাসার টানে তার নিজ জীবনধারার প্রতি চরম ঝিকার জন্মেছিল এবং সে পতিতাবৃত্তি ত্যাগ করে পবিত্র জীবনের দিকে হাত বাড়িয়ে দিয়েছিল। চন্দ্রমুখী মদের নেশা ছেড়ে দেবার জগৎ বাববার দেবদাসের পায়ে মাথা খুঁড়ে মেরেছে কিন্তু দেবদাস সে-হিতকথায় কর্ণপাত না করে আত্মধ্বংসের ঝোঁকে নেশার ভিতর আপনাকে আরও বেশী ডুবিয়ে দিয়েছে। শেষ পর্যন্ত অত্যন্ত নিষ্করণ পরিবেশে তার জীবননট্যের উপর বিয়োগান্ত যবনিকার পটখানি নেমে এসেছে—নিতান্ত শোচনীয় ভাবে দেবদাসের জীবনাবসান ঘটেছে। )

উপন্যাসটি মেলোড্রামাটিক, বিশেষ করে দেবদাসের পার্বত্যকে না পাওয়ার শোকে বিবাগী হওয়া ও নেশার ঘোরে ডুবে যাওয়া ভাববিলাসিতার একশেষ। আত্মগতিক ভাবালুতার বশে সে তার নিজের বিনাশ নিজেই ডেকে এনেছে। কিন্তু চন্দ্রমুখীর চরিত্রের আদল সে রকম নয়। সে বারবণিতা হলেও সাধারণ শ্রেণীর বারবণিতা নয়। ভালবাসার আকুলতা তার ভিতর গুসুগু ছিল। দেবদাসের ঘৃণার আঘাতে সেটি জেগে উঠেছে। দেবদাস তার দিক থেকে ঘৃণায় যত বেশী মুখ ফিরিয়ে রেখেছে তত চন্দ্রমুখীর মন দেবদাসের অভিমুখে আকৃষ্ট হয়েছে—এক সময় তাকে বিনিঃশেষে হৃদয় দান করেছে। তার পর থেকেই তার প্রেমের অনলে অগ্নিশুদ্ধ হওয়ার পালা। চন্দ্রমুখী দেবদাসকে উদ্দেশ্য করে বলে, “তুমি যে কি আকর্ষণ, তা যে কখন তোমাকে ভালবেসেচে সে জানে। এই স্বর্গ থেকে সাধ করে ফিরে যাবে, এমন মেয়েমানুষ কি পৃথিবীতে আছে!”

সেই মেয়েমানুষেরই একজন চন্দ্রমুখী, তা সে পতিতা রূপেই পরিচিত। হোক আর যাই হোক। সত্যিকার নারীত্বের গৌরবে চরিত্রটি দীপ্ত।

সাবিত্রীকে নষ্ট করেছে তার ভগিনীপতি, বিবাহের প্রতিশ্রুতি দিয়ে তাকে ঘর থেকে ভাগিয়ে আনে, তার পর পথের ধূলায় নিষ্ক্ষেপ করে সরে পড়ে। সেই থেকে সাবিত্রী দেহবাসনার প্রতি বাঁতস্পৃহ এবং সুস্থ জীবনের জন্য সতৃষ্ণ। সে মেসের অগ্রতম বাসিন্দা। সতীশকে মনে মনে ভালবাসে কিন্তু একমাত্র সতীশের মঙ্গলাকাজ্জা ছাড়া আর কোন রূপে সে ভালবাসার প্রকাশ হয় না। সতীশ মদ্যপ, অস্থান-কুস্থানে যাওয়ারও তার অভ্যাস আছে, সে কলকাতায় নামেই শুধু পড়ে এসেছে, আসলে উদ্দেশ্যহীন ভাবে সময় কাটানো ছাড়া সে আর বড় একটা চিন্তা করে না, ইচ্ছা করলে সাবিত্রী সতীশকে আরও টেনে নামাতে পারতো, কিন্তু সে তো তা করেই না, উল্টো মায়ের মত সেও ও উদ্বেগে তাকে অধঃপাতের কবল থেকে আগলে রাখে। সেবা দিয়ে মমতা দিয়ে সতীশের প্রবাসী জীবন ভরে রাখে।

ভালবাসার বিশল্যকরণীর স্পর্শেই সাবিত্রী চরিত্রের এই সঞ্জীবন। উপলব্ধির শেষাংশে সেবার মধ্যে সাবিত্রীর আত্মবিলোপ দেখানো হয়েছে। যদিও এতে মন খুঁতখুঁত করে এবং সাবিত্রীর জন্য খুবই দুঃখ হয়, তবুও এই ভেবে সান্ত্বনা পেতে হয় যে, সে যে বিড়ম্বনার পাকে জড়িয়ে গিয়ে ভদ্র সমাজ থেকে দূরে নিষ্ক্ষিপ্ত হয়েছে এবং দৃশ্যতঃ এক কলঙ্কিতাৰ জীবন যাপনে বাধ্য হয়েছে, তাতে আমাদের দেশের সামাজিক অবস্থার পরিপ্রেক্ষিতে এবং গতানুগতিক মূলবোধের শাসন-দোরাণ্যে সাবিত্রীর ভাগ্য আর কোন্ খাতেই বা প্রবাহিত হতে পারতো? তাই সতীশ-সরোজিনীর যুগকাঠে বলিপ্রদত্তা সাবিত্রীর পরিণামটিকে নির্ভর মনে হলেও অস্বাভাবিক মনে হয় না। এ সমাজে সুস্থ ও সম্ভাব্যসম্মত জীবনে পতিতা শ্রেণীর পুনর্বাসন হতে এখনও অনেক বিলম্ব।

রাজলক্ষ্মী জ বিকাগতভাবে পিয়ারী বাইজী নামে পরিচিতা, রাজলক্ষ্মী নামের তাৎপর্য ও মাধুর্য শুধু শ্রীকান্তের কাছেই একান্ত। ছোটবেলায় রাজলক্ষ্মী ছিল শ্রীকান্তের খেলার সাথী, বন থেকে বৈঁচি ফুল কুড়িয়ে এনে তাই দিয়ে মালা গেঁথে শ্রীকান্তের গলায় পরিয়ে দিত। সেই খেলাচ্ছলে পরানো মালা ওই কালে খেলার তুচ্ছতায় ঢাকা থাকলেও তারই মধ্যে কালক্রমে অন্তরের রঙ লাগল—দার্দ্র্যদিনের অদর্শনের পর শ্রীকান্ত দেখল যে, রাজলক্ষ্মীর মনের পটে এতকাল সে স্বামিরূপে বিরাজিত ছিল। শুধু স্বামী নয়; স্বামী, প্রেমিক, সখা। রাজলক্ষ্মী যখন শ্রীকান্তের কাছে আসে, পিয়ারী বাইজীর পাটটি

তার গা থেকে ব্যবহৃত পোশাকের মত খসিয়ে ফেলে তার শুদ্ধ অন্তর-স্বরূপে আসে—শ্রীকান্তের নিকট তার যথার্থ প্রণয়িনী সত্তার প্রকাশ।

কিন্তু এ প্রণয়িনীর জাত আলাদা। এ তার প্রণয়ীকে আপন প্রভাববৃত্তের মধ্যে বেঁধে বাথতে চায় না, তাকে তার স্বীয় মনোমত পথে চলবার স্বাধীনতা দেয়। নিজে কঠোর সংযমে আপনাকে সংবৃত্ত করে আত্মশাসনের দ্বারা নির্মল ভালবাসার শিখাটিকেই শুধু জ্বালিয়ে রাখে, রূপজ মোহে প্রেমিককে ভোলাতে চায় না। শ্রীকান্তের ভবঘুরে স্বভাবকে সে দমিত করে না, বরং উৎসাহিত করে, অন্ততঃ তার আচরণের ফলে শ্রীকান্তের বাউঙুনে প্রবৃত্তি আরও শাণিত হয়, তীক্ষ্ণতর হয়। “বড় প্রেম শুধু কাছেই টেনে আনে না, দূরেও সরিয়ে দেয়”—শরৎচন্দ্রের স্বকায় এই উক্তির একটি সার্থকতম দৃষ্টান্ত রাজলক্ষ্মী-শ্রীকান্তের সম্বন্ধ।

রাজলক্ষ্মীর প্রেম সম্বন্ধে শ্রীকান্তের ধারণা যে কত উচ্চতাবে বাঁধা ছিল তা শ্রীকান্তের একটি স্বীকারোক্তি থেকে বোঝা যায়। শ্রীকান্ত অভয়াকে রাজলক্ষ্মীর পরিচয় দিয়ে বলছে—“আর সেই রাজলক্ষ্মী। তার তাগের দংশ যে কত বড় সে ত আমি চোখে দেখেই এসেছি। এই দংশের জোরেই আজ সে আমার সমস্ত বুক জুড়ে আছে।”

অভয়া চমকিয়া বলিল, তবে আপনিই কি তাঁর—

বলিলাম, তা না হলে সে এত স্বচ্ছন্দে আমাকে দূরে সরিয়ে বাথতে পারত না, হারাবার ভয়ে প্রাণপণে কাছে টেনে রাখতেই চাইত।

অভয়া বলিল, তার মানে রাজলক্ষ্মী জানে আপনাকে তার হারাবার ভয় নেই।

আমি বলিলাম, শুধু ভয় নয়—রাজলক্ষ্মী জানে আমাকে তার হারাবার জো নেই। পাওয়া এবং হারানোর বাইরে একটা সম্বন্ধ আছে; আমার বিশ্বাস সে তাই পেয়েছে বলে আমাকেও এখন তার দরকার নেই।”

এই থেকে শ্রীকান্তের মনোভাব উপলব্ধি করা যায়। তবে দুইয়ের সম্পর্কের তুলনামূলক মূল্যায়নের ভিত্তিতে বলতেই হয় যে, রাজলক্ষ্মীর ভালবাসা শ্রীকান্তের ভালবাসা অপেক্ষা অনেক বেশী গভীর, নিবিড়, প্রকৃতপক্ষে এই ভালবাসা তার গোটা সত্তার সঙ্গে জড়ানো। পতিতা নারী দৃশ্যঃ বহুচারিণী হলেও ক্ষেত্রবিশেষে ভালবাসার নির্ভায়, ত্যাগে ও তপস্যায় একাচারিণীর প্রেমকেও যে হার মানাতে পারে শরৎচন্দ্রের রাজলক্ষ্মী চরিত্র তার প্রমাণ।

॥ ১৫ ॥

দ্বৈধতা-১

শরৎচন্দ্রের জন্মশতবর্ষের বৎসরে তাঁর সাহিত্যের নতুন করে মূল্যায়ন প্রয়োজন। এযাবৎ শরৎ সাহিত্যের আলোচনার নামে যা হয়েছে তার বেশার ভাগই তাঁর জীবনের সঙ্গে মিলিয়ে গাল-গল্পের প্রচার। আর যেহেতু শরৎচন্দ্রের জীবনের ছকটা গতানুগতিক ধাঁচের ছিল না, আমাদের গড়পরতা সাধারণ বাঙালী জীবনের ধারা-ধরন থেকে লক্ষণীয়ভাবে ছিল পৃথক্, সেই কারণে এই জন্ম-ভবনুরে বাউণ্ডুলে-স্বভাব শিল্পীকে নিয়ে সত্য ঘটনা আর জল্পনা-কল্পনাব মিশে লেটে যায়। মুখরোচক কাহিনী পচারের একটা রেওয়াজ দাঁড়িয়ে গিয়েছিল এত কিছুদিন আগে পর্যন্তও আমাদের সাহিত্য-সংসারে। রেওয়াজটি বন্ধ হওয়া দরকার।

অনুপক্ষে অধ্যাপকীয় সমালোচকদের কৃপায় স্তুতিবাদও হয়েছে বড় কম নয়। বাস্তবেব সঙ্গে সম্পর্ক বর্জিত স্তুতিবাদে শুধু যে যথার্থ সমালোচনার কাজটাই ক্ষতিগ্রস্ত হয় তাই নয়, স্তুতির বিষয়ীভূত লেখকের প্রতিও বিলক্ষণ অবিচার করা হয়। তিনি তখন সত্যের প্রতিষ্ঠাভূমি থেকে বিচ্যুত হয়ে নিছক ভক্ত-আরাধ্য অসার বিগ্রহ-শিলায় পরিণত হন। কিতাবী ধারার স্তুতিকারক সমালোচকদের এই বিগ্রহীকরণেব প্রবণতাটিও রুদ্ধ হওয়া দরকার।

আমাদের এই দুই প্রবণতার বিপদ সম্পর্কেই সতর্ক থাকতে হবে। সত্য কখনও প্রান্তে বিরাজ করে না—এই বিপরীত প্রান্তীয় স্তরের কোন একটা মধ্যস্থলে তার অধিষ্ঠান। আমাদের সেই মধ্যস্থলটি খুঁজে বার করতে হবে আর সেটি খুঁজে নিয়ে সেখানে শরৎচন্দ্রকে তাঁর স্ব-স্বরূপে প্রতিষ্ঠিত করতে হবে। বর্তমান নিবন্ধ সেই রকমেরই একটি অভিপ্রায় থেকে প্রসূত।

শরৎ সাহিত্যের মূল্যায়ন-ক্রিয়ায় আগ্রসর হওয়ার গোড়ায় প্রথমেই এই মৌলিক তথ্যটি স্বীকার করে নেওয়া প্রয়োজন যে, তিনি ছিলেন মধ্যবিভক্ত রোদ্ভূত লেখক। তাঁর জন্ম, কৌলিক পরিবেশ, শিক্ষা-দীক্ষা-আবেষ্কনী,

যৌবনের ক্রিয়াকলাপ, উত্তর-জীবনের ছাঁচ—সব কিছু তাঁর এই মধাবিত্ত-মূলতঃ সাম্প্রদায়িক বৈশিষ্ট্যের প্রতি ইঙ্গিত করেছে। এবং যেহেতু ছিলেন তিনি মূলতঃ মধাবিত্ত সম্প্রদায়ের একজন প্রতিনিধিস্থানীয় লেখক, সেই কারণে প্রভূতশক্তিশালী আর প্রতিভাধর হওয়া সত্ত্বেও মধাবিত্ত মানসিকতার সীমাবদ্ধতাকে অতিক্রম করা তাঁর পক্ষে সম্ভব হয়নি। এমনকি ব্যক্তিজীবনের, শাসন-বারণ-না-মানা উড়নচণ্ডী বোম্বেমীয়া স্বভাবটিও এইক্ষেত্রে তাঁকে মধাবিত্ত দৃষ্টিভঙ্গীর সংকীর্ণতা আর পশ্চাৎটান থেকে রক্ষা করতে পারেনি। মধাবিত্তের মানসিকতায় দোলচলচিত্ততা অতি স্পষ্ট। ঘড়ির দোলকের মত তার গতি। কখনও মধাবিত্ত মানুষ অগসর ভাবনাব দ্বারা উদ্বেজিত, কখনও রক্ষণশীলতার আবেগের দ্বারা চানিত। বৈজ্ঞানিক সমাজব্যবস্থার পরিভাষা অনুযায়ী পঁচিশ-বর্জ্যেয়া শ্রেণীর যে-গোত্রলক্ষণ, আমাদের বাঙালী মধাবিত্ত শ্রেণীরও সেই একই গোত্রলক্ষণ। চিন্তার স্বতন্ত্রবিরোধ, ভাবাবেগের দৈবতা তার মজ্জায়। এই পরস্পরবিরুদ্ধতার প্রবৃত্তি বা ঝোঁক মধাবিত্ত মানসিকতায় এমন দৃঢ়রূপে সংলগ্ন যে, অশ্রিবড় প্রগতিশীল মধাবিত্ত ভাবকের পক্ষেও তার মায়া কাটিয়ে ওঠা কঠিন। বেশী দূবে যেতে হবে না, শরৎচন্দ্রের রচিত গল্প-উপন্যাসগুলির ছাঁচ থেকেই এ কথাবা নিঃসংশয় প্রমাণ মিলবে।

শরৎচন্দ্র প্রথম ভূ বনে যে-সব পল্ল ভিত্তিক গল্পোপন্যাস রচনা করেছিলেন, যেমন কাশীনাথ, শুভদা, দেবদাস, চন্দ্রনাথ, সিরাজ বৌ, নিষ্কৃতি, বৈকুণ্ঠের উঠল, মেজদিদি, পল্লীসমাজ, অরক্ষণীয়া, পণ্ডিত শাহী ইত্যাদি (উপন্যাস), এবং অনুপমার প্রেম, মন্দির, বিন্দুর ছেলে, রামের স্মৃতি, মামলার ফল, বিলাসী, একাদশী বৈবাগা ইত্যাদি (ছোটগল্প); তাদের ভিতর প্রগতিশীল ভাবনা-ধারণার বিশেষ কোন ছাপ নেই। এসব রচনা আমাদের দীর্ঘকালীন প্রথাবদ্ধ সংস্কারমালিত বর্জিতগতের সম্পর্কচ্যুত অনগ্রসর গ্রামীণ জীবনযাত্রাব এক নিখুঁত বাস্তব চিত্র। তাতে কোথাও কোথাও সামন্ততান্ত্রিক ভূমি-ব্যবস্থার শোষণ ও অত্যাচারের নিষ্পেষণে পিষ্ট অসহায় মানুষের কাতরতাব ছবি পাই, পাই কৃত্রিম ও নিষ্ঠুর সামাজিক অনুশাসনের দ্বারা অবদমিত, দলিত নারীহৃদয়ের নীরব মর্মবেদনার চিত্তস্পর্শী আলেখ্য; কিন্তু রচনাগুলির মূল সুর প্রতিবাদের বা প্রতিরোধের নয়; বরং একটু তলিয়ে দেখলে দেখা যায় ওই সব পল্লী-আশ্রয়ী গল্প-উপন্যাসগুলিতে প্রচলিত সামাজিক কাঠামোর আওতায় যেসব মূল্যবোধ যুগ যুগ ধরে লালিত হয়েছে তাদেরই জয়গান করা হয়েছে।



কোথাও গতানুগতিক সমাজ-পদ্ধতিকে বদলাবার কথা নেই, তেমন চিন্তা চরিত্রগুলির মানসিকতায় ভুলেও স্থান পায় না ; তার বদলে যেটা পাই তার নাম প্রচলিত অবস্থা-ব্যবস্থাকে অবিরোধে স্বীকার করে নেওয়ার প্রবৃত্তি, তার কাছে আত্মসমর্পণের ঝোঁক।

এই-একটি দৃষ্টান্ত দিলে কথাটা আরও পরিষ্কার হতে পারে। শুভদা উপন্যাসের শুভদা, বিরাজ-বৌয়ের বিরাজ, চন্দ্রনাথের সরযু, পণ্ডিতমশাইয়ের কুমুম, দেনা-পাণ্ডনার ষোড়শী ( অলকা ), শ্রীকান্ত প্রথম পর্বের অন্নদাদিদি, স্বামী উপন্যাসের সৌদামিনী প্রভৃতি নারীচরিত্র ভাবগম্য নারীহৃদয়ে আবহ-মানকাল থেকে বদ্ধমূল অলঙ্ঘনীয় প্রতিবর্তের আদর্শের যুগ্মমূলে উৎসর্গীকৃত কতকগুলি প্রতিবাদতীন বলি মাত্র। এদের 'একজননার মধ্যে, যেমন ষোড়শী আর কুমুমের মধ্যে তবু পানিকটা আত্মমর্জাদা আর আত্মস্বাতন্ত্র্যের ভাব ফুটে উঠেছে বাদবাকী নারীচরিত্রগুলিতে স্বামীর প্রতি প্রগল্ভ্য একাত্মব্রতী ও বিনিঃশেষ আত্মসমর্পণের আকৃতি ভিন্ন পরিণামে আর কোন মনোভাবকে জায়গা ছেড়ে দেওয়া হয়নি। এদের মধ্যেও আবার বিশেষ করে শুভদা আর অন্নদাদিদি স্বাধীনতা ও অবমানিতা নারীত্বের জীবন্ত প্রতীক। সর্বসংস্কারগ্রস্ত চেয়েও বেশী তাদের সহিষ্ণুতা ; স্বামীর শত অত্যাচার গঞ্জনা-প্রপীড়নেও তাদের মুখে রা সেরে না এমনি পতিঅন্তপ্রাণ এই দুই নারীর সত্তা। স্বামী অত্যাচারের বিরুদ্ধে প্রতিবাদ বা প্রতিরোধের কোন কথাই ওঠে না। এই দুই চরিত্রের মাধ্যমে যা দেখানো হয়েছে তা নারীত্বের প্রতিষ্ঠা নয়, পত্নীত্বের প্রতিষ্ঠা, অর্থাৎ নির্বিচার পতিভক্তির মহিমার উদ্‌ঘোষণ।

অণুপক্ষে, বড়দিদির মাধবা, দেবদাসের পার্বতী, পল্লীসমাজের রমা প্রভৃতি চরিত্রের রূপায়ণের মধ্যে সামাজিক অনুশাসনের ত্বরতা দেখানো হলেও তেমন নির্ণয়তার অনিবার্যতাকে যেন প্রগা না করেই মেনে নেওয়া হয়েছে। মাধবা আর রমার বেলায়, বিধবার প্রেমকে ভুলেও প্রশ্রয় দেওয়া হয়নি, বরং হৃদয়ের ক্ষত হৃদয়ে বহন করে নতমুখে সামাজিক নিষেধাজ্ঞার শাসনের কাছে ওই প্রেমকে আত্মোৎসর্গ করতেই যেন পরামর্শ দেওয়া হয়েছে। দেবদাসের সঙ্গে পার্বতীর বিশেষ হতে পারলে দেবদাসের জীবনটা এমনভাবে নষ্ট আর ব্যর্থ হতো না। কিন্তু দেবদাসের মদ আর মেয়েমানুষকে কেন্দ্র করে আত্মধ্বংসের প্রবণতার মধ্যে একটা মেলোড্রামাটিক ভাবাতিশ্যকেই শুধু বড় করে তুলে ধরা হয়েছে, অত্যাচার সমাজ-ব্যবস্থার

অনুচিত বিধানকে মোটেই সমালোচনা করা হয়নি। বস্তুতঃ, সেই দিক দিয়েই লেখক যাননি। শরৎচন্দ্র তাঁর ভাষণে প্রবন্ধে চিঠিতে বঙ্কিমচন্দ্রের নীতিবাদীমূলভ রক্ষণশীল মনোবৃত্তিকে একাধিক উপলক্ষ্যে কটাক্ষ করলেও এই পর্বের লেখাগুলিতে কিন্তু তিনি বঙ্কিমচন্দ্র থেকে বিশেষ কিছু অগ্রসরতার পরিচয় দিতে পারেননি। বরং শ্রীযুক্তা লীলারাগী গঙ্গোপাধ্যায়কে লিখিত এক পত্রে তিনি এই বলে আত্মপ্রসাদ প্রকাশ করেছেন যে, তিনি তাঁর বইয়ে একটি বিধবারও পুনর্বিবাহ ঘটাননি। এই আত্মতুষ্টিতে বলিষ্ঠতার কিছু নেই। প্রচলিত সামাজিক সংস্কারের কাছে অসহায় নতি স্বীকার ছাড়া একে আর কিছু ভাবা যায় না।

পক্ষান্তরে, বিন্দুর ছেলে, রামের সূত্রি, মামলার ফল প্রভৃতি গল্প মূলতঃ বাৎসল্য রসের গল্প। বাৎসল্য রস আর সেবাপরায়ণতার মধ্যে যে-অনুপম মাতৃত্বের মহিমা প্রকটিত তাকেই অনবদ্য ভাষায় ও ভঙ্গীতে শিল্পীর সমস্ত দরদ ঢেলে তিনি এই গল্পগুলিতে পরিবেশন করেছেন। কিন্তু সনাতন মাতৃত্বের এই রূপায়ণে পাঠক হিসাবে আমাদের প্রাণমন ভরলেও একথা বারেকের জ্ঞাও বিস্মৃত হওয়া উচিত নয় যে, যে-সমাজ-কাঠামোর আশ্রয়ে তিনি এই মধুর স্নেহ ও সেবার চিত্র এঁকেছেন, তা আমাদের বাংলার ষাট-সত্তর বছর আগেকার আপনাত্তে-আপনি-বন্ধ কুপমণ্ডুক অজ-পাড়াগাঁয়ের ট্র্যাডিশনাল সমাজ-কাঠামো। এমনি নীরন্ধ আর নিরেট এই পল্লীসমাজের গঠন যে, বাইরের আলো-বাতাস কোন ফাঁক-ফোকর দিয়েই সেই পল্লী-সমাজের অভ্যন্তরে প্রবেশ করতে পারে না। ওই গ্রাম নাগরিক জীবনের সর্ববিধ ভাবপরিমণ্ডলের সংস্পর্শরহিত, প্রগতিশীল ধ্যান-ধারণার ছিটে-ফোঁটা প্রভাবও পল্লীর ওই চিরাভ্যস্ত বাতাবরণেব ভিতর খুঁজে পাওয়া যাবে না।

অথচ আশ্চর্য এই যে, গতানুগতিক সমাজ-কাঠামোয় দ্বুত শরৎচন্দ্রের এইসব গ্রামীণ গদ্য-উপন্যাসগুলিই শিল্পোৎকর্ষের দিক দিয়ে সবচেয়ে বেশী উৎরেছে। শিল্পের এ এক আশ্চর্য রহস্য যে, চিন্তার দিক দিয়ে অ-বিপ্লবী, বিষয়বস্তুর দিক দিয়ে সনাতন রচনাও রসকৌলীন্তের শ্রেষ্ঠ শিরোপা লাভ করতে পারে। যেমন, বিরাজ-বৌ একটি ঐতিহ্যবাহী পতিভক্তির গল্প, কিন্তু অসামান্য তার রসের আবেদন। নিষ্কৃতি গ্রামীণ যৌথ পরিবার প্রথার একটি তিস্ত-মধুর সংসার যাত্রার কাহিনী, কিন্তু এমনধারা হাজার কাহিনীর দঙ্গল

থেকে একে আলাদা করে চিহ্নিত করা চলে এমনি তার শিল্পের জোর। পণ্ডিতমশাই বিনাদোষে স্বামী-পরিত্যক্তা এক গ্রাম্য যুবতীর কাহিনী, কিন্তু মনস্তত্ত্বের আলো-ছায়ার লালার অসাধারণ আলেখ্যায়নের জন্য এই উপন্যাসটি সমগ্র শরৎ-সাহিত্যে একটি বিশিষ্ট স্থানের অধিকারী। রামের সুমতি একটি জটিলতাবর্জিত বাৎসল্যের গল্প, কিন্তু অপ্রতিরোধ্য তার আকর্ষণ। কবি দ্বিজেন্দ্রলাল রায় এই গল্পটিকে বাংলা সাহিত্যের একটি শ্রেষ্ঠ গল্প আখ্যা দিয়েছেন, অকারণে দেননি।

কাজেই দেখা যাচ্ছে, বচনার বিষয়বস্তু যতই সাদাশাঠা আর প্রচলিত সমাজ-কাঠামোব আশ্রয়ী হোক-না কেন, তাব কাহিনী-বৃত্তের উপর থাকুক না কেন পুরাতন-পরিচিত পরিবেশের ছাপ, চরিত্রগুলি মনে হোক-না কেন চিরচেনা ও গতানুগতিকই বিশিষ্ট; লেখবার কলম যদি হাতে থাকে, আর সেই কলমে জাহ্ন করবাব মত থাকে প্রতিভার রসায়ন লেখকের করায়ত্ত, তাহলে এই মামুলিত্বের ভিতর থেকেই অনাস্বাদিতপূর্ব রস নিষ্কাশন করা যায়, যেমন করতে পেয়েছেন শরৎচন্দ্র তাঁর প্রথম পর্বের পল্লীকেন্দ্রিক গল্পোপন্যাস-গুলিতে। পরবর্তী রচনাগুলিতে বুদ্ধিব ওজ্জ্বল্য আছে, আছে প্রতিবাদ ও বিদ্রোহের দ্যোতনা কিন্তু সৃষ্টিশীলতার সম্মোহন নেই।

এবারে এই প্রবন্ধের মূল প্রতিপাদ্যে, কেন্দ্রীয় বিষয়টিতে আসা যাক। আমি মধ্যবিত্ত মানসিকতার মজ্জাগত দোলাচলবৃত্তির কথা বলেছি। দোহুল্য-মানতা মধ্যবিত্তের স্বভাবে নিহিত বলে ইঙ্গিত করেছি। কথাটার যথার্থ্য শরৎ-বচনায় ধীরে ধীরে উন্মোচিত হতে থাকল। বয়োবৃদ্ধি এবং সাহিত্য-সংসারের অভিজ্ঞতাবৃদ্ধির সঙ্গে সঙ্গে শরৎচন্দ্রের চেতনা ক্রমেই এই উপলব্ধির কিনারায় এসে উপস্থিত হলো যে, যতই শিল্পসৌন্দর্যমণ্ডিত করে গতানুগতিক বিষয়বস্তুকে পরিবেশন করা যাক-না কেন, মননশীলতার আকৃতি ছাড়া, পাঠকের মনে চিন্তা উদ্রেক করবার মত বিতর্কিত প্রশ্ন ও সমস্যা়ার অবতারণা ছাড়া, এ যুগের নাগরিক পাঠকের বিদগ্ধ রুচি ও চাহিদার পরিতৃপ্তি সম্ভব নয়। বিচক্ষণ পাঠকের মন পেতে হলে তাঁর ভাবনা-ধারণার গ্রহণযোগ্য করে রচনার কাহিনী ও চরিত্র সাজানো দরকার। খুব সম্ভব বিশ্বসাহিত্যের সঙ্গে ক্রম-ঘনিষ্ঠতর পরিচয় ও রেঙ্গুনপ্রবাস থেকে কলকাতায় ফিরে আসার ফলস্বরূপ বৃহত্তর আবেষ্টনীর মধ্যে নিক্ষিপ্ত হওয়ার অভিনবত্বের বোধ তাঁর এই উপলব্ধিকে আরও বেশী শাণিত করে থাকবে।

তাই দেখি শরৎচন্দ্রের কল্পনা এখন থেকে এমন সব চরিত্র সৃষ্টির অভিযুক্তে ঝুঁকছে, যে-চরিত্র প্রচলিত নিয়মের আনুগত্য স্বীকারের বদলে নিয়ম ভাঙতেই অস্তিত্বের সার্থকতা বেশী খুঁজে পেয়েছে। অর্থাৎ, মধ্যবিত্ত মানসিকতার ঘড়ির দোলক এবার একপ্রান্ত থেকে সম্পূর্ণ অন্যপ্রান্তে চলে যাওয়ার জন্য প্রস্তুত। নইলে এ কথা কে কবে ভাবতে পেরেছিল যে, যিনি একদা শুভদা, বিরাজ, অন্নদাদিদি, সৌদামিনী প্রভৃতি নাবীচরিত্র রূপায়ণের মধ্য দিয়ে সনাতন পাণ্ডিত্যের আদর্শকে মহিমামণ্ডিত আকারে ফুটিয়েছেন, তিনিই আবার মেজাজ-মানসিকতার আর একটি ফেরতের কালে অভয়া, সুনন্দা, কিরণময়ী, সুমিত্রা, কমল, এমনকি অচলার মত চরিত্র সৃষ্টি করতে পারবেন? শেষোক্ত চরিত্রগুলির কোনটিই সংস্কারের হাতে-ধরা হয়ে চলার প্রবৃত্তি বা অভ্যাসযুক্ত বস্তু জীবন নয়; উল্টো, প্রচলিত সমাজের নিয়ম-কানূনের বিরুদ্ধে বিদ্রোহেই তাদের সত্তার সার্থকতা। চরিত্রগুলিকে আর একটু পরিস্ফুট করে দেখলেই এই মন্তব্যের সারবত্তা হৃদয়ঙ্গম করা যাবে।

তাকে মন্ত্র-পড়ে-বিয়ে-করা স্বামীর বিরুদ্ধে বিদ্রোহ ঘোষণা করে অভয়া এমন একজনকে স্বামিরূপে গ্রহণ করলো, যাকে পতিত্ব বরণের সামাজিক অনুমোদন হয়ত এদেশে কোন কালেই মিলবে না, কিন্তু সত্যিকার প্রেমের অঙ্গীকারে যাব সঙ্গে সম্পর্ক সকল প্রকার অগ্নিপরাঙ্কায় স্নাত্ত্বর্ণ। আপাত-দৃষ্টিতে রোহিণী পরপুরুষ বলে মনে হলেও তার প্রতি অভয়ার আকর্ষণ ভালবাসার সত্যের উপর দাঁড়িয়ে আছে, সুতরাং নির্মল ও বিশুদ্ধ এ বন্ধন। একটা কদাচারী, মদ্যপ, বিয়ের-পরেই-স্ত্রীকে-ফেলে-পালিয়ে-আসা জানোয়ারকে শুধুমাত্র মন্ত্রসাক্ষিত্বের নজিরে চিরকাল পতিরূপে ভজনা করার মধ্যে নারাত্ত্বের যে-অবমাননা লুক্কায়িত রয়েছে, তার বিরুদ্ধেই অভয়ার ব্যক্তিত্ব-ব্যঞ্জক বিদ্রোহ। ধরা যাক অন্নদাদিদি চরিত্র—ওই চরিত্রের আদলের সঙ্গে কি এই চরিত্রের কিছুমাত্র মিল আছে? সুনন্দাও বিদ্রোহী চরিত্র, তবে তার বিদ্রোহ নারাত্ত্বের অবমাননার বিরুদ্ধে নয়, সামাজিক অত্যাচার-অবিচারের বিরুদ্ধে। গ্রামীণ ভূমিব্যবস্থার সঙ্গে সম্পর্কিত একটা অর্থনৈতিক অত্যাচারের প্রতিবাদিনীর ভূমিকায় সুনন্দা চরিত্রের অন্তর্নিহিত তেজ ও সাহস ফুটে উঠেছে। কিরণময়ী একটি আশ্চর্য চরিত্র, খতিয়ে দেখতে গেলে শরৎচন্দ্রের সৃষ্ট তাবৎ নারী-চরিত্রের মধ্যে এইটি সবচেয়ে ব্যক্তিত্বময়ী চরিত্র। সে শাস্ত্র মানে না, ঈশ্বর মানে না, প্রথাবদ্ধ পতিনিষ্ঠা কিংবা পতিসেবায় বিশ্বাস করে না, স্বামী বর্তমানে

পরপুরুষকে সৌন্দর্যের কুংকে ভুলিয়ে স্বার্থসাধন করতে কিংবা স্বীয়-উন্মুখ-প্রেম-প্রত্যাখ্যানকারী প্রণয়াম্পদকে জব্দ করবার জন্য তারই স্নেহের পাত্র বালকতুল্য এক আত্মায়কে বখাতে তার নীতিতে বাধে না; কিন্তু তৎ-সত্ত্বেও কী ক্ষুরধার চরিত্র! কিন্তু পূর্বেই বলেছি শরৎচন্দ্রের মধ্যে বিদ্রোহের আকৃতিটা একটা স্থায়ী কোন আবেগ নয়, তা পর্বান্তরের পবিবর্তিত চিত্র। ও চেতনার স্রোতোমুখে ভেসে আসা একটা সাময়িক আবেশ। মধ্যবিত্ত দৃষ্টি-ভঙ্গ্য মজ্জাগত দ্বৈধতা-দোদুল্যমানতারই এ একটা রকমফের মাত্র। আর এই দোদুল্যমানতার জগুই দেখা যায়, এমন যে বিদ্রোহিনী নারী কিরণময়ী, তাকে শেষ অবধি বিদ্রোহিনী রূপে জয়যুক্ত করে আঁকতে তাঁর মাতসে কুলায়নি—কাহিনীর পরিণতিতে তিনি কিরণময়ীকে পাগল বানিয়ে ছেড়েছেন। পাগলিনার দায়-দায়িত্ব স্বীকারের কোন বাত্মেলা নেই, সে প্রায় মৃত্যুরই সামিল; এই উপায়ে শরৎচন্দ্র বিদ্রোহ ও সমাজ-বশ্যতার মধ্যে আপস-রফা করে চরিত্র সাহসিকতার দায় এড়িয়েছেন। মধ্যবিত্ত স্বভাবের ভাবগত জগুই এমনটা ঘটতে পেরেছে বলে সন্দেহ হয়।

সুমিত্রা ‘পথের দাবী’ নামক বিপ্লবী দলের নেত্রী। তার বিগত ৩ বন কিংবা বিপ্লবী দলের মঞ্চালিকা রূপে তাঁর নূতন জীবনের ক্লিয়াকলাপ কোনটাই আমাদের দেশের অভ্যস্ত নাব্যবসায়ের সঙ্গে মেলে না। সে স্বল্পবাক্য, মর্যাদাময়ী, দৃষ্ট ব্যক্তিত্বের অধিকারিণী, ভাবাবেগের বহিঃপ্রকাশ দমনে কুশল। তার রূপের ছটায় তার বুদ্ধির প্রাণবীর্ষ আড়াল পড়ে না। অল্পদাদিদি, বিরাজ, শুভদা, সুবাবা প্রভৃতি চরিত্রের আদলের সঙ্গে তুলনা করলেই আমরা বুঝতে পারব শরৎচন্দ্র তাঁর পূর্বতন চরিত্রায়নের সংস্কার থেকে কত ব্যবধানে চলে এসেছিলেন নূতনের টানে। নূতনত্বের আকর্ষণের আর একটি উজ্জ্বল ফলশ্রুতি, শেষ প্রশ্ন উপত্যাসের কমল চরিত্র। কমলকে তিনি বিদ্রোহের এক মূর্তিমতী প্রতীক রূপে দাঁড় করিয়েছেন। পথের দাবীর সব্যসাচী যদি হয় রাজনৈতিক বিদ্রোহের জ্বলন্ত প্রতীক, কমলকে বলতে হয় সামাজিক বিদ্রোহের বাণবাহিকা, প্রতিবাদের এক দীপ্ত মূর্তি। সে একদিকে পাশ্চাত্যের ক্ষণিকবাদের আদর্শে আস্থাশীল, অতীতকে প্রাচীন ভারতের সনাতন সভ্যতা ও সংস্কৃতির মোহের কবল থেকে সম্পূর্ণ বিমুক্ত। স্বামীর প্রেমকে সে শ্রদ্ধা করে কিন্তু প্রেম যদি মালা না হয়ে জঁীর গলায় পরাধীনতার শৃঙ্খল রূপে ভারের মত চেপে বসে তবে সে সেই শিকল ছিঁড়ে বেরিয়ে আসতে

মুহূর্তেকের দ্বিধা করে না। প্রেমহীন স্বামিত্বের স্থায়িত্বে তার বিশ্বাস নেই, পরন্তু প্রেমপূর্ণ স্বামিত্ব, তা যতই স্বল্পকালীন হোক, তাকে মর্যাদা দিতে সে সর্বদাই প্রস্তুত। এদিকে, গৃহদাহের অচলা দুই পুরুষের মধ্যে বিভক্ত প্রবৃত্তির প্রতীক। আপনার স্বরূপকে চিনতে-না-পারা অন্তর্দ্বন্দ্বে জর্জরিত। এক প্রণেলিকাময়ী নারী।

এমন সব নারীর আদলের সঙ্গে কি শুভদা কিংবা অন্নদাদিকে মেলাবার যো আছে? অথচ সব কয়টি চবিত্র একই লেখকের সৃষ্টি—একই লেখক তাঁর সাহিত্যজীবনের দুই ভিন্ন অধ্যায়ে এই দুই ধরনের চরিত্রের জন্ম দিয়েছেন। বলা হবে সৃষ্টিধর্মী লেখকমাত্রেই বৈচিত্র্য সন্ধান, তাঁরা একটিমাত্র চরিত্রায়ণের ছাঁচে সন্তুষ্ট কিংবা বেশীকাল আবদ্ধ থাকতে পারেন না—অভিনবত্বের আকর্ষণে তাঁকে নতুন নতুন চরিত্রের পরিকল্পনা আর রূপদান করতেই হবে। কিন্তু শরৎচন্দ্রের বেলায় শুধুমাত্র বৈচিত্র্যাস্পৃহা দ্বারা এই বিভিন্নতার ব্যাখ্যা হয় না। এমনতর বিভিন্নতার সন্তোষজনক ব্যাখ্যার জন্ম আমাদের আরও গভীরে দৃষ্টি সঞ্চালন করতে হবে। বুঝতে হবে এই কথা যে, মধ্যবিত্তের অস্থিরচিত্ততাই তাঁকে কখনও প্রথাবদ্ধতা কখনও প্রথার বিরুদ্ধে বিদ্রোহের মন্ত্রণা যুগিয়েছে। তেমন করে সমাজ ভাঙার ডাক তিনি দিতে পরেননি, কেননা তাঁর নিজের মধ্যেই রক্ষণশীলতার পেছুটান বরাবর সংলগ্ন হয়ে ছিল—কখনও জ্বাতে কখনও অর্ধজ্বাতসারে, কখনও প্রত্যক্ষে কখনও পরোক্ষে।

এ কথা যে কথার কথা নয় তা শরৎচন্দ্রের আর একটি পর্বান্তরের রচনার দ্বারা বিচার করলেই বুঝতে পারা যাবে। আমি তাঁর শেষ বয়সের লেখার কথা বলছি। অবিশ্বাস্য হলেও এ কথা সত্যি যে, যিনি সব্যসাচীর মত এদেশের বিপ্লবী স্বাধীনতাযোদ্ধাদের নিত্যপ্রেরণার আধারস্থল এক সুমহান্ নিভীক চরিত্রের সৃষ্টি করেছিলেন, তিনিই আবার শেষবয়সের পশ্চাদ্গতির টানে বিপ্রদাসের মত একটি প্রতিক্রিয়াশীল উপন্যাসের সংরচন করে বৈপ্লবিকতার আগুনের উপর স্বহস্তে জল ঢেলে দিয়েছিলেন। বিপ্রদাস উপন্যাসের নাম-চরিত্র দৌর্দণ্ডপ্রতাপ জমিদার, কেমন করে কঠোরহস্তে প্রজাশাসন করে জমিদারী রক্ষা করতে হয় তার কৌশল তিনি জানেন। তাঁর ব্যক্তিত্বে লেখক অনেকগুলি মহনীয় গুণের আরোপ করলেও এবং অগ্রথা বিপ্রদাস সংমানুষ হলেও,—হিন্দুয়ানীর তিনি এক পয়লা নম্বরের ধ্বজাধারা

—জপতপ, পূজা-আর্চায় সতত নিবেদিতচিত্ত, ছোঁয়াছুঁয়ির বাজবিচার মেনে চলায় উৎসর্গ। গতানুগতিক মূল্যবোধ আর সনাতন জীবনযাত্রার আদর্শে বিশ্বাসী এমন এক পুরনো জগতের মানুষকে শেষ বয়সের লেথায় একটি আদর্শ চরিত্ররূপে দাঁড় করানোর চেষ্টা, আর যাই হোক লেথাকে বৈপ্লবিকতাব্যবস্থার আন্তরিকতায় আত্মবিশ্বাসের সঞ্চার করে না। বরং রচনার একটি পর্বে বৈপ্লবিকতা, প্রতিবাদ বা প্রতিরোধ যে একটা তাৎক্ষণিক আবেগ মাত্র ছিল, সেই সন্দেহকেই আরও জোরালো করে।

আরও প্রমাণ আছে। শ্রীকান্ত চতুর্থ পর্বের কমললতা বৈষ্ণবকে শেষ প্রশ্নের কমলের প্রতিস্পর্ধিনী রূপে দাঁড় করালেই বুঝতে পারা যাবে শব্দচন্দ্র শেষ বয়সে প্রতিক্রিয়ার কোন আঘাতায় গিয়ে তাঁর লেখনীর যাত্রা থামিয়েছিল। কমল তাঁক্ষুব্ধি সপ্রতিভ সঙ্গীতবিচারশীল। এক নারী, যুক্তির নিরিখে ঘনেষু তব সে তাবৎ বিষয়ের ভাল-মন্দের বিচার করে, পুণ্যতন বলেই তাব কাছে কোন-কিছু গ্রাহ্য বা মান্য নয়; পক্ষান্তরে কমললতা শ্রীকৃষ্ণের সর্ব-অস্তিত্ব-সমর্পণকারী প্রশংসন ভক্তির এক মূর্তিমর্তী রূপ। এই দুই বিপ্রতীপ চরিত্র-পরিচয়কে এক অখণ্ড শিল্পকল্পনার সামঞ্জস্যে মিশ খাওয়ানো কঠিন, যদি-না অবশ্য মধ্যস্থিত মানসিকতার পরস্পর-বিরোধিতাকে অসামঞ্জস্যের এক প্রতিতিযোগ্য ব্যাখ্যা রূপে দাঁড় করানো যায়।

আসলে শব্দচন্দ্রের খোদ শিল্পচেতনার মধ্যেই দ্বৈতবিরোধ ছিল। তাঁর বংশগত কৌলিক পরিবেশ, শিক্ষাদিক্ষা আর জীবনযাত্রার ধরন-পন্থা থেকেই এই দ্বৈধতার উদ্ভব। তাই কখনও তিনি রক্ষণশীল, কখনও বিপ্লবী। এই দুই ভূমিকা একটি আর একটিকে কাঁচিয়ে দিয়েছে। দুটি ভূমিকা একটি বৃহত্তর সমন্বয়ে অখণ্ড রূপ লাভ করতে পারলে, সে কি চমৎকাবই না হতো!

## ॥ ১৬ ॥

### দ্বৈধতা—২

শরৎচন্দ্রের সমাজ-চেতনা বিষয়ে পূর্বে কিছু আলোচনা করেছি (‘সমাজ-চেতনা’ প্রবন্ধ দ্রষ্টব্য)। এখানে তাঁর সমাজ-চেতনার একটা বিশেষ দিক আবও সবিস্তারে তুলে ধরতে চাই—দ্বৈধতার দিক, যার কথা পূর্ববর্তী প্রবন্ধেও কিছু বলেছি। দ্বৈতাবিরোধের প্রবণতা থেকে এই দ্বৈধতার উদ্ভব।

সব বড় লেখকই তাঁদের কথাসাহিত্যে বা কাব্যে বা নাট্যে সমাজকে কম-বেশা পৃষ্ঠপট রূপে ব্যবহার করে থাকেন। শরৎচন্দ্রও এ নিয়মেই ব্যতিক্রম নন। তাহলে বিশেষ করে শরৎ-সাহিত্যেও বেলায়ই সমাজ-চেতনা বস্তুতিকে আলাদা করে চিহ্নিত কববার কি কাবণ থাকতে পারে? তাঁর দ্বৈত সন্দর্শনেবই বা কী আবশ্যিকতা?

এর জবাবে বলি: যার শরৎচন্দ্রের রচনাবলী অত্যন্ত নিবিড়ভাবে সমাজ-সম্পৃক্ত। সমাজের ভাল-মন্দ দোষ-গুণ আলো-আঁধার শরৎ-সাহিত্যে যেরকম স্পষ্ট-প্রত্যক্ষভাবে ফুটে উঠেছে এমন বোধ করি তাঁর পূর্বসূরী বাঙালী লেখকদের লেখায় ফুটে ওঠেনি। বঙ্কিমচন্দ্রের সমাজ-মনস্কতা সুবিদিত। তাঁর রচনাবলী সমাজ-ভাবনায় দাপ্ত। তবে সমাজের বাস্তব রূপ অঙ্কন অপেক্ষা সমাজের আদর্শ রূপ কা হতে পারে, হওয়া উচিত, তারই রূপবেশা অঙ্কনে তিনি যেন সমধিক ব্যস্ত ছিলেন তাঁর উপন্যাসগুলির কাহিনীবিগ্রাম ও চরিত্রায়ণের ধারার ভিতর। তিনি সমাজপতির ভূমিকা গ্রহণ করেছিলেন। রবীন্দ্রনাথও তাঁর গল্পে উপন্যাসে কাব্যে বাংলার সমাজের চিত্র নিবিড়ভাবে উপস্থিত করেছেন, তবে তাঁর উপস্থাপনার বীতির ভিতর বাস্তবের সঙ্গে কল্পনার এমন মধুর মিশ্রণ ঘটেছে যে, প্রায়ই বাস্তবের প্রত্যক্ষতাকে ছাপিয়ে সৌন্দর্যের রূপলোক বেশা উজ্জ্বল হয়ে উঠেছে পাঠকের চোখে।

শরৎচন্দ্র সমাজপতিও নন কবিও নন। তিনি সমাজের বাস্তবতার রূপকার। সমাজকে যেমন দেখেছেন তেমনি এঁকেছেন। বিশেষ করে বাংলার পল্লীসমাজ তাঁর লেখায় অতিশয় জীবন্ত হয়ে প্রকাশ পেয়েছে তার ভাল-মন্দ সমেত। বাংলা কথাসাহিত্যে সত্যিকার রিয়ালিজমের ধারার



প্রবর্তক ‘স্বর্ণলতা’-বচয়িতা আরকনাথ গঙ্গোপাধ্যায়, তার পরেই শরৎচন্দ্র। শরৎচন্দ্রের পল্লীচিত্রের বৈশিষ্ট্য এখান থেকে নেওয়া যে, তিনি বাংলার গ্রাম-সমাজকে আদর্শায়িত্ব করে কখনও তাঁকেই যাননি, বাব বাব তাঁকে তার স্ব-স্বরূপে আঁকবার চেষ্টা করেছেন। গ্রামবাসী দেবী হৃদয়-সম্পদের পাশে পাশে তাদের হৃদয়-কার্পণ্যের ছবিও অনেক আঁকেছেন। গ্রামীণ নব-নারীর প্রেম-পীড়িত ভালবাসা স্নেহ-বাৎসল্য সেবার মাদরাসী ইত্যাদি সদৃশ্যের দিকগুলি যেমন তুলে ধরেছেন, তেমনি তাদের স্রষ্টাবের কুশীলতা মালিগা কুটিলতা দ্বৈধ-চিন্তার ভাবকেও প্রয়োজনবোধে নিখুঁতভাবে ফুটিয়ে তুলেছেন। সমাজের এই বিশ্লিপ্ত চিত্র তিনি না দেখিয়ে পাবেননি, কেননা তাঁর অন্তরের পক্ষপাত ছিল সমতার প্রতি, আদর্শায়ণ বা কাব্যসৌন্দর্যের প্রতি নয়। বাস্তবতার ত্রিগিদে তিনি বস্তুত কেই মর্যাদা দিয়ে গেছেন বরাবর।

হবে সমাজের ছবি তুলে ধরলেও সমাজের সমাধান তিনি কখনোই দিয়েছেন বা দিতে পেরেছেন। তিনি সমাজ উপস্থিত করেই থালাস, তার সমাধানের দায়িত্ব নিজের হাতে নিতে চাননি। বলেছেন, এ দায় সমাজের, সাহিত্যিকের নয়। “সাহিত্যে অর্ট ও ওর্নীতি” প্রসঙ্গে (মহাগঞ্জ সাহিত্য-সভার সভাপতিত্ব ভাষণ, ১৯৩১) তিনি তাঁর পল্লী সমাজ উপন্যাসের বমা ও রমেশ চরিত্র দুটি উল্লেখ করে একপাশে মন্তব্য করেছেন যে, এ দুটি মহাগঞ্জ নব-নারীর প্রতীক। বর্ণতার মূলে আছে হিন্দু সমাজের বিশেষ গড়ন। তিনি শুধু পাঠকের হৃদয়গ্রাসীবে তাদের বার্তাবাহক বেনাব বার্তাটুকুই পৌঁছে দিয়েছেন, এর বেশি আর কিছু করার তাঁর ছিল না।

এটা রিয়ালিস্টিক শিল্পের মতই কথা, তবে মনে হয় সমাধানের ভার তিনি নিজের হাতে একেবারেই নিতে না চেয়ে কিছু পরিমাণে দায়িত্ব এড়িয়ে গিয়েছেন। এইখানেই শরৎ-সাহিত্যের অপূর্ণতা, শরৎচন্দ্রের সমাজ-ভাবনার দুর্বলতা। শিল্পী-সাহিত্যিক শুধু সমাজকে উপস্থাপনা করেই ক্ষান্ত থাকবেন, সমাজের সমাধান দিতে পারবেন না, এমন কোন ধর্ম-বোধ নিয়ম নেই। বিশেষ করে আধুনিক সাহিত্যে সমাধান দেওয়াটাও লেখকের কর্তব্যের ‘অঙ্গ’ ভূত হয়ে পড়েছে। তাঁর পক্ষে শুধুমাত্র সমাজের স্থিতিশীল রূপটিকে চিত্রিত করাই যথেষ্ট নয়, তার গতিশীল রূপটিকেও তুলে ধরা চাই। সমাজের সঠিক গতিপথের নির্দেশ দেওয়া চাই।

এই মানদণ্ডে বিচার করলে শরৎ-সাহিত্যের শক্তিমাত্রার পাশে পাশে কিছু

কিছু ন্যূনতাও আমাদের চোখে না পড়ে উপায় নেই। তিনি প্রবলভাবে সমাজ-সচেতন মনেই নেই, বস্তুতপক্ষে সমাজের বিষয়ে সজাগতা তাঁর পূর্বাপর সকল বচনার মধ্যেই লক্ষণীয়ভাবে অনুসৃত, কিন্তু তাঁর সমাজ-সচেতনতার পাশে পাশে তিনি তাঁর সমালোচক সত্তাকে তেমন প্রবলভাবে জানান দিতে পারেননি বলেই মনে হয়। তাঁর লেখায় প্রচলিত সমাজ-ব্যবস্থার প্রচ্ছন্ন সমালোচনা আছে, কিন্তু এই সমালোচনাকে তার ব্যায়সম্মত পরিণতিতে নিয়ে গিয়ে এই সমাজ-কাঠামোকে ভেঙে গুঁড়িয়ে ফেলার মন্ত্রণা তিনি দিতে পারেননি। স্থিতিবস্তুর প্রতি মনস্ত্ব কোথায় যেন তাঁকে আটকেছে—রক্ষণশীলতা তাঁর বিদ্রোহী সত্তাব স্ফূর্তির পথবোধ করে দাঁড়িয়েছে। শরৎচন্দ্রের বাস্তব সমাজচিত্রণ সহানুভূতি আর গুণ-কাতরতার অক্ষজলে সিক্ত কিন্তু রোষবহির্বিদ্রা সমপরিমাণে উদ্ভূত বলা যায় কি? তা যদি যেত তো সমস্যার অবতারণাতেই তিনি থেমে থাকতেন না, সমস্যার সমাধানেও সম্মান তৎপর হতেন।

শরৎ-সাহিত্যে সমাজ-চেতনার আলোচনা প্রসঙ্গে একরূপ ক্ষোভের অভিব্যক্তি অনিবার্য বললেও চলে, কেননা শরৎচন্দ্রের মানসিকতার মধ্যেই এমনতরব ক্ষোভের হেতু নিহিত আছে বলে মনে হয়। তিনি বাংলা সাহিত্যে মধ্যবিত্ত সম্প্রদায়ের সবচেয়ে বিশ্বস্ত প্রতিনিধি বলা যায়। এবং যেহেতু তিনি ছিলেন বাঙালী মধ্যবিত্ত জীবনের সবচেয়ে বিশ্বস্ত প্রতিনিধি, সেই কারণে ওই সম্প্রদায়ের অগ্রসরমুখী মনোভাব ও পশ্চাৎমুখী চান দুই-ই তাঁর রচনায় কম-বেশঃ সমান হারে প্রতিফলিত হয়েছে। মধ্যবিত্তের দোলাচলচিত্ততা, দোহলামানতা, দ্বৈধতা শরৎ-সাহিত্যে অনুলিপ্ত হয়ে আছে বললেও চলে। আর সেইটে একটা কারণ, যার জন্য শরৎচন্দ্র সমস্যার সমাধান দিতে ইতস্ততঃ করেছেন, সমস্যার ইঙ্গিত করেই দায়মুক্ত হতে চেয়েছেন। এই দায়িত্ব স্বালনের ইচ্ছার মধ্যেই এককালীন মুদ্রিত রয়েছে তাঁর প্রগতিশীল ও প্রতি-ক্রিয়াশীল রূপটি। কোথাও তিনি প্রগতিশীল, কোথাও রক্ষণশীল। স্বতাবিরোধে তাঁর মানসিকতা খণ্ডিত। তাঁর ব্যক্তিজীবনের উদাহরণ এবং সাহিত্য-সৃষ্টির উদাহরণ এই দুয়ের ভিত্তিতেই বক্তব্যটিকে পরিষ্কৃত করার চেষ্টা করা যেতে পারে।

প্রথমে ব্যক্তি-জীবনের উদাহরণ ধরা যাক। শরৎচন্দ্র একজন জন্ম-বাউলুলে শিল্পী—উড়নচণ্ডী, ভবঘুরে, অস্থিরস্বভাব। জন্মেছিলেন এক রক্ষণশীল কুলীন

ব্রাহ্মণ পরিবারে কিন্তু দারিদ্র্যের নিষ্পেষণ আর স্বভাবের অস্থিরতায় মিলে কৌলীগের প্রথাবদ্ধ সংস্কার-বিশ্বাস তাঁকে পুরাপুরি রক্ষণশীল করে তুলতে পারেনি, মাঝেমাঝেই তাঁর ভিত্তব বাঁধন-ছেঁড়ার আবেগ এনে দিয়েছে। বলা যেতে পারে তাঁর ভবঘুরে জাম্যমাণ স্বভাব তাঁকে বাঁচিয়ে দিয়েছিল, তাঁর শিল্পী-সত্তাকে রক্ষণশীলতার কাছে পরিপূর্ণ আত্মসমর্পণের বিপদ থেকে রক্ষা করেছিল। আপাতদৃষ্টিতে শরৎচন্দ্রের জীবনের যেটা নিয়মবিহীন উচ্ছৃঙ্খল দিক বলে মনে হয়, সেইটাই তাঁর আশাবাদের দিক—তাঁর প্রগতিশীলতার রক্ষাকবচের দিক। নয়তো জন্মার্জিত নিকষ কৌলীগ্য আর ব্রাহ্মণত্বের পশ্চাৎ-গতির টানে এই সমাজের প্রথাবদ্ধ গতানুগতিক ধান-ধারণার পাকে তাঁব হারিয়ে যাওয়া অসম্ভব ছিল না।

শরৎচন্দ্রের সামাজিক দৃষ্টিভঙ্গীর এই এক অশ্রুচর্চা দ্বৈধতা দেখতে পাওয়া যায়। যখনই তিনি বাংলার পল্লাব হিতৈশীল রূপকে তাঁর বিভিন্ন গল্প-উপন্যাসে মূর্তি দেবার চেষ্টা করেছেন, তখনই তাঁর মনের সংস্কারবদ্ধ সনাতন ভারতীয় ঐতিহাসিক গুরুত্ব, সব ছাড়িয়ে বড় হয়ে উঠেছে। পক্ষান্তরে যখনই তাঁর কল্পনা বাংলার গ্রামের গভী পেনিয়ে বাইরের পৃথিবীতে পদক্ষেপ করেছে তখনই তাঁর সংস্কারমুক্ত মনের চেহারাটি আমাদের কাছে বড় হয়ে ধরা পড়েছে। ভবঘুরে যাবাব জীবন যাপনের পালা চলতে থাকাকালে, বিশেষ করে রেঙ্গুন প্রবাসের সময়, তিনি বিচিত্র স্তরের ও ধরনের মানুষের সংস্পর্শে এসেছিলেন। প্রথম যৌবনে সন্ন্যাসী হয়ে খরছাড়া হয়েছিলেন গোটা পাঁচেক বার, এ ভিন্ন ব্রহ্মদেশে অবস্থিতির সুযোগে সুমাত্রা, জাভা, বোর্নিও প্রভৃতি দক্ষিণ-পূর্ব এশিয়ার দেশগুলিও ঘুরে আসার উপলক্ষ্য ঘটেছিল। এই সব বিবিধ অভিজ্ঞতার ফলে তাঁর জাতপাতের সংস্কার লোপ পেয়ে গিয়েছিল—তিনি সর্বসংস্কারমুক্ত হয়ে উঠেছিলেন। পাশ্চাত্যের বোহেমীয় জীবনযাত্রায় অভ্যস্ত শিল্পীদের মতই তাঁর সমাজ ও মানুষ সম্পর্কে দৃষ্টিভঙ্গী গতানুগতিকতারহিত হয়ে পড়েছিল।

কিন্তু এটা তাঁর ব্যক্তিত্বের সর্বস্বর্ণ পরিচয় নয়। তাঁর ব্যক্তিত্বের আর একটা দিক ছিল, যেখানে তিনি কৌলিক সংস্কারের হাতে-ধরা মানুষ, রাঁড়-দেশীয় কুলীন ব্রাহ্মণের বর্ণশ্রেষ্ঠত্বাভিমান এবং এই জাতীয় অগাধ রক্ষণশীল মনোভাবের প্রভাবাধীন। তাঁর জন্মগ্রাম হুগলী জিলার দেবানন্দপুর তিনি ছেড়েছিলেন নিতান্ত বালক বয়সেই। কিন্তু হলে হবে কি, এই দেবানন্দপুরের

বাল্যজিত সঙ্কারগুলির স্মৃতি তাঁকে সারা জীবন রাহুরায়ায় তাড়া করে ফিরেছে। উত্তরকালে কছে-দূরে নানা ভূখণ্ড ঘেষে বেড়ালেও এবং নান ধরনের মানুষের সংস্পর্শে এলেও দেবানন্দপুত্রের পেছুটান তাঁর পক্ষে কোনকালেই আব কাটিয়ে ওঠা সম্ভব হয়নি—ওই ভাব একটা অপরিবর্তনীয় নিয়তির মত তাঁর সমস্তায়ে সংলগ্ন হয়ে গিয়েছিল।

এতাবস্থায় যতাবিরোধ অনিবার্য ছিল। অব হয়েছিলও ঠিক এই। একদিকে সংস্কারমুক্তির অগ্রসর চান এবং অতীতকে সংস্কারবান্ধবতাব পশ্চাদ-বেগ—এই দুইয়ের টানাপোড়েনে মথিত হয়ে শরৎচন্দ্রের সমাজ-ভাবন' পূর্বাপর সমঞ্জস্যপূর্ণ থাকতে পারেনি, তাব মধ্যে মাঝখানেই পরস্পরবিরুদ্ধতাব টান লেগেছে। তিনি আপনাকে আপনি খণ্ডন করেছেন। এই অস্বস্তিগুণের জুই এই এনএব পরস্পরবিরুদ্ধ উক্তি কবা তাঁর পক্ষে সম্ভব হয় যে, তিনি অতীতের চোয়াড়ায় জাতবিরোধ মানেন না আব র মনেন। আমি শরৎচন্দ্রের ঐটিপ' থেকে সংশ্লিষ্ট ঐটিপ'ত্রাংশ হুনে শিচ্ছি।

প্রথম পত্রাংশ :

“চাচ্চি, অমর মতে করে তে মাদেব যদি উপায়াস বচনা করতে হতো ত হলে তে কবা উপায়াস লিখতেই পারতে ন। এমন দিন গেছে, যখন ত-তিনদিন অন্যতাবে অনিদ্রায় থেকেছি। কবে গামছা ফেলে এ-গ্রাম সে-গ্রাম ঘুরে বেড়িয়েছি। কত বাড়িতে কুসু বেলিয়ে দিয়েছে—ত বা বালোক। কত বাড়ী বগদীব বাড়িতে আত্মব কবেছি। গ্রামেব সকলের সঙ্গে মিশেছি, তাদের সুখে-দুখে সহানুভূতি জানিয়ে তাদের মুখ থেকে তাদের পারিবারিক ও সামাজিক জীবনের কাহিনী' জেনে নিয়েছি। তারপর খুব ভাল করে দেখে নিমেছি পল্ল গ্রাম ও পল্লসমাজ।” (বাল্যবন্ধু ঔপন্যাসিক চরকচন্দ্র বন্দ্যোপাধ্যায়কে লেখা।)

দ্বিতীয় পত্রাংশ :

“দিদি, আমি কোন কালে বাওয়া-ছোওয়াব বাছনিচব করিনে, কিন্তু মেয়েদের হাতে আমি কোনদিন কিছু খাইনে। শুধু খাই তাঁদের হাতে যাঁদের বাপ-মা দুজনেই ব্রাহ্মণ এবং বিয়েও হয়েছে ব্রাহ্মণের সঙ্গে। ... সমাজভুক্ত হোন তাতে আসে যায় না, কিন্তু ঐ রকম মেশানো জাত হলে আমি তাঁদের ছোঁয়া খাইনে।” (শ্রীমতী লাল রানী গঙ্গোপাধ্যায়কে লেখা।)

মন্তব্য নিম্নপ্রয়োজন। এ থেকে পাঠক আপন আপন সিদ্ধান্ত আপনি কবে নিতে পারবেন।

এবার শরৎচন্দ্রের সাহিত্যের আধারে সমাজ-চেতনার প্রসঙ্গটির আলোচনা করা যাক। ব্যক্তিজীবনে যেমন এ ব্যাপারে দৈধতা, সাহিত্যেও তেমনি দৈধতার মুখোমুখি হওয়া ছাড়া গত্যন্তর নেই। দৃষ্টান্ত সহযোগে কথটি পরিষ্কৃত করবার চেষ্টা করি।

শরৎ-সাহিত্যের পাঠকমাত্রই জানেন যে, শরৎচন্দ্র তাঁর একাধিক গল্প-উপন্যাসে ভাবতীয়া পতিব্রতা নারীর কতকগুলি অনবদ্য চাইপ সৃষ্টি করেছেন। যেমন শুভদা উপন্যাসে ধবিকীর গায় সতিমুখ শুভদা, বিরাজ-বৌ উপন্যাসে সাময়িক বিভ্রমের বশে পদশালিতা কিন্তু অন্তবে নিভাঁজ সতী বিরাজ, চন্দ্রনাথ উপন্যাসে স্বামী-পতিভক্তা পবে গৃহীতা সহনশীলা সবয়ু, পশুভংশাই উপন্যাসে বিনাদোসে স্বামীর সংসার থেকে উৎখাত অভিমানিনী কুসুম, দেবা-পাওনা উপন্যাসে স্বামী নাকি আইডিয়াল হলে উৎসর্গীকৃতপ্রাণা ভৈবর ঘোড়শ, সত্যেন্দ্র প্রথম পর্বের নেশাসক্ত ও লম্পট স্বামীর দ্বারা সতত নিগৃহীতা অপার মহিষ্যতার প্রতিমূর্তি অন্নদা, স্বামী উপন্যাসেব পরপুরুষের মোহগ্রস্তা পবে আত্মত্যাগী সৌদামিনী, চরিত্রহীন উপন্যাসেব স্বাম্য অন্তপ্রাণ সুরবালা, গৃহদাত উপন্যাসেব স্বামিত্বের যুগ্মমূলে বলিপ্রদত্তা সেব-পর-য়ণ' মৃণাল, অভাগীর যুগ ছোট গল্পেব অভাগী প্রভৃতি। সর্বত্রই ভাবতীয়া সনাতন পাতিব্রতের আদর্শের জয়জয়কার—স্বামী ছাড়া যে নারীর হিন্দুসমাজে অণু কোন গতি নেই এবং স্বামী ভাগ বা মন্দ, সং বা অসং যা-ই হোক না কেন, স্বামী-সেবাতাই যে নারীত্বের চরম চরিতার্থতা—এই মূল্যবোধেরই যেন আবেগধর্মী প্রচাব এই সব চরিত্র-পবিত্রকল্পনার মধ্য দিয়ে কবা হয়েছে বলে মনে হয়। হয়ত গতানুগতিক হিন্দু বিবাহপদ্ধতির কিছু প্রচ্ছন্ন সমালোচনা এই সব চরিত্রের উপস্থাপনার মধ্যে চেষ্টা করলে খুঁজে বার করা যায় কিন্তু খতিয়ে দেখলে দেখা যাবে হিন্দু বিবাহরীতির সমালোচনাকেও ছাড়িয়ে এই সব চরিত্রের আদলের মধ্যে বড় হয়ে উঠেছে হিন্দু নারীর সর্বাবস্থায় অনুসরণযোগ্য পতিভক্তিরূপ অবিচল সামাজিক আদর্শের মাহাত্ম্য কীর্তন। যেন এই বহুধুগলান্বিত মূল্যবোধকেই ভারতীয় নারীর অলঙ্কার, অখণ্ডনীয় নিয়তি রূপে তুলে ধরতে চাওয়া হয়েছে লেখকের আবেগকল্লিত লেখনার মুখে—যেন এই আদর্শের আর কখনও নড়চড় হতে

নেই। অর্থনৈতিক অবস্থা-বাবস্ত্যের পেষণে এবং অগাধ নানা কারণে সমাজের যতই ভাঙচুর হোক না কেন, বিবাহিতা নারীর মুখ বুজে সব সয়ে যাওয়াটাই যেন হিন্দু সংসারের এক অচল-অনড় ধারা। এখানে শরৎচন্দ্র নারীত্বের সঙ্গে জড়িত প্রথাবদ্ধ গতানুগতিক শ্রেয়োবোধকেই মহিমাম্বিত করে তুলেছেন বলে সন্দেহ হয়।

অথচ এই সব চরিত্রেরই পাশে রেখে তুলনা করুন শ্রীকান্ত দ্বিতীয় পর্বের অভয়া চরিত্র, শ্রীকান্ত তৃতীয় পর্বের সুনন্দা চরিত্র, চরিত্রহীন উপন্যাসের কিরণময়ী, পথের দাবী উপন্যাসের সুমিত্রা, শেষ প্রশ্ন উপন্যাসের কমল ; দেখা যাবে তাঁদের চরিত্র-পরিকল্পনার ছাঁচটাই সম্পূর্ণ আলাদা। পূর্বের চরিত্রগুলির সঙ্গে এই সব চরিত্রের আদৌ মিল নেই। শেষোক্ত চরিত্রগুলি সব কয়টিই স্বাধীনা, আত্মপ্রত্যয়দীপ্তা, বিদ্রোহিণী, প্রতিবাদিনী। অভয়া তার মদ্যপ কুক্রিয়াসক্ত স্বামীকে খারিজ করে দিয়ে নিজের মনোমত পুরুষকে স্বামিত্বের অধিকারে প্রতিষ্ঠিত করে তাকে নিয়ে ঘর বেঁধেছে, সুনন্দা গ্রামীণ মেয়ে হয়েও একটি জ্বলজ্বালন্ত অর্থনৈতিক অগাধের প্রতিবাদে স্বামী-পুত্রের হাত ধরে সম্পন্ন ভাসুরগৃহ ছেড়ে বেরিয়ে এসেছে এবং স্বেচ্ছায় দারিদ্র্য বরণ করে নিয়েছে ; কিরণময়ী শাস্ত্র মানে না, ঈশ্বর মানে না, হিন্দু সমাজ-সংসার-পরিবারের প্রচলিত মূল্যবোধে তার কোন আস্থা নেই ; সুমিত্রা তার পূর্বজীবনের বন্ধন সম্পূর্ণ ছিন্ন করে ‘পথের দাবী’ বিপ্লবী সংস্থার সঙ্গে আপন ভাগ্য জুড়ে নিয়েছে এবং স্ত্রীয় ব্যক্তিত্ব বলে ওই সংস্থার সভানেত্রীর পদে অধিষ্ঠিত হয়েছে ; কমল স্বামিত্বের গতানুগতিক সংস্কারের বিরুদ্ধে বিদ্রোহিণী এক অসাধারণ তেজস্বিনী নারী। এদের মধ্যে আবার সবচেয়ে বিদ্রোহিণী অভয়া—আত্মস্বাতন্ত্র্যে দৃপ্তা, গতানুগতিক শাস্ত্রশাসিত বিবাহনীতির বিরুদ্ধে প্রতিবাদে বলিষ্ঠ।

কিন্তু শরৎচন্দ্রের মনের কথাটা কী তা ঠিক বুঝতে পারা যায় না। তিনি একই সঙ্গে প’তিব্রতের জোয়ালে বাঁধা প্রশ্নহীন আনুগত্যময়ী নারীর মতিমঃ উদঘোষণে মুখর, আবার ওই বন্ধন অস্বীকারকারিণী মর্যাদাময়ী স্বাধীনা নারীর জয়ঘোষণাতেও সমান অব্যাহত। এই দুই ধরনের নারীর ভিতর একটি আদর্শকে বেছে নিতে হলে শরৎচন্দ্রের পক্ষপাত কোন্ দিকে যাবে ? এই প্রশ্নের জবাব শরৎচন্দ্রের রচনার মধ্যেই খুঁজে পাওয়া যেতে পারে। শ্রীকান্ত দ্বিতীয় পর্বে অভয়ার কানিনী বিবৃত করার পর শ্রীকান্ত আত্মমগ্ন হয়ে

ভাবতে বসলো, অভয়া। যেকোন অবলীলাক্রমে বিবাহের মন্তসাক্ষী স্বামীকে বাতিল করে দিয়ে একজন পরপুরুষকে স্বামীরূপে নির্বাচন করে নিল, তেমন অবস্থায় তার অন্নদাদিদি সেরূপ করতে পারতো কিনা। শ্রীকান্তের সুনিশ্চিত অভিমত এই যে, অন্নদাদিদি কিছুতেই, কোন অবস্থাতেই তার স্বামী ত্যাগ করতে পারতো না—শত লাঞ্ছনা-অপমানেও ছায়ার ছায় তার স্বামীকে আঁকড়ে থাকতো।

এই থেকে বোধহয় শরৎচন্দ্রের মনের পক্ষপাত কতক ধরতে পারা যায়। কেননা শ্রীকান্তের জবানী প্রকারান্তরে তার স্রষ্টা শরৎচন্দ্রেরই জবানী। তিনি সম্ভবতঃ অভয়া অপেক্ষা অন্নদাদিদির আদর্শকেই সঞ্চিক বর্ণনায় আদর্শ বলে মনে করেছেন। অর্থাৎ বিনা প্রতিবাদে সকল অত্যাচার সওয়া এবং অত্যাচার সয়েও স্বামীকে অবলম্বন করে থাকার নির্বিরোধ পতিনিষ্ঠার আদর্শই বুঝি। ভারতীয় হিন্দু নারীর পক্ষে একমাত্র গ্রহণীয় আদর্শ। অভয়ার আচরণকে মনেপ্রাণে স্বীকার করে নেবার ব্যাপারে শরৎচন্দ্রের মনে দ্বিধা ছিল, তা নয় তো তিনি অভয়ার সঙ্গে অন্নদাদিদির প্রতিতুলনা টেনে এনে অন্নদাদিদিকে শ্রেষ্ঠতর মর্যাদার আসনে বসাতেন না। প্রগতিশীলতা আর রক্ষণশীলতার একটিকে মনোনয়নের প্রসঙ্গে এক্ষেত্রে রক্ষণশীলতারই যে জয় হয়েছে সে বিষয়ে সন্দেহ নেই।

পাতিব্রত্যের আদর্শের সঙ্গে আর একটি আদর্শ অসঙ্গাভাবে জড়িত—এক-পতিত্বের আদর্শ। এক্ষেত্রেও শরৎচন্দ্রের মনের স্ববিরোধের পরিচয় পাই। শরৎচন্দ্র তাঁর ভাষণে, চিঠিপত্রে একাধিক স্থলে বিধবার প্রতি হিন্দু সমাজের নিষ্ঠুর আচরণের সমালোচনা করেছেন এবং বঙ্কিমচন্দ্র তাঁর উপন্যাসে বিধবার চরিত্র অঙ্কনে আরও কেন সগাণুভূতি ও সহৃদয়তার পরিচয় দেননি তার জ্ঞাত ক্ষোভ প্রকাশ করেছেন। বিশেষ করে কৃষ্ণকান্তের উইল উপন্যাসে বোহিণীর প্রতি লেখকের নিষ্করণ মনোভাবের তিনি তীব্র প্রতিবাদ জানিয়েছেন (“আধুনিক সাহিত্যের কৈফিয়ৎ”, স্বদেশ ও সাহিত্য, পৃ. ১৫৬-৫৮)।

কিন্তু তিনি নিজেও বিধবার চরিত্র অঙ্কনে বঙ্কিমচন্দ্র অপেক্ষা অধিক উদারতার পরিচয় দিতে পারেননি। হিন্দু বিধবাকে তিনি জ্বর সমাজ-শাসনের এক নিপীড়িতা অবদমিতা অপ্রতিবাদিনী জীব রূপে আঁকতেই বেশী ভালবেসেছেন এবং একপতিত্বের নির্ধাকে জীবনভোর আঁকড়ে ধরে থাকার আদর্শকেই তাঁর অঙ্কিত বিধবা চরিত্রগুলির সামনে বড় করে তুলে ধরেছেন।

তিনি তাঁর কোন কাহিনিতেই বিধবার পুনর্বিবাহ ঘটাননি। প্রমাণ পল্লী-সমাজ উপন্যাসের রমা, বড়দিদির মাধবী, গৃহদাহের মৃণাল, পথনির্দেশ গল্পের হেম, মন্দির গল্পের অপর্ণা প্রভৃতি। হয়ত হিন্দু সমাজের প্রচলিত মূল্যবোধের শমনের অধীনে অস্তিত্ববন্ধকারিণী এই সব বিধবা নারীর পুনর্বিবাহের কল্পনা কম-বেশী আবাস্তব এবং শরৎচন্দ্র একজন বাস্তববাদী লেখকরূপে সমাজের সত্য অবস্থাটাকেই রূপ দিতে চেয়েছেন, নিজের অভিপ্রায়কে বাস্তব স্থিতির উপর কৃত্রিম ভাবে আরোপ করতে যাননি। তাহলেও কথা থেকে যায় এই যে, তিনি তো ইচ্ছা করলে কোন না কোন স্থলে বিধবাব পুনর্বিবাহের সম্ভাব্যতার প্রশ্নটি উত্থাপন করতে পারতেন, কিন্তু তা তিনি করেননি, এবং অগেয়ে এ ব্যাপারে নীরবতা অবলম্বন করে রেখেছেন। শুধু তাই নয়, শ্রীযুক্তা লালার গঙ্গাপাধ্যায়কে লিখিত এক চিঠিতে জ-ক কবে বলেছেন যে, আর য-ই কখন, তিনি তাঁর কোন বইতেই বিধবাব বিদ্যে দেননি। এটা নিশ্চয়ই প্রগতিশীল মনোভাবের সূচক নয়, বরং কেউ যদি এর ভিতর স্থিতাবস্থা রক্ষাব অন্তর্ভুলেই লেখকের আবেগ চালিত হয়েছে বলে মনে করেন তাহলে তাঁকে বুদ্ধিগত বেশ দোষ দেওয়া যায় না।

অবশ্য শ্রীযুক্তা রামধর্মা দেবী এর অগা একটি কারণ নির্দেশ কববার চেষ্টা কবেছেন। শরৎচন্দ্রের স্নেহগা এই লেখিকা শবৎচন্দ্রের ব্যক্তিজীবন থেকে স্মৃতি উদ্ধার করে বলতে চেয়েছেন যে, শবৎচন্দ্র এ ব্যাপারে বলবিধবা নিরুপমা দেবীর কাছে প্রতিপ্রতিবন্ধ ছিলেন এবং তাঁরই অলক্ষ্য তর্জনের নিষেধে তিনি বিধবার অগা কোন পরিণাম চিত্রণের কথা ভুলেও মনের কোণায় স্থান দেননি। একথা যদি সত্য হয়ও, তাহলেও শিল্পীরূপে শরৎচন্দ্রের কর্তব্যের ক্রটির স্থানলন হয় না; শুধু এ কথাই প্রমাণ হয় যে, তিনি ব্যক্তিজীবনের একটি বিশেষ আবেগকে এত বেশী মর্যাদা দিয়েছিলেন যে তাঁর তলায় তাঁর শিল্পগত ইতিকর্তব্যবোধ চাপা পড়ে গিয়েছে। অদৃশ্য তর্জন যদি এমন অলঙ্ঘনীয়ভাবে কোন শিল্পীকে শাসন ও নিয়ন্ত্রণ করতে পেবে থাকে তো বুঝতে হবে সেই শিল্পী শিল্পের দাবা অপেক্ষা ব্যক্তিজীবনের দাবীকে বেশী মূল্য দেন। জীবনের দিক দিয়ে এটা একটা অনুকরণীয় আদর্শ হতে পারে কিন্তু শিল্পের দিক দিয়ে যে এতে নিরপেক্ষতা ও উচিত্যের হানি ঘটেছে, সে কথা বলাই বাহুল্য। ব্যক্তিজীবনের আবেগ দ্বারা চালিত হলে শিল্পের অপক্ষপাত মনোভাব আর থাকে না।



কিন্তু পতিব্রতা নারীর সমস্যাই বলুন আর বিধবা নারীর সমস্যাই বলুন, এগুলি হলো পারিবারিক জীবনের সমস্যা। আরও সঙ্কুচিত অর্থে ধরলে, নবনারীর জৈবজীবনের সমস্যা। এব দ্বাবা বৃহত্তর সমাজের অগ্যাণ সমস্যাকে ঠিক স্পর্শ করা যায় না। এই সমস্ত বৃহত্তর সমস্যার মধ্যে পড়ে—অর্থনৈতিক শোষণ, সামাজিক অগিচাব ও অগ্যাণ, রাষ্ট্রিক পরাধীনতা, রাষ্ট্রিক পবাধীনতায় শিক্ষাগত বিশৃঙ্খলা, সমাজমনের উপর দার্কালবাতিত কুপ্রথা ও কুসংস্কারের পণ্ডন ইত্যাদি। এই সকল প্রগে শরৎচন্দ্র যে অত্যন্ত সমাজ-সচেতন ছিলেন তার প্রমাণ তিনি তাঁর সাহিত্যে ভূরি ভূরি রেখে গেছেন। হস্ত সব জায়গায় তিনি বক্ষণশীলতার পশ্চাৎটানের উদ্দেশ্যে উঠতে পারেননি কিন্তু সমস্যাগুলির বিষয়ে যে তিনি রীতিমত অগিত ছিলেন সে বিষয়ে কোনই সন্দেহ নেই।

গ্রাম্য তাঁর পল্ল্যসমাজ, অরক্ষণীয়, দেনা-পাওনা, পণ্ডিতমশাই, বনের মেয়ে, চরিএতন, গৃহদাহ, শ্রীকান্ত, পথের দাবা, শেব প্রগ, জাগরণ (অসম্পূর্ণ) প্রভৃতি উপন্যাস এবং মহেশ, অগার দর্গ, একাদশা বৈরাগী, বিলসাঁ, অরূপ প্রভৃতি গল্প। এখানে এ সকল বইয়েই বিবরণস্ব সম্বন্ধে বিস্তার কবে বলবার অবকাশ নেই, ওরূপক্ষেপে এই বল চলে যে, শরৎচন্দ্র তাঁর উপন্যাস ও ছোটগল্পের মাধ্যমে সামাজিক ভূমি-ব্যবহার শোষণ ও অবক্ষয়ের চিত্র একেছেন, গ্রামীণ যৌথ পরিবার-প্রথার ভাঙনের ইঙ্গিত করেছেন, জমিদার ও শাস্ত্রব্যবসায়ী পুরোচিত এগার মিলিত যোগসাজসে সাধারণ মানুষের নিপণ্ডনের চিত্র একেছেন, কৃষক-জাগরণের ছবি তুলে ধরেছেন, ইংরেজের সাম্রাজ্যবাদী শাসনের নিপুণতা ও লোভাতুরতার অতিশয় নগ্ন চিত্র উদ্ঘাটিত কবে দেখিয়েছেন সব বইয়ে না হলেও অন্ততঃ একটি বইতে (পথের দাবা), শ্রমিকদের সজ্জবন্ধ অধিকার প্রতিষ্ঠার সংগ্রামের পথনির্দেশ দিয়েছেন, তারুণ্য ও যৌবন ধর্মের জয়গান করেছেন, প্রাচীন ভারতীয় শাস্ত্রগ্রন্থগুলিতে অভিব্যক্ত পুণ্ড্রের শ্রেণ্যস্বার্থচেতনার বিরুদ্ধে বিদ্রোহের জয়ধ্বজা উত্তোলন কবেছেন, সর্বোপরি সনাতন ধর্মের জয়মন্দির ঘোষণায় বিবত থেকেছেন ও ধর্মের নামে অচারের বাড়াবাড়ির সনালোচনা করেছেন। এ সমস্ত শরৎ-সাহিত্যের সদর্শক দিক, গুণাত্মক দিক। তাঁর কৌলিক সংস্কার-লাসিত মজ্জাগত রক্ষণশীলতার প্রতিষেধক দিক। এই দিকগুলির প্রতি আমাদের অবগত বেশী মনোযোগী হওয়া দরকার।

## ভাষাশিল্প

শরৎচন্দ্রের ভাষাশিল্প সম্পর্কে প্রথমেই যে-কথাটা মনে হয় তা হলো। তিনি মূলতঃ বাংলার গ্রামজীবনের রূপকার বলেও তাঁর ভাষার ডোলটি কিন্তু পুরোপুরি নাগরিকতায় ভরা। তিনি গ্রামের চিত্র এঁকেছেন শহরের ভাষায়—এ ভাষার পরতে পরতে একজন সচেতন শিল্পীর বৈদগ্ধ্য, সযত্ন অনুশীলন, বাক্যবিশ্বাসে ও শব্দব্যবহারে সূক্ষ্মগ্রহণবর্জননির্বাকচর্চা মননেব ছাপ অতি স্পষ্ট। আমরা যাকে শিল্পের দরবাবী বা ক্লাসিকাল সংস্কার বলি, যার উদ্ভব নাগরিক আবহাওয়ায়, পরিপুষ্টিও নগরসভ্যতার আওতায়, সেই সংস্কার অপ্রতিদ্বন্দ্বী কথাশিল্পী শরৎচন্দ্রের ভাষাভঙ্গীর ভিতর অচ্ছেদ্যভাবে গ্রথিত। শরৎচন্দ্রকে স্টাইলের জাঁকবলা যায়। তাঁর এই জাঁকবলা শক্তির মূল রহস্যটা নিহিত আছে তাঁর শিল্পসৃষ্টির এই অভূত দৈবতার মধ্যে যে, তাঁর উপন্যাস ও ছোটগল্পের বিষয়বস্তু হলো গ্রামজীবনের চিত্র ও চরিত্র অথচ যে-ভাষায় তিনি এই গ্রামীণ চিত্র-চরিত্রের রূপদান করেছেন তার ভিতর গ্রামীণতার ছিটেফোঁটা প্রভাবও নেই; সেটা আগাগোড়াই নাগরিক কর্ণার দ্বারা সুমার্জিত।

ভাষার প্রতি পদক্ষেপে লেখকের সযত্ন নোযোঁগের প্রমাণ বিদ্যমান; অসাবধানে তিনি এক পাও এগোন না। বাক্যের গঠনেই যে শুধু এই যত্নের পরিচয় মেলে তা নয়, প্রত্যেকটি শব্দের ব্যবহারেও তাঁর অভিনিবেশ সমান ক্রিয়াশীল। গল্প-উপন্যাসের উপজীব্য বিষয়টা হলো আধেয়, সেই বিষয়কে যে-ভাষার সাহায্যে রূপ দেওয়া হয় সেটা হলো আধার। এই আধারের নির্মিতিতে শরৎচন্দ্রের বিদগ্ধশিল্পিজনসুলভ নাগরিক নৈপুণ্য তাঁর তাবৎ শিল্পকর্মকে, গ্রামাঞ্চলিক শিল্পকর্মগুলিকে বিশেষ করে, এক অনন্য বৈশিষ্ট্য দান করেছে।

আমাদের দেশে গ্রামীণ শিল্পচর্চার সঙ্গে অশিক্ষিতপটুত্বের ধারণার যেন একটা নিকট-সম্বন্ধ আছে। বিশেষতঃ, লোকশিল্পের বেলায় এ ধারণাটা আরও বেশী বলবৎ। এদেশের লোকশিল্পী বা লোককবি বা লোকসঙ্গীতকার

মাত্রই দৈবানুগ্রহসেবিত মানুষ—তাদের শিক্ষা-দীক্ষার ধার না ধারলেও চলে, তাঁদের নিজ নিজ শিল্পবস্তুর সৃষ্টিতে প্রেরণার দ্বারা সঞ্চালিত হওয়াটাই যথেষ্ট। শুধু তাই নয়, এসব ক্ষেত্রে লেখাপড়া জানা থাকাটাকে সংশ্লিষ্ট শিল্পীর একটা অণুণ মনে করাটাই রেওয়াজ। যে-লোকশিল্প যত বেশী স্বতঃস্ফূর্ত তত তার আদর ও কদর। শিক্ষাদীক্ষা এখানে স্বতঃস্ফূর্তি বাক্যের পর্যায়ে পড়ে।

শরৎচন্দ্র অবশ্য লোকশিল্পের চর্চা করতেন না, লোকযান্নাও তিনি নন, কিন্তু একথা তো ঠিক যে তিনি তাঁর অধিকাংশ গল্প-উপন্যাসে গ্রামকেই প্রধানতঃ চিত্রিত করেছেন। বিশেষ, তাঁর প্রথম দিককার তাৎ গল্পোপন্যাস গ্রামজীবনের ভিত্তিতে রচিত। কিন্তু যেটা গোড়া থেকেই লক্ষ্য করব, তা হলো এই যে, তিনি তাঁর এই গ্রামচিত্রণের প্রণালী ও প্রকরণে অশিক্ষিতপটুত্ব কিংবা দৈবপ্রেরণার ধারণাকে এতটুকু প্রশ্রয় দেননি। প্রথম থেকেই তিনি একজন সচেতন ভাষাবিদ্যা-কুশল শিল্পী, নাগরিক মেজাজের শিল্পী। গ্রামের কথা তিনি শহরের ভাষায় লেখেন। উপমা দিয়ে বলতে গেলে বলতে হয় তিনি গ্রামে বাড়ি বানান ঠিকই কিন্তু সেই গ্রামের বাড়ি কুঁড়েঘর নয়, ইমারৎ; ইমারতের প্লানটিও শহরে।

এই ক্ষেত্রে শরৎচন্দ্র বঙ্কিমচন্দ্র ও রবীন্দ্রনাথের সার্বক উত্তরাধিকার, কিন্তু তাঁর পরবর্তীকালীন লেখক তারাক্ষর-বিভূতিভূষণ-মানিক বন্দ্যোপাধ্যায়দের সঙ্গে তাঁর তেমন মিলে না। বঙ্কিমচন্দ্র ও রবীন্দ্রনাথ উভয়েই গ্রামজীবনকে যথাক্রমে তাঁদের উপন্যাসে ও ছোটগল্পে রূপায়িত করেছেন কিন্তু তাঁদের দুজন্যই ভাষাশিল্পের ছাঁচ প্রবলভাবে নাগরিক বৈদগ্ধ্যের সংস্কারকে মনে করিয়ে দেয়। অধ্যয়নের ব্যাপ্তি, মননশীলতা, কবিপ্রাণতা সুকর্ষিত ও সুপরিণীলিত দৃষ্টিভঙ্গি, শব্দসমৃদ্ধি ও ভাষার সমৃদ্ধ প্রয়োগ তাঁদের দুইয়ের স্টাইলের সঙ্গে ওতপ্রোতভাবে জড়িত থেকে তাঁদের একান্তভাবে নাগরিক ধারার শিল্পরূপে চিহ্নিত করেছে। পক্ষান্তরে, তারাক্ষর-বিভূতি-ভূষণ-মানিক—উত্তরসূরী এই ত্রয়ী প্রভূতশক্তিশালী ওপন্যাসিক হলেও তাঁদের রচনার ভাষাবিদ্যাসে ও শব্দবাহারে তাদৃশ যত্নশীল মনোযোগের পরিচয় পাওয়া যায় না। এ ব্যাপারে তাঁরা যেন তাঁদের অজ্ঞাতসারেই কতক পরিমাণে স্বভাবকুশলতা ও স্বতঃস্ফূর্তির ধারণার দ্বারা চালিত হয়েছেন। কাহিনীচয়নে ও কাহিনীর পরিবেশ সৃষ্টিতে এবং চরিত্রগুলির বিকাশসাধনে

তার যতটা যত্ন ও অভিনিবেশের পরিচয় দিয়েছেন, ভাষার পরিশীলনে বোধহয় তাঁদের ততটা মনোযোগপরায়ণ হওয়ার অবসর ঘটে ওঠেনি।

ভাষার ক্ষেত্রে শরৎচন্দ্র বঙ্কিম ও রবীন্দ্রনাথের সুযোগ্য শিষ্য। শুধু তাই নয় শরৎচন্দ্র তাঁদের প্রদর্শিত পথে, কথাসাহিত্যের অনুষঙ্গে, ভাষাশিল্পের চর্চাকে যেন আরও বেশ কিছুদূর টেনে নিয়ে গেছেন। তিনি এ ব্যাপরে আরও বেশী মনোযোগী হয়েছেন। বঙ্কিম-রবীন্দ্রের কবিপ্রাণতা ও সূক্ষ্মসংবেদনশীলতার সঙ্গে অবশ্য শরৎচন্দ্র তুলনায় নন, তবে যেহেতু শরৎচন্দ্র খুবই জীবনঘনিষ্ঠ লেখক এবং বাংলা কথাসাহিত্যে বস্তুবাদী ধারার একজন পথিকৃৎ, সেই কারণে তাঁর রচনাব শিল্পসিদ্ধির ক্ষেত্রে ভাষাবিশয়ে তাঁকে সবিশেষ প্রযত্নশীল হতে হয়েছে। এই যে শরৎচন্দ্র বিভিন্ন উপলক্ষে বিভিন্ন ভাষণে তাঁর আত্মকথামূলক স্মৃতিচারণগুলিতে বঙ্কিমচন্দ্র ও রবীন্দ্রনাথের ভাষার কাছে তাঁর স্বাধীন কবিবেতন—তিনি একাধিকবার বলেছেন যে, রবীন্দ্রনাথের চেয়ে তার বলি তিনি কমপক্ষে শো বাব পড়েছেন—তার থেকে এই তথ্যেরই প্রমাণ হয় যে, তিনি তাঁর ভাষাশ্রমের সাক্ষ্যে জন্মই বারবার তাঁর পূর্বসূরী এই প্রসিদ্ধ ঔপন্যাসিকের ভাষাভঙ্গা গভীর মনোযোগে অনুধাবন করেছেন। শরৎচন্দ্রের ভাষার জগৎ পূর্বসূরীদের ভাষার জগৎ থেকে সম্পূর্ণ স্বতন্ত্র। সেদিক থেকে বঙ্কিমচন্দ্র ও রবীন্দ্রনাথের কাছে তাঁর স্বাধীনতার পরিমাণ সামান্যই। তিনি নির্যাতিত-শোষিত স্তরের মানুষদের দৃষ্টেবেদনাপূর্ণ জীবনের শিল্পী এবং তাঁর শিল্প তাঁর সামাজিক কালের প্রশ্ন ও সমস্যার চেতনায় বিশেষভাবে বিধ্বত। সমাজ-বাস্তবতা তাঁর রচনার একটি মূল উপাদান। ভাষার ক্ষেত্রে শরৎচন্দ্র বঙ্কিম-রবীন্দ্র-রচনার দ্বারা যত-না প্রভাবিত হয়েছেন তার চেয়ে অনেক বেশী প্রভাবিত হয়েছেন তাঁর ব্যক্তিগত জীবনের অভিজ্ঞতা-সমৃদ্ধির দ্বারা। কিন্তু ভাষার ব্যাপারে একথা বলা যায় না। এক্ষেত্রে বঙ্কিমচন্দ্র-রবীন্দ্রনাথের কাছে তাঁর স্বাধীনতার সামান্য-পরিমিত নেই। তাঁদের দুইয়ের ভাষা তিনি তন্ন তন্ন করে খুঁটিয়ে বিচার করেছেন এবং ওই বিচারক্রিয়ার মন্থন থেকে অত্যন্ত মনোজ্ঞ ধরনের স্বকীয় একটি ভাষারূপ উদ্ভাবন করে নিয়েছেন। প্রতিভাশালী লেখকেরা এইভাবেই ঐতিহ্যের ফল আত্মসাৎ করে আপনাদের ভাষার ভাণ্ডার পুষ্ট করেন এবং নিজ রচনায় তার শ্রেষ্ঠ সুফল প্রয়োগ করে থাকেন। এবং ঠিক এই গুণেই বোধ হয় শরৎচন্দ্র এমন অপ্রতিরোধ্যরূপে বাঙালীর

চিন্তাজয়ী লেখক হয়েছেন, এই সমাজের শিক্ষিত-অশিক্ষিত গ্রাম্য-শহরবাসী বুদ্ধিজীবী-সরসপ্রাণ সকল স্তরের পাঠক-পাঠিকার মনোহরণ করেছেন। শরৎ-শিল্পের অপূর্ব মনোহারিতার রহস্যের অন্বেষণে একাধিক হেতু নিশ্চয়ই আছে, কিন্তু ভাষা যে অত্যন্তম প্রধান হেতু সে বিষয়ে বরেকের জ্ঞাত বৃদ্ধি সন্দেহ প্রকাশ করা চলে না। তাঁর জীবননিষ্ঠ, বাস্তবসম্পৃক্ত সাহিত্যের উপস্থিতি বহু তার ভাষা। এটি ভাষার ভিত্তে ছাত্রের তাঁর স্নায়ু ব্যক্তিত্বের নির্বাস অনুসৃত। স্টাইল যদি ব্যক্তিত্বেরই প্রক্ষেপ হয়ে থাকে তাহলে শরৎচন্দ্রের স্টাইলে তাঁর ব্যক্তিত্ব যেরকমভাবে অনুপ্রবেশ করেছে এমন বৃদ্ধি আর কোন লেখকের বেলায় দেখা যায় না। শরৎচন্দ্রের যে-কোন লেখা পড়লেই তাঁর ভাষার আদলের ভিত্তর শরৎচন্দ্র মানুষটিকে যেন ঠিক-ঠিক অনুভব করা যায়। নচেৎ বা উপরে নামস্বাক্ষর না থাকলেও অল্পে বসে দেওয়া যায় এ লেখ শরৎচন্দ্রের না হয়েই যায় না। এমনকি তাঁর প্রবন্ধ, অভিভাষণ, চিঠিপত্রের ভাষা থেকেও এত দিনে নিতে অসুবিধা হয় না।

একেই বলে লেখকের ব্যক্তিত্বের দ্বারা তাঁর স্টাইল জারিত হওয়া, ব্যক্তিবৈশিষ্ট্য স্টাইলে সংক্রান্ত হওয়া। স্টাইল হো গুণী ভাষার বিবর্ত পরিচ্ছদমাত্র নয়, তা গোটা মানুষটির আত্মার সৌগন্ধে অধুনিপুণ। এটি মানদণ্ডে বিচার করলে শরৎচন্দ্রের বচনার শিব ভিতর তার অত্যাশ্চর্য্য মনভালে ধরা পড়েছে এমন কে-একবি বাংলায় আঁক কবও বচনায় নয়।

অনেকেবই একটা ধারণা আছে যে, শরৎচন্দ্রের ভাষাভঙ্গী খুব সরল, সহজ। শুধু যে সিমিত আলোচনাত্তই এটি ধারণার প্রকাশ দেখতে পাই তা নয়, বক্তৃত মঞ্চও একাধিক বক্তার মধ্যে এই ভাবের কথা শুনেছি। মোটেই সত্য নয় ধারণাটা। শরৎচন্দ্রের ভাষাভঙ্গীর সামগ্রিক ফলশ্রুতি সংজ্ঞার ইঙ্গিত করে, অর্থাৎ স্পষ্টভাবে প্রকাশ করে; কিন্তু তাঁর বাক্য-গঠনের প্রক্রিয়া একটু অভিনিবেশ সজকারে পবাক্ষ করলেই দেখা যাবে তাঁর ছাত্র ছাত্র শিল্পনৈপুণ্যের ছাপ। শরৎচন্দ্র তাঁর গল্পোপন্যাসের ভাষানির্মিতির ক্ষেত্রে স্বতঃস্ফূর্তি বা প্রেরণার উপর মোটেই নির্ভরশীল ছিলেন না; তিনি অনুশীলনে বিশ্বাস করতেন আর সেই অনুশীলন আর প্রয়ত্নের আঁদর্শই বরাবর তাঁকে চালিত করেছে এ ব্যাপারে। সব জড়িয়ে তাঁর ভাষার 'এফেক্ট' পাঠকের কাছে নিশ্চয়ই সরল-সুবেশ বলে মনে হবে কিন্তু যে-লেখক এই ভাষার সৃষ্টি করেছেন তিনি কিন্তু অসীম যত্নে সচেতন বিচারশক্তি প্রয়োগ

করে একটির পর একটি শব্দ গেঁথে তাঁর মোহময় ভাষা তৈরী করে তুলেছেন। ভাস্কর যেমন অনেক দিনের পরিশ্রমে একটি একটি করে অঙ্গ-প্রত্যঙ্গের বিচার করে অপূর্ব দেহশ্রীমণ্ডিত মূর্তি উৎকীর্ণ করেন, শবৎচন্দ্রের ভাষাগঠনের রীতিও ছিল অনেকটা সেই রকমের। তাঁর রচিত বাক্যের একটি সামান্য শব্দও অযত্নে বসানো নয়, অমনোযোগে প্রযুক্ত নয়। অস্বাভাবিকতার ঘোরে তিনি কিছুই রচনা করেন না, তাঁর ব্যবহৃত প্রতিটি শব্দের পিছনে সজাগ মন কাজ করেছে। শুধু নিপুণ যত্নে শব্দ ব্যবহার করেই তিনি ক্ষান্ত থাকেন না, পাঠকমনের উপর সেই শব্দের সম্ভাবিত ধ্বনিগত প্রতিক্রিয়া কী হতে পারে তা-ও তিনি যাচিয়ে দেখেন, বজিয়ে দেখেন। তিনি সর্বদাই দ্বিভূ বর্জনের পক্ষপাতী। বাক্যের গঠনে অস্বয়ের হেরফের করে, অর্থাৎ কর্তা কর্ম ক্রিয়া অব্যয় ইত্যাদির অবস্থানের প্রয়োজনানুযায়ী অগ্রপশ্চাৎ বিধান করে, তিনি বাক্যের গঠনে আনেন সৌম্য, ছন্দ, কান্তি। ভাষার সাদামাঠা বিরহিত্তে তিনি সন্তুষ্ট নন, তিনি ভাষার লাবণ্যের শিল্পী।

অর্থাৎ অনুশীলন ও বৈদগ্ধ্য-কর্ষিত ভাষাই শবৎচন্দ্রের কাছে আদর্শ ভাষা। অব যেখানেই অনুশীলন সেখানেই সাধনার প্রয়োজন, ক্রেতাদায়ীকার অবধারিত। পরিশ্রম বিনা সাধনা হয় না। শবৎচন্দ্র তপস্কার রীতিতে সাহিত্যসাধনা করার প্রয়োজন মানতেন। গল্প বানাবার তাগিদে বিনা প্রস্তুতিতে লিখতে বসে কিংবা দৈবপ্রেরণার উপর ভর করে খস্ খস্ করে দ্রুত কলম চালিয়ে যাঁহোক একটা গল্পের অবয়ব গড়ে তোলা—এ ধাত তাঁর ছিল না। লিখতে বসলে বেশ আটখাঁট বেঁধেই লিখতে বসতেন, তপস্বীর মত আসন পরিগ্রহ করে একটা কঠিন পরিশ্রমের কাজে নামার মত করে লেখার কাজে নামতেন। যেন আত্মপ্রকাশের শিল্পের সঙ্গে পাঞ্জা কষবার পরীক্ষায় অবতীর্ণ হতে চলেছেন, লেখনীধারণকালে এই ভাব তাঁর মুখেচোখে ব্যঞ্জিত হতো।

শুধু শবৎচন্দ্র কেন, সকল সারিয়াস ভাষাশিল্পীরই লেখবার সময় এমনি মনোভাব হয়। লেখার কাজটা তাঁদের কাছে মুক্তির উপায়ও বটে আবার যন্ত্রণাকর ব্যায়ামবিশেষও বটে। যন্ত্রণার ধারণাটা আসে শ্রমের ক্রেতাদায়ীকারের অনিবার্যতার বোধ থেকে। আত্মপ্রকাশের শিল্প সবটাই ফুলবিছানো পথ নয়, তাতে কাঁটাও ছাড়ানো থাকে অনেক। আর এই কষ্টকের চেতনাটাই অতি বড় সারিয়াস লেখককেও কখনও-কখনও শ্রমভীরু করে তোলে, বোধকরি

খতিয়ে দেখলে, সীরিয়াস লেখকদের মধ্যেই এই ধরনের শ্রমকাতরতা বেশী চোখে পড়ে। লেখা তো নয় যেন একটা কঠিন পরীক্ষা, তাকে এড়াতে পারলে বাঁচা যায়—এইজাতীয় ভাবের দ্বারা কবলিত হননি এমন লেখক খুব অল্পই খুঁজে পাওয়া যাবে।

শরৎচন্দ্রের অনুশঙ্গে এ কথাটা কেন বলছি তার একটা বিশেষ অর্থ আছে। শরৎচন্দ্রের ব্যক্তিজীবনের আদলের সঙ্গে যঁারা পরিচিত ছিলেন তাঁরা কমবেশী সকলেই জানেন যে, শরৎচন্দ্র সহজে লেখার টেবিলে বসতে চাইতেন না। বাইরের অনুরোধ-উপরোধের চাপ এবং ভিতরের দুর্নিবার তাগিদ—এই দুই একবিন্দুতে মিলিত হলে তবেই তিনি লেখায় আত্মনিযুক্ত হবার ক্লেশ স্বীকার করতেন। লেখায় প্রবৃত্ত হবার আগে আড়মোড়া ভাঙতেই তাঁর অনেক সময় চলে যেত। না-লেখার অজুহাত সৃষ্টি করাতেও তিনি ছিলেন অদ্বিতীয়।

তার মানে কি এই যে, শরৎচন্দ্র কুঁড়ে প্রকৃতির মানুষ ছিলেন? আসলেমি তাঁতে স্বভাবগত ছিল? তা যদি হয় তো জীবনে এত এত বই তিনি লিখে যেতে পারলেন কা করে? ব্যাপারটা কিন্তু অত সরল নয়। আসলে শরৎচন্দ্র ছিলেন ষোল-আনা সাধক-শিল্পী। যখন শিল্পসাধনায় বসতেন, তখন তপস্বীর মনোভাব নিয়ে সে-কাজে বসতেন। রচনাকার্যে পরিপূর্ণ শ্রম বিনিয়োগ করতেন। ভাষার সৌষ্ঠব বিধানে তাঁর যত্নের অন্ত ছিল না। যে পর্যন্ত না ভাষাদেহ নিখুঁত হয়েছে বলে তাঁর মনে হতো ততক্ষণ পর্যন্ত তার প্রসাধনকলায় তিনি ক্ষান্তি দিতেন না। তার মানে এই যে সাহিত্য-চর্চায় তিনি নিজের উপরে প্রচণ্ড পরিশ্রমের ভার সওয়াতেন—কণ্টসহিষ্ণুতার চরমে যেতেন।

২

সাহিত্যজীবনের একেবারে শুরুর কাল থেকেই শরৎচন্দ্র ভাষাবিষয়ে যত্নপরায়ণ। কাশীনাথ উপাধ্যায়ের প্রথম খসড়াটা চোদ্দ বছর বয়সের লেখা। জন্মগ্রাম দেবানন্দপুরে থেকে স্কুলে পাঠাভ্যাসকালে তিনি এটি রচনা করেন। পরে ভাগলপুরে বাসকালীন এটিকে পুনর্মার্জিত করেন। কাহিনীতে বয়সোচিত কাঁচা হাতের ছাপ আছে কিন্তু বয়সের অনুপাতে ভাষা অবিশ্বাস্য রকমের পরিণত। একটি উদ্ধৃতি দিই। উদাসীন স্বামী কাশীনাথের অমনো-যোগে ব্যথিতা স্ত্রী কমলার বর্ণনা :

এ-সব দেখিয়া শুনিয়া কমলা একরকম হতাশ হইয়া হাল ছাড়িয়া দিয়াছে। সে যুবতী হইলেও এখনও বালিকামাত্র। স্বামী-প্রীতি, স্বামী-ভক্তি এখনও তাহার শিক্ষা হয় নাই। শিথিতেছিল—বাধা পড়িয়াছে; আবার স্বামী কর্তৃকই বাধা পড়িয়াছে। তাহার দোষ কি? সে যাহা শিখিয়াছিল ক্রমশঃ ভুলিতে লাগিল। যে-সব সোনার দাগ বুকের মাঝে ঝুপ পড়িয়াছিল, তাহা এখনও উজ্জ্বল হয় নাই, বাহিরের সৌন্দর্য এখনও ভিতরে প্রতিবিম্বিত হইতে পারে নাই—অথচ অসাবধানে তাহা ক্রমশঃ ক্ষয় হইয়া আসিতে লাগিল। শেষে যখন একেবারে মিলাইয়া গেল—কমলা তখন জানিতেও পারিল না। একখানা ভগ্ন অট্টালিকার দুই-একখানা ইট, দুই-এক টুকরা কাঠ পাথর বুকের মাঝে ইতস্ততঃ বিক্ষিপ্ত আছে—কখনও-কখনও দেখিতে পাইত, কিন্তু সে-সকল একত্র করিয়া আবার জোড়া দিয়া অট্টালিকা গাঁথিবার তাহার ইচ্ছাও ছিল না, সামর্থ্যও ছিল না। এখানে এক সময়ে একটা রাজপ্রাসাদ ছিল, প্রমোদকানন ছিল—স্বপ্নের ঘোরে আসিয়াছিল, স্বপ্নশেষে চলিয়া গিয়াছে। সে স্বপ্ন ফিরিয়া দেখিবারও তাহার আর সাধ নাই। যাহা গিয়াছে—তাহা গিয়াছে।

চোদ্দ বছর বয়সের একটি বালকের পক্ষে এরূপ পরিণত বাঁধুনির বাক্য-সমষ্টি রচনা করা প্রতিভার প্রভাবেই শুধু সম্ভব। চোদ্দ বছর তো দূরের কথা, তার তিনগুণ বয়সের কোন লেখকের পক্ষেও এমন বাচ্যার্থ-অতিক্রমকারী ব্যঙ্গার্থপ্রধান ভাষাভঙ্গীর নির্মাণক্ষমতা বিরল-দৃষ্ট বললেও চলে। স্বামীর ঔদাসীন্യের কঠিন পাষাণে প্রতিহত হয়ে কমলার উদ্গত ভালবাসা মরে যেতে বসেছে—এই ভাবটিকেই এখানে উপমা-উৎপ্রেক্ষার সাহায্যে প্রকাশ করবার চেষ্টা করেছেন তরুণ লেখক শরৎচন্দ্র। ভগ্ন অট্টালিকাকে এখানে উপমার আধারস্বরূপ ব্যবহার করা হয়েছে। শরৎচন্দ্র সচরাচর উপমা-অলঙ্কার ব্যবহার করতেন না, উপমাবহুল রচনারীতির প্রতি তাঁর বরং অনীহাই ছিল, উত্তর-জীবনের রচনায় কদাচ তিনি উপমা-উৎপ্রেক্ষার শরণ নিয়েছেন—কিন্তু নিলে কত ফলপ্রদভাবে নিতে পারতেন এই রচনাংশটি তার প্রমাণ। ত্রিস্রমাণ প্রেমকে ভগ্ন অট্টালিকার সঙ্গে তুলনা করার পরিকল্পনাটিও অভিনব।

দেবানন্দপুরে বসে লেখা বিচার আর একটি প্রথম বয়সের লেখা গল্প।



এটি ১৩২০ সালের কার্তিক সংখ্যা। যমুনায় প্রকাশিত হয়েছিল, সম্প্রতি ১৩৮২ আনন্দবাজার পত্রিকা। শারদীয় পুনর্মুদ্রিত হয়েছে। গল্পটি এখনও কোন গ্রন্থভুক্ত হয়নি, খুব সম্ভব প্রথম বয়সের রচনার প্রতি গ্রন্থকার মাঝেরই যে-অবশ্লে। থাকে তার দরুন এটি গ্রন্থে সংবদ্ধ হবার সুযোগবঞ্চিত থেকেছে। কিন্তু নিতান্ত কাঁচা বয়সের লেখা হলেও কি প্লট পরিকল্পনায় কি ভাষার বাঁধুনিতে আশ্চর্য নিটোল একটি গল্প। ভাষার কিঞ্চিৎ নমুন। শোনাই। গল্পটির শুরু হয়েছে এইভাবে :

রাঠোর রাজকুমারী যমুনাবাদি ছেলেবেলায় তাহার পিতার ক্রোড়ে বসিয়া বলিত, ‘বাবা, তুমি সিংহাসনে বসিয়া বিচার কর না কেন?’ অজয় সিংহ কন্ঠার শির চুষন করিয়া বলিতেন, ‘মা তোমার বুড়ো বাবার বড় ভুল হয়, তাই সে আর বিচার করে না— সিংহাসনে বসিয়া শুধু ক্ষমা করিতে ভালবাসে। তুমি যখন ঐ স্বর্ণসিংহাসনে বসিবে, তখন কি করিবে, যমুনা?’

যমুনা বলিত, ‘আমি নিজে বিচার করিব। অপক্ষপাত বিচার করিয়া যে দোষী তাহাকে নিশ্চয় শাস্তি দিব। দোষ করিলে আমি কাহাকেও ক্ষমা করিব না।’

বৃদ্ধ রাজা হাসিতেন, বলিতেন, ‘মা, ক্ষমা কেহ করে না— ক্ষমা হৃদয় হইতে আপনি বাহির হইয়া দোষীর দোষটুকুকে এমন স্নেহের সহিত কোলে লইয়া বসে যে রাজাও সে মুখ দেখিয়া নিজের চোখের জল সামলাইতে পারে না। ক্ষমা আপনি ক্ষমা করে।.....’

রচনায় মুন্সিয়ানার ছাপ প্রথম বাক্য থেকে শেষ বাক্য অবধি পরিস্ফুট। আরম্ভ-ভঙ্গীটির শিল্পকৌশল লক্ষণীয়। তার উপর তৃতীয় অনুচ্ছেদের সংলাপে ক্ষমার ‘দোষীর দোষটুকুকে স্নেহের সহিত কোলে লইয়া বসা’র কল্পনাটি তো একান্তভাবেই শরৎচন্দ্রীয় লেখক-ব্যক্তিতে পূর্ণ। এমন দৃষ্টান্ত তাঁর রচনায় প্রায়ই দেখা যায়। প্রাথমিক দৃষ্টান্তের নজির রূপেই শুধু এখানে এই উদ্ধৃতির অবতারণা।

দত্তা উপন্যাসের আরম্ভাংশ এরূপ :

সেকালে হুগলী ব্রাহ্ম স্কুলের হেডমাস্টারবাবু বিদ্যালয়ের রত্ন বলিয়া যে তিনটি ছেলেকে নির্দেশ করিতেন, তাহারা তিনখানি বিভিন্ন গ্রাম হইতে প্রত্যহ এক ক্রোশ পথ হাঁটিয়া পড়িতে আসিত।

আপাত-দৃষ্টিতে সরল অর্থের একটি বাক্য, কিন্তু এর ভিতর শিল্পের অতি সূক্ষ্ম কৌশল নিহিত আছে। এই শিল্পচাতুর্যের মূলে আছে নূনতম শব্দ-সংখ্যার প্রয়োগ, সংক্ষিপ্ততা, অনেকগুলি বাক্যকে একটি জটিল বন্ধের বাক্যের মধ্যে পুরে প্রকাশের সংহতিবিধান, এবং অর্থব্যক্তি। একটি মাত্র বাক্যে কতগুলি সংবাদ এখানে পরিবেশন করা হয়েছে একবার দেখা যাক। প্রথমত, একালের হুগলী ব্রাহ্ম স্কুল নয়, সেকালের হুগলী ব্রাহ্ম স্কুল। দ্বিতীয়ত, স্কুলের হেডমাষ্টারবাবু তিনটি ছেলেকে বিদ্যালয়ের রত্ন বলে চিহ্নিত করতেন। তৃতীয়ত, তিনটি ছেলে তিনটি ভিন্ন গ্রাম থেকে পায়ে হেঁটে রোজ স্কুলে পড়তে আসত। চতুর্থত, তাদের প্রত্যেকেরই গ্রাম থেকে স্কুলের দূরত্ব ছিল এক ক্রোশ। সবশেষে, বাক্যটির অনুক্ত এই বাঞ্ছনা যে, এই তিনটি ছেলেই বর্তমান উপন্যাসের কাহিনীর সূত্রপাতের সঙ্গে জড়িত এবং তারাই এর ঘটনাবলীর মূলপ্রবর্তক।

পরিষ্কার বুঝতে পারা যায়, এই বাক্যগঠনে শিল্পীর সচেতন মন কাজ করেছে এবং শব্দ-ব্যবহারের যথাযথ্য এবং ব্যয়স্বল্পতা ওই সচেতন মনন-ক্রিয়ার উদ্ভিষ্ট ছিল। একটিমাত্র বাক্যের অবয়বে যে-তথ্যগুলি এখানে লেখক পাঠকের গোচর করেছেন, মামুলী কোন লেখক হলে তাদের পরিজ্ঞাত করাবার জন্ম কোন্না। চার-পাঁচটি বাক্যের বিস্তারের আশ্রয় নিতেন। শরৎচন্দ্র গ্রামের কথা লিখলে কী হবে, রূপ ও আঙ্গিকসচেতন নাগরিক শিল্পীর মেজাজ তাঁকে বরাবর গ্রামাণতা থেকে রক্ষা করেছে, রক্ষা করেছে অশিক্ষিত-পটুত্বের ক্ষতিকর প্রভাব থেকে। ‘সফিস্টিকেশন’ তাঁর ভাষার ছত্রে ছত্রে পরিদৃশ্যমান। সফিস্টিকেশন কথাটার মধ্যে কৃত্রিমতার দোতনা আছে। এটা শরৎচন্দ্রের বেলায়ও কৃত্রিমতামণ্ডিত হতে পারতো যদি তাঁর শৈল্পিক মনোগঠনে আবেগের কমতি থাকতো। কিন্তু সকলেই জানেন যে, শরৎচন্দ্র ছিলেন অতিশয় ভাবাবেগসমৃদ্ধ লেখক। বরং এক-এক সময় আবেগের অতিশয় তাঁর মাত্রাসাম্যকে ভাসিয়ে নিয়ে যাবার উপক্রম করেছে; তিনি মেলো-ড্রামাটিক হয়ে পড়েছেন। রক্ষা এই যে, তাঁর হাতে এই ভাষার আয়ুধটি ছিল। এই ভাষা তাঁকে ভাবাবেগে অতিরেকী হতে দেয়নি, বরং স্বভাব-সংযমের দ্বারা তাঁকে আবৃত করে রেখেছে। তা বর্মের স্নায় তাঁকে স্বতঃস্ফূর্তির উপদ্রব থেকে রক্ষা করেছে। তাঁর আঁটোসাঁটো সংযত ভাষা যদি তাঁর হাতে রক্ষাকবচ হয়ে না থাকতো তো তাঁর পক্ষে বর্ণনায়, বিবৃতিতে ও

সংলাপে বেচাল হয়ে পড়া কিছু অসম্ভব ছিল না। এককথায়, শরৎচন্দ্রের ভাষা প্রায়শঃ শরৎচন্দ্রের ভাষার স্বেচ্ছাচারের প্রতিষেধকরূপে তাঁর আত্মরক্ষার উপায় হয়েছে।

একটা জিনিষ এই প্রসঙ্গে মনে রাখা উচিত। শরৎচন্দ্রের ভাষা খুবই সাংগীতিকগুণসম্পন্ন, মিউজিক্যাল। ছন্দোময় তাঁর বাক্যরীতি। শরৎচন্দ্রের ব্যক্তিজীবনের ছকের সঙ্গে পরিচিত ব্যক্তিমা এই জানেন যে, তিনি বেশ ভাল গান গাইতে পারতেন। প্রথম জীবনে বছর পাঁচেক একটানা ক্লাসিক্যাল সংগীতের চর্চা করেছেন, শেষের দিকে কীর্তন গাইতেন। এই সাংগীতিক গুণ তাঁর ভাষার দেহেও বর্তিয়েছিল। বাক্যের মাঝে মাঝে যতিস্থাপনে এবং ছন্দের দোলায় সেটা ধরা পড়তো। শব্দগুলি সাজাবার কায়দার মধ্যেও ছিল সংগীতের ধ্বনিময়তা। মহেশ গল্পের আরম্ভটির কথাই ধরা যাক। “গ্রামের নাম কাশাপুর। গ্রাম ছোট, জমিদার আরও ছোট,—” গ্রাম আর জমিদার এই পর পর সহাবস্থানের চিত্রের উপস্থাপনার দ্বারা তিনি সুকৌশলে বাক্যটির ভিতর একটি ছন্দের দোলা সৃষ্টিতে সমর্থ হয়েছেন। কিংবা শ্রীকান্ত উপন্যাসের প্রথম পর্বের প্রথম বাক্যটির উপর একবার চোখ বুলনো যাক : “আমার এই ‘ভবঘুরে’ জীবনের অপরাহ্নবেলায় দাঁড়াইয়। ইহারই একটা অধ্যায় বলিতে বসিয়া আজ কত কথাই না মনে পড়িতেছে।” অথবা চরিত্রহীন উপন্যাসের প্রথম বাক্যবন্ধের গড়ন : “পশ্চিমের একটা বড় সহরে এই সময়টায় শান্ত পড়ি-পড়ি করিতেছিল।” প্রথম বয়সের (১৮৯৮) লেখা শুভদা উপন্যাসের আরম্ভটি এইরূপ : “গঙ্গায় আগ্রীবনির্মার্জিতা কৃষ্ণপ্রিয়া ঠাকুরানী চোখ কান রুদ্ধ করিয়া তিনটি ডুব দিয়া পিতল-কলসীতে জলপূর্ণ করিতে করিতে বলিলেন, ‘কপাল যখন পোড়ে তখন এমন করেই পোড়ে।’” আবার একেবারে শেষ বয়সের (১৯৩৩), লেখা শ্রীকান্ত ঐর্ষ্য পর্ব উপন্যাসের প্রারম্ভিক তিন-চারটি বাক্য এইরূপ : “এতকাল জীবনটা কাটিল উপগ্রহের মত। যাহাকে কেন্দ্র করিয়া ঘুরি, না পাইলাম তাহার কাছে আসিবার অধিকার, না পাইলাম দূরে যাইবার অনুমতি। অধীন নই, নিজেকে স্বাধীন বলারও জোর নাই। কাশীর ফেরত ট্রেনের মধ্যে বসিয়া বার বার করিয়া এই কথাটাই ভাবিতেছিলাম।”

সর্বত্র আরম্ভের বাক্যবন্ধগুলির ভিতর একটি ছন্দের দোলা, ধ্বনির প্রতিগম্যতা। সকলের কানে এই ছন্দ বাজবে কিনা জানি না তবে অভিজ্ঞ

কানের কাছে না বেজেই পারে না। সংগীতবেত্তা সাহিত্যিক রোমাঁ রোমাঁ জঁা-জ্যাক রুশো সম্বন্ধে আলোচনা করতে গিয়ে লিখেছেন, রুশো তাঁর রচনার প্রতিটি বাক্য রচনাদেহে গ্রথিত করবার আগে প্রথমে উচ্চারণ করে পড়তেন। তাঁর কান অনুমোদন করলে তবে সেটিকে মুদ্রিত রচনার জগ্য প্রস্তুত পাণ্ডুলিপিতে স্থান দিতেন। শরৎচন্দ্র রুশোর মত এইভাবে বাক্য উচ্চারণ করে পড়তেন কিনা জানা নেই, তবে মনে মনে তিনি যে বাক্যের ধ্বনিগত সম্ভাব্যতা বাজিয়ে দেখতেন সে বিষয়ে সন্দেহ করা চলে না। উদ্ধৃত বাক্যগুলির গঠন বিচার করলেই তাদের ওই জুতিবৈশিষ্ট্যের দিকটা টের পাওয়া যাবে বলে মনে করি। শরৎচন্দ্র শব্দ মেপে মেপে বসাতেন শুধু নয়, শব্দের ধ্বনি মনে মনে কান পেতেও শুনতেন। তিনি কবিপ্রাণ লেখক ছিলেন না, মূলতঃ ছিলেন মানবতন্ত্রী লেখক। তৎসত্ত্বেও তাঁর সাংগীতিক অভিজ্ঞতা তাঁর ভাষায় কাব্যভাবের সঞ্চার করেছিল।

কাহিনীর প্রারম্ভিক অনুচ্ছেদগুলির দ্বারা অনেক সময় গোটা কাহিনীর রূপরেখাটি নিরূপিত হয়ে যায়। শরৎচন্দ্রের একাধিক উপন্যাসের মুখবন্ধ থেকে একথার প্রমাণ দেওয়া চলে, তবে প্রকৃষ্ট প্রমাণরূপে দুটি উপন্যাসের উদাহরণ এখানে দেব। একটি প্রথম বয়সের লেখা উপন্যাস, অগ্নাটি পরিণত জীবনের।

বড়দিদি (রচনা আনুমানিক ১৮৯৮, গ্রন্থাকারে প্রকাশ ১৯১৩)  
উপন্যাসের প্রথম দুইটি অনুচ্ছেদ :

এ পৃথিবীতে এক সম্প্রদায়ের লোক আছে, তাহারা যেন খড়ের আগুন। দপ্ করিয়া জ্বলিয়া উঠিতেও পারে, আবার খপ্ করিয়া নিবিয়া যাইতেও পারে। তাহাদিগের পিছনে সদাসর্বদা একজন লোক থাকা প্রয়োজন—সে যেন আবশ্যক অনুসারে খড় যোগাইয়া দেয়।

গৃহস্থ-কন্ডারা মাটির দীপ সাজাইবার সময় যেমন তৈল ও সলিতা দেয় তেমনি তাহার গায়ে একটি কাঠি দিয়া দেয়। প্রদীপের শিখা যখন কমিয়া আসিতে থাকে—এই ক্ষুদ্র কাঠিটির তখন বড় প্রয়োজন—উন্কাইয়া দিতে হয়, এটি না হইলে তৈল এবং সলিতা সত্ত্বেও প্রদীপের জ্বলা চলে না।

এই থেকেই উপন্যাসের মূল চরিত্র সুরেন্দ্রনাথের পরনির্ভরতার ভাবটি

মুদ্রিত হয়ে গেল এবং গল্পের কাহিনী কোন পথ ধরে চলবে তার একটা আভাস পাওয়া গেল। কাজেই খুব ভেবেচিন্তে সচেতনভাবেই গল্পের এই আরম্ভাংশটি রচনা করা হয়েছে।

অন্যপক্ষে উত্তরকালীন উপন্যাস জাগরণ (অসমাপ্ত, রচনাকাল ১৩৩০ বঙ্গাব্দ), এর প্রারম্ভিক অংশটি এইরূপ :

ব্যারিস্টার মিস্টার আর. এম. রে ব্রাহ্ম ছিলেন না, গোঁড়া হিন্দু তো ছিলেনই না, হয়ত বা আঠারো-আনা ‘বিলাত-ফেরতের জাতি’ নাও হইবেন, তবে এ কথা সত্য যে, তাঁহার পিতা মাতা যখন আরাধ্য দেব-দেবী স্মরণ করিয়া সপ্তপুরুষের অক্ষয় স্বর্গকামনায় একমাত্র পুত্রের নাম শ্রীরাধামাধব রায় রাখিয়াছিলেন, তখন অতি বড় দুঃসপ্নেও তাঁহার। কল্পনা করেন নাই যে, এই ছেলে একদিন আর. এম. রে হইয়া উঠিবে, কিংবা তাহার খাদ্য অপেক্ষা অখাদ্য এবং পরিধেয় বস্ত্র অপেক্ষা অপরিধেয় বস্ত্রেই আসক্তি হ্রমদ হইয়া দাঁড়াইবে। যাই হউক, সেই পিতা-মাতারা আজ যখন জীবিত নাই এবং পরলোকে বসিয়া পুত্রের জন্ম তাঁহার। মাথা খুঁড়িতেছেন কিংবা চুল ছিঁড়িতেছেন অনুমান করা কঠিন, তখন এই দিকটা ছাড়িয়া দিয়া তাঁহার। যেদিকটায় মতদ্বৈধের আশঙ্কা নাই, সেই দিকটাই বলি।

ভাষাভঙ্গীর মুস্লিয়ানা লক্ষণীয়। প্রচ্ছন্ন ব্যঙ্গের ঝিলিক চোখে না পড়ে পারে না। কিন্তু রে সাহেবের যেদিকটা বিলাতিয়ানায় আচ্ছন্ন নয়, সেদিকটা কিন্তু বিদ্রূপ বা কোতুক উদ্বেক করবার মত দিক নয়। আলোচ্য উপন্যাসে সেই দিকটাই তুলে ধরা হয়েছে আর এ সম্বন্ধেই ‘মতদ্বৈধের আশঙ্কা’-বিহীনতার ইঙ্গিত করা হয়েছে। জাগরণ উপন্যাসের পরবর্তী ঘটনার ধারা অনুধাবন করলেই এ কথার সত্যতা উপলব্ধি করা যাবে।

লক্ষ্য করলে দেখা যাবে যে, শরৎচন্দ্র প্রকৃতি-বর্ণনা কিংবা নারীর রূপ-বর্ণনায় কোন সময়েই উচ্ছ্বসিত হননি। প্রকৃতি-বর্ণনায় রবীন্দ্রনাথের কবি-লেখনীর সহজাত আনন্দ-তন্ময়তা অথবা নারীর রূপবর্ণনায় বঙ্কিমচন্দ্রের সৌন্দর্যপ্রীতির উদ্বেলতা—এর কোনটাই শরৎচন্দ্রের কল্পনাকে উদ্বিগ্ন করেনি। তিনি মানবকেন্দ্রিক লেখক, মানুষের অন্তর্জীবনের ছবি ফুটিয়ে তুলতেই সমধিক উৎসাহ বোধ করতেন। নরনারীর পারস্পরিক সম্পর্কের

আকর্ষণ-বিকর্ষণের লীলা কিংবা মনস্তাত্ত্বিক সংঘাত তাঁর কথাসাহিত্যের একটি প্রধান উপজীব্য ছিল। “রূপের বর্ণন”, স্বভাবের বর্ণনা, আমার বইয়ের মধ্যে প্রায় নেই। ও আমি দু-এক কথায় সেরে দিই, বেশি নজর দিই না। আসল বস্তু, তার সত্তা বা মন যাই বলুন—সেটা মানুষের ভিতরটা।” এছাড়া শ্রীকান্ত প্রথম পর্বের আরম্ভ-কালেও তিনি লিখেছেন :

তাছাড়া মস্ত মুন্সিল হইয়াছে আমার এই যে, ভগবান আমার মধ্যে কল্পনা-কবিত্বের বাষ্পটুকুও দেন নাই। এই দুটো পোড়া চোখ দিয়া আমি যা কিছু দেখি ঠিক তাহাই দেখি। গাছকে ঠিক গাছই দেখি—পাহাড়-পর্বতকে পাহাড়-পর্বতই দেখি। জলের দিকে চাহিয়া জলকে জল ছাড়া আর আর কিছুই মনে হয় না। আকাশে মেঘের পানে চোখ তুলিয়া রাখিয়া, ঘাড়ে ব্যথা করিয়া ফেলিয়াছি, কিন্তু যে মেঘ সেই মেঘ! কাহারো নিবিড় এলো-কেশের রাশি চুলোয় যাক—একগাছি চুলের সন্ধানও কোনদিন তাহার মধ্যে খুঁজিয়া পাই নাই। চাঁদের পানে চাহিয়া চাহিয়া চোখ ঠিকরাইয়া গিয়াছে ; কিন্তু কাহারো মুখটুকু ত কখনো নজরে পড়ে নাই। এমন করিয়া ভগবান যাহাকে বিড়ম্বিত করিয়াছেন, তাহার দ্বারা কবিত্ব সৃষ্টি করা ত চলে না। চলে শুধু সত্য কথা সোজা করিয়া বলা। অতএব আমি তাহাই করিব।

কিন্তু এই বিবৃতিকে পুরোপুরি আক্ষরিক অর্থে গ্রহণ করার আবশ্যকতা নেই। শ্রীকান্তের জবানীতে এ লেখকের বিনয়ের একটা ভঙ্গী ওয়াই সম্ভব—আত্ম-অবনয়নের ভঙ্গী। একথা অবশ্য সত্য যে শরৎচন্দ্র রবীন্দ্রনাথের মত নিসর্গ-প্রকৃতির বর্ণনায় আশ্রিত হননি, তবে চেষ্টা করলে তিনিও যে এক্ষেত্রে গভীর রূপসচেতনতার পরিচয় দিতে পারেন তার প্রমাণ তাঁর ওই শ্রীকান্ত উপন্যাসচতুষ্টয়ের মধ্যেই রয়েছে। দৃষ্টান্ত শ্রীকান্ত প্রথম পর্বে ইন্দ্রনাথ ও শ্রীকান্তের গঙ্গানদীতে মাছ চুরির কালে গঙ্গা-প্রকৃতির বর্ণনা, দ্বিপ্রহর নিশীথের শ্মশান-বর্ণনা ; শ্রীকান্ত দ্বিতীয় পর্বের শ্রীকান্তের রেঙ্গুন যাত্রাকালে জাহাজে ঝড়ের বর্ণনা ; ইত্যাদি। সংশ্লিষ্ট অংশগুলির সব কয়টির উদ্ধৃতি এখানে উৎকলন করা সম্ভব নয়, তবে একটি উদ্ধৃতি তুলে দিচ্ছি—গঙ্গানদীতে অঙ্ককার নিশীথিনীর রূপ বর্ণনা। তার থেকেই

বুঝতে পারা যাবে শরৎচন্দ্র প্রকৃতি-বর্ণনায় আপাত-অনীহা দেখালেও এবং কোন কোন জায়গায় পল্লীপ্রকৃতির বর্ণনায় কবিদের আত্যন্তিক উচ্ছ্বাসকে ব্যঙ্গ করলেও (শ্রীকান্ত চতুর্থ পর্ব দ্রষ্টব্য) প্রয়োজনবোধে প্রকৃতি-বর্ণনায় তিনি কতখানি দ্ব্যর্থ হতে পারেন :

কয়েক মুহূর্তেই ঘনাক্ষকারে সম্মুখ এবং পশ্চাৎ লেপিয়া একাকার হইয়া গেল। রহিল শুধু দক্ষিণে ও বামে সমান্তরাল প্রসারিত বিপুল উদাম জলপ্রোত এবং তাহারই উপর তীব্র-গতিশীল এই ক্ষুদ্র ভরণীটি এবং কিশোর ঝরক দুটি বালক। প্রকৃতিদেবীর সে অপরিমেয় গভীর রূপ উপলব্ধি করিবার বয়স তাহাদের নহে, কিন্তু সে কথা আমি আজও ভুলিতে পারি নাই। বায়ুলেশহীন নিষ্কম্প, নিস্তব্ধ, নিঃসঙ্গ নিশীথিনীর সে যেন এক বিরাট কালীমূর্তি। নিবিড় কালে চুলে দ্ব্যলোক ও ভুলোক আচ্ছন্ন হইয়া গেছে এবং সূচীভেদ্য অক্ষকার বিদীর্ণ করিয়া করাল দংষ্ট্রারেখার দ্বারা দিগন্তবিস্তৃত এই তীব্র জলধারা হইতে কি এক প্রকারের অপরূপ স্তিমিত দ্ব্যতি নিষ্ঠুর চাপা হাসির মত বিচ্ছুরিত হইতেছে। আশেপাশে কোথাও বা উন্নত জলপ্রোত গভীর তলদেশে ঘা খাইয়া উপরে উঠিয়া ফাটিয়া পড়িতেছে, কোথাও বা প্রতিকূল গতি পরস্পরের সংঘাতে আবর্ত রচিয়া পাক খাইতেছে; কোথাও বা অপ্রতিহত জলপ্রবাহ পাগল হইয়া ধাইয়া চলিয়াছে।

এই বর্ণনার কি কোন তুলনা আছে? এ কি ঠিক 'জলের দিকে চাহিয়া জলকে জল ছাড়া আর কিছুই মনে হয় না'-র মত বোধ হচ্ছে? লেখকেরা বিনয়-নম্রতায় কখনও-কখনও বৈষ্ণব ভক্তদেরও ছাড়িয়ে যান—এ তারই নমুনা।

আর নারীর রূপ? সেও কি শরৎচন্দ্রের হাতে পরিস্ফুটিত হয়নি? এক্ষেত্রে অবশ্য তিলোত্তমা-মৃগালিনী-কপালকুণ্ডলা-কুন্দনন্দিনী-রোহিণীর দেহ-সৌন্দর্যবর্ণনায় উচ্ছ্বসিতলেখনী বঙ্কিমচন্দ্রের সঙ্গে আর কোন লেখকের কোন তুলনাই হয় না, তাহলেও শরৎচন্দ্রও প্রয়োজনবোধে বঙ্কিমচন্দ্রের ধারারক্ষা করতে পারেন না এমন নয়। অবশ্য বঙ্কিমচন্দ্রের মত শরৎচন্দ্র এ ব্যাপারে কথার বিস্তার-বাহুল্যের পক্ষপাতী নন, তিনি তাঁর অভ্যাস অনুযায়ী পরিমিত বাক্যপ্রয়োগের নীতিতে বিশ্বাসী এবং দু-চারটি অঁচড়েই কাজ

সারেন। বর্ণনার ফেনিলতার পরিবর্তে তিনি বর্ণনার তির্যক রেখার উপর দিয়ে চলতে ভালবাসেন।

চরিত্রহীন উপস্থাসের কিরণময়ীর রূপবর্ণনা :

উপেন্দ্র দরজা ঠেলিয়া চোঁকাঠের উপর দাঁড়াইয়া স্তম্ভিত হইয়া গেলেন। স্ত্রীলোকটি কেরোসিনের ডিবা হাতে করিয়া একপাশে দাঁড়াইয়া আছে। মাথার উপরে অল্প একটুখানি আঁচলের ফাঁক দিয়া সমস্ত-রচিত কবরীর এক অংশ দেখা যাইতেছে। দেখা গেল, তার একটিমাত্র কেশও স্থানভ্রষ্ট হয় নাই। নিখুঁত সুন্দর মুখের উপর হাতের আলোকসম্পাতে জয়ুগের মধ্যে সন্নিবিষ্ট কাঁচপোকাকার টিপ চিক্‌চিক্‌ করিয়া উঠিল এবং ঈষৎ আনত চোখ দুটি দিয়া যে বিহ্বৎপ্রবাহ বহিয়া গেল, চতুর্দিকের নিবিড় অন্ধকারে তাহার অপূর্ব জ্যোতি ক্ষণকালের জন্য উভয়কেই বিভ্রান্ত করিয়া ফেলিল। সতীশ স্পষ্ট দেখিতে পাইল, ওষ্ঠাধরে হাসির রেখা বাধা পাইয়া বারংবার ফিরিয়া যাইতেছে। সে উপেন্দ্রর গা ঠেলিয়া দিল।

ভাষার কী অসামান্য সংযম। এই সংযম একদিনে আয়ত্ত হয়নি, এর পিছনে দীর্ঘদিনের অনুশীলনের ইতিহাস সুগুপ্ত রয়েছে—সমস্ত আর ক্লেশসহনক্ষম অনুশীলন।

৩

শ্রীমতী রাধারাণী দেবীকে এক পত্রে শরণচন্দ্র লিখেছিলেন, “ভাষার ওপরে দখল আমার চিরদিনই কম, শব্দসম্পদ যে কত সামান্য এ সংবাদ আর যার কাছেই লুকোনো থাক্, তোমাদের কাছে থাকবার কথা নয়।” কিন্তু এই বিরূতিকে সত্য বলে গ্রহণ করবার হেতু নেই। বিনয়-ভাষণের এ একটা ভঙ্গী মাত্র, যার ইঙ্গিত আমি পূর্বেই দিয়েছি। আর যদি তর্কের খাতিরে এই বিরূতিকে সত্য বলে ধরেও নেওয়া যায় তাহলেও কিছু এসে-যায় না। কেননা লেখকের ভাষাশক্তি তাঁর ব্যবহৃত শব্দসংখ্যার কমবেশীর উপর নির্ভর করে না, নির্ভর করে শব্দ সাজাবার কায়দার উপর। যত সামান্য পরিমাণ শব্দ নিয়েই তিনি তাঁর রচনার প্রাকার দাঁড় করান না কেন, দেখতে



হবে শব্দগুলিকে তিনি কীভাবে প্রয়োগ করেছেন, শব্দের অরয়ে তিনি ছন্দ রক্ষা করেছেন কিনা, দ্বিত্ব তথা বাহ্যিক ভাষিতা এড়িয়ে চলেছেন কিনা, প্রযুক্ত শব্দসম্ভারের মধ্যে তাঁর স্বীয় ব্যক্তিত্বের নির্যাস সঞ্চারিত করে দিতে পেরেছেন কিনা, সর্বোপরি এইসব প্রক্রিয়া অনুসরণ করার পরও তাঁর বাক্যাবলীর অর্থ অভীপ্সিত সারল্য ও সহজতা অর্জন করতে পেরেছে কিনা।

এই মানদণ্ডে বিচার করলে শরৎচন্দ্রকে শব্দের জাহ্নক বললেও অত্যাক্তি হয় না। তাঁর শব্দের ম্যাজিক অপ্রতিরোধ্য, সংক্রামক। ওই শব্দপ্রয়োগের নীতি অনুধাবন করলে বোঝা যায় পিছনে বহু-অধীত একটি বৈজ্ঞানিক মেজাজ কাজ করেছে। যুক্তিপ্রধান বৈজ্ঞানিক সাহিত্য পড়ার ফলেই শুধু এ-জাতীয় শব্দসংস্কার তথা ভাষাভঙ্গীর জন্ম হওয়া সম্ভব।

একটা কথা সকলেরই এ প্রসঙ্গে মনে রাখলে ভাল হয় যে, শরৎচন্দ্র নিজেকে বাইরে একজন কম-লেখাপড়া-জানা 'দাঠাকুর'গোছের মানুষের ভাবমূর্তিতে প্রতিষ্ঠিত করে আত্মপরিচয় দিতে ভালবাসতেন। তিনি তাঁর অধ্যয়নশীলতা ও বৈদগ্ধ্যকে আড়াল করে গ্রামঘরের সাধারণ একজন লালাখ্যাপা মানুষরূপে আপনার পরিচয় দিতে চাইতেন। শিল্পীদের নানা রকমের খেয়াল থাকে, এও এক ধরনের খেয়াল। স্বীয় প্রকৃত সত্তাকে গোপন করে বাইরে আলাভোলা বৈরাগী সেজে থাকার মধ্যে জনসাধারণের সঙ্গে নিষ্কলুষ কৌতুক করার যে-একটা প্রবণতা দেশী-বিদেশী বহু প্রথম শ্রেণীর শিল্পীদের মধ্যে দেখা যায়, সেই প্রবণতা শরৎচন্দ্রেরও শিল্পী-ব্যক্তিত্বের অন্যতর গোত্রলক্ষণ ছিল। তিনি সাধারণকে 'ভাঁড়িয়ে' 'মজা' পেতেন। আর এই হূর্মর রঙ্গ-বোধেরই প্রকাশ তাঁর বিদ্যা-বৈদগ্ধ্য লোকচক্ষুর অগোচর রাখার চেষ্টার মধ্যে।

নয়তো বাস্তবতঃ তিনি ছিলেন ইউরোপীয় সমাজবিজ্ঞানী সাহিত্যের একজন নিবিষ্ট পাঠক। সমাজতত্ত্ব, অর্থনীতি, ইতিহাস, নৃবিজ্ঞান, রাষ্ট্র-বিজ্ঞান প্রভৃতি বিষয়ক বই পড়তে তিনি স্বভাবের স্ফূর্তি অনুভব করতেন। প্রসিদ্ধ সমাজবিজ্ঞানী হার্বার্ট স্পেন্সারের তিনি একজন সাতিশয় ভক্ত ছিলেন এবং তাঁর সমস্ত বই তন্ন তন্ন করে পড়েছিলেন। নৃবিজ্ঞানেও যে তাঁর কত পড়াশুনো ছিল তা অনিলা দেবীর ছদ্মনামে লিখিত নারীর মূল্যের পাঠা খুললেই বুঝতে পারা যাবে। বাট্রাও রাসেলের গ্রন্থ পড়ে অভিভূত হয়ে শরৎচন্দ্র দিলীপকুমারকে একবার সাথে লিখেছিলেন যে, ইউরোপে জন্মালে

তিনি একজন সমাজতাত্ত্বিক লেখক হতে পারতেন, এই পোড়া দেশের জল-হাওয়ার দোষে তিনি কিনা হয়েছেন একজন জনমনোরঞ্জক গল্পলেখক !

এই থেকেই মানুষটির ধাত বোঝা যায়। চন্দননগর প্রবর্তক সজ্জের আয়োজিত আলাপ-সভায় শরৎচন্দ্র নিজের কথা বলতে গিয়ে বলেছিলেন, “পরের লেখা সাহিত্য আমি খুব কম পড়েছি। ও আমার ভাল লাগে না। আমার বাড়িতে যে বই আছে তার অধিকাংশই সায়েন্সের বই।...আমার ভাষাটা বোধহয় সায়েন্সের বই পড়ার দরুন ঐ-রকম হয়ে থাকবে।”

লেখকের এই আপন স্বীকারোক্তি থেকেই তাঁর ভাষা-বৈশিষ্ট্যের রহস্যের চাবিকাঠির সন্ধান পাওয়া যায়। অর্থাৎ নিজেই তিনি বলেছেন তাঁর ভাষার মেজাজটা বিজ্ঞানের—সায়েন্সের। সায়েন্সের ভাষার কয়েকটি প্রধান লক্ষণ—যাথাযথ্য, মিতব্যয়ী শব্দব্যবহার, দ্বিহ বা বাহুল্য উক্তি পরিহার, উদ্দিষ্ট বক্তব্যের আয়তনের মধ্যেই শুধু রচনাকে সীমাবদ্ধ রাখা, বাড়তি বক্তব্যের মধ্যে না যাওয়া, অলঙ্কারিক রীতি (যংক, অনুপ্রাস, উপমা, উৎপ্রেক্ষা, অতিশয়োক্তি ইত্যাদি) যথাসম্ভব বর্জন, সর্বোপরি অর্থের স্পষ্টতা ও সুবোধতা।

এই সব কয়টি মানদণ্ডের পরীক্ষাতেই শরৎচন্দ্রের ভাষারীতি কমবেশী উত্তীর্ণ হওয়ার ক্ষমতা রাখে। যদিও তাঁর রচিত সাহিত্য কথাসাহিত্য, তাহলেও সেই কথাসাহিত্য বৈজ্ঞানিক রচনার লক্ষণাক্রান্ত বলাই যুক্তিযুক্ত। এই কথাটি মনে রাখলে শরৎসাহিত্যের প্রকৃতি উপলব্ধির কাজ সহজতর হতে পারে।

## প্রবন্ধ সাহিত্য

প্রবন্ধ লেখক হিসাবেও শরৎচন্দ্রের একটা ভূমিকা আছে। তবে এই ভূমিকার সম্যক্ অবহিতি ও মূল্যায়ন এখনও হয়েছে বলে মনে হয় না। কথাসিদ্ধি রূপে শরৎচন্দ্রের সৃষ্টিশীল ব্যক্তিত্বের সর্বাতিশায়ী প্রভাব মননশীল প্রবন্ধকার রূপে তাঁর দানকে ভাসিয়ে নিয়ে গেছে বললেও চলে। একথা অবশ্য খুবই সত্য যে, শরৎচন্দ্র বঙ্কিমচন্দ্র কিংবা রবীন্দ্রনাথের মত প্রণালী-বদ্ধভাবে প্রবন্ধ সাহিত্যের চর্চা করেননি কিংবা এক্ষেত্রে তাঁর অনুশীলন ওই দুয়ের মত প্রাচুর্যলক্ষণাক্রান্তও বলা চলে না। সাময়িক উপলক্ষে কিংবা কখনও কখনও গভীরভাবে অনুভূত কোনও বিষয়ে বক্তব্য প্রকাশের আন্তরিক তাগিদে তিনি নিত্যন্ত ছাড়াছাড়া ভাবে মাঝে-মধ্যে প্রবন্ধ রচনার উদ্দেশ্যে লেখনী ধারণ করেছেন। তাঁর প্রবন্ধের পরিমাণ একত্র জড় করেও একটা মোটা বই দাঁড় করানো যেত কিনা সন্দেহ। ‘নারীর মূল্য’ ‘স্বদেশ ও সাহিত্য’ (যার ভিতর তাঁর বিখ্যাত ‘তরুণের বিদ্রোহ’ রচনাটি বিধৃত আছে), কিছু সাহিত্য-সংক্রান্ত অভিভাষণ ও আলাপচারী এবং পত্রগুচ্ছ—এই হলো তাঁর সমগ্র প্রবন্ধ সাহিত্য বা প্রবন্ধজাতীয় রচনার পুঁজি। এত স্বল্পপরিমাণ দানের ভিত্তিতে কোনও একজন লেখককে প্রবন্ধকার হিসাবে আখ্যাত করা চলতে পারে কিনা সেটা একটা প্রশ্ন হতে পারে। কিন্তু প্রাচুর্যই তো মূল্যবিচারের একমাত্র মাপকাঠি নয়। প্রবন্ধের বিষয়বস্তু, বক্তব্য, রচনারীতি, চিন্তার মৌলিকতা এগুলিকেও সমপরিমাণে হিসাবের মধ্যে গণ্য করতে হবে। এক কথায়, পরিমাণের পাশে পাশে গুণেরও তৌল করতে হবে। খতিয়ে দেখতে গেলে, পরিমাণ অপেক্ষা গুণেরই সঠিক তৌল হওয়া দরকার। এই মানদণ্ডে বিচার করে শরৎচন্দ্রকে একজন বিশিষ্ট প্রাবন্ধিকের সম্মান দান করবার পথে কোনরূপ বাধা থাকা উচিত নয় বলে মনে করি।

আমাদের আলোচ্য বিষয়ের বিশ্লেষণ বা বিস্তারিত ক্রিয়ায় প্রবৃত্ত হওয়ার পূর্বে শরৎচন্দ্রের মানসিক গঠনের উপর এক নজর চোখ বুলিয়ে নেওয়া মন্দ নয়। কেননা ওই সমীক্ষণ প্রবন্ধকার রূপে শরৎচন্দ্রের রচনার ভাল-মন্দের

নিরূপণে সহায়ক হতে পারে। প্রবন্ধ সাহিত্য মূলতঃ মননশীলতার ক্ষেত্র। এই ক্ষেত্রে ভাবাবেগ অপেক্ষা যুক্তিবিচারের সমধিক প্রাধান্য। অথচ শরৎচন্দ্র মানুষটি ছিলেন অতিশয় আবেগময়। কি কথাসাহিত্য কি প্রবন্ধ সাহিত্য, তাঁর সর্ববিধ রচনা আবেগে জরজর ছিল বললেও অতুক্তি হয় না। আবেগের রঙে না ছুপিয়ে তিনি কোন কিছুই বলতে বা লিখতে অভ্যস্ত ছিলেন না। বাঙালীর ভাবাবেগসমৃদ্ধ রূপের এমন সার্থক রূপকার আর হয় না।

অথচ মজার ব্যাপার এই যে, অধ্যয়নের ক্ষেত্রে তাঁর সমধিক পক্ষপাত ছিল সেই সমস্ত বিষয়ের প্রতি যা আবেগের ক্ষেত্র থেকে দূরাবস্থিত এবং মননশীলতার সঙ্গে নিবিড়ভাবে সম্পৃক্ত—সমাজ বিজ্ঞান, রাজনীতি বিজ্ঞান, অর্থনীতি, নৃতত্ত্ব, ইতিহাস ইত্যাদি। ব্যক্তিজীবনে হৃদয়াবেগের প্রাবল্য আর চিন্তাচর্চার ক্ষেত্রে মননশীলতার সংস্কারের প্রতি দৃষ্টিগ্রাহ্য পক্ষপাতিত্বের ফলে একজন প্রবন্ধ লেখকের মানসিক গঠন যা হতে পারে, যা হওয়া সম্ভব, প্রাবন্ধিক শরৎচন্দ্রের মানসিক গঠন ঠিক তাই ছিল—তিনি দ্বৈধতার দ্বারা আক্রান্ত ছিলেন। বক্তব্য প্রতিষ্ঠায় যুক্তিবিচার দ্বারা চালিত হওয়া যেখানে সবচেয়ে বেশী প্রয়োজন, সেখানেও আবেগ এসে তাঁর লেখনীর উপর ভর করে তাঁর চিন্তাকে ভিন্নমুখে নিয়ে যাবার চেষ্টা করত। যুক্তিশৃঙ্খলা ভেঙ্গে গিয়ে বড় হয়ে উঠত লেখকের আবেগসমৃদ্ধ ভাবুকের রূপ কিংবা সমাজকল্যাণকারী এক প্রচারক বক্তার রূপ।

ব্যক্তিত্বের এই দ্বিধা-বিভক্ত রূপের কথা শরৎচন্দ্র নিজ মুখেই কবুল করে গেছেন। “পরের লেখা সাহিত্য আমি খুব কম পড়েছি। ও আমার ভাল লাগে না। আমার বাড়িতে যে বই আছে তার অধিকাংশই সায়েন্সের বই। ...আমার ভাষাটা বোধহয় সায়েন্সের বই পড়ার দরুণ ঐরকম (সাদামাঠা অলঙ্কারবর্জিত) হয়ে থাকবে।” লেখেন গল্লোপন্যাস অথচ পড়েন সমাজ বিজ্ঞান ও অন্যান্য বিজ্ঞানের বই এ একটা বিচিত্র সহাবস্থান। নারীর মূল্য বইখানা পড়লেই বোঝা যায় তিনি সমাজতত্ত্ব সংক্রান্ত গ্রন্থাদি কত মনোযোগ সহকারে অধ্যয়ন করেছিলেন। হার্বার্ট স্পেন্সার তাঁর সবচেয়ে প্রিয় লেখক ছিলেন। এ ভিন্ন ফ্রেজার, ম্যাকডুগাল, মর্গান প্রমুখ সমাজবিজ্ঞানীদের রচনার সঙ্গেও তিনি অতিশয় পরিচিত ছিলেন। দিলীপকুমার রায়কে একবার আক্ষেপের সুরে লিখেছিলেন যে তাঁর হওয়া উচিত ছিল একজন সমাজবিজ্ঞানী, এদেশের পচা জলহাওয়ার দোষে হয়ে দাঁড়িয়েছেন একজন

লোকমনোরঞ্জন গল্পকার। এই স্রীকারোক্তি থেকেই মানুষটির মনের ধাত বোঝা যায়। আর তাঁর দ্বিধাবিভক্ত মানসিকতারও সূত্র নিহিত আছে এইখানে।

শরৎচন্দ্র ইচ্ছা করলে একজন বেশ বড় রকমের প্রবন্ধকার হতে পারতেন কিন্তু নানা বাস্তব অবস্থার চাপে তিনি এইদিকে তাদৃশ মনঃসংযোগ করতে পারেননি। একাধিক কার্যকারণঘটিত বাধার দরুন তিনি এইদিকে তাঁর ইচ্ছার জোর খাটাতে উৎসাহ বোধ করেননি। সবচেয়ে বড় বাধা তাঁরই কল্লীকৃত পূর্বোল্লিখিত “এ দেশের পচা জলহাওয়ার দোষ” এবং—তাঁর স্ব-স্বভাবের বাধা। মানুষটির হৃদয়বৃত্তির প্রাবল্য তাঁকে মননশীল লেখকরূপে প্রতিষ্ঠা দেবার পথে বারবার প্রতিবন্ধকতা করেছে। এমন কি কথাসাহিত্যের নির্দিষ্ট আয়ত্তনের মধ্যে এলেও দেখতে পাই সেখানেও হৃদয়াবেগেরই রাজত্ব—লেখকের মননশীল সত্তাটি অনাদৃত অবস্থায় একপাশে কুণ্ঠিত হয়ে পড়ে আছে। দেখানেও না মননশীলতা আত্মপ্রতিষ্ঠা করতে চেয়েছে, আবেগ এসে মননের কণ্ঠরোধ করে দাঁড়িয়েছে। গোটা শরৎ-সাহিত্য জুড়ে এই দ্বৈধতার চিত্র, স্বতোবিরোধের ছবি। সুতরাং প্রবন্ধ সাহিত্যেও যে একই অবস্থার মুখোমুখি হতে হবে তাতে আর বিচিত্র কী।

॥ ২ ॥

নারীর মূল্য বইটি তিনি প্রথমে অনিলা দেবীর ছদ্মনামে প্রকাশ করেছিলেন, পরে স্বনামে প্রকাশ করেন। এই স্বল্পায়তন গ্রন্থের সীমিত পরিসরের ভিতর শরৎচন্দ্র নারীর সামাজিক অবস্থার মূল্যায়ন করেছেন। যুগ যুগ ধরে নারী পুরুষের দ্বারা কী শোচনীয়রূপে শোষিত ও নির্যাতিত হয়ে এসেছে তাঁরই একটি জ্বলজ্বালন্ত মর্মান্তিক চিত্র পৃথিবীর বিভিন্ন দেশের উদাহরণ যোগে তিনি এই বইয়ে তুলে ধরেছেন। সভ্যতার আদি পর্বে সমাজের গঠন যখন ছিল মাতৃতান্ত্রিক তখন নারীর এরকম হীনাবস্থা ছিল না। বরং পুরুষের তুলনায় তার অধিকার ছিল অনেক বেশী সুরক্ষিত। কিন্তু পুরুষের শ্রেণীস্বার্থের কারসাজিতে যখন মাতৃতান্ত্রিক সমাজের রূপ পরিবর্তিত হয়ে পিতৃতান্ত্রিক সমাজ-কাঠামোর পত্তন হলো তখন থেকেই নারীর মন্দদশার শুরু হলো, তার কপাল পুড়লো। পুরুষশাসিত সমাজব্যবস্থায় নারী হয়ে উঠলো পুরুষের স্থূল ভোগের উপকরণ ও স্বার্থমলিন সেবা আহরণের যন্ত্রবিশেষ। যদিও নামতঃ দেবীরূপে মাহাত্ম্য

কীর্তন করে নারীর মন ভোলাবার জারিজুরির অন্ত রইলো না। সেবা ও ভোগের দাসীরূপে নারীর এমনিতেই লাঞ্ছনার শেষ নেই, তার উপরে অর্থ-নৈতিক পরাধীনতা যুক্ত হয়ে নারীর অধোগতিকে চূড়ান্ত করে ছাড়লো।

শরৎচন্দ্র তাঁর বইয়ে সভ্যতার ইতিহাসের বিবর্তনের ছকে ফেলে নারীর এই বঞ্চিত পীড়িত অবহেলিত রূপটিকেই আবেগমথিত ভাষায় উপস্থিত করেছেন বহুতর তথ্য সমাবেশের সাহায্যে। এটি একটি নারী-বিষয়ক সমাজতাত্ত্বিক তথ্যসমৃদ্ধ বই কিন্তু রচনার বিশেষ ধরনের জন্ম তা নিছক তথ্যাশ্রয়ী বই হয়ে থাকেনি—তার ভিতর কথকতার আবেগ প্রবেশ করেছে, প্রচারকের কণ্ঠস্বর শুনতে পাওয়া গেছে। নৈর্ব্যক্তিক ও নির্মোহ বৈজ্ঞানিক সমীক্ষা ব্যক্তিগত আবেগের দ্বারা স্পৃষ্ট ও অভিযুক্ত হয়ে তার বৈজ্ঞানিক চরিত্র হারিয়েছে।

তবু এই বইয়ের যথেষ্ট গুরুত্ব আছে। কেননা বাংলা ভাষায় নারী জাতির পক্ষাবলম্বন করে আবেগতপ্ত ভাব ও ভঙ্গিমায় লেখনী চালনার এর চেয়ে সার্থক দৃষ্টান্ত আর নেই। শরৎচন্দ্র যে নারীর দুঃখ-বেদনা কত গভীরভাবে অনুভব করতেন তার অন্ততর নিঃসংশয় প্রমাণ এই বই। বস্তুতঃ তাঁর গোটা জীবনের সাহিত্যকর্মই নারীর লাঞ্ছনা ও দুর্গতির জন্ম অপরিমেয় সহানুভূতি ও ক্রন্দনপরতায় ভরা। কিন্তু প্রবন্ধের আধারে তাঁর এই নারীদরদী রূপ সন্দর্শন করতে হলে বিশেষভাবে আমাদের এই বইটির খোঁজ করতে হবে। নারীর মূল্য বই তিনি দশ খণ্ডে সমাপ্ত করবেন বলে অভিপ্রায় পোষণ করতেন এবং তার জন্ম প্রয়োজনীয় মালমসল্লাও আহরণ করে আসছিলেন অনেকদিন ধাবৎ। কিন্তু যে-কোন কারণেই হোক তাঁর এই সংকল্প তিনি কাজে পরিণত করে যেতে পারেননি। মানুষের অনেক সার্থলালিত কিন্তু কার্যতঃ অপূরিত মনোরথের মতই এই মনোরথও হৃদয়ে উদ্ভিত হয়ে হৃদয়ে লয় পেয়ে গেছে। কিন্তু মনোরথ পূরণ করতে পারুন আর না পারুন এই থেকে তাঁর নারী সমস্যা়ার বিষয়ে গভীর সজাগতার পরিচয় পাওয়া যায়। এদেশের জলবায়ুর দোষেই হোক আর গুণেই হোক তিনি তাঁর শিল্পসৃষ্টির মূল আবেগ কথাসাহিত্যের খাতে চালনা করেছিলেন। আর কথাসাহিত্যের আধারেই তিনি তাঁর নারী ভাবনাকে রূপায়িত করেছেন মূলতঃ, রূপায়িত করেছেন অনবদ্য শিল্পরসে জারিত করে। তারপর আর উদ্ধৃত আবেগ বোধকরি এমন কিছু অবশিষ্ট থাকেনি, যাকে

সম্বল করে একই বিষয়ের উপর দশ গুণ প্রবন্ধের বই লেখা যায়। সেইজন্যই সম্ভবতঃ নারীর মূল্য বই দীর্ঘায়িত করার বাসনা তিনি শেষ পর্যন্ত ত্যাগ করেছিলেন। কিন্তু বাসনাটি বাস্তবায়িত হলে সে কি চমৎকারই না হতো! মনুর পুরুষপ্রভুত্বব্যঞ্জক পুরুষ কঠোর শাস্ত্রীয় বিধিবিধান সমূহের একটা মুখের মত জবাব রচিত হতে পারতো বাংলা সাহিত্যের জবানীতে। আন্তর্জাতিক নারীবর্ষে এমন একখানি গ্রন্থমালা নারীকল্যাণকামী সমাজ-সেবীদের কত কাজেই না লাগতে পারতো!

নারীর মূল্য থেকে একটি উদ্ধৃতি দিয়ে এ বইয়ের প্রসঙ্গ শেষ করছি। নারীর লাঞ্জনায় শরৎচন্দ্রের অন্তর কত গভাব ভাবে কাঁদতো এই উদ্ধৃতিই তাব প্রমাণ :

পুরুষ বুঝাইয়াছে সহায়তা হওয়া সত্ত্বেও পরম ধর্ম। মনুও বলিয়াছেন, এক পতি-সেবা ব্যতীত স্ত্রীলোকের আর কোন কাজ নাই। সে কালে পুরুষের সেবা করিয়াছে, পরকালে গিয়াও করিবে। কিন্তু কখন করিবে, কতদিন পরে করিবে, এত ব্যঞ্জনাটে সে খাতিরে চাড়ে নাই। তাহার বিলম্ব মতে না, তাই মরণ সম্বন্ধে একটু সহন ও সতর্ক হওয়াই সে আবশ্যক মনে করিয়াছে। শাস্ত্র বলিয়াছেন, এক মাতৃহের কাবণেই সে পূজার্থ, সুতরাং সে সুযোগ না থাকিলে তাকে লইয়া আর কি হইবে? তারপর ছোট বড় কীর্তি-সুস্ত্য উঠিয়াছে, গল্পের মধ্যে দৃষ্টান্তের মধ্যে তখন সে-স্ত্রীর দাম চড়িয়া গিয়াছে। পুরুষ যে কেবলমাত্র নিজের সুখ ও সুবিধা ব্যতীত—মেটা সত্যই হোক আর কাল্পনিক হোক—আর কোনদিকে দৃষ্টিপাত করে নাই, সে কথা চাপা দিয়া গর্ব করিয়া প্রচার করিয়াছে, যেদেশে নারী হাসিতে হাসিতে চিতায় বসিত, স্বামীর পাদপদ্ম ক্রোড়ে লইয়া প্রফুল্ল মুখে নিজেকে ভাস্মসাৎ করিত। ইত্যাদি ইত্যাদি—

। ৩ ॥

একদিকে নারীজাতির পক্ষে লেখনী সঞ্চালন অগাদিকে যুবশক্তির তথা তারুণ্যের মাহাত্ম্য কীর্তন—এই দুই দিককে কেন্দ্র করে শরৎচন্দ্রের প্রবন্ধ সাহিত্য মূলতঃ আবর্তিত হয়েছে। আর এই দুই প্রান্তের মধ্যে বিরাজ

কবছে তাঁর সাহিত্যসম্পর্কিত চিন্তারাজি। শরৎচন্দ্রের নারীদরদী রূপের সংক্ষিপ্ত অবলোকনের পর এবার তাঁর যৌবনধর্মের উদ্গাতার ভূমিকাটির দিকে এক-পলক চোখ ফেরানো যেতে পারে।

শরৎচন্দ্র তারুণ্যকে যে কতখানি মলা দিতেন তার প্রমাণ তাঁর 'তরুণের বিদ্রোহ' নামক রচনা। এই প্রবন্ধে তিনি তারুণ্যের কৃত্রিম শাসন-বারণ-অগ্রাহকারী বন্ধন-অসহিষ্ণু বিদ্রোহী রূপটিকে প্রতিষ্ঠিত করেছেন। এটি একটি বক্তৃতা, যা তিনি দিয়েছিলেন ১৯২৯ সালের ইন্টারের ছুটিতে রংপুরে বঙ্গীয় প্রাদেশিক রাষ্ট্রীয় সম্মিলনীর অব্যবহিত পূর্বে অনুষ্ঠিত বঙ্গীয় যুব সম্মিলনীর সভাপতিরূপে। বক্তৃতাটির আদ্যোপা্য যৌবনের জয়গানে মুখর। ই-একটি নমুনা তুলে ধরছি :

স্বাধীনতার বিনিময়ে পবাবান স্বর্গরাজ্যও দেশের যৌবনশক্তি কোনদিন প্রার্থনা করবে না। কিন্তু স্বাধীনতা শুধু কেবল একটা নামমাত্রই ত নয়। দাতার দক্ষিণ হস্তের দানেই ত একে ভিক্ষার মত পাওয়া যায় না—এর মূল্য দিতে হয়। কিন্তু কোথায় মূল্য? কার কাছে আছে? আছে শুধু যৌবনের রক্তের মধ্যে সঞ্চিত। সে অর্গল যতদিন না মুক্ত হবে, কোথাও এর সন্ধান মিলবে না। সেই অর্গলমুক্ত করার দিন এসেছে। কোনক্রমেই আর বিলম্ব করা চলে না।

এই বক্তব্যেরই জের টেনে খানিক পরে তিনি তরুণদের সম্বোধন করে বলছেন :

এদের (ভূগত দেশবাসীদের) বাঁচাবার ভার তোমাদের। এ ভার কি তোমরা নেবে না? জগতের দিকে চেয়ে দেখ—এ বোঝা কে বয়েছে। তোমরাই ত! শুধু এ দেশেই কি তার ব্যতিক্রম হবে? শান্তি-স্বস্তি-শীন সম্মানবর্জিত প্রাণ কি একা ভারতের তরুণের পক্ষেই এতবড় লোভের বস্তু? দেশকে কি বাঁচায় বুড়োরা? ইতিহাস পড়ে দেখ। তরুণ শক্তি নিজের মৃত্যু দিয়ে, দেশে দেশে কালে কালে জন্মভূমিকে ধ্বংসের কবল থেকে রক্ষা করে গেছে। এ সত্ত্বেও যদি তোমরা ভোলো, তবে এ সমিতি তরুণ সজ্জ গঠনের তোমাদের লেশমাত্র প্রয়োজন ছিল না।

আমি শরৎচন্দ্রের শিল্পী সত্তার আবেগময়তার কথা বলেছি, এমনকি তাঁর



প্রবন্ধ নিবন্ধের মধ্যেও যে তাঁর এই আবেগী রূপটি ঢাকা পড়েনি সে কথাও বলতে কমূর করিনি। কিং কখনও-কখনও আবেগের কুয়াশা ভেদ করে তাঁর লেখায় বিশুদ্ধ ও উজ্জ্বল সত্যের আলো আশ্রয় বিভায়ে প্রতিভাত হতেও দেখেছি। সে আলো একটা আকস্মিক বিদ্যুদ্দীপ্তির ঝলকে আমাদের মনের আকাশটাকে সহসা আলোয় আলোময় কবে তুলেছে। ১৯২৯ সালের ১৫ই ফেব্রুয়ারি তারিখে মালিকান্দা (ঢাকা) অভয় আশ্রমে অনুষ্ঠিত পশ্চিম বিক্রমপুর যুবক ও ছাত্র সমাবেশে প্রদত্ত “সত্যশ্রয়ী” শীর্ষক ভাষণটি এইরূপ একটি উজ্জ্বল আলোর বহিঃ। এখানে শরৎচন্দ্রের চিন্তায় ভাবাবেগকে আভাল করে নির্মোহ যুক্তির প্রাধান্য প্রতিষ্ঠিত দেখতে পাই। এবং সেইসঙ্গে এও চোখে পড়ে যে, একালীন বৈজ্ঞানিক সমাজবাদী চিন্তাধারার সঙ্গে তাঁর কোথায় একটা অলক্ষ্য মিল ছিল, যে বিষয়ে হয়ত তিনি নিজেও পুরাপুরি অবহিত ছিলেন না। উনিশ শতকের পাস্চাত্য সমাজতাত্ত্বিক চিন্তাধারার অনুশীলনই খুব সম্ভব তাঁকে এই জাতীয় মননের কিনারায় নিয়ে এসে থাকবে।

আমাদের অধিকাংশরই ধারণা সত্য শাস্ত্রত ও অপরিবর্তনীয়, অজর ও অমর। যুগ বদলালেও সত্যের বদল হয় না। এই ধারণার প্রতিবাদ করে শরৎচন্দ্র তাঁর সত্যশ্রয়ী ভাষণে বলেছেন :

সত্যের কোন শাস্ত্রত সংজ্ঞা আমার জানা নেই। দেশকাল বা পাত্রের যে সম্বন্ধ বা relation তা দিয়েই সত্যের খাচাই হয়। দেশ-কাল-পাত্রের পরস্পরের সম্বন্ধেব সত্যজ্ঞানই সত্যের স্বরূপ। একের পরিবর্তনের সঙ্গে অপরের পরিবর্তনও অবশ্যস্বাভাবী। এই পরিবর্তন বুদ্ধিপূর্বক মেনে নেওয়াই সত্যকে জানা।

শুধু তত্ত্বের বিদ্রোহ প্রবন্ধেই নয়, সত্যশ্রয়ী প্রবন্ধেও তিনি যৌবন-ধর্মের জয়গান করেছেন দ্বার্বাহীন ভাষায়।

দেশের শিক্ষাব্যবস্থা সম্বন্ধেও শরৎচন্দ্র চিন্তা করেছিলেন এবং এসম্বন্ধে ‘তার সময়কার প্রচলিত মতের বিরুদ্ধাচরণ করেছিলেন। তাঁর সময়ে প্রচলিত মত ছিল যে, স্কুল-কলেজের ছাত্রদের রাজনীতিতে যোগ দেওয়া ঠিক নয়। তাতে অধ্যয়নরূপ তপস্যার বিঘ্ন ঘটে। ছাত্রদের একান্তরূপে অধ্যয়নেই নিবিষ্ট হয়ে থাকা কর্তব্য। শরৎচন্দ্র এই গণানুগতিক মতের তীব্র বিরোধিতা করে রংপুরে যুবসংঘের ভাষণে ( ১৯শে এপ্রিল ১৯২৯ ) বলেছিলেন :

ইস্কুল কলেজের ছাত্রদের পাঠ্যাবস্থাতেও দেশের কাজে যোগ দেবার—দেশের স্বাধীনতা-পরাধীনতার বিষয় চিন্তা করবার অধিকার আছে। এবং এই অধিকারের কথাটাও মুক্তকণ্ঠে ঘোষণা করবার অধিকার আছে।

বয়স কখনও দেশের ডাক থেকে কাউকে আটকে রাখতে পারে না, তোমাদের মত কিশোর বয়স্কদেরও এগজামিনে পাশ করা দরকার,—এ তার চেয়েও বড় দরকার। ছেলেবেলায় এই সত্য চিন্তা থেকে আপনাকে পৃথক করে রাখলে যে ভাঙার সৃষ্টি হয়, একদিন বয়স বাড়লেও আর তা জোড়া লাগতে চায় না। এই বয়সের শেখাটাই সবচেয়ে বড় শিক্ষা। একেবারে বক্তব্য সঙ্গে মিশে যায়।

শিক্ষা বাপদেশে শবৎচন্দ্র, এমনকি, কবিগুরু ববীন্দ্রনাথেরও শিক্ষাদর্শের বিবোধিতা করেছিলেন। রবীন্দ্রনাথ তাঁর প্রসিদ্ধ “শিক্ষার মিলন” প্রবন্ধে প্রাচ্য ও পাশ্চাত্যের শিক্ষার মিলনের উপর গুরুত্ব আবেশ কবে একপ অভিমত প্রকাশ করেছিলেন যে, পশ্চিম যে আজ সারা পৃথিবীর উপর আধিপত্য বিস্তার করেছে তার মূলে ‘নিশ্চয়ই কোন একটা মতের জোব আছে।’ শরৎচন্দ্র সবিনয়ে কিন্তু দৃঢ়তাব সঙ্গে এই মতের প্রতিবাদ কবেছিলেন। তাঁর এই প্রতিবাদ বিদ্রুত আছে তাঁর “শিক্ষার বিরোধ” নামক বহুল আলোচিত প্রবন্ধে। এটি অসংযোগ আন্দোলন চলাকালে রচিত। ১৯২১ সালে গৌড়ীয় সর্ববিদ্যা আয়তন নামক প্রতিষ্ঠানে পঠিত। এই প্রবন্ধে শরৎচন্দ্র কবিপোষিত মতের বিরোধিতা করে অসংযোগ আন্দোলনে স্কুল-কলেজ বয়স্কদের নাতি সমর্থন কবেছিলেন। এদেশে ইংরেজদের হাত ধরে-আসা শিক্ষাপ্রণালীর কঠোর সমালোচনা করে তিনি লিখেছিলেন :

.....পরাজিতের জন্ত এমনি (আদর্শ) শিক্ষার ব্যবস্থা বিজ্ঞতা কি কখনও করতে পারে? তার বিদ্যালয়, তার শিক্ষার বিধি সে কি নিজের সর্বনাশের জগ্নেই তৈরী করিয়ে দেবে? সে কেবলমাত্র এইটুকুই দিতে পারে যাতে তার নিজের কাজগুলি সুশৃঙ্খলায় চলে। তার আদালতের বিচারের বহুমূল্য অভিনয় করতে উকীল-মোক্তার-মুন্সেফ, হুকুমমত জেলে দিতে ডেপুটি-সাবডেপুটি, ধরে আনতে থানায় ছোট বড় পিয়াদা, ইস্কুলে ডুবালের পিতৃভক্তির গল্প পড়াতে ধর্মশিক্ষাপ্রদিত মাস্টার, কলেজে ভারতের হীনতা ও

বর্ষরতার লেকচার দিতে নখদন্তহীন প্রফেসার, আপিসে খাতা লিখতে জীর্ণ শীর্ণ কেরানী,—তার শিক্ষা বিধান এর বেশি দিতে পারে এও যে আশা করতে পারে, সে যে পারে না কি, আমি তাই শুধু ভাবি।

এই প্রবন্ধেরই অগত্যা তিনি অতিরিক্ত পাশ্চাত্য বিদ্যামোহ ও পাশ্চাত্য প্রীতির সমালোচনা করে লিখছেন :

পশ্চিমের বিদ্যার অনেক গুণ থাকতে পারে, কিন্তু সে যদি আমাদের নিজেদের প্রতি কেবল অনাস্থাই এনে দিয়ে থাকে, আমাদের জ্ঞান আমাদের ধর্ম আমাদের সমাজ-সংস্থান আমাদের বিদ্যাবুদ্ধি সকলের প্রতি যদি শুধু অশ্রদ্ধাই জন্মিয়ে দিয়ে থাকে ত মনে হয়, লুক্কিচে পশ্চিমের শুক্রাচার্যের পানে আমাদের না থাকানই ভাল।.....এই সুদীর্ঘকাল পশ্চিমের সংসর্গেও যে আমরা কিছুই মাছি মাএ সেটুকুই কি এ বিষয়ে যথেষ্ট প্রমাণ নয়? পেয়েছি কেবল এই শিক্ষা—যাতে নিজেদের সর্ব বিষয়ে অবজ্ঞা এবং তাদের যা কিছু সমস্তের পরেই আমাদের গভীর শ্রদ্ধা জন্মে গেছে। আর তাদের ভিতরের দ্বার এমন অবকদ্ধ বলেই অবনতিও আজ আমাদের এত গভীর।

কবিগুরুব শিক্ষাসংক্রান্ত বক্তব্যের প্রতিবাদে যদিও ১৮৭৮-এ এই প্রবন্ধটি লিখেছিলেন তা হলেও নিছক শিক্ষার পরিসরেই এই প্রবন্ধের বিষয়বস্তু সীমিত থাকেনি। ইংরেজের সাম্রাজ্যবাদ, শোষণনীতি, লোভ নিষ্ঠুরতার বিরুদ্ধে সাম্যহীন ঘৃণা এই প্রবন্ধের ছত্রে ছত্রে পরিব্যক্ত হয়েছে। সেই দিক থেকে দেখতে গেলে এরই কয়েক বছর পরে লিখিত পথের দাবী উপন্যাসের বক্তব্যের সঙ্গে এই প্রবন্ধের প্রতিপাদ্যের আশ্চর্য মিল আছে। শিক্ষার বিরোধ রচনাটিকে পথের দাবীর প্রাক-ভূমিকা বলা যেতে পারে। সব্যসাচীর মুখের কথাগুলি এখানে লেখক নিজের কলমের মুখে বসিয়েছেন। কথাগুলি আবেগে কম্পিত। আব খুব জোরালোভাবে বলা। চিন্তার মতো খুব যে একটা পারম্পর্য বা গুঁজলা আছে তা বলা যায় না তবে ভাবাবেগের সংক্রমণ গুণে কথাগুলি পাঠকচিত্তে কেটে-কেটে গিয়ে বসে। আবেগমথিত রচনার ভাল ও মন্দ দ্বিবিধ বৈশিষ্ট্যই বচনাটির মতো প্রতিফলিত।

প্রবন্ধের উপসংহারটি বড় সুন্দর। তার থেকে অংশ-বিশেষ এখানে উদ্ধৃত করছি :

বিদ্যা এবং বিদ্যালয় এক বস্তু নয় ; শিক্ষা ও শিক্ষাব প্রণালী এ দুটো আলাদা জিনিস। সুতরাং কোন একটা ভাগ করাই অপব্যবহার বর্জন করা নয়। এমনও হতে পারে বিদ্যালয় ছাড়াই বিদ্যালয়ের বড় পথ। আপাতদৃষ্টিতে কথাটা উল্টা মনে হলেও সত্য হওয়া অসম্ভব নয়।

॥ ৪ ॥

শরৎচন্দ্রের প্রণালীবদ্ধ কোন সাহিত্য চিন্তা নেই। তবে কয়েকটি সুপরিজ্ঞাত রচনা (যথা, “আধুনিক সাহিত্যের কৈফিয়ৎ”, “সাহিত্য ও নীতি”, “সাহিত্যের বাতি ও নীতি”, “সাহিত্যে আর্ট ও ইনীতি” প্রভৃতি) এবং কিছু সাহিত্য-সভায় এদণ্ড অভিমতাদির ভিত্তি সাহিত্য বিষয়ে তাঁর ভাবনা-চিন্তার একটা মোটামুটি আদর্শ পাওয়া যায়। বঙ্গবান্ধবদের কাছে লেখা চিঠিপত্রের মধ্যেও কখনও কখনও আলোচনা প্রসঙ্গে তাঁর সাহিত্যসংক্রান্ত মনোভাব পরিব্যক্ত হয়েছে। উল্লিখিত প্রবন্ধগুলির ভিত্তি সাহিত্যের নীতি ও নীতি প্রবন্ধটাই সবচেয়ে প্রসিদ্ধ। এটি তিনি রবীন্দ্রনাথের “সাহিত্যের ধর্ম” নামক প্রবন্ধের প্রতিবাদে রচনা করেছিলেন। প্রকাশিত হয়েছিল তৎকালীন ‘বঙ্গবন্ধু’ মাসিকে ১৩৩৪ বঙ্গাব্দের আশ্বিন সংখ্যায়। তবে প্রসিদ্ধ হলেও এই রচনাটি বাদানুবাদমূলক বিষয় তাঁর ভিত্তি কোতূহলোদ্দীপকতা যতটা ততটা গভীরতা নেই। বরং সেই তুলনায় তাঁর অন্যান্য কয়েকটি নিবন্ধে ও ভাষণে কিছু মৌলিক ভাবনার সাক্ষ্য পাওয়া যায়।

শরৎচন্দ্রের সাহিত্যসম্পর্কিত ভাবনা-ধারণার আলোচনা প্রসঙ্গে প্রথমেই যে কথাটা লক্ষণীয় তা হলো, তিনি সাহিত্যে সমাজকল্যাণের আদর্শে বিশ্বাস করতেন। সমাজের মঙ্গলামঙ্গলের চিন্তা একপাশে সরিয়ে রেখে কিংবা একেবারেই উপেক্ষা করে শুদ্ধমাত্র বিশুদ্ধ কলাকৈবল্যবাদের প্রেরণায় সাহিত্য-সৃষ্টির তত্ত্ব তাঁর আস্থা ছিল না। অর্থাৎ সমাজ-সচেতনতার ক্ষেত্রে তিনি ছিলেন বঙ্কিমচন্দ্রের সাক্ষাৎ-শিষ্য। তবে বঙ্কিমচন্দ্রের মত নীতিবাদী তিনি ছিলেন না। সাহিত্যকে সজ্ঞানতঃ সমাজহিতের কাজে লাগাতে হবে এটা তিনি স্বীকার করতেন না তবে এই তত্ত্ব মানতেন যে, যা সমাজের পক্ষে অকল্যাণকর তাকে সাহিত্যে কখনও প্রকাশ দিতে নেই। সাহিত্য ও নীতি প্রবন্ধের এক জায়গায় তিনি লিখেছেন : “যা অসুন্দর, যা immoral, যা

অকল্যাণ, কিছুতেই তা art নয়, ধর্ম নয়। Art for art's sake কথাটা যদি সত্য হয়, তা হলে কিছুতেই তা immoral এবং অকল্যাণকর হতে পারে না, এবং অকল্যাণকর এবং immoral হলে art for art's sake কথাটাও কিছুতে সত্য নয়, শত সহস্র লোকে 'ভুল' শব্দ করে বললেও নয়।"

শরৎচন্দ্র জীবনের বাস্তব আর সাহিত্যের বাস্তবের পার্থক্য মানতেন এবং এই ক্ষেত্রে নির্বাচনপন্থী ছিলেন। সমাজ-সংসারে কত কী তো নিত্য ঘটছে তাকে নির্বিচারে হুবহু সাহিত্যে রূপায়িত করার যে উদ্দেশ্যমূলক বিশ্বস্ততা, এই জাতীয় বিশ্বস্ততাকে তিনি সন্দেহের চোখে দেখতেন। সাহিত্যকে জীবনের সঙ্গে আগাগোড়া সমীকরণ করলে তার ফলে আমাদের প্রাকৃত-বাদের গুণা মিটে পাবে কিন্তু সংসাহিত্য সৃষ্টি হবে না। এ বিষয়ে শরৎচন্দ্রের বক্তব্য :

Art জিনিসটা মানুষের সৃষ্টি, সে nature নয়। সংসারে যা কিছু ঘটে -- এবং অনেক নোঙ্রা জিনিসই ঘটে, — তা কিছুতেই সাহিত্যের উপাদান নয়। প্রকৃতির স্বভাবের হুবহু নকল কর; Photography হতে পারে, কিন্তু সে কি ছবি হবে? দৈনিক খবরের কাগজে অনেক কিছু বোমতর্ষণ ভয়ানক ঘটনা ছাপা থাকে, সে কি সাহিত্য? চরিত্র সৃষ্টি কি এতই সহজ?—

আমাদের আজকের দিনের একশ্রেণীর কথাকার এই কথাটা তলিয়ে বুঝতে চান না। তারা জীবনের ঘটনা আর সাহিত্যের ঘটনাকে গুলিয়ে ফেলেন। সাহিত্যও যে অণু সব শিল্পের মতই মূলতঃ গ্রহণ-বর্জন-নির্বাচন প্রক্রিয়ার উপর নির্ভরশীল তার চেতনা এঁদের আছে বলে মনে হয় না। অন্ততঃ এঁদের রচনার ধারাধরন দেখে সে কথা মনে হওয়ার যো নেই। এঁদের শরৎচন্দ্রের নিয়োকৃত বক্তব্যটি ধীরভাবে অনুধাবন করে দেখতে বলি :

ভাল মন্দ সংসারে চিরদিনই আছে—ভালকে ভাল মন্দকে মন্দ বলায় কোন artই কোনদিন আপত্তি করে না। কিন্তু দুনিয়ায় যা কিছু সত্যি ঘটে নির্বিচারে তাকেই সাহিত্যের উপকরণ কুরলে সত্য হতে পারে কিন্তু সত্য-সাহিত্য হয় না।

অর্থাৎ যা কিছু ঘটে তার নিখুঁত ছবিকেও আমি যেমন সাহিত্য-বস্ত্ত বলিনে, তেমনি যা ঘটে না অথচ, সমাজ বা প্রচলিত

নীতির দিক দিয়ে ঘটলে ভাল হয়, কল্পনার মধ্য দিয়ে তার উচ্ছৃঙ্খল গতিতেও সাহিত্যের ঢের বেশী বিড়ম্বনা ঘটে।

১৩৩১ বঙ্গাব্দের চৈত্র মাসে মুন্সীগঞ্জ সাহিত্যসভার সভাপতির ভাষণে (সাহিত্যে আর্ট ও দ্বন্দ্বীতি) তিনি অনেক মূল্যবান কথা বলেছিলেন। সব কথা এখানে উদ্ধার করার জায়গা নেই তবে একটা অংশ উদ্ধৃত না করলেই নয়। এর থেকে বোঝা যাবে শরৎচন্দ্রের সাহিত্যসম্পর্কিত চিন্তাধারা ক্রমশঃ কোন্ খাত বেয়ে অগ্রসর হচ্ছিল। বাংলা সাহিত্যে অতিমাত্রায় realistic হয়ে উঠেছে বলে কেউ কেউ শরৎচন্দ্রের কালে অভিযোগ করে আসছিলেন। শরৎচন্দ্র এই অভিযোগের জবাবে বলেছেন :

পূর্বের মত রাজারাজডা জমিদারের হুংখ-দৈন্য-দম্ভহীন জীবনেতিহাস নিয়ে আধুনিক সাহিত্যসেবীর মন আব ভরে না। তার। নীচের স্তরে নেমে গেছে। এটা আপশোসের কথা নয়। বরঞ্চ এই অভিশপ্ত, অশেষ হুংখের দেশে নিজের অভিমান বিসর্জন দিয়ে রুষ-সাহিত্যের মত যেদিন সে সমাজের নীচের স্তরে আরও নেমে গিয়ে তাদের সুখ হুংখ বেদনাব মাঝখানে দাঁড়াতে পারবে, সেদিন এই সাহিত্যসাধনা কেবল স্বদেশে নয়, বিশ্ব-সাহিত্যেও আপনাব স্থান করে নিতে পারবে।

এটা অত্যন্ত দামী কথা। সত্যিকারের গণতান্ত্রিক ও সমাজতান্ত্রিক সাহিত্য রচনার বরাত তিনি এতদ্বারা ভবিষ্যদ্বংশায় লেখকদের উপর চাপিয়েছেন। সমাজ-বাস্তবতার (সোশ্যাল রিয়ালিজ্‌ম) নান্দী গেয়েছেন। মধ্যবিত্ত স্তর থেকে উদ্ভূত হলেও মধ্যবিত্ত মানসিকতার গভী অতিক্রম করে তিনি নীচুতলার মানুষের হুংখ-বেদনাকে স্পর্শ করার জন্য ঠাত বাড়িয়েছেন। এ তাঁর যুগ-চেতনা ও গণ-মানসিকতারই প্রমাণ। 'লোয়ার ডেপথ্‌স্'-এর রূপকার ম্যাক্সিম গর্কি প্রমুখ লেখকদের সঙ্গে শরৎচন্দ্র এক্ষেত্রে তাঁব আত্মার সাযুজ্য স্থাপন করেছেন।

শরৎচন্দ্রের সাহিত্যচিন্তা সম্পর্কে আরও অনেক কথা বলা যায় তবে এই প্রবন্ধ যাহেতু তাঁর প্রবন্ধ সাহিত্যের আলোচনাতেই কেন্দ্রীভূত সেই কারণে সূত্রাকারে মাত্র বিষয়টির উত্থাপন করে ক্ষান্ত হওয়া গেল। কৌতূহলী পাঠক আরও তথ্যের জন্য “সাহিত্যচিন্তা” শীর্ষক অধ্যায়টি নেড়ে চেড়ে দেখতে পারেন। সেখানে বিষয়টির কম-বেশী বিস্তারিত সমীক্ষা করা আছে।

## প্রতিভার রহস্য

অপবাক্ষ্যেয় কথাশিল্পী শরৎচন্দ্রের পরিচয় থেকে এই জানা যায় যে, আজ থেকে একশত বৎসর আগে, ১২৮৩ সালের ৩১শে ভাদ্র তারিখে, তিনি হুগলী জিলাব দেবানন্দপুর গ্রামে এক নিয়মধাবিত্ত কুলীন ব্রাহ্মণ পবিত্রবে জন্মগ্রহণ করেন। আর্থিক অসচ্ছলতাব জন্ম তাঁকে বাল্যে ও কৈশোবে যথেষ্ট অসুবিধা ভোগ করে স্কুলের লেখাপড়া চালাতে হয়। প্রথমে দেবানন্দপুরের গ্রাম পাঠশালায়, তারপর ভাগলপুর মামাদেব বাড়িতে স্কুলে পড়াশুনো, পুনরায় দেবানন্দপুরে চালান হয়ে যগ্রাম থেকে হুগলী ব্রাহ্ম স্কুলে যাত্রায়, সর্বোপরি পুনরপি ভাগলপুরে গিয়ে স্কুলে ভর্তি হওয়া ও পরে সেখানকার কলেজে অধ্যয়ন—বিদ্যাশিক্ষার পর্ব মেটানর জন্ম তাঁকে মাকুর মত একবার বিদ্যাবয়ন-তাঁতের এপিঠ আর একবার এপিঠে গতাগতি কবতে হয়েছে। চলাচলের এই ছক থেকে শরৎচন্দ্রের অভিভাবকদেব অব্যবস্থিতচিত্ত হয়াত কিছু পরিমাণে বোঝা যায় কিন্তু তাঁর নিজের অস্থিরতা তাব চেয়েও অনেক বেশী পরিমাণে বোঝায়। এই জন্ম-অশান্ত অস্থিরচিত্ত মানুষটিকে এক ছায়গায় বেশীদিন ধরে বাথা খুব সহজ ব্যাপার ছিল না। স্বভাবে যিনি বাউণ্ডুলে ভবঘুরে ভ্রাম্যমাণ প্রকৃতির, বালক বয়সেও তিনি উদ্ভিজ্জ অভ্যাসের বশবর্তী হয়ে একই স্থানে থিতু হয়ে বসে গতানুগতিকত্বের জাবর কাটেন—এমনটা ভাবলে ভবঘুরে প্রকৃতির মূল ঝাঁকটিকেই অস্বীকার করা হয়।

আসলে শরৎচন্দ্রের জীবনের ছকের সঙ্গে সাধারণ বাঙালী বিদ্যভ্যাসরত বালক পড়ুয়াদের বলতে গেলে প্রায় কিছুই মেলে না। পড়াশুনোয় বালক শরৎচন্দ্র অমেধাবী ছিলেন না কিন্তু তৎকালীন আর দশটি গডপরতা বাঙালী ছেলের মত বইয়ের উপর মুখ গুঁজে ‘ভাত্রানাং অধ্যয়নং তপঃ’ নীতির সার্থকতা প্রতিপাদন তাঁর ধাতে ছিল না। তেমন শাস্তিশিষ্ট নিরীহ নির্বিরোধ ছেলেই তিনি ছিলেন না। তাঁর নিজের স্বীকৃতি থেকেই দেখা যায়, একাধিকবার তিনি স্কুল পাসিয়েছেন, স্কুল পালানো অর্থে বাড়ি থেকেও পালিয়েছেন। “ছেলেবেলার কথা মনে আছে। পাড়গাঁয়ে মাছ ধবে ডেঙা

ঠেলে নৌকা বেয়ে, দিন কাটে। বৈচিত্র্যের লোভে মাঝে মাঝে যাঁএর দলে সাকরেদি কবি, তাব আনন্দ ও আরাম যখন পরিপূর্ণ হয়ে উঠে, তখন গামছা কাঁধে নিরুদ্দেশ-যাঁএয় বাব হই, ঠিক বিশ্বকবির কাবোর নিরুদ্দেশ যাত্রা নয়, একটু আলাদা। সেটা শেষ হলে আবাব একদিন ক্ষতবিক্ষত পায়ে, নির্জীব দেহে ঘরে ফিরে আসি। আদর অভ্যর্থনাব পালা শেষ হলে, অভিভাবকেবা পুনরায় বিদ্যায় চ্যাপন করে দেন। সেখানে আব একদফা সম্বর্ধনা লাভের পর আবাব বোধোদয় পদ্যপাঠে মনোনিবেশ করি, আবাব একদিন প্রতিজ্ঞা ভুলি, আবাব স্ট্রিট সরস্বতী কাঁধে চাপে, আবাব সাকরেদি শুরু করি, আবাব নিরুদ্দেশ-যাঁএ—আবাব ফিরে আসি। আবাব তেমনি আদর আপ্যায়ন সম্বর্ধনাব ঘট।”

এট। গেন্স দেবানন্দপুত্র থাকাকালীন ছাত্রজীবনের অধ্যায়। তারপর এলেন শহরে, অর্থাৎ ভাগলপুর শহরে। সেখানে আবাব নিরুদ্দেশ যাত্রার আর এক রকম ফের। ভাগলপুর শহরে বাস করবাব কালে, সেখানকার ছাত্রজীবন ও ছাত্রজীবনোত্তর সময় মধ্যে, পাঁচ-পাঁচবার ঘব ডেডে বৈবাগী হয়েছেন সন্ন্যাসী হবাব বাসনায়া। যখন সন্ন্যাসী হননি বা সন্ন্যাসীর চালাগিরি করেননি তখনও নির্বিবোধে ঘরে বসে থাকেননি, সাপ ধরার ও সাপ বশ করার কৌশল শেখবাব জন্ত সাপুড়েদের সঙ্গে করেছেন, গান বাজনা নিয়ে মেতে থেকেছেন। এই সময়কার অভিজ্ঞতা বর্ণনা কবতে গিয়ে শরৎচন্দ্র ১৩৩৭ বঙ্গাব্দে চন্দ্রনগর প্রবর্তক সম্ভের আত্মত আলাপ-সভায় বলেছিলেন, “অভিজ্ঞতা লাভের জন্য অনেক কিছুই কবতে হয়। অতি ভদ্র শান্তশিষ্ট জীবন হলে, আর সমস্ত অভিজ্ঞতা লাভ হলে—তা হয় না। বলেছি—ইচ্ছেয় হোক বা অনিচ্ছেয় হোক—আমাকে চার পাঁচবার সন্ন্যাসী হতে হয়েছিল। ভাল ভাল সন্ন্যাসীরা যা করেন সবই করেছি। গাঁজা মালপো কিছুই বাদ যায় নি। .....বিশ বছর এইটাতে গেল। এই সময় খানকতক বই লিখে ফেললুম। ‘দেবদাস’ প্রভৃতি ওই আঠারো কুড়ির সেখা। তারপর গান বাজনা শিখতে লাগলাম। পাঁচ বছর এতে গেল। তারপর পেটের দায়ে চলে গেলাম নানা দিকে। প্রচণ্ড অভিজ্ঞতা তাই থেকে।”

এই থেকেই বোঝা যায় শরৎচন্দ্র সম্পূর্ণ অশ্রুত হাতে গড়া মানুষ ছিলেন। খামখেয়ালিপনা ও বয়ুরপনা উড়নচণ্ডী আর বেহিসাবী স্বভাব ছিল তাঁর রক্তে। পিতার সংসারী হয়েও সংসারবিরাগী অস্থির স্বভাব, তিনি



উত্তরাধিকারস্বরূপ পেয়েছিলেন এবং নিজ জীবনে এই উত্তরাধিকার সঞ্জাত বাউণ্ডুলেগিরির তদ্ব্যবহার করে ছেড়েছিলেন। এই প্রসঙ্গে একটি কথা বলা দরকার। শরৎচন্দ্র সম্বন্ধে আমাদের সাহিত্য-সংসারে বহুশ্রম কিংবদন্তী প্রচলিত। তার মধ্যে অন্যতর কিংবদন্তী এই যে, ফিস ( fees ) টাকা জমা দিতে না পাবায় তাঁর আর্থিক পরীক্ষা দেওয়া হয়নি। প্রসিদ্ধ গবেষক ব্রজেন্দ্রনাথ বন্দ্যোপাধ্যায় এ বিষয়ে মনোযোগী অনুসন্ধান চালিয়ে এই সিদ্ধান্তে উপনীত হয়েছেন যে, এই কিংবদন্তী নিছকই জনশ্রুতি মাত্র, তার মূলে সত্যের ভিত্তি নাই। উপরে শরৎচন্দ্রের যে অশ্রুত অস্তিত্ব বহির্মুখ স্বভাবের বর্ণনা করা হয়েছে তা থেকে এমন মনে করা কি অসম্ভব যে, ইচ্ছা করেই তিনি আর্থিক পরীক্ষায় বসেননি, পরীক্ষার আগে খুব সম্ভব গৃহ থেকে নিজস্ব হয়ে কোথাও “নিরুদ্দেশ-যাত্রা” পাড়ি জমিয়েছিলেন? অনুমান করা অসম্ভব হবে না যে, এই নিরুদ্দেশ-যাত্রা করার মূলে পরীক্ষায় অকৃতকার্য হবার কোন ভয় ছিল না, বরং ভয়ের কোন ব্যাপারই ওটা ছিল না, ছিল নির্ভীক নিপাট বিদ্বৎ প্রেরণার একটা নমুনা। ভাগলপুরেব মামারা মোটামুটি অবস্থাপন্ন লোক ছিলেন। যাঁরা গ্রামাচ্ছাদনের ব্যয়সমেত শরৎচন্দ্রের স্কুল ও কলেজেব পড়ার ব্যয় বহন করেছেন, তাঁরা সেই অবসরে মদ্রায় তাঁদের ভাগিনেয়ের জন্ত পনের কি বিশট, টাকা পরীক্ষার ফিস জোগাতে পারেননি এটা বিশ্বাস্য বলে মনে হয় না। আসলে ভাগ্যেটাই এ বিষয়ে মতিমাব কোন তুলনা ছিল না। তিনি পরীক্ষা অনুষ্ঠিত হবার ঠিক অব্যবহিত পূর্বে, আজকের লৌকিক পরিভাষা অনুসরণ করে বলছি, মামাদের ‘কাট’ দিয়েছিলেন—বাড়ির চৌহদ্দির মধ্যেই তাঁকে আর পাবার যো ছিল না।

এহেন যে বিবিধ গুণাঙ্কিত শরৎচন্দ্র, যাঁকে আমাদের দেশের প্রচলিত ছাত্রজীবনযাত্রার কোন সীমা-সরহদের মধ্যেই ফেলা যায় না, তিনি যে উত্তরকালে একটু অসাধারণত্বের লক্ষণমণ্ডিত হয়ে প্রকাশ পাবেন তা কি বলার অপেক্ষা রাখে? আর বাস্তবিক, একটু-আধটু অসাধারণ নয়, রীতিমত এক প্রতিভাধর রূপে প্রকাশিত হয়েছিলেন। সে প্রতিভা বাংলা সাহিত্যে নতুন দিকচিহ্ন নির্দেশ করেছিল, নতুন মূল্যমানের সৃষ্টি করেছিল।

তাঁকে অস্বাকার করবার উপায় ছিল না বলেই তিনি স্বীকৃত হয়েছিলেন, নয়তো এই অভিজাত ধ্যান-ধারণা প্রভাবিত সমাজে তথা বুর্জোয়া মূল্যবোধ শাসিত সাহিত্যে একজন নিষ্কণ নিয়মধাবিত লেখকের অনেকেই মাথা

ডিঙিয়ে মর্যাদার আসনে আপন স্থান করে নেওয়া মোটেই সহজ ছিল না। কি সাহিত্যে কি অগ্র কোন ক্ষেত্রে যেখানে কঠিন প্রতিযোগিতাটাই ধর্ম এবং বিনা চেষ্টায় কেউ কাউকে এক ইঞ্চি জায়গাও ছেড়ে দেয় না, সেইখানে শরৎচন্দ্র যে শ্রেষ্ঠ একজন লেখকরূপে বাংলার জনমানসে উজ্জ্বল এক ভাব-মূর্তিতে প্রতিষ্ঠিত হয়েছিলেন সে এই জন্তই যে, তাঁর খাপছাড়া স্বরূপের মধ্যেই তাঁর প্রতিভার বাজ লুকিয়ে ছিল আর সেই প্রতিভা অপ্রতিরোধ্য ছিল বলেই তাঁর বিরুদ্ধে প্রতিরোধ কার্যকর হয়নি এবং এক সময়ে তা একেবারেই এলিয়ে পড়েছিল। শরৎচন্দ্রই প্রথম বাংলার সার্থক লেখক, যিনি নিয়মধাবিত্ত কুলাগত হয়েও শুধুমাত্র প্রতিভার জোরে তথাকথিত বনেদী সমাজের পাণ্ডাদের তাঁর কাছে তাঁদের অনিচ্ছুক মাথা নোয়াতে বাধ্য করেছিলেন। বিশুদ্ধ গুণগ্রাহিতা একটা কথা। এ সমাজে গাঁই গোত্র প্রবর মেল মিলিয়ে যেমন বিবাহ হয়, তেমনি শ্রেণ্যমর্যাদা বিভ্রকৌলান্য সামাজিক প্রতিষ্ঠা প্রতিপত্তি ইত্যাদি লক্ষণ মিলিয়ে গুণগ্রাহিতাব আবেগ উদ্বারিত হয় কিংবা সংকুচিত হয়। কিন্তু এমনই অশ্রু্য প্রতিভা শরৎচন্দ্রের যে, তাঁর বেলায় এসব জারিজুরির কোনটাই খাটেনি। তিনি বাংলার সাহিত্যক্ষেত্রে আত্ম-প্রকাশের সঙ্গে সঙ্গেই বাংলার পাঠককুলকে জয় করে নিয়েছেন।

শরৎচন্দ্রের শিল্পী সত্তার এই বিশেষ বৈশিষ্ট্যটিকে আমাদের ভাল করে বুঝতে হবে। তিনি এ দেশের লেখক হলেও তাঁর মনোভঙ্গা ইউরোপীয় লেখকদের স্বগোত্র। তাঁর কথা মনে হলেই আমাদের ইউরোপের বহুতর বাস্তব অভিজ্ঞতার পোড়-খাওয়া দাগ-ধরা সংগ্রামী লেখকদের কথা মনে পড়ে। বিশেষতঃ তাঁর অনুষ্ণে ম্যাক্সিম গর্কির আদলটি বিশেষভাবেই ভেসে ওঠে। পশ্চিমের বোহেমীয় লেখকদের নিয়ম-না-মানা ছলছাড়া শাসন-নাশন জীবন-রীতির একটা বিনাশাত্মক দিক আছে। সংঘমের অভাব থেকেই তাঁদের ওই বৈনাশিকতার উদ্ভব। এই ধারার অধিকাংশ লেখকই জীবনের বাতি একই সঙ্গে দুই প্রান্তে পুড়িয়ে অল্প দিনেই তাকে খাক করে দিতে অভ্যস্ত। তাঁদের এই ধ্বংসাত্মক প্রবণতা সমর্থনের অযোগ্য হলেও, এ বিষয়ে আদৌ ভুল করবার যো নেই যে, তাঁদের অনেকেই প্রতিভাবান এবং সে প্রতিভা অনস্বীকার্য।

বলা নিস্প্রয়োজন যে, শরৎচন্দ্রের প্রতিভাও তাঁদেরই কোঠায় পড়ে। তিনি তাঁর গল্প-উপন্যাসগুলিতে বাংলার সমাজের, বিশেষ পল্লীসমাজের,

বিশ্বস্ত চিত্র অঙ্কন করে এদেশবাসীর খুবই অন্তরঙ্গ আত্মীয় হয়ে উঠেছিলেন। সেটা হলো তাঁর সৃষ্টি সাহিত্যের ফলশ্রুতির দিক। কিন্তু এই ফলশ্রুতির মূল্যায়নকে পাশ কাটিয়ে কেবলমাত্র নিরবচ্ছিন্ন শিল্পী হিসেবেই যদি তাঁর বিচার হয়, তাহলে মানতেই হবে যে, তিনি এদেশের কেউ নন; তাঁর লেখক-সত্তার অধিষ্ঠান পশ্চিমের মনোজগতে। আমাদের অভিজাত ও মধ্যবিত্ত মানসিকতার করণ-কারণ ধরন-ধারণের সঙ্গে তাঁর জীবনযাত্রার মিল এত সামান্য যে, তাঁকে কোনমতেই এঁদের গোত্রীয় মনে কর যায় না, মনে করতে গেলে পদে পদে হেঁচট খেতে হয়।

একথা অবশ্য সত্য যে, শরৎচন্দ্র যখন রেঙ্গুণ প্রবাস থেকে ফিরে এসে বাংলায় স্থায়ীভাবে স্থিতি করলেন—তখন তিনি এদেশের মধ্যবিত্ত ভদ্রলোকের জীবনযাত্রার আদর্শটিকে কমবেশী অবিরোধে মেনে নিয়েছিলেন। কিন্তু সেই সঙ্গে এ কথাও মানতে হবে যে, তাঁর সৃষ্টির আবেগও সেই সঙ্গে কমবেশী ফুরিসে এসেছিল। তাঁর বেশারভাগ সেরা বই-ই তাঁর উড়নচণ্ডী বিশৃঙ্খল পর্বে লেখা। একথার দ্বারা অবশ্য আমি বিশৃঙ্খলার সমর্থন করতে চাচ্ছি না, সে রকম চিন্তা আমার মনের বহুদূরে অবস্থান করুক; আমি বলতে চাচ্ছি শুধু এই কথাই যে, কোন বিশেষ মানসিক অবস্থার জমিতে শিল্পোৎকর্ষের শ্রেষ্ঠ ফসলটির জন্ম হয় তা নিরূপণ করা এত সহজ নয়। আর্থিক সচ্ছলতা, সামাজিক নিরাপত্তাবোধে অবস্থান, মানমর্যাদার প্রাচুর্য, আনন্দ ও স্বাচ্ছন্দ্যপূর্ণ জীবনযাত্রা—এ সব কাঙ্ক্ষিত বস্তু নিশ্চয়ই, কিন্তু হয়, এগুলির সঙ্গে উৎকৃষ্ট শিল্পসৃষ্টির কোন সম্পর্কই নেই, বরং প্রতিকূল সম্পর্ক আছে। ইউরোপে ভূরি ভূরি, এবং আমাদের দেশে কিছু পরিমাণে, এমনতরো নজির আমরা দেখেছি যে, বঞ্চিত, রিক্ত, অসংবদ্ধ জীবনের পাকের গাদা থেকেই কখনও কখনও শিল্পের সুন্দরতম পদ্মফুল ফুটে উঠেছে। এ রকম কেন হয় তা শিল্পসৃষ্টির একটা ধাধা হয়েই রইলো, কিন্তু হয় এইটেই সত্য।

আমরা আমাদের সাহিত্যে, শরৎচন্দ্র, নজরুল, মানিক বন্দ্যোপাধ্যায় প্রমুখ লেখকদের জীবন থেকেই এ কথার অসংশয় প্রমাণ পেতে পারি। শরৎচন্দ্রের কথাই ধরা যাক। শরৎচন্দ্র যখন তাঁর শ্রেষ্ঠ পল্লীভিত্তিক গল্প-উপন্যাসগুলি লেখেন তখন তাঁর আদৌ কোন প্রতিষ্ঠা ছিল না, লোকমনো-যোগের অগোচরে বসে তাঁর সে সব দিনের রচনা। কমবেশী অপরিচয়ের নিরালোকে নিমজ্জিত থেকেই তিনি তাঁর উৎকৃষ্ট বইগুলি লিখেছেন।

জীবনযাত্রাও মোটে সুস্থিত ছিল না, বরং কখনও কখনও স্পষ্টই বেচারা খাবায় বহমান ছিল। অথচ এই লেখকই যখন পাদপ্রদীপের আলোকে সুপ্রতিষ্ঠিত হয়ে লোকখ্যাতির পূর্ণছটার বলয়ের মধ্যে এলেন, সেরকম সৃষ্টি আর তিনি করতে পারেননি। পথের দাবী, শেষ প্রশ্ন ইত্যাদির মত দৃশ্যতঃ মননশীল আর বৈপ্লবিক উপন্যাস লিখেছেন, কিন্তু পল্লাসমাজ, অরক্ষণীয়া, নিষ্কৃতি, পণ্ডিতমশাই প্রভৃতির মত বই আর সৃষ্টি করতে পারেননি। এমনকি চরিত্রহীনও আর নতুন সৃষ্টি হয়নি। সৃষ্টি হয়েছে কী ধরনের বই? না, বিপ্রদাস আর শেষের পরিচয়ের মত বই, যে দুটি বইয়ের ভাববস্তু সুস্পষ্টরূপে প্রতিক্রিয়াশীল ও বক্তব্য স্থিতিবাহার জয়ধোষণায় মুখর।

কাজেই বলতে চাই, বিপ্লবী লেখককে বিপ্লবী লেখকের মত থাকতে দেওয়া ভাল। তাঁর ছন্নছাড়া বাউণ্ডুলে জীবনের ধাঁচধরন ধুচিয়ে তাঁকে 'ভদ্রলোক' লেখক বানাবার চেষ্টা তাঁর জাত মেরে দেবার সামিল। পরবর্তীকালে মানিক বন্দ্যোপাধ্যায় এ তত্ত্বটি খুব ভাল করে বুঝেছিলেন, তাই তিনি 'ভদ্র' লেখক হবার সাধ সযত্নে বর্জন করে তাঁর বৈপ্লবিক কৌণীকটুকুকেই সব ছাড়িয়ে আঁকড়ে ধরে থাকতে চেয়েছিলেন, আর সেই অভিপ্রায়েরই সচেতন এক অঙ্গ হিসাবে বরাবর জনগণের পাশে থেকে সাধনা করে গেছেন। এতে হয়েছে তাঁকে ছন্নছাড়া 'ছোটলোক-সোণাগা', উচ্ছৃঙ্খল হিসাবে বদনাম কিনতে হয়েছে, কিন্তু তাতে কী এসে যায়? আপাতদৃষ্টিতে যেটা তাঁর অপবাদ বলে ধরা হয়েছে সেইখানেই তাঁর শিল্পশক্তির শ্রেষ্ঠ জোর।

মানিকের পূর্বসূরী শরৎচন্দ্র সম্পর্কেও একই কথা। তাঁর বাউণ্ডুলেনা আর ভবঘুরেমির মধ্যেই তাঁর শক্তিমত্তার নিশানা। তাঁর সাহিত্যের অমূল্য মাল-মশলা স্বরূপ যে অভিজ্ঞতা-বৈচিত্র্য ও অশিক্ষিতা-ভূয়িষ্ঠতার উপরে নিজেই তিনি বিশেষ গুরুত্ব আরোপ করেছেন, তারও উৎস এই আপাত-উডনচণ্ডা জীবনের ছকের মধ্যে নিহিত। প্রতিভার রহস্য সমালোচকদের একটা প্রধান উন্মোচনীয় বস্তু—শরৎ-প্রতিভার রহস্য এখনও খুব ভাল করে উদ্ঘাটিত হয়েছে বলে বোধ হয় না।

অতিশয় নিষ্করণ দরিদ্র ঘরে জন্মগ্রহণ করে নিত্য অভাব-অনটনের সঙ্গে সংগ্রাম করে যাকে জীবনের পথে অগ্রসর হতে হয়েছে তার ভিতর সাহিত্যের মাধ্যমে আত্মপ্রকাশের এমন আকুলতা এলো কি করে? এখানেও আর এক ধাঁধা। তবে এই ধাঁধার চেষ্টা করলে একটা সমাধান বোধ করি বার করা

যায়। অতঃপর তাঁর প্রতিভার রহস্য উন্মোচনের মত এক জেতেন অসম্ভব মনে হয় না।

শরৎচন্দ্রের ভিতর সাহিত্যিক আত্মপ্রকাশের আকুলতা এসেছিল কৌলিক সূত্রে। আরও পবিষ্কার করে বললে, পিতৃদেবের দৃষ্টান্ত প্রভাবে। পিতা মতিলাল চট্টোপাধ্যায় ছিলেন গার্হস্থ্য পথের পথিক হয়েও সংসার-বিবাগ্য পুরুষ, উপার্জনে উদ্যমান অথবা অশক্ত। এরকম মানুষের নিজেকে সংসারে জড়ানো হতো। অত্যাশ কিস্ত আমাদের দেশের বর্ণহিন্দু সমাজের গড়নটাই এমন যে পাকে-চক্রে এ জিনিস হয়ে যায়। বিশেষ, গৃহশ্রম প্রবেশ থাী যদি কুলীন ব্রাহ্মণ সন্তান হন তাতলে তো আবও। বহুসংখ্যক কন্যাদায়গ্রস্ত পরিবারের নিখুস্ত ঘটকদের ঘটকালীর আয়োজন বার্থ করে কুলীন পাত্রের পক্ষে অবিবাহিত থাকা একটা অতিশয় বিবল ঘটনা, চরম পরীক্ষার স্থলও বটে, তা সে পাত্র উপার্জনশাল পোক আর নাই হোক। সুতরাং মতিলাল চট্টোপাধ্যায় মহাশয়ের আর্থিক যোগ্যতা না থাকা সত্ত্বেও সংসার বন্ধনে আবদ্ধ হয়ে একটি নাতিবৃহৎ পরিবার সৃষ্টির অনুবুলে দৃষ্টির জোব না থাকলেও তৎকালীন সামাজিক প্রথাব অনুমোদন ছিল। যদিও প্রথাটি ক্ষতিকব সে কথা বলাই বাহুল্য।

কিস্ত চাটুজো মশায়েব অর্থাভাব থাকলেও ভাবুকতাব অভাব ছিল না। তিনি অতিশয় কল্পনাপ্রবণ মানুষ ছিলেন এবং লেখক ছিলেন। পুত্রের মুখ থেকেই পিতার কাহিনী শোনা যাক। “আমার শৈশব ও যৌবন ঘোর দারিদ্র্যের মধ্যে দিয়ে অতিবাহিত হয়েছে। অর্থের অভাবেই আমার শিক্ষালাভের সৌভাগ্য ঘটেনি। পিতার নিকট হতে অস্থির স্বভাব ও গভীর সাহিত্যানুরাগ ব্যতীত আমি উত্তরাধিকার-সূত্রে আব কিছুই পাইনি। পিতৃদত্ত প্রথম গুণটি আমাকে ঘরছাড়া করেছিল—আমি অল্প বয়সেই সারা ভারত ঘুরে এলাম। পরে পিতার দ্বিতীয় গুণের ফলে আমি জীবন ভরে কেবল স্বপ্ন দেখেই গেলাম। আমার পিতার পাণ্ডিত্য ছিল অগাধ। ছোট গল্প, উপন্যাস, নাটক, কবিতা—এক কথায় সাহিত্যের সকল বিভাগেই তিনি হাত দিয়েছিলেন, কিস্ত কোনটাই তিনি শেষ করতে পারেননি। তাঁর লেখাগুলি আজ আমার কাছে নেই—কবে কেমন করে হারিয়ে গেছে, সে কথা আজ মনে পড়ে না। কিস্ত এখন স্পষ্ট মনে আছে, ছোটবেলায় কতবার তাঁর অসমাপ্ত লেখাগুলি নিয়ে ঘন্টার পর ঘন্টা কাটিয়ে

দিয়েছি। কেন তিনি এগুলি শেষ করে যাননি, এই বলে কত দুঃখই না করেছি। অসমাপ্ত অংশগুলি কি হতে পারে, ভাবতে ভাবতে আমার অনেক বিনীত রজনী কেটে গেছে। এ কারণেই বোধহয় সতের বছর বয়সের সময় আমি গল্প লিখতে শুরু করি। কিন্তু কিছুদিন বাদে গল্প রচনা একেজোর কাজ মনে করে আমি অভ্যাস ছেড়ে দিলাম। তারপর অনেক বছর চলে গেল। আমি যে কোনকালে একটি লাইন লিখেছি, সে কথা ভুলে গেলাম।”

এই আত্মকথামূলক জীবনী থেকে পরিষ্কার বোঝা যায় তাঁর সৃষ্টির প্রেরণার মূল উৎস কোথায় লুকিয়ে ছিল। অবশ্য ‘হেরিডিটি’র বা বংশগতির প্রভাব গোটা ব্যক্তিত্বের ছাঁচ গড়ে ওঠার মূলে একটা সামান্য ভগ্নাংশের কাজ করে মাত্র, তার সঙ্গে জড়িয়ে আরও বহুতর কারণ বিদ্যমান থাকে, উত্তর জীবনে যেগুলির প্রভাব অনেক বেশী কার্যকর হতে দেখা যায়। যেমন, শিক্ষাদীক্ষা, জ্ঞানস্পৃহা, পারিপার্শ্বিক অবস্থা, লোকসঙ্গ, অবস্থার দৌলতে অথবা অবস্থার ফেরে নিত্য নতুন নতুন পরিস্থিতিতে শিক্ষিত হওয়ার অভিজ্ঞতা, বুদ্ধি কল্লনা আন্তরিকতা নিঃস্বার্থতা প্রভৃতির ভূমিকা ইত্যাদি। খতিয়ে দেখলে, বংশগতি অপেক্ষা শেষোক্ত বস্তুগুলির প্রভাবই মানবজীবনের উপর বেশী ছাপ ফেলে এবং তার গতিপথ নির্দিষ্ট করে। পারিপার্শ্বিকই মানুষ গোড়ায় যা ছিল থেকে পরে যা হয়, তার প্রধান নির্ণায়ক। তবে বংশগতির প্রভাবটাকেও একেবারে কিছু নয় বলে উড়িয়ে দেওয়া যায় না। শরৎচন্দ্রের বেলায় দেখা যায় তাঁর লেখক হতে চাওয়ার মূল প্রেরণাটি এসেছিল তাঁর পিতার কাছ থেকে; পরে অবশ্য তিনি প্রেরণাটিকে তল্লিষ্ঠ অনুশালনের দ্বারা ক্রমেই সার্থক থেকে সার্থকতর করে তোলেন—তিনি আপনাকে বাংলার একজন শ্রেষ্ঠ সৃষ্টিশীল লেখকে পরিণত করেন।

মায়ের নাম ভুবনমোহিনী দেবী। মায়ের সম্পর্কে বিশেষ কিছু জানা যায় না, এদেশের পুরুষপ্রধান সামাজিক গড়নের দরুন নারীর ব্যক্তিত্বের বৈশিষ্ট্য নিয়ে কে কবেই বা মাথা ঘামিয়েছে—তবে অনুমান করে নিতে কষ্ট হয় না। শরৎ-সাহিত্যের অপরিমেয় দরদ, ভাবাবেগের সমৃদ্ধি ও আন্তরিকতা গুণের মূলে কাজ করেছে মায়ের প্রভাব। বাংলার নারীকুলকে যে শরৎচন্দ্র বিশেষ মর্যাদা ও শ্রদ্ধার দৃষ্টিতে দেখেছিলেন তারও মূলে তাঁর মায়ের প্রত্যক্ষ দৃষ্টান্ত থাকা অসম্ভব নয়। ঘর থেকেই মানুষের সহৃদয়তার চর্চার শুরু হয়, শরৎচন্দ্রের বেলায়ই বা এ কথা কেন না সত্য হবে?

## ॥ ২০ ॥

### বৈদেশিক প্রভাব

শরৎচন্দ্র বিদেশী সাহিত্যের দ্বারা কতদূর কী-পরিমাণ প্রভাবিত হয়েছিলেন তা নিরূপণ করবার নির্ভরযোগ্য কোন মাপকাঠি নেই, তবে ইতস্ততঃ-বিক্ষিপ্ত আভ্যন্তর প্রমাণ থেকে এরকম ধারণা করলে অস্বাভাবিক হয় না যে, প্রথম জীবনের কোন কোন রচনায় ইউরোপীয় গল্প-উপন্যাসের ছাঁচ স্পষ্ট-প্রত্যক্ষ না হলেও পরোক্ষ প্রভাব বিস্তার করেছিল, আর মধ্য ও শেষ বয়সের রচনায় পাশ্চাত্য চিন্তাশীল লেখকদের মধ্যে বিশেষভাবে যাঁরা সমাজতত্ত্ব ও নীতিতত্ত্ব নিয়ে চর্চা করেন তাঁদের কারও কারও রচনাদর্শের প্রভাব ছাড়া ফেলেছিল। শেষোক্ত ক্ষেত্রে ছাত্রাণ্ডি বেশ দীর্ঘবিলম্বিত ও স্পষ্ট, ধূসর কিংবা ক্ষীণরেখ নয়। শরৎচন্দ্র সম্পর্কে একটা লক্ষণীয় ঘটনা এই যে, যদিও তিনি মূলতঃ ও প্রধানতঃ কথাসাহিত্যিক ছিলেন, কথাসাহিত্য পড়েছেন তিনি কম, সেই তুলনায় সমাজতত্ত্ব, রাষ্ট্রবিজ্ঞান, অর্থনীতি, নৃতত্ত্ব, ইতিহাস, নীতিশাস্ত্র প্রভৃতি বিষয়ের বই পড়েছেন অনেক, অনেক বেশী। বিশেষ করে রেঙ্গুনে থাকাকালে তাঁর পড়াশুনো একান্তভাবেই উল্লিখিত বিষয়সমূহের বইকে কেন্দ্র করেই কম-বেশী আবর্তিত হয়েছে। তিনি পরে দু'একবার প্রকাশেও স্বীকার করেছেন যে, পরের লেখা সাহিত্য অর্থাৎ কথাসাহিত্য তিনি খুব কমই পড়েছেন। “ও আমার ভাল লাগে না। আমার বাড়িতে যে বই আছে তার অধিকাংশই সায়েন্সের বই।”

তবে সায়েন্সের বই তো আর কিশোরকাল থেকেই পড়া বা পড়ে আয়ত্ত করা সম্ভব ছিল না। তার জগৎ মানসিক প্রস্তুতি ও উপযুক্ততা অর্জনের প্রশ্ন ছিল। প্রথম বয়সে তিনি উপন্যাস গল্পের বইই বেশী পড়েছেন। আমাদের স্বদেশীয় লেখকদের মধ্যে বঙ্কিমচন্দ্র ও রবীন্দ্রনাথ তাঁর সবিশেষ প্রিয় ছিল, বিশেষ করে রবীন্দ্রনাথ। আর বিদেশী লেখকদের মধ্যে মেরি কুরেলি, মিসেস হেনরী উড, চার্লস ডিকেন্স এঁদের লেখা তিনি খুব পড়তেন। ভাগলপুরে থাকতে হেনরী উডের ‘ইন্টেলীজেন্স’ উপন্যাসের অবলম্বনে কোরেল নামক গল্পটি লিখেছিলেন, যা পরে বর্মাদেশের পটভূমিকায় ছবি গল্পে

রূপান্তরিত হয়। প্রথম বয়সের কিছু কিছু গল্প আছে, যেমন মন্দির, আলো ও ছায়া এবং পথনির্দেশ, তাদের কাহিনীর আদলে বিদেশী ছোটগল্পের ছায়াপাত ঘটেছে বলে সন্দেহ হয়, যদিও সেই বিদেশী ছোটগল্পগুলিকে চিহ্নিত করা কঠিন। এরকম সন্দেহ উদিত হবার কারণ, এই তিনটি গল্পে এমন এক অস্বাভাবিক মনস্তত্ত্বের চিত্রণ আছে যাকে অসুস্থ বলেও অত্যাক্তি হয় না। এই অসুস্থ মনস্তত্ত্ব আমাদের দেশের সমাজ-কাঠামোয় কল্পনীয় নয়, ইউরোপের উত্তেজনাতাড়িত সংঘাত-সঙ্কুল জীবনযাত্রায় অভ্যস্ত নরনারীদের ভিতরই তার দেখা পাওয়া সম্ভব। অথচ তিনটি গল্পেই এমনতর ‘মর্বিড’ মনোভঙ্গীর দৃষ্টিগ্রাহ্য অনুপ্রবেশ ঘটেছে, যা এদেশের কাহিনীর আদলের মধ্যে প্রক্ষিপ্ত বলে মনে হয়। শরৎচন্দ্রের আগে-পরের আর কোন লেখাতেই এই জাতীয় ‘মর্বিডিটি’ নেই, তাই থেকেই সংশয় জাগে পাশ্চাত্য সূত্রেই এই প্রভাব তদানীন্তন শরৎচন্দ্রের রচনায় সংক্রমিত হয়েছিল। পরে এই বিমর্ষ আবেশ সম্পূর্ণ কেটে যায়।

আমাদের সাহিত্যের সমালোচকেরা শরৎচন্দ্রকে ঊনবিংশ শতাব্দীর ইংরেজী কথাসাহিত্যের অগ্ৰতম প্রধান পুরুষ চার্লস ডিকেন্সের সঙ্গে তুলনা করতে ভালবাসেন। শরৎচন্দ্রের উপর ডিকেন্সের প্রভাব প্রত্যক্ষতঃ কতটা পড়েছিল বলা শক্ত, তবে দুইয়ের অপরিসীম জনপ্রিয়তার আদলের মধ্যে যে বড় রকমের একটা মিল আছে সে কথা কোনক্রমেই অস্বীকার করা যায় না। দুজনাই নিজ নিজ সাহিত্যে অসামান্য লোকধন্য লেখক। জীবনীর ছাঁচের মধ্যেও মিল আছে। উভয়েই অতিশয় সাধারণ অবস্থা থেকে বড় হয়েছিলেন এবং প্রতিভার জাহ্নুতে সাহিত্যক্ষেত্রে প্রতিষ্ঠা লাভ করেছিলেন। তবে জীবনীর আদলে ডিকেন্স অপেক্ষাও রুশ কথাসাহিত্যিক ম্যাক্সিম গর্কির সঙ্গে শরৎচন্দ্রের বেশী মিল। গর্কির প্রথম জীবনের ভবঘুরেপনা আর শরৎচন্দ্রের যৌবনের সততভ্রাম্যমাণ স্বভাব খুবই নিকটসাদৃশ্যযুক্ত। তাঁদের দুজনার অভিজ্ঞতার ধরনের মধ্যেও সমূহ মিল। দুজনেই স্বশিক্ষিত, স্কুল-কলেজের শিক্ষার প্রভাব তাঁদের মনোগঠনে খুব সামান্য প্রভাবই বিস্তার করতে পেরেছিল, কেননা এই ক্ষেত্রে বেশীদূর এগোবার সুযোগ দুজনার একজনও পাননি। তাঁরা ‘জীবনের পাঠশালা’ ছাত্র, জীবনের পাঠশালায় থেকেই মূলতঃ পাঠ গ্রহণ করেছিলেন। তবু গর্কির সঙ্গে তুলিত না করে ডিকেন্সের সঙ্গে কেন যে শরৎচন্দ্রকে তুলিত করা হয় ভাল বোঝা যায় না।



তবে ডিকেন্সের সঙ্গে মিল থাকুক বা না থাকুক অথ দু'একজন ইংরেজ লেখকের সঙ্গে শরৎচন্দ্রের মিলের কথা কেউ কেউ উল্লেখ করেছেন। যেমন, বাংলা সাহিত্যের ঐতিহাসিক অধ্যাপক সুকুমার সেন মণ্ডাশয় দত্ত। উপন্যাসটির সঙ্গে চার্লস গারভিলের *Leola Dale's Fortune* নামক উপন্যাসের মিল খুঁজে পেয়েছেন। পক্ষান্তরে, অধ্যাপক বিমলাপ্রসাদ মুখোপাধ্যায় দত্তার মধ্যে পেয়েছেন টমাস হার্ডির *Two On A Tower* উপন্যাসের কাহিনীবৃত্তের সাদৃশ্য, যদিও এই সাদৃশ্যকে তিনি আকস্মিক বলেই মনে করেন, এ দুয়ের ভিতর কোন সচেতন উত্তমৰ্ণ-অধমৰ্ণ সম্পর্ক আছে বলে তিনি বিশ্বাস করেন না। সম্পর্ক যদি কিছু থেকে থাকে তো তা নিতান্তই আপাতিক। এই প্রসঙ্গে হার্ডির জুড দ্য অবসকিউর উপন্যাসের সঙ্গে গৃহদাহের মিলও স্মরণীয়।

ইংরেজী উপন্যাসের সঙ্গে শরৎচন্দ্রের গল্পোপন্যাসের প্রভাষ বা পরোক্ষ সম্বন্ধের এইখানেই ইতি। বরং সেই অনুপাতে রুশ সাহিত্যের সঙ্গে শরৎচন্দ্রের নৈকট্য বেশী। গার্কির জীবনের ছাঁচের সঙ্গে শরৎ-জীবনের অভূত মিলের কথা পূর্বেই উল্লেখ করেছি। উপন্যাসের এলাকায় এলে দেখতে পাই, টলস্টয়ের অ্যানা কাবেনিনা উপন্যাসের ত্রিকোণ প্রেমের ছাঁচের সঙ্গে গৃহদাহ উপন্যাসের ত্রিকোণ কাহিনীবৃত্তের লক্ষণীয় সাদৃশ্য আছে। টলস্টয় অ্যানার বিবাহিত জীবনে পরপুরুষ ভ্রনস্কির আবির্ভাব ঘটিয়ে তাকে স্বামী আর প্রণয়ীর মধ্যে দ্বিধাবিভক্ত মানসিকতায় আচ্ছন্ন করে তার চিত্তকে ক্ষতবিক্ষত করেছেন। অনুরূপভাবে অচলা ক্ষতবিক্ষত হয়েছে মতিম আর তার বন্ধু সুরেশের মধ্যে আকর্ষণ-বিকর্ষণের টানাপোড়েনের দ্বন্দ্ব। ভ্রনস্কির প্রতি অ্যানার আসক্তি তবুও অনেকটা স্পর্ধরৈখ্য অঙ্কিত, সুরেশের প্রতি অচলার আকর্ষণ কিন্তু তেমন কোন বলিষ্ঠ অভিব্যক্তি লাভ করতে পারেনি—আগাগোড়া দ্বিধাজড়িমায় কুণ্ঠিত হয়েই রয়েছে। তবু দুটি উপন্যাসের কাহিনীবৃত্তের মধ্যে বিশেষ স্বাক্ষর্য বিদ্যমান। সব দেশেরই সমাজে ত্রিকোণ প্রেমের ছাঁচ কম-বেশী এক। ত্রিকোণ প্রেমের এই বিশিষ্ট প্রকৃতির মধ্যেই উভয় উপন্যাসের সাদৃশ্যের সংকেত নিহিত, নয়তো দুইয়ের মধ্যে কোন কার্য-কারণ সম্পর্ক নেই, তেমন কার্য-কারণ সম্পর্ক খুঁজতে যাওয়া নিরর্থকও বটে।

টলস্টয়ের রিসারেকসন উপন্যাসটির প্রতি শরৎচন্দ্রের বিশেষ মমত্ব ছিল। এই বইয়ের ঘটনার আদর্শ তাঁর কোন উপন্যাসে বা ছোটগল্পে প্রভাব ফেলেনি বটে (যেমন রবীন্দ্রনাথের বিচারক গল্পের মধ্যে এর প্রভাব পড়েছিল বলে কেউ

কেউ মনে করেন), তবে এই উপন্যাসটিকে যে তিনি বিশ্বের একটি সেরা শিল্প-সৃষ্টি মনে করতেন তার লিখিত প্রমাণ আছে। অল্লীলতার অভিযোগে চরিত্রহীন উপন্যাসটি যখন ভারতবর্ষ পত্রিকার দপ্তর থেকে ফেরত আসে তখন সেই পত্রিকার সঙ্গে যুক্ত শরৎচন্দ্রের অগ্রতম ঘনিষ্ঠ বন্ধু প্রমথনাথ ভট্টাচার্যকে শরৎচন্দ্র এই মর্মে সঙ্ক্ষেপে লিখেছিলেন যে, খুব সম্ভব ভারতবর্ষ পত্রিকার পরিচালকেরা ইউরোপীয় সাহিত্যের সঙ্গে তেমন পরিচিত নন, তাঁদের যদি টলস্টয়ের রচিত রিসারেকসন নামীয় উপন্যাসটির সঙ্গে পরিচয় থাকত তো তাঁরা চরিত্রহীন বইটিকে রুচিবিকারের দোষে কোনমতেই অভিযুক্ত করতে পারতেন না। একটি পতিতাকে নিয়ে ওই উপন্যাসের কাহিনী, অথচ এটি পৃথিবীর অগ্রতম শ্রেষ্ঠ উপন্যাস। আমাদের দেশের পাঠকদের পাশ্চাত্যের পাঠকদের স্তরে উন্নীত হতে এখনও অনেক দিলম্ব।

উপন্যাসে মিল এই পর্যন্ত। এর বেশী মিলের কথা আর বিশেষ কেউ উল্লেখ করেননি বা খুঁজে পাননি। প্রকৃতপক্ষে, শরৎচন্দ্রের শিল্পের জগৎ একান্তরূপেই স্নানিত ও মৌলিক—প্লটের জন্ম কিংবা অন্য কোন উপাদান সংগ্রহের জন্ম তাঁকে বিদেশী সাহিত্যের দ্বারস্থ হতে হয়নি, হলেও তার পরিমাণ অতিশয় নগণ্য বল। চলে। শরৎচন্দ্র নিজেই বলেছেন যে, তিনি তাঁর গল্পে ও উপন্যাসে যা-কিছু লিখেছেন তা তাঁর অভিজ্ঞতা থেকে সংগৃহীত; একান্তরূপে স্বীয় জীবনের দেখা ও জানার অনুভবকে আশ্রয় করেই তিনি তাঁর গোটা শিল্পের জগৎ গড়ে তুলেছিলেন, এজন্য অভিজ্ঞতার বৃত্তের বাইরে তাঁকে কখনও হাত পাততে হয়নি। আর সত্যিই তো, যাঁর নিজের জীবনেই বিচিত্র ধরনের চমকপ্রদ অভিজ্ঞতার অন্ত নেই, তিনি তাঁর গল্প-উপন্যাসের মালমসলা কিংবা চরিত্রায়ণের আদল কুড়োবার জন্ম বিদেশী সাহিত্যের শরণাপন্ন হবেন, এটা সহজ বুদ্ধিতে ভাবা যায় না। শরৎ-সাহিত্যের একটা প্রধান জোরই হচ্ছে তাঁর রচনার স্বদেশভিত্তিকতা। বাংলাদেশের গ্রাম যেন তাঁর লেখাতে স্ব-স্বরূপে দীপ্যমান হয়ে উঠেছে। কেউ কেউ অবশ্য তাঁর সাহিত্যের এই ঐকান্তিব indigenous বা ঘরোয়া রূপকে তাঁর চিন্তা ও কল্পনার কুপমণ্ডুকতার প্রমাণ রূপে দাখিল করতে চান, কিন্তু প্রমাণটা শরৎ-সাহিত্যের কুপমণ্ডুকতারই নির্দেশক হোক আর যা-ই হোক, ওই বৈশিষ্ট্যের মধ্যেই তাঁর শক্তির সংকেতও নিহিত। বিশ্বজনীনতার মূর্তি তাঁতে নাই থাকুক, যে-প্রাদেশিকতার মূর্তিটিকে তিনি তাঁর লেখায় তুলে ধরেছেন তা-ও বড় কম উজ্জ্বল বা কম তেজোময় নয়।

আপাতদৃষ্টিতে দেখতে গেলে পথের দাবী, শেষ প্রশ্ন প্রভৃতি উপন্যাসে একটা বৈদেশিকতার আমেজ আছে বলে মনে হয়। সেগুলির পরিবেশের ভিন্নতার জগুই প্রথম-প্রথম এরকম মনে হওয়া বিচিত্র নয়। পথের দাবী উপন্যাসে আছে একটা আন্তর্জাতিকতার প্রতিবেশ, আর শেষ প্রশ্নের কমল চরিত্রের মধ্যে আছে কেমন যেন একটা অপরিচয়ের ছাপ। সেই নজীরে কোন কোন সমালোচক ওই দুটি উপন্যাসের ভিতর একদা বিদেশী প্রভাব আবিষ্কারে সচেষ্ট হয়েছিলেন। কিন্তু একটু চিন্তা করলেই দেখা যাবে সংশ্লিষ্ট সমালোচকদের ওই অনুমান ঠিক নয়। পথের দাবী উপন্যাসে যে আন্তর্জাতিকতার স্বাদ পাওয়া যায় তার মূল কেন্দ্র কিন্তু বর্মায়; যে-বর্মামূলকে শরৎচন্দ্র নিজেই দীর্ঘদিন অতিবাহিত করেছিলেন। আর সব্যসাচী চরিত্রের আদল সংগ্রহ করেছিলেন হয় মানবেন্দ্রনাথ রায়ের দৃষ্টান্ত থেকে, নয়তো অল্প কোন স্বদেশীয় বিপ্লবী বীরের জীবন থেকে। লেনিনের প্রভাব থাকাও অসম্ভব নয়, তবে মিলটা বহিরঙ্গ মাত্র। সাদৃশ্যটাকে অনুমানের স্তরে রাখাই যুক্তিযুক্ত, তাকে বেশীদূর টেনে নিয়ে যাওয়া উচিত হবে না।

আর কমল সম্বন্ধে একজন প্রশংসারক শরৎচন্দ্রকে সরাসরি প্রশ্ন করেছিলেন, এ চরিত্র এদেশের সচরাচর-দেখা চরিত্রের আদলের সঙ্গে একেবারেই মেলে না, এ চরিত্র তিনি ইউরোপীয় সাহিত্যের অনুরূপ কোন চরিত্র-পরিকল্পনার আদলে সৃষ্টি করেননি তো? তার উত্তরে শরৎচন্দ্র বলেছিলেন, কমল তাঁর স্বচক্ষে-দেখা চরিত্র, নাগপুরে এরকম একটি ভেজোদৃশ্য স্বাধীন প্রথমমহনর্শালা মেয়েকে তিনি দেখেছিলেন। এমন কোন চরিত্রই তিনি তাঁর উপন্যাসে এযাবৎ সৃষ্টি করেননি যা তাঁর আপন চেনা-জানার অভিজ্ঞতার বৃত্তের অন্তর্গত নয়। (১৯৩১ সালে কুমিল্লায় তরুণ সাহিত্যিকদের সঙ্গে আলাপচারী, তদানীন্তন নবশক্তি পত্রিকায় সঞ্জয় ভট্টাচার্য-সংকলিত রিপোর্ট।)

সুতরাং দেখা যাচ্ছে, শরৎচন্দ্র তাঁর গল্পে-উপন্যাসে বিদেশী প্রভাবের দ্বারা খুব কম ক্ষেত্রেই প্রভাবিত হয়েছেন। এমনকি আকস্মিক বা আপাতিক বা অনভিপ্রেত মিলের দৃষ্টান্তও নগণ্য। যাঁর নিজেরই অভিজ্ঞতার পুঁজির কোন সীমা-পরিসীমা নেই আর তা থেকে শিল্প সৃষ্টি করবার ক্ষমতাও যাঁর তুলনারহিত, তিনি কেন কাহিনীবয়ন কিংবা চরিত্র-পরিকল্পনার ছাঁচ সংগ্রহের জগু বিদেশী সাহিত্যের দ্বারায় ধর্না দিতে যাবেন? দিতে যাবেন কোন্‌ হুংথে?

তবে, যে-কথা পূর্বেই বলেছি, প্রবন্ধ-সাহিত্য রচনায় তিনি পাশ্চাত্য মনস্বীদের রচনাদর্শের দ্বারা গভীরভাবে প্রভাবিত হয়েছিলেন। রেঙ্গুনে থাকাকালে এবং রেঙ্গুন থেকে দেশে ফিরে আসার পর প্রথমে বাজ্জে-শিবপুর ও পরে সামতাবেড়-পানিত্রাসে বাস করার কালে তিনি প্রচুর সমাজতত্ত্ব, অর্থনীতি, রাজনীতির বই পড়েছিলেন। হার্বার্ট স্পেন্সার, জন স্টুয়ার্ট মিল, অগাস্টাস কোথ, কার্ট, হেগেল, সোপেনহায়ার, সার হেনরী মেইন, কীন্স প্রমুখের রচনাবলীর সঙ্গে তাঁর বিলম্বিত পরিচয় ছিল। বিশেষ করে হার্বার্ট স্পেন্সারের রচনাবলী তিনি তন্ন তন্ন করে পড়েছিলেন। নৃতাত্ত্বিক পণ্ডিতদের লেখা যে কী গভীর মনোযোগের সঙ্গে অধ্যয়ন করেছিলেন তার পরিচয় তাঁর নারীর মূল্য পুস্তকের ছত্রে ছত্রে বিকীর্ণ আছে।

শরৎচন্দ্র এক রহস্যময় পুরুষ ছিলেন। রহস্যপ্রিয়ও বটে। তিনি তাঁর পাণ্ডিত্যকে সযত্নে আড়াল করে বাইরে একজন গ্যালাখাপা গোছের 'দাদা-ঠাকুর' সেজে থাকতে ভালবাসতেন। কিন্তু ওটা যে তাঁর একটা ছদ্মবেশ সেটা তাঁর জীবদ্দশায় তাঁর অতি নিকট পরিজনদের কাছেও তেমন ধরা পড়েনি। ধরা দিতে তিনি নিজেও চাননি। এই ক্ষেত্রে লোককে ভাঁড়িয়েই তাঁর আনন্দ ছিল। লোকে নিজ নিজ পাণ্ডিত্য জাহির করতে চায়, আর এই মানুষটির ছিল ঠিক তাব বিপরীত স্বভাব। পাণ্ডিত্যকে গোপন করবার জগ্য তাঁর যত্নের অবধি ছিল না। আর ঠিক এই কারণে জনমনে এই এক ভ্রান্ত ধারণার সৃষ্টি হয়েছে যে, শরৎচন্দ্র স্বল্পশিক্ষিত ছিলেন, তাঁর বিচিত্র ভাবধুরে জীবনের পর্বে পর্বে আহরিত অভিজ্ঞতার সমৃদ্ধিটাই তাঁর সাহিত্যের একমাত্র পুঁজি ছিল, অণু কোন সম্বল তাঁর ছিল না। এই ভুল-কিংবদন্তী সৃষ্টির জগ্য শরৎচন্দ্র নিজেও অনেকখানি পরিমাণে দায়ী। তিনিই এই চারাগাছটি রোপণ করেছিলেন এবং নিজের হাতে জলনিষেকে তাকে পরিপুষ্ট করে তুলেছিলেন। পণ্ডিত হয়েও স্বল্প-শিক্ষিতের অপবাদ নিয়ে তাঁকে সংসার থেকে বিদায় নিতে হয়েছে।

শ্রীযুক্ত তারাপদ সাঁতরা শরৎচন্দ্রের সামতাবেড়-পানিত্রাস ভবনের লাইব্রেরীর পুস্তকাবলীর এক তালিকা প্রকাশ করেছেন (শরৎচন্দ্রের গ্রন্থাগার, শরৎ-সম্পূট, ডঃ রবীন্দ্রনাথ গুপ্ত সম্পাদিত)। তা থেকে দেখা যায় কত বিচিত্র ধরনের জ্ঞানগর্ভ বই তাঁর লাইব্রেরীর সংগ্রহে ছিল। সমাজতত্ত্ব, রাজনীতি, অর্থনীতি, ইতিহাস, দর্শন, নীতিতত্ত্ব, নৃতত্ত্ব প্রভৃতি বিষয়ক বই-ই

বেশী। এমনকি কার্ল মার্কসের গ্রন্থও তাঁর সংগ্রহে ছিল। এই থেকেই তাঁর জিজ্ঞাসার প্রকৃতি ও কোন্ কোন্ দিকে সেই জিজ্ঞাসা প্রধাবিত ছিল তার হৃদিস পাওয়া যায়। শরৎচন্দ্র একবার বাটর্যাও রাসেলের গ্রন্থপাঠে অভিভূত হয়ে সখেদে দিলীপকুমার রায়কে লিখেছিলেন যে, তাঁর হওয়া উচিত ছিল একজন সমাজবিজ্ঞানী, এদেশের জলহাওয়ার দোষে হয়ে উঠেছেন একজন জনমনোরঞ্জক গল্পকার। ইউরোপে জন্মালে তিনি কোন্ না একজন বিশিষ্ট চিন্তাশীল লেখক হতে পারতেন।

শরৎচন্দ্রের কোন কোন উপন্যাসের মধ্যেও তাঁর অধ্যয়নের ব্যাপ্তির পরিচয় আছে। পথের দাবী উপন্যাসে তিনি ইতিহাস-সচেতনতার গভীর পরিচয় রেখেছেন। সব্যসাচীর জবনীতে একজায়গায় পাই তিনি ফরাসীদেশের ১৮৫৩ সালের 'জুন বিদ্রোহের' উল্লেখ করছেন, যে-বিদ্রোহের কথা একমাত্র ইউরোপের ইতিহাসের নিবিষ্ট পাঠক ছাড়া খুব কম লোকেই এখন পর্যন্ত এদেশে জানেন। আর এক জায়গায় সব্যসাচী শ্রমিক ও কৃষকের তুলনামূলক ভূমিকার আলোচনায় কৃষককে খুবই খাটো করে দেখিয়েছেন এবং বিপ্লবের শক্তি হিসাবে শ্রমিক শ্রেণীর উপরেই সবটা গুরুত্ব আরোপ করেছেন। এটি ট্রটস্কির বক্তব্য, রুশ রেড আর্মির স্রষ্টা ট্রটস্কি কৃষক শ্রেণীকে মোটে আমলেই আনতে চাইতেন না, এই নিয়ে রুশ বিপ্লবের অন্ত্যন্ত সহকর্মীর সঙ্গে তাঁর বিরোধ হয়। দেখা যাচ্ছে শরৎচন্দ্র এই মতের সঙ্গে পরিচিত ছিলেন, শুধু তাই নয়, সব্যসাচীর মুখে এই অভিমতটি তিনি বসিয়েছেনও। সাতরা মহাশয়ের সংকলিত গ্রন্থ-তালিকায় ট্রটস্কির উল্লেখ আছে এবং ট্রটস্কির যে-বইটি ( Lenin, London, 1925 ) শরৎচন্দ্রের সংগ্রহে রয়েছে তার সংগ্রহ-তারিখ : ডিসেম্বর ১৯২৫। পথের দাবী উপন্যাসের প্রকাশকাল ১৯২৬। শরৎচন্দ্র সব্যসাচীর উপরি-উক্ত রূপ অভিমত প্রকাশে সরাসরি এই গ্রন্থটির দ্বারাই যে প্রভাবিত হননি তা কে বলতে পারে ?

## ॥ ২১ ॥

### উপসংহার

এই পর্যন্ত এ গ্রন্থে যে যে বিষয়ের আলোচনা করা হয়েছে সেগুলিকে এই প্রবন্ধে সংক্ষেপে পুনরবলোকন করা যেতে পারে। যেহেতু উপসংহার-প্রবন্ধ, সেইহেতু পুনরুক্তির ঝুঁকি নিয়েও বোধ হয় এই কাজ করা যায়।

সুপ্রসিদ্ধ কথাসিদ্ধী শরৎচন্দ্র চট্টোপাধ্যায়ের কতকগুলি সুচিহ্নিত বৈশিষ্ট্য বিদ্যমান : তাঁর সমাজ-বাস্তবতা, সামন্তবাদ-বিরোধিতা, সাম্রাজ্যবাদ-বিরোধিতা, নারী-সমাজের প্রতি অপরিমেয় দরদ, সর্বোপরি স্টাইলের গুচ্ছল্য।

প্রথমতঃ সমাজ-বাস্তবতার প্রসঙ্গ। শরৎচন্দ্র অত্যন্ত সমাজ-সচেতন লেখক ছিলেন। সাহিত্যের সঙ্গে সমাজের নিগূঢ় সম্পর্ক স্বীকার করতেন। সমাজের ভাল-মন্দ বাদ দিয়ে সাহিত্যের বিশুদ্ধতার খে-তত্ত্ব কলাকৈবল্য-বাদীরা প্রচার করেন তার প্রতি তাঁর কোন আস্থা ছিল না। তিনি সাহিত্যে নন্দনবাদী ছিলেন না, ছিলেন সমাজকল্যাণবাদী। অর্থাৎ সাহিত্যের দ্বারা সমাজের কল্যাণ সাধন করা যায়, করা উচিত, পক্ষান্তরে সাহিত্যে এমন কিছু পরিবেশন করা উচিত নয় যার দ্বারা সমাজের অহিত হয়—এই আদর্শ তিনি বিশ্বাস করতেন। সমাজ-নিরপেক্ষ বিশুদ্ধ আনন্দের সৃষ্টি একশ্রেণীর লেখকের যতই কাজীত হোক, তাঁর কাছে সে-বস্তুর বিশেষ কোন মূল্য ছিল না।

এই দিক থেকে দেখতে গেলে শরৎচন্দ্র বঙ্কিমচন্দ্রের যোগ্য উত্তরাধিকারী ছিলেন। বঙ্কিমচন্দ্র অসাধারণ সমাজ-চেতনাদীপ্ত লেখক ছিলেন। নবীন লেখকদের উদ্দেশ্যে তাঁর প্রসিদ্ধ উপদেশাবলীর অন্যতম উপদেশই হলো : এমন কিছু লিখে শক্তির অপব্যয় করতে নেই যাতে সমাজের অকল্যাণ হয়। অবশ্য কিসে সমাজের হিত হয়, কিসে অহিত হয়, এই নিয়ে মতভেদ থাকা স্বাভাবিক। বঙ্কিমচন্দ্র ও শরৎচন্দ্রের মধ্যে এমনতর মতভেদ ছিল। শরৎচন্দ্র বঙ্কিমচন্দ্রের সমাজ-কল্যাণের ধারণাকে স্বীকার করে নিতে পারেননি। যেভাবে বঙ্কিমচন্দ্র বিশ্ববৃক্ষ উপন্যাসে কুন্দনন্দিনীকে বিষপানে আত্মহত্যা

করিয়েছেন কিংবা কৃষ্ণকালের উইল উপস্থাসে রোহিণীকে গোবিন্দলালের রিভলবারের গুলিতে হত্যা করিয়েছেন তার অন্তর্নিহিত সামাজিক উদ্দেশ্য শরৎচন্দ্রের আদৌ মনঃপূত হয়নি—একাধিক ভাষণে ও আলোচনায় শরৎচন্দ্র এই খাতে বঙ্কিমের সমালোচনা করেছেন। তাছাড়া, আজকের প্রগতিশীল বিচারের মানদণ্ডে বঙ্কিমের প্রচারিত সমাজাদর্শ কতটা গ্রাহ্য তাও একটা অনুধাবনীয় বিষয়। কিন্তু বঙ্কিমচন্দ্রের সামাজিক মতামত শরৎচন্দ্রের কালে অথবা এই কালে স্বীকার্য হোক আর নাই হোক এ কথা তো মানতেই হবে যে, তিনিই বাংলা সাহিত্যে সমাজ-চেতনের প্রয়োজনীয়তার উপর সবচেয়ে বেশী জোর দিয়েছেন। শরৎচন্দ্র সেই ধারাটাকেই বিশ্বস্ততার সঙ্গে অনুসরণ করেছিলেন। সেই দিক থেকে শরৎচন্দ্র বঙ্কিমচন্দ্রের অনুগামী লেখক।

শরৎচন্দ্রের সমাজ-চেতনার পরিকল্পনায় গ্রামীণ সমাজ বিশেষ প্রাধান্য লাভ করেছে। তিনি নিজে গ্রামের সন্তান ছিলেন, গ্রামের হিন্দু মধ্যবিত্ত স্তর থেকে উদ্ভূত হয়েছিলেন, সেই স্তরের জীবনযাত্রা ও আচরিত মূল্যবোধগুলির সঙ্গে নিবিড়ভাবে পরিচিত ছিলেন; সুতরাং স্বভাবতঃই চিত্র ও চরিত্রের রূপায়ণে বাংলার গ্রামসমাজ তাঁর মনোযোগের বারো-আনা মনোযোগ দখল করেছিল। তাঁর প্রথম দিক্কার প্রায় সব কয়টি গল্প-উপস্থাসের পটভূমিই হলো গ্রাম, তা-ও এমন গ্রাম যা তাঁর জানাচেনার পরিধির অন্তর্গত, প্রত্যক্ষ অভিজ্ঞতার বলয়ভূক্ত। তাঁর জন্মগ্রাম দেবানন্দপুরকে যদি কেন্দ্ররূপে ধরা যায় তাহলে শরৎচন্দ্রের অঙ্কিত গ্রামসমাজের পরিসীমা ছিল হাওড়া ও হুগলী জেলায় বিস্তৃত। এই দুই জেলার গ্রামগুলির ভৌগোলিক সংস্থান, জনবৈশিষ্ট্য, জীবনপ্রণালী, বিশেষ সমস্যাগুলির সঙ্গে তাঁর অন্তরঙ্গ পরিচয় ছিল। বালো ও কৈশোরে তিনি খুব কাছে থেকে সেসব গ্রামের দিনযাত্রার ধারা লক্ষ্য করেছেন তো বটেই, সেই ধারার সঙ্গে নিজেও সম্পৃক্ত ছিলেন, ওই অঞ্চলের গ্রামবাসীদের সুখ-দুঃখের অংশীদারত্বে তিনি তাদেরই একজন ছিলেন। সেই-জন্মই দেখা যায় বাংলার গ্রাম তাঁর লেখায় অত্যন্ত বাস্তবঘনিষ্ঠ হয়ে প্রকাশ পেয়েছে, জীবন্ততার মূর্তি পরিগ্রহ করেছে। বাংলার গ্রাম তার ভালোয়-মন্দে কালোয়-ধলোয় আলো-আঁধারিতে আর কারও লেখায় এমন সজীব হয়ে উঠেছে কিনা সন্দেহ। শরৎ-সাহিত্যের অপরিসীম জনপ্রিয়তার একটা প্রধান উৎসই হলো তাঁর এই বাস্তবঘনিষ্ঠতা, প্রখর জীবননিষ্ঠা। তাঁর দেখা

গ্রামের মধ্যে আমরা প্রত্যেকেই আমাদের নিজের দেখা গ্রামকে কোন না কোন ভাবে প্রত্যক্ষ করি।

গ্রামসমাজের চিত্রায়ণে তিনি কতকগুলি জিনিসের উপর বিশেষ জোর দিয়েছেন। যেমন সামন্তবাদী ভূমি-ব্যবস্থার শোষণ ও অত্যাচার, মানুষের ব্যক্তিত্বের অবদমনে গ্রাম্য সমাজপতিদের নিষ্ঠুর ভূমিকা, যৌথ পরিবার প্রথার জীবনযাত্রার চিত্র, গ্রামবাসীর দুষ্টিভঙ্গী আচার ও আচরণে সনাতন মূল্যবোধ-গুলির আধিপত্য, এ সমস্ত বিবিধ সীমাবদ্ধতার মধ্যেই গ্রাম্য নারী-হৃদয়ের অবিস্থাঙ্গ মাধুর্য সৌন্দর্য ও কমনীয়তা, ইত্যাদি। শরৎচন্দ্র যতগুলি গ্রামের ছবি এঁকেছেন তার প্রায় সব কয়টিই অঙ্গ-পাড়াগাঁ; অনুন্নত, পশ্চাৎপদ, শহরের আলে-হাওয়া বর্জিত। এককথায় আত্মতৃপ্ত, আপনাতে-আপনি-বদ্ধ কুপমণ্ডুক গ্রাম। অথচ সে সব গ্রামেই মানুষের সহজ প্রাণের ঐশ্বর্য কত। বিশেষ, মেয়েদের প্রাণের ঐশ্বর্য। এঁদের গায়েই যদি এমন অটেল প্রাণের সম্পদ ছড়িয়ে থাকতে পারে তো গোটা বাঙালী জাতির ভিতর তা কা অপরিসীম হতে পারে তা সত্যেই অনুমেয়। গ্রামে-গাঁথা বাংলার সাধারণ নরনারীর ভাবাবেগের জীবনের সবচেয়ে সার্থক রূপকার যদি কেউ থাকেন তো তিনি শরৎচন্দ্র।

কিন্তু বাংলার গ্রামের অপরিসীম হৃদয়সম্পদের চিত্রকার হলেও তিনি গ্রামের অন্ধকার দিকগুলিকে তুলে ধরতে এতটুকু পিছপা হননি। জমিদারের শোষণ ও অত্যাচার, ধর্মব্যবসায়ী পুরোহিত সম্প্রদায়ের হৃদয়হীনতা ও কাপট্য, সুদখোর মহাজনের কুরতা, গ্রাম্য দলাদলির কদর্যরূপ, কুসংস্কারের দাপট, তথাকথিত নিম্নবর্ণের মানুষের প্রতি উচ্চবর্ণের মানুষদের ঘৃণা ও অবজ্ঞা, সাধারণ মানুষদের কঠোর দারিদ্র্য ও নিত্য-অভাব—এই সব কয়টি দিকই শরৎ-সাহিত্যে প্রখর বাস্তবনিষ্ঠায় প্রতিফলিত। চাষী সমাজের হৃৎসবেদনার ব্যাপক চিত্র হয়ত তাতে পাওয়া যাবে না কিন্তু শরৎচন্দ্র যে-কয়টি চাষীর চরিত্র এঁকেছেন তার থেকেই বোঝা যায় এই সমাজের হৃৎসবেদনের প্রতি তাঁর কী নিবিড় সহানুভূতি ছিল। মহেশ গল্পটিকে এই খাতে সর্বাপেক্ষা প্রতিনিধিত্বমূলক রচনা মনে করা যেতে পারে।

লক্ষ্য করলে দেখা যায় শরৎচন্দ্র যে সব জমিদার বা জোতদার চরিত্র অঙ্কন করেছেন তাদের অধিকাংশই প্রোঢ়বয়সী, প্রজাপীড়ক, বঞ্চক; কেউ কেউ



কুক্ৰিয়াসত্ত, মদ্যপ, লম্পট। বক্ষিমচন্দ্রের উপন্যাসের জমিদারদের মত তাদের কেউই তরুণ নয়, নায়কোচিত গুণে বিভূষিত নয়, নায়ক নয়। উপন্যাসের মূল চরিত্রের মর্যাদা তাদের প্রায় কাউকেই দেওয়া হয়নি, অধিকাংশই পার্শ্ব-চরিত্র। দৃষ্টান্তস্বরূপ পল্লীসমাজ-এর বেণী ঘোষাল, পণ্ডিতমশাই-এর তারিণী মুখুজ্যে, শ্রীকান্ত তৃতীয় পর্বের কুশারী মহাশয়, বামুনের মেয়ের গোলক চাটুজ্যে, মহেশ গল্পের শিবচন্দ্র রায় প্রমুখের উল্লেখ করা যেতে পারে। দেনা-পাওনা উপন্যাসের জীবানন্দ চৌধুরী নায়ক বটে তবে বয়সে উত্তরযৌবন এবং সর্ববিধ কদাচারের একটি মূর্তিমান বিগ্রহ। বিরাজ-বৌ উপন্যাসের জমিদারনন্দন রাজেন্দ্র এবং শ্রীকান্ত প্রথম পর্বের কুমারস হেব নবীন যুবা তবে দুইয়ের কেউই আদর্শ চরিত্র নয়। এদের প্রথম জন পরস্ত্রীর প্রতি লোভার্ভ, দ্বিতীয় জন আমোদ-সন্ধানী। বক্ষিমচন্দ্রের কাল থেকে শরৎচন্দ্রের কালে বাংলাব জমিদারী ব্যবস্থা যে কতখানি ক্ষয়িস্থতার পথে অগ্রসর হয়েছে তার একটা হাদিস চরিত্রগুলির এই বিবর্তনের ছকের মধ্যে পাওয়া যেতে পারে। অর্থাৎ শরৎচন্দ্রের সময় জমিদারী ব্যবস্থা অনেক বেশী ঝুল হয়ে পড়েছে, তার ভিতর জরুর লক্ষণ প্রকট হয়ে উঠেছে। এরই পরিপ্রেক্ষিতে তিনি কৃষক-জাগরণের ছবি এঁকেছেন। হয়ত এ জাগরণকে যতটা ব্যাপকভাবে আঁকতে পারলে সামন্তবাদের বিরুদ্ধে প্রকট বিদ্রোহের আকার দেওয়া যেতে পারতো তাঁর গল্পে ও উপন্যাসে তেমনভাবে তাকে আঁকা হয়নি—মাত্র কয়েকটি রচনাতেই এই চিত্রণ সীমিত দেখা যায়। যথা, পল্লীসমাজ উপন্যাসে রমেশের নেতৃত্বে পীরপুরের মুসলমান চাষীদের জাগরণ, দেনা-পাওনা উপন্যাসে ষোড়শীর নেতৃত্বে ভূমি থেকে উৎখাত ভূমিজ কৃষক অধুনা লেঠেল সদারদের রুখে দাঁড়ানোর ঘটনা, শ্রীকান্ত তৃতীয় পর্বে বজ্রানন্দ স্বামীর গ্রামসংগঠন চেষ্টা, অসমাপ্ত উপন্যাস জাগরণ-এ অমরনাথের নেতৃত্বে কৃষকদের অহিংস অসহযোগ আন্দোলন, মহেশ ও অণাগীর স্বর্গ গল্পদ্বয়ে জমিদারী অত্যাচারের নিষ্করণ চিত্র ইত্যাদি। তাহলেও যতটা আঁকা হয়েছে তার মূল্যও বড় কম নয়। বাংলার গ্রামাঞ্চলে সামন্তবাদী শোষণের স্বরূপ বোঝাতে এ সব চিত্রায়ণ খুবই কার্যকর হয়েছে।

সামন্তবাদী শোষণের তিনটি হাতিয়ার—জমিদারী ভূমি-ব্যবস্থা, পুরোহিত-তন্ত্র ও সুদখোর-মহাজনী কারবার। এ তিনের ছবিই শরৎ-সাহিত্যে তুলে ধরা হয়েছে। শোষণের এই তিনটি হাতিয়ার একে অণের সঙ্গে ঘনিষ্ঠরূপে

যুক্ত। জমিদারী শোষণের কথা আগেই বলা হয়েছে, এবারে আর দুটির বিষয়ে কিছু বলা যেতে পারে।

ইতিহাসের বিবর্তনের ধারায় রাজ্যতন্ত্রের সঙ্গে বরাবরই যাজকতন্ত্রের ঘনিষ্ঠ সংযোগ দেখা যায়। পরবর্তীকালে তার সঙ্গে এসে যোগ দেয় বণিকতন্ত্র। বৃহত্তর সমাজ-প্রেক্ষাপট থেকে দৃষ্টি সংহরণ করে নিয়ে গ্রামের অনুষঙ্গে এই ত্রয়ী 'অণ্ডভ সম্পর্কে'র আদল খুঁজতে গেলে দেখতে পাবো তাদেরই ক্ষুদ্রে সংস্করণ রূপে দেখা দিয়েছে যথাক্রমে জমিদার, পুরোহিত ও মহাজন। প্রজাশোষণের ক্ষেত্রে এই তিন শক্তি একপ্রাণ, একদিল্। শরৎ-সাহিত্যে শাস্ত্রব্যবসায়ী পুরোহিতের হৃদয়হীনতার তথ্য জমিদারের সহযোগী ভূমিকার কয়েকটি বাস্তবসম্মত চিত্র পাওয়া যায়। যথা মহেশ গল্পের তর্করত্ন; পল্লীসমাজের ধর্মদাস চাটুজ্যে, গোবিন্দ গাঙ্গুলী, পরান হালদার এবং কতকাংশে ভৈরব আচার্য; দেনা-পাওনার শিরোমণি ঠাকুর, জনার্দন রায় প্রভৃতি। এঁরা একই সঙ্গে ধর্মব্যবসায়ীও বটে আবার সমাজপতিও বটে দুর্বলের দুর্বলতার সুযোগে ক্ষমতাবানের অনুকূলে সমাজের পাঁতি দিতে এঁরা ওস্তাদ। মেয়েদের দমিয়ে রাখতে এঁরা সব সময়ে শাস্ত্রের বিধান নিয়ে প্রস্তুত। কোন নারীর মনোভাবে কিংবা আচরণে স্বাতন্ত্র্যের এতটুকু চিহ্ন প্রকাশ পেয়েছে তো তাকে দাবিয়ে দেবার জন্য সমাজপতির দল সর্বশক্তি প্রয়োগে সদা তৎপর। প্রয়োজনে কারও মুনামর উণর ভিত্তিহীন কলঙ্ক লেপনে এঁদের জুড়ি দেখা যায় না।

একে রামে রক্ষা নেই সুগ্রীব দোসর। এদের সঙ্গে আবার হাত মিলিয়েছে মহাজনী সম্প্রদায়ের সুদখোরী কুরতা ও শাঠ্য। গরিবকে সর্বহারার পর্যায়ে ঠেলে দেবার জন্য এদের জারিজুরির অন্ত নেই—শোষণ ও বঞ্চনায় এরা সিদ্ধহস্ত। শরৎ-সাহিত্যে এই শ্রেণীর দুই-একটি পরিচিত চরিত্র হলো দেনা-পাওনা উপন্যাসের জনার্দন রায় ও বামুনের মেয়ের গোলক চাটুজ্যে। এঁদের জোত-জমার আত্মসংক্রান্তিক পরিষ্কারিতির মূলে আছে রায়ত-ঠকানো তেজারতি কারবার এবং সমশ্রেণীর আরও একাধিক কুক্রিয়া। ধর্মের ভড়ং দেখিয়ে সরল প্রজাদের সর্বনাশ সাধন তাঁদের অভ্যাস্ত কুক্রিয়াগুলির অগ্রতম। (অবশ্য সুদব্যবসায়ীর সত্যনিষ্ঠার একটি ব্যতিক্রমী দৃষ্টান্ত দেখানো হয়েছে একাদশী বৈরাগী গল্পটিতে।)

শরৎচন্দ্র যে কতখানি বাস্তবনিষ্ঠ সমাজসচেতন লেখক ছিলেন উপরের

তথ্যগুলির মধ্যে তার অসংশয় পরিচয় পাওয়া যায়। ইচ্ছা করেই তিনি সমাজের এই অবক্ষয়ের রূপ দেখিয়েছেন। গ্রামীণ সমাজের প্রকৃত মঙ্গলাকাজ্ঞা তাঁকে এ কাজে প্রবৃত্ত করিয়েছে, সে কথা বলাই বাহুল্য।

নারীসমাজের প্রতি শরৎচন্দ্রের বিশেষ পক্ষপাত ছিল, অনেকেই বলে থাকেন। কথাটা হয়ত মিথ্যে নয় কিন্তু এই পক্ষপাতিত্বের আসল কারণটি প্রায়শঃ তলিয়ে দেখা হয় না। নারী আমাদের সমাজে খুবই অত্যাচারিত ও শোষিত একটি শ্রেণী। পুরুষপ্রাধান্য-ভিত্তিক শ্রেণীবিভক্ত সমাজে নারী জাতিকে প্রলিটারিয়েট শ্রেণী বললেও অত্যাচারিত হয় না। সব রকম প্রলিটারিয়েটের মধ্যে নারাই আদি-প্রলিটারিয়েট। এই পুরুষশাসিত সমাজে নারীকে হয় ভোগের উপকরণ নয় তো সেবা আশ্রয়ের যন্ত্র রূপে, প্রায়শঃ উভয় ভূমিকায় একসঙ্গে, ব্যবহার করা হয়। শাস্ত্রের কারচুপির সাহায্যে কখনও কখনও তাঁতে দেবীত্বের মহিমা আরোপ করা হয় বটে কিন্তু প্রায়ই সেটা মেয়েদের মন ভুলিয়ে পুরুষের শ্রেণী-স্বার্থ হাঁসিল করবার কৌশল মাত্র। শাস্ত্র ভাবে ভাবিত বাংলার এই তাত্ত্বিক সমাজে দেবীর পূজাটা আসলে নারীকে প্রতারণা করার একটা মন্ত ছিল। মাতৃভজনা নয় তো নারীকে চিরকালের মত দাসীত্বের শৃঙ্খলে আবদ্ধ রাখার ধর্মীয় আয়োজন মাত্র।

শরৎচন্দ্র ভারতীয় সমাজের পুরুষ-নারী সম্পর্কের এই মূলতত্ত্বটি ভাল করে বুঝছিলেন বলেই নারীচরিত্র এত দরদ ও মমতা দিয়ে এঁকেছেন। গভীর মানবপ্রেমিক এই শিল্পী তাঁর চিত্রের সমস্ত আবেগ ঢেলে নারীচরিত্র-গুলিকে রূপায়িত করেছেন তাঁর গল্পে ও উপন্যাসে। শুদ্ধ প্রথাবদ্ধ চরিত্রই আঁকেননি, কতকগুলি বিদ্রোহিণী চরিত্রও এঁকেছেন। প্রথাবদ্ধ চরিত্রগুলি এঁকেছেন নারীর অন্তর্নিহিত স্নেহ-প্রেম-সেবা-ভালবাসা-সন্তানবাৎসল্য জাতীয় কতকগুলি মৌলিক নারীমূলভ গুণের মহিমা পরিস্ফুটনের জন্য। অগ্রপক্ষ বিদ্রোহিণী চরিত্রগুলি এঁকেছেন নারীর আগ্রহাতন্ত্র্যের কামনাকে প্রতিষ্ঠা দেবার জন্য। প্রথম সারির নারীচরিত্রের উদাহরণ—শুভদা, বিরাজ, সরযু, কুমুম, পার্বতী, মাধবী, রমা, নারায়ণী, অন্নপূর্ণা, বিন্দু, অন্নদাদিদি, হেমাজিনী, সোদামিনী, সুরবালা, মৃণাল প্রভৃতি ; দ্বিতীয় সারির নারীচরিত্রের দৃষ্টান্ত—অভয়া, সুনন্দা, কিরণময়ী, সুমিত্রা, কমল, সবিতা প্রভৃতি। এ ভিন্ন

কয়েকটি স্বাতন্ত্র্যময়ী পতিতা চরিত্র ও তাঁর লেখনীমুখে বিশেষ ব্যক্তিমাহাত্ম্যে প্রকাশ পেয়েছে। যেমন বিজলী, চন্দ্রমুখী, সাবিদ্রী, রাজলক্ষ্মী প্রভৃতি। পতিতা শ্রেণী, নামেই প্রকাশ, নারী সমাজের সবচেয়ে অধঃপতিত ও নিগৃহীত অংশ। সুতরাং স্বভাবতঃই এই অনাদৃত শ্রেণীর দুঃখ-বেদনার প্রতি এই মানবদরদী শিল্পীর সবটুকু সহানুভূতি সবেগে খাতিত হয়েছে। পরিবেশের কদর্যতার মধ্যেও যে মনুষ্যত্বের মহিমা পাঁকের ভিতর পদ্মফুলের মত বিকাশ লাভ করতে পারে, এইটি দেখানোই শরৎচন্দ্রের পতিতা-চিত্রায়ণের উদ্দেশ্য ছিল।

লক্ষ্য করলে দেখা যায় পাতিব্রত, মাতৃত্ব, সেবা-পরায়ণতা, স্নেহ-বাৎসল্য প্রভৃতি মূল্যবোধগুলিকে শরৎচন্দ্র খুব বড় করে দেখালেও যে-সমাজব্যবস্থার আওতায় এগুলি আমাদের দেশে স্মৃতিপ্রাপ্ত হয়েছে তাকে কিন্তু তিনি কোথাও সমর্থন করেননি, বরং তার সমালোচনাই করেছেন। হয়ত প্রচ্ছন্ন সমালোচনা, তবু সেই সমালোচনায় জোর আছে। যেমন, হিন্দু বিবাহরীতির গতানুগতিকত্ব ও অবিচার বারবার তাঁর আক্রমণের লক্ষ্য হয়েছে (সরযু, কুসুম, হেম, ষোড়শী, অন্নদাদিদি, রাজলক্ষ্মী, মৃণাল, অন্না, কিরণময়ী প্রভৃতি চরিত্রগুলিকে এ কথার প্রমাণরূপে দাঁড় করানো যেতে পারে); যৌথ পরিবার প্রথার মাধুর্যের সঙ্গে সঙ্গে তার ভাঙন-প্রবণতার দিকটাও তুলে ধরেছেন (বিন্দুর ছেলে, নিষ্কৃতি, বৈকুণ্ঠের উইল প্রভৃতি গল্পোপগ্ধাস স্মরণীয়); বিধবার অসহায়ত্বকেও তিনি সম্যক্ ভাষা দিয়েছেন (পথনির্দেশ, বড়দিদি, পল্লীসমাজ এবং বামুনের মেয়ের সংশ্লিষ্ট চরিত্রগুলি দ্রষ্টব্য), ইত্যাদি। তিনি হয়ত সব সময় সমাধানের পথ বাতলাতে পারেননি, তা বলে সমালোচনা থেকে নিবৃত্ত থাকেননি।

সাম্রাজ্যবাদ বিরোধিতার চিত্র শরৎ-সাহিত্যে প্রথম দিকে তেমন ফোটেনি, জীবনের শেষের দিকে এ বিষয়ে তিনি বিশেষভাবে সচেতন হয়েছিলেন। প্রথম দিকের গল্পোপগ্ধাসগুলির মধ্যে যে-কালকে বর্ণনা করা হয়েছে তার সময়-সীমা মোটামুটি ১৮৯০ থেকে ১৯১০ সালের মধ্যে বিস্তৃত; অথচ আশ্চর্য এই যে, তাঁদের পটভূমিকায় কোথাও ভারতীয় জাতীয় কংগ্রেসের উল্লেখ নেই, বঙ্গভঙ্গের কথা নেই, এমন কি বিপ্লবীদের কার্যকলাপও অনুল্লিখিত। এটা শরৎচন্দ্রের প্রাথমিক পর্বের রচনার একটা মস্ত বড় ক্রটি। এই অধ্যায়ের রচনায় সমাজ যতটা প্রাধান্য পেয়েছে রাজনীতি তার সিকির-সিকি প্রাধান্যও

পায়নি। বলতে গেলে রাজনীতি কোন জায়গাই পায়নি তাঁর এই পার্বের সৃষ্টি-পরিকল্পনার ভিতর।

শরৎচন্দ্র এই ক্রটির শোধন করেছেন উত্তর-জীবনে এবং সুদে-আসলে ক্রটিটির খেসারত দিয়েছেন। প্রমাণ ১৯২৬ সালে প্রকাশিত পথের দাবী উপন্যাস। ভারতবর্ষে ইংরেজ শাসনের নিষ্ঠুরতা ও লুণ্ঠন-তৎপরতার বিরুদ্ধে কী সীমাহীন ঘৃণাই না প্রকাশিত হয়েছে উপন্যাসের ছত্রে ছত্রে। বইখানা একসময়ে তাঁর জ্বালাময় বক্তব্যের জঘ্য পাঠক সমাজের উপর গভীর প্রভাব বিস্তার করেছিল; নিষ্ঠাবান হিন্দুর চে খে যেমন বেদগ্রন্থ, খ্রিস্টীয়ানের চোখে বাইবেল, মুসলমানের চোখে কোরান, তেমনি এই বই একদা বিপ্লবীদের হাতে হাতে ফিরেছে এক অপরিহার্য মহামূল্যবান পুস্তক রূপে। ইংরেজ অতিচতুর জাত, এই বইয়ের বাধাবন্ধগীন প্রচারের ফল কতদূর গড়াতে পারে তা বুঝেছিল, তাই বই প্রকাশের সঙ্গে সঙ্গেই বইটিকে বাজেয়াপ্ত করে দিয়ে তার প্রতি পাবলিক মর্যাদা প্রদর্শন করেছিল। পরাধীন দেশে রাজনিগ্রহ নিগৃহীতের মর্যাদার দ্যোতক, এই বইখানির ভাগ্যেও এমনি রাজটিকা জুটেছিল।

পথের দাবী উপন্যাসের পাঠ্যবস্তু সম্পর্কে এখানে বিস্তৃত আলোচনার অবকাশ নেই। এ বিষয়ে বাংলা ভাষায় বহু আলোচনা হয়েছে, আরও হবে। এই বইয়েও উপন্যাসটির বিস্তৃত আলোচনা করা হয়েছে। বইয়ের 'রাজনৈতিক চিন্তা' পরিচ্ছেদ দ্রষ্টব্য।

সর্বশেষে শরৎচন্দ্রের ভাষা। এ এক আশ্চর্য সৃষ্টি। স্টাইল জিনিসটো নাকি ব্যক্তিত্বের বহিঃপ্রক্ষেপ। একথা যে অক্ষরে অক্ষরে সত্য তা শরৎচন্দ্রের ভাষাভঙ্গীর দিকে তাকালেই বোঝা যায়। তাঁর ভাষা তাঁর ব্যক্তিত্বের সৌগন্ধ্যে ভরপুর, দু-চার লাইন পড়লেই বুঝতে বিন্দুমাত্র অসুবিধা হয় না এ কার রচনা। মানুষটাকে যেন স্পর্শ করা যায় তাঁর ভাষার মধ্যে।

স্টাইলের ব্যক্তিক বৈশিষ্ট্য সব লেখকের লেখা সম্বন্ধেই অল্পবিস্তর সমভাবে প্রযোজ্য। কিন্তু এ ছাড়াও শরৎচন্দ্রের ভাষার অণু বৈশিষ্ট্য আছে। তিনি মূলতঃ গ্রামীণ জীবনের শিল্পী হলেও যে-ভাষার আশ্রয়ে ওই শিল্পকে রূপ দিয়েছেন তার চালটি সম্পূর্ণ নাগরিক, দরবারী, বৈদম্ব্যসম্মিত। 'কালচার্ড' স্টাইলে তিনি গ্রামের কথা লিখেছেন। তাঁর ভাষা-প্রয়োগ সচেতন, শব্দ-

বাবহার গ্রহণ-বর্জন-নির্বাচনপন্থী, শব্দের বিন্ধ্যাসের ধরনে আছে সঙ্গীতময়তা। তাঁর ভাষার চালটি এতই পরিমার্জিত ও পরিশীলিত যে, কখনও কখনও মনে হয় তিনি বিজ্ঞানীর যথাযথ্যপ্রীতি ও বাহুল্য পরিহারের অভ্যাসের দ্বারা চালিত হয়ে ভাষাকে যতদূর সম্ভব ছিমছাম, পরিপাটি ও স্বল্পবাক্য করবার চেষ্টা করেছেন। গ্রামের লোকজীবনের চিত্রায়ণে যেন এই ‘সফিস্টিকেটেড’ ভাষার ভোলটি মানায় না, গ্রামশিল্পীসুলভ অশিক্ষিতপটুত্বের সামান্যতম প্রভাবও এর ভিতর খুঁজে পাওয়া যাবে না।

কিন্তু একটু খতিয়ে দেখলে দেখা যায়, এই ভাষাই শরৎচন্দ্রের শ্রেষ্ঠ রক্ষাকবচ হয়েছে। মানুষটি ছিলেন অসাধারণ আবেগময়; ভাবাবেগের তোড়ে তাঁর ভেসে যাওয়ার আশঙ্কা ছিল পদে পদে, এই ভাষাই তাঁকে বারংবার মেলোড্রামার কবল থেকে রক্ষা করেছে। ‘স্টাইল’ ও ‘ভাষাশিল্প’ পরিচ্ছেদদ্বয় দ্রষ্টব্য।



গ্রন্থকারের আর একখানি সমালোচনার বই

## সমকালীন সাহিত্য

সমসাময়িক বাংলা সাহিত্যের নানা বিষয়ের আলোচনা ।  
অন্যান্য রচনার মধ্যে আছে রবীন্দ্রনাথের উপর  
দুটি প্রবন্ধ ও দুটি বিয়োগ-নিবন্ধ—প্রথম চৌধুরী ও  
মানিক বন্দ্যোপাধ্যায় । কয়েকটি রচনায় আছে  
জীবনঘনিষ্ঠ সাহিত্য বলতে কী বোঝায় তার নিপুণ  
বিশ্লেষণ । সাহিত্যের ছাত্রদের অবশ্য পাঠ্য ।



---

এ. মুখার্জী অ্যান্ড কোং প্রাইভেট লিঃ

২, বঙ্কিম চ্যাটার্জী স্ট্রীট, কলিকাতা-১২